


UNIVERSITY OF TORONTO



3 1761 00004226 7




3









T. LIVII PATAVINI  
HISTORIARUM  
LIBRI

QUI SUPERSUNT OMNES  
CUM INTEGRIS  
JOANNIS FREINSHEMII  
SUPPLEMENTIS



VOLUMEN NONUM

BIPONTI  
EX TYPOGRAPHIA SOCIETATIS

MDCCCCLXXXVI

PEWLOWITZ

bei

PRERAU

FA

6402

A2

1702

1.7

887656

# JOANNIS FREINSHEMII SUPPLEMENTORUM LIVIANORUM

LIBER XXXVII.

IN LOCUM LIB. LXXII LIVIANI.

---

## E P I T O M E

LIBRI SEPTUAGESIMI SECUNDI.

*Italici populi defecerunt, Picentes, Vestini, Marſi, Peligni, Marrucini, Samnites, Lucani, initio belli a Picentibus moti. Q. Servilius proconſul in oppido Aſculo cum omnibus civibus Romanis, qui in eo oppido erant, occiſus eſt. ſaga populus ſumſit. Ser. Galba, a Lucanis comprehenſus, unius feminæ opera, ad quam devertebatur, captivitate exemptus eſt. Æſernia & Alba coloniæ ab Italicis obſeſſæ ſunt. Auxilia deinde Latini nominis externarumque gentium miſſa populo Romano, & expeditiones invicem expugnationeſque urbium referuntur.*

**I.** **B**ELLUM Italicum, quamquam ſociale vocari conſueverit, ſi verum ſpectemus, ſimillimum civili fuit, cum ſanguine, locis, belli denique ac pacis pleraque communione mixtæ unitæque populo Romano nationes, repente hoſtilia induerent, aſterioribus odiis, ut ſolet in diſſen-

*T. Livii Vol. IX.*

A

sione conjunctissimorum, quam si cum quantumvis barbara gente susceptum certamen foret. Igitur intra paucos deinceps annos plusquam trecenta millia juventutis Italicæ bello absumta traduntur. Multi enim validique populi defecerant, postquam, initio a Picentibus orto, civium Romanorum Asculi effusus sanguis est. Ex iis, quos ad explorandum, quæ a focis haberent, Roma missos fuisse diximus, quidam adolescentem Asculanum duci Corfinium viderat, ut ibi, sicut communiter convenerat, pro sua civitate obfes foret.

II. Id cum Q. Servilio, qui in ea parte Italiæ proconsule agebat, nuntiatum esset, propere accurrit Asculum, ut incipienti adhuc malo occurreret. Ceterum nec opprimere morbum potuit, & sua cum pernicie supra modum exulceravit. Ludi tum forte agebantur, res una omnium maximos cogere cœtus solita. Erant ea omnino tempora, iique hominum animi, ut lenissima quæque remedia vix laturos viderentur; cum Servilius, quasi mancipia conviciis minisque ferociter increpat: *Pro Juppiter, inquit, Dii-que ceteri, qui Romanum Capitolium ideo nimirum incolitis, quod ibi caput rerum terrarumque omnium, sedemque sicut numinum vestrorum, sic imperii esse voluistis, quod tantum admisimus nefas, ut hæc audire, hæc videre tam sæda ac pulenda cogeretis!*

III. Eone deveniri indignitatis oportuit, ut Itali nos contemnerent, & quos potentissimi reges formidant, clientibus nostris contemptui essemus? Jam igitur, si Diis placet, regimen rerum Asculanus capeffet, & pro Romanis Patribus fata gentium regumque Picentes temperabunt. Id vero facinus Dii prohibeant, aut si tam nefanda permittere decreverunt, prius quidquid usquam est Romani nominis, intemeratum adhuc impollutumque pereat! Mihi quidem satius fuerit, vel mille mortes perferre, quam hanc tantam subire ignominiam, ut meo suffragio jus Romanum ad dedititios nostros transeat. Vestrum autem furorem mirari satis nequeo, Asculani, quos non populi Romani

*majestas ultra, non vestrarum virium reputatio, ne prioris quidem avi memoria deterret, ne tam pernicioſa inciperetis.*

IV. *Cum omnibus Italiae populis majores noſtri bellaverunt; nec par omnibus aut virtus, aut reſiſtendi ſpatium fuit. nemo tamen omnium æque facile, atque Picentes, ſubaſti ſunt. Uno prælio viſti, continuo ſeſe P. Sempronio, & primi omnium Aſculani, dediderunt. Vos igitur, qui tam levi momento ſpem libertatis abjicere ſoletis, quibus præſtigiis dementati ad rebellandum vultis eſſe principes? Non tulerunt iſta vociferantem Aſculani, tanto furore exacerbati, ut quidquid deprehendi civium Romanorum in oppido potuit, cum ipſo proconſule, legatoque ejus Fontejo, trucidaretur, bonis omnium direptis. Ab hoc initio, cum ultra diſſimulandi non eſſet locus, per Italiae populos & urbes ſigna cecinerunt, diſcurrente paſſim Pompædio, quem præcipuam iſtius belli faciem fuiſſe conſentitur.*

V. Hic igitur, cum primos omnium Marſos ſuos eduxiſſet, nomen toti bello fecit, ut a plerisque *Marſicum* appelletur. His in urbe cognitis, *tumultum eſſe* decretum; juſtitium ediſtum; ſaga populus ſumſit. Interea Cn. Pompejo prætori negotium ſenatus dederat, ut cum exercitu Aſculum accederet, initia belli oppreſſurus. Ille ſtrenue proſectus, Aſculanos ad ſatiſfaciendum populo Romano, tradendoſque defectionis auctores cohortatus, renuentibus vim intentat, eduſtaſque copias oppugnationi paratas habet. Oppidani, de induſtria metum ſimulantes, ut incautos invaderent, juventutem intra muros inſtructam tenent: paucos homines, eoſque magnam partem valetudine aut ævo inutiles, in mœnibus locant.

VI. Idcirco Romani, proſecto diſmiſſos alio juniores arbitrati, remque ſibi tantum cum parvo debiliſſimo numero fore, contemptim ſuggrediuntur. Dam alii ſuffodere muros, alii ſuperare ſcalis tendunt, & in hanc unam rem inten-

§ IV. Orol. 5, 17. Cic. pro Fontejo. c. 14. Flor. 3, 18. Liv. Epit. 76. Strab. l. 5. Vellej. 2, 16. § V. Orol. 5, 18. Front. 3, 17.

tis omnis periculi metus & cautio abest; subito apertis portis, fit Aſculanorum acerrima eruptio, Romanique, multis deſideratis, a muro rejiciuntur. Inter hos Italiæ motus, exſpectationemque longe graviſſimi belli L. Julius Cæſar, P. Rutilius L. F. L. N. Lupus conſulatum Romæ iniverant (Cæſari multis Appiani locis pro Lucio prænomen Sexti additur) quo anno ſol iubenti circulo circumdatus apparuit, magno apud animos aliis jam ante cauſis ſollicitos metu: eodemque mox inſigniter aucto propter Metellæ Cæciliæ ſomnium, Q. Balearici filiæ. Junonem Soſpitam, quod templa ſua immunde haberentur, profugientem, ſuis precibus ægre revocatam eſſe per quietem viderat.

VII. Eam rem ſenatus minime negligendam eſſe cenſuit, quod pacem numinis, cui ſalutaris ineſſet appellatio, & cui conſules omnes facere neceſſum eſſet, inprimis ad tutelam reipublicæ pertinere credebat. Igitur de ſententia Patrum ſupplicationibus habitis, L. Julius conſul templum reſecit: adeo quidem negligenter habitum, ut, præter alias fordes, ſub ipſo ſimulacro Dææ canis catulos eniſa reperi-retur. Metellæ negotium datum (quod eam præ ceteris Junoni gratam eſſe appareret) *ut græge matronarum ſordidis obſcæniſque corporis coinquatum miniſteriis, religioſe commundato, priſtino ſplendori omnia reſtitueret.* Hujus mulieris inſomnium quamquam mirifice cum re conveniſſe videretur, fuerunt tamen Romæ, qui nihil ſomniis tribuendum crederent: inter quos & L. Siſenna fuit, eorundem temporum rerumque celebris ſcriptor.

VIII. At ſenatus a religionibus ad belli molem omni cura converſa, Samnium & Marſi provinciæ conſulibus decretæ. Marſi P. Rutilio evenerunt; L. Julio Samnium. Hi præcipui rebellantium populi erant. multi enim præterea defecerant. Picentes Veſtinique, & cum Pelignis Marrucini, & Apuli. tum Ferentani, Hirpini, Pompejani, denique totus ille tractus Italiæ, qui a Liri fluvio ad ma-

§ VI. Plin. 2. 30. Jul. Obſeq. Cic. de divinat. § VII. Cic. pro Muræn. c. 41. & de divinat. Jul. Obſeq.



ris Adriatici sinum intimum porrigitur. Consules hi Q. Pompædium Silonem, C. Aponium Murilum legerant. pro Aponio quidam *Papium* nominant. Prætores, e Marrucinis Herium Asinium, e Marfis C. Vettium Catonem, e Lucanis M. Lamponium, Ti. Cleptium reperio.

IX. Habuerunt & Samnites Marium Egnatium & Trebatium, & Pontium Telefinum. Sed C. Judacilium five Apuli, five Picentes, (utrumque enim traditum est) & Peligni A. Cluentium. Præter hos clari sociorum duces, non adjecto, quorum quisque populorum fuerit, nominantur T. Afranius, P. Ventidius, C. Pontidius, P. Præfentejus, Titus Herennius. præterea Juventius quidam & Obfidius, & Capuanus Gutta. quorum alii statim ab initio prætores sunt creati: ceteros vel in abeuntium locum factos, vel in occisorum suffectos intelligimus. Sub horum imperio urbium insignium præfecti multi, cum suo quisque præsidio, erant. Igitur contra hos tam peritos militiæ & impigros viros cum instaret dimicatio, diligenter curatum, ut qui tunc erant, quique postea facti sunt, consulibus quam præstantissimi legati adderentur.

X. Sed tum quidem Rutilio Cn. Pompejus, Magni pater, Q. Cæpio, C. Perperna, C. Marius, Valerius Messalla, proconsulari omnes potestate, adjutores dati: Cæsari P. Lentulus frater consulis uterinus, T. Didius, P. Licinius Crassus, L. Cornelius Sulla, M. Marcellus. Præterea M. Cornutus, L. Cinna, Q. Catulus, Q. Metellus, itemque P. Sulpicius, & M. Antonius legati bello Marfico fuisse memorantur. L. Calpurnius L. F. Piso armis faciendis præfectus est. Sed Italici populi, priusquam bellum inciperent, legatos in urbem miserunt. Eorum, preces atque minas ita miscentium, ut malle pacem, plus confidere armis viderentur, talis ferme oratio fuit. *Qui simus, unde*

§ VIII. Memn. ap. Phot. Appian. Diodor. Liv. Epit. Senec. de benefic. Flor. Oros. Macrob. Saturnal. 1, 2. Vellej. Eutrop. § IX. Cic. pro Fontej. c. 15. & in Brut. c. 89. Diodor. ap. Valer. Appian.

veniamus, Patres conscripti, neque vos ignoratis; & nobis nota templa, familiares vultus occurrunt: affines consanguineosque videmus, quibuscum domi militiæque magnus nobis usus, & conjunctissima necessitudo fuit.

XI. Inter homines tot nominibus invicem devinctos, & proloqui paulo duriora, & audire juxta grave est. Sed mandata nimirum accepimus, quæ cum fide perferenda sunt, rationem Italiæ toti reddituris. Ne enim a nostris tantummodo civitatibus missos credideritis: eadem hic uti causa Italorum omnium, ita voluntas est. Et ne, ut in repentinis consiliis facilem sedatu motum imaginemini, jurejurando, & obsidibus missis, usque eo devincti sumus, ut eundem omnes casum experiri necessum sit. Igitur & senatum communiter legimus, & consilio publico constituimus temporariam sedem. creavimus interea magistratus, legiones conscripsimus, arma, comineatum, pecuniam coegimus, eo omnia animo, ut prius cum omnibus nostris, quod Dii avertant omen, funditus intereamus, quam diutius defraudari nos jure nostro patiamur.

XII. Neque nova hæc nobis incidit, sed a patribus avisque transmissa & transdita est cogitatio. jam olim indigne ferimus, Romani, quod rebus omnibus pares, numero meritisque superiores, quippe tanto jam tempore duplicem numerum militum ad omnia bella præbuimus, ita negligimur a vobis atque contemnimur. Igitur quæ nunc de communicando sociis jure, tanquam inauditiæ audaciæ verba averfamini, ea jam ante ducentos annos in curia vestra sonverunt. & quamquam eo tempore, cum paucis Italiæ populis sociis uteremini, mediocres eorum opes fregistis, subinde tamen postea querelæ auditiæ sunt, & interdum confilia capta. & ne longius abeamus, patrum nostrorum memoria, quid mentis Italiæ fuerit, plenissime effectis experti, nisi rem nondum maturam Fregellanorum festinatio prodi tisset.

XIII. Hodie vero non unius oppidi, ne paucarum quidem civitatum, sed Italiæ legatos auditis, Deorum hominumque obtestantes fidem, ut aliquando temperetis ab injuria, & ad utilita-

*tem tum ceteræ Italiæ, tum etiam vestram vestrique imperii urbisque salutem respiciatis, quando res in eum statum devenit, ut una hæc vobis sit in præsentia deliberatio, utrumne cives sitis nos Italos, an vero hostes habituri. Neque est, ut ad hæc verba tumultuemini, Patres. liberam, sed veram vocem audistis, neque indignam aut his, quorum nomine emissa est, aut his, apud quos prolata. Quid enim in nobis est, cujus communione quasi pollui credatis vestram civitatem, Romani? Natos in eadem Italia, iisdem institutos eductosque moribus & artibus, pari usu militiæ, qui & pro vobis tam diu feliciter pugnâvimus, &, si necessum sit (quod abominamur) contra vos pugnaturi sumus, non anteponetis Mancipiis vestris, e quibus jure manumissionis cives Romanos, quisquis voluit, fecit?*

XIV. *Fieri non potest, ut hanc indignitatem qui abjicere possunt, diutius ferant. ne natura quidem rerum finit, ut in æquali virtutis atque libertatis indole, alii dominantur perpetuo, alii serviant: & qui vim facere conati sunt, neque tranquillum imperium unquam, neque certum diu habuerunt. A majoribus vestris, & hujus urbis frequenti seditione discite, quam sit difficile, adversus viros & armatos, simul & securitatem suam, & erepta aliis jura tueri. Quam pertinaciter olim patricii vestri, quorum tum in manu erant omnia, repugnarunt, ne tribuni plebis crearentur. creati sunt: eorumque potestas in tantum evaluit, ut nobilissimo cuique potentissimoque maxime formidabilis esset. Iterum deinde, per speciem decemviratus obtinuerunt tyrannidem: illa quoque cum pernicie sua quam cito sunt dejecti!*

XV. *Matrimonia plebejorum, tanquam rem miseram & pudendam, cum essent vehementissime aversati, postremo concedere coacti sunt. Plebejos ab honoribus, sacerdotiis, magistratibus diu repulerunt: sed postquam illi carere ultra jure, quod se mereri sentiebant, noluerunt, id quoque cum illis communicatum est. Quod igitur tenuis tum & inops illa plebecula, illa ex variis Italiæ partibus collecta colluvies, obtinere potuit, id huic Italiæ pernegabitis, Romani? quid enim in petitione nostra vel iniquum jure, vel exemplo sædum, vel ad famam dedecorum inest? Quam multæ fuerunt florentissimæ nostræ civitates, priusquam Roma conderetur?*

*quanta ubique principum nobilitas, qui familiarum splendor? sed neque virium opumve publicarum privatarumque pœnitet.*

XVI. *Quid deinde postulamus? ut pares vobis, quemadmodum sumus, ita habeamur. Hæcne tam impudens postulatio, tamque contumeliosa est & nefaria, ut potius omnia præfenti exponere periculo, vastare atque urere Italiam, in eundem casum colonias vestras urbemque ipsam permittere, denique cælum (quod ajunt) terramque miscere, quam hæc concedere oporteat? Per hæc omnia, quæ nominavimus, & per cuncta, quæ his continentur pietatis affectusque vocabula, nolite confarguineos populos, quorum deberetis amare concordiam, parricidiali bello committere! nolite vos nosque in eam adigere necessitatem, ut pro hostili sanguine cognatum hauriamus: oppida, fana, domus, quæ majorum utrinque nostrorum manibus condita sunt, nostris diruantur: pulcherrimum, quod unquam fuit, imperium suas intra ruinas sepeliatur!*

XVII. *Nec enim nescire vos, aut negligere arbitramur, quanta cupiditate externi reges nationesque, quibus jam olim prægrave videtur hoc imperium, hanc velut a Diis oblatam occasionem sint arrepturi. Antiquissimis populi Romani monumentis traditum accepimus, paucas a Romulo raptas Sabinorum mulieres, cum in media urbe inde patres suos fratresque, hinc maritos exitiabili prælio dimicare cernerent, interventu suo precibusque infestas diremissee acies, recipiendisque in civitatem Sabinis, perpetuæ concordiæ stabilivisse pignus. Idem nunc neque paucas matronas orare, sed infinita millia filiarum sororumque nostrarum, quas in matrimonio habetis, vestrarum iidem, quas nobis elocastis, credite. neque majori, quam tum, pretio redemeritis pacem. accipite in civitatem veteres socios, veteres cognatos vestros, cum optimo quoque pietate in hanc patriam certaturos.*

XVIII. *Hoc non modo nostri principes populique contendunt; sed omnes ferme, quæ sunt per Italiam, coloniæ civium Romanorum, plebis etiam urbanæ pars melior, ac quod inter vos sapientia & amore patriæ primum est: adeoque, si verum amamus, jam præjudicatum est a majori parte Romani nominis; nec ferme, nisi pauci maligni & invidi, & ab his deinde aliorum*

*decepta multitudo repugnat. Horum pravitate effectum est, ut res olim agitata perfici nequiverit, eoque jam deducta sit loci, ut, nisi vestra prudentia obsiterit, Patres conscripti, propediem longe atrocius sensura bellum sit Italia, quam aut Pyrrhus olim, aut postea Carthaginenses intulerunt.*

*XIX. Horum infelicibus nefandisque artibus & Gracchi duo, & nuper clarissimus juvenis, & cui pares Romana civitas per paucos tulit, in sacrosancto magistratu occisus est. Ab iisdem, quo spes omnis impetrandi iusta sociis vestris semel eriperetur, nefaria lex excogitata est, per quam, ne cui dubium foret, quales illi cives pati nescirent, sanctissimi amplissimiue viri, assertores amplificatoresque hujus imperii, ornamenta urbis ac senatus, exilio multati sunt: ceteris, ut quis virtute atque dignitate præcellit, idem periculum, nobis apertum bellum denuntiatur. Sed ne Juppiter Diique ceteri sirint, ut precibus nostris, benignitate vestra, salute omnium hæc superior sit factio: & plus paucorum importunitas ad profligandam Italiæ pacem, quam ad conservandam confirmandamque ceterorum virtus & benevolentia possit.*

*XX. Scilicet horum imperium perpetuo feremus socii, qui tam insolenter potestatem suam exercent in cives suos, & quos æquo secum jure esse, licet factis negent, ore coguntur confiteri. Et quoniam ita se res habet, ut non eadem omnium Romanorum sit sententia, sed diversis factionibus dividatur civitas, nos etiam orationem nostram dividemus. Et vos quidem, Patres conscripti, & quidquid in civitate sanum est, his manibus ad genua vestra protensis oramus & obtestamur, ut aliquando consanguineorum vestrorum, ut vestri etiam, uxorū liberorumque vestrorum, quibus, quod exspectamus responsum, aut fidam securitatem, aut perpetuam sollicitudinem, & quæ dicere nolumus, allaturum est, misereamini: sociosque vestros, quorum fidem virtutemque semper probavistis, bene de hac civitate meritos, bene merituos, ætliore vobiscum jure copuletis. ita rem non indignam sapientia vestra, urbi autem totique Italiæ salutarem feceritis: & a posteris etiam optimæ sententiæ auctores celebrabimini.*

*XXI. Si quis autem est adeo juris omnis & æquitatis ho-*

*flis, ut servire sibi postulet viros ad imperium natos, is sibi, & si qui præterea eadem superbia & perversa aget, hoc ab universa Italia dictum putet: Viri sumus, arma habemus: virtute, disciplina, scientia rei militaris pares; causa & numero superiores sumus. jus ejus civitatis petimus, cujus imperium nostro auxilio partum, auctum, servatum est. quæ invidia est, cum laborum atque periculorum partem majorem tulerimus, si juris & præmiorum saltem æquam efflagitamus? Cives, si vultis, habebitis optimos, vestrique & urbis amantissimos: hostile non modo factum omne, sed etiam nomen detestamur: servos tamen sub nomine sociorum ultra non habebitis. sine quibus nec parare tantas potuistis opes, nec tueri quasitas potestis, iis imperare velle desinite.*

XXII. Vix perorare legati potuerunt: tantus audiendi talia dolor fuit, tantaque impatientia. multorum deinde simul voces auditæ increpantium, ominantiumque, *ita demum feliciter eventura sociis, quæ agerent, si Latinis olim, si Campanis eadem superbia bene cessisset.* Idcirco & senatus nomine responsum animose est: *Ubi pœnitentiam suam socii approbassent, posse iterum de iisdem rebus legatos mittere: de cetero, priusquam satisfactum senatui populoque Romano esset, mittendi veniam non fore.* Hæc ubi renunciata legatio est, passim totis viribus bellum instrui, delectus agi, & præter eas copias, quas suis quisque tuendis finibus populus paraverat, in commune exercitus, peditum equitumque ad millia centum, conscribi cœpit.

XXIII. Neque minores Romanis apparatus erant. E quibus, quod urbi custodiendæ satis visum erat, retento, ceteræ copię consulibus legatisque sunt traditæ: nam ut in magno & intestino tumultu ambo simul consules votis nuncupatis paludati profecti sunt. Interea diversis Italiæ locis cives Romani, præsertim qui in dignitate aliqua erant, trucidabantur: vulgo mancipiisque vita ea lege dabatur, *ut sub signis sociorum militarent.* Præ ceteris notata Picentum immanitas fuit, qui barbaro more multos excrucia-

runt: ne in populares quidem mitiori rabie, si qui contra Romanos arma capere detrectarent. nec enim viros tantum, in conspectum suorum productos, omni genere contumeliarum affligebant; sed matronis etiam capilli cum ipsa simul cute avellebantur.

XXIV. Pinnenfium (in Vestinis id oppidum hodieque est) nescio quo casu excepti a sociis liberi fuerant. Eos rebellium agmen, ad mœnia Pinnæ deductos, quo parentes consanguineosque misericordia carissimorum pignorum ad defectionem impellerent, postquam id inceptum frustra esse apparebat, ante ora suorum crudeliter interfecit. His & talibus in facinoribus multa Cilicis cujusdam archipiratae opera erat, quem, ob frequentia maleficia & homicidia a Romanis Asculi in custodia habitum, Picentes initio defectionis vinculis exemerant. Is ergo, quasi pro meritis cujusque gratiam relaturus, collecta perditorum hominum manu, pro liberatoribus acriter, in Romanos infenso animo militabat, & agros, vicos, oppida rebellibus accedere renuentium, latrociniis a puero exercitus, supra ceterorum furorem incendiis cædibusque pervastabat.

XXV. Lucani Ser. Sulpicium Galbam comprehenderant: sed ille unius mulieris opera, ad quam divertebatur, captivitatem evasit. Multa tum florentissima longæ pacis bonis oppida fœde vastata. Oriculum in Umbris, Fæsolas in Tuscis, Carseolos Æquicolanorum, & in Campania Nuceriam, caputque gentis suæ Picentiam, cum multis æque nobilibus eo bello plurimum vexatas esse reperio. Sed omnium pertinacissime obsessæ defensæque sunt Æsernia & Alba coloniae. quarum illa duobus Maniis Valerio Messalla, & Octavio Crasso consulibus deducta est anno urbis conditæ quadringentesimo nonagesimo; Albenfes ad lacum Fucinum totis annis quadraginta ante Æserninos deducti sunt, cum Ser. Cornelius Lentulus, L. Genucius Aventinensis consules essent.

§ XXIII. Sueton. Aug. c. 27. Jul. Obseq. Diodor. ap. Vales. Plin. 2, 12. § XXV. Flor. 3, 10. Liv. Epit. Supplem. Liv. l. 6. Oros. 5, 18. Appian.

XXVI. Sed Rutilius, Juliusque consules, ut obsessis opem ferrent, in Samnium Marfosque diversi abierunt. Inter hæc a nomine Latino, reliquisque extra Italiam sociis frequentia venerunt auxilia. nam etiam tum magna pars Italiæ, omne Latium, Etrusci, Umbri, aliæque validæ nationes in fide manebant. Sed & in aliis quibusdam, quæ defecerant, adeo repentinus inter omnes consensus esse non potuit, ut non magna portio immixta bonorum esset. In Hirpinis certe justam legionem Minatius Magius conscripsit, Æsculanensis quidem civitate, sed intactus a scelere, & avitæ in Romanos fidei tenax. Nepos enim Decii Magii Campanorum principis erat, ejus, qui deficiente ad Hannibalem Capua, ut ruentem in dedecus & exitium patriam retineret, multa ausus passusque, fortissimi atque fidelissimi viri famam emeruit.

XXVII. Neque segnis Minatii eo bello opera fuit: nam & Herculanei capti communem cum T. Didio laudem habet; & cum L. Sulla Pompejos oppugnavit, Cosamque occupavit. agnovitque meritum Romanus populus, & ipsum quidem nominatim donavit civitate: duosque deinde filios ejus creavit prætores, cum adhuc feni crearentur. Utilior etiam, quam celebrior, industria Sertorii fuit: cujus egregia facta toto eo tempore primum ignobilitas hominis, deinde scriptorum invidia obscuravit. Sed is tum Galliæ Cispadanæ quæstor arma virosque magno numero coegerat, ne ipse quidem suo corpori parcens. unde eodem bello, dum, nullum periculum refugiens, acriter pro patriæ imperio pugnat, effossio altero oculorum, *non dehonestamentum id oris, sed ornamentum habere*, haud injuria gloriatus est.

XXVIII. Venerunt & ab ultimis terris auxilia, non re-gibus modo, magnisque populis promte submittentibus, sed etiam mediocrium civitatum alaeri studio. Inter quas & ab Heraclea Pontica duas triremes tectas venisse Meninon scriptum reliquit, cujus in populorum assignandis sedibus

§ XXVI. Vellej. 2, 16. Liv. 23, 7. § XXVII. Plut. in Sertor. c. 5. Sallust.



error admonet, ut operæ pretium facturi videamur, si qualis initio belli socialis Italia, quibusque habitata gentibus fuerit, velut in tabella spectandum exhibeamus. Cum enim vir, ut existimari potest, cetera non ineptus, ad hæc paulo post hæc tempora, florente certe Romanorum imperio, natus, Marfos, Pelignosque, ac Marrucinos, Libyæ gentes, Gadibus finitimas potuerit credere; profecto nobis haud translatitia diligentia erit opus, ne in rebus, tot seculorum vetustate oblitteratis, tot interim mutationibus aliam aliamque subinde faciem adeptis, hallucinemur.

XXIX. Igitur omnis Italia decies centena & viginti millia passuum in longitudinem protenditur, ab Augusta Prætoria per urbem Capuamque ad Siculum fretum, ubi Rhegium oppidum est, pergentibus. Augusta nomen adhuc hodie retinet, juxta geminas Alpium fauces, Grajas atque Pœninas, sita. Latitudo minime respondet longitudini, ipsa quoque varia, maxima proxime Alpes inter Varum & Arsiam fluvios, ad quadringenta decem millia patens; deinceps, quanto magis in Austrum vergit, arctior; nisi quod in media ferme longitudine inter Tiberis & Aterni ostia, brevissimo itinere in centum millia tumet. ad Scyllacium quidem, & sinum Terinæum, qui hodie S. Euphemie dicitur, angustissima Italia est, vix millia passuum viginti inter superum inferumque mare occupantibus terris.

XXX. In hoc situ plurimæ gentes civitatesque nobiles & nunc sunt, & olim fuerunt. sed in præsentia satis habebimus eas descripsisse, quarum tum temporis præcipua celebritas & potentia, aut sociali bello insigne aliquod factum fuit. Ergo, naturam secuti, quatuor in partes Italianam dividimus, ut Circumpadana montibus & Adriatico sinu planities terminetur; partem secundam Apenninus mons, totam Italiæ longitudinem pertransiens; ceteras, quæ cis, aut trans Apenninum jacent, constituent. a prima, quam secimus, regione commodissime descriptionem totam ordie-

§ XXVIII. Memn. ap. Phot. Plin. 3, 5 & 17. Cluver. Ital. p. 96. § XXIX. Plin. 3, 10. Cluver.

mur. Sub ipsis Alpium radicibus, ubi nunc ex argumento vocati *Pedemontani* colunt, angustis primo spatiis, deinde latioribus, campi fertilissimi extenduntur, quos Polybius, qui plurimas terras peragravit, *tota Europa præstantissimos esse, passuumque in ambitum millia MCCL completi*, prædicat.

XXXI. Hos ita interfecat Padus, ut longe majorem efficiat partem, quæ ad Adriaticum mare, quam quæ ad Ligusticum vergit. Utramque ripam Gallicæ nationes, Etruscis pulsas, antiquitus occupaverant, ut Vespasiani ævo de Tuscorum in ea regione oppidis sola Mantua superesset. Cum his populis diutissime depugnandum Romano fuit; & ab his omnis ea regio Gallia Cisalpina appellata. Nobilissimæ illarum gentium, in sinistra ripa Insubres, Cenomani; in dextra, quæ propior Romæ est, Boji atque Senones fuerunt. Horum Boji pulsi sedibus: Senonum tota natio a populo Romano deleta. Ab his illustres urbes multæ conditæ: in agro Insubrium Mediolanum Bellovesus exstruxit; Veronam & Brixiam Cenomani. Senenses quidem ipsa appellatione prodere originem videntur: & Comum, Bergamum, Tridentum, Vicentia, Trogo auctore, Gallis auctoribus initia sua debent.

XXXII. At Placentiam & Cremonam M. Livio, L. Paulo consulibus sub Hannibalis bellum Romanæ coloniae occuparunt. A latere Gallorum usque ad mare Adriaticum Veneti sunt, antiquissimæ celebritatis nomen, & hodie quoque pulcherrima urbe, neque integra modo libertate, sed etiam imperio non contemnendo præcipuæ famæ. Sed Galliae Cispadanæ Ligures ad mare sui nominis prætexuntur. His antiquitus caput Genua fuit, nunc quoque florentissima. Durum bello, minusque fidei, quam libertatis, tenax genus, arma Romana, jam Africam Asiamque magnis victoriis peragrantia, sæpe sustinuit, aliquando repressit. neque ulla Italicarum gentium ferius perdomita est. Inter hæc mons Apenninus, a Liguribus per mediam ferme Ita-

§ XXX. Polyb. 2, 14. Plin. 3, 19. § XXXI. Strab. 1. 5. Liv. 5, 34. Jo. Sarisburiens. 6, 17.

liam porrectus, apud Bruttium in duo brachia discedit, altero Leucopetram Rheginorum contingens ad Siculum fretum, altero promontorium Lacinium, quod a Junonii templi ornamentis posteriora tempora *caput Columnarum* vocaverunt.

XXXIII. Isto montium tractu Ligures habitant, quos ab Etruscis Arni fluentia separant. Inde jam in mediterraneis Arretium, ad mare Pisæ sunt in Tuscorum finibus. Tuscis ex Lydia repeti genus, nec nescio, nec refello. tantum ut ingeniis talia studiose rimantibus, argumentum non inamœnæ disquisitionis subijciam, non dissimulo, per mihi mirum videri, nullas earum gentium origines, uti nunc vulgo fieri scimus, ita antiquitus etiam e Germania peti, cum tot essent notæ huc trahi faciles: gentium septemtrionalium creberrimæ migrationes, vicinia locorum, sermonis quidem etiam expressa vestigia. Nam & in Asia Lydiaque ipsa Cimbros olim fedes habuisse constat, ut etiam inde venire Germanici sanguinis populi potuerint: & e magna Germania per Alpes nec longior, nec difficilior, trajectus erat, quam postea iisdem Cimbris fuit. præterea quo tempore Hannibal in Italiam transiit, partem Alpium semi-germanæ gentes tenebant.

XXXIV. Nomen autem Tuscorum propter sacrificiorum religiones a Græcis impositum credatur licet; quemadmodum alia non minus inepta creduntur: dum ne ignoremus, nunc quoque Germanos inter se, aut a consanguineis nationibus, *Lydos* atque *Tuscos* nominari. Sed & *Italiam*, nisi quem fabulosæ delectant origines, a Tuscis appellatam fuisse suspicio est, iis, inquam, Tuscis, qui subiectam Alpibus regionem tenuerunt, in valle (hoc enim ipsum significat Italia) se habitare indicantibus. Quid quod *Bodinci* nomen Pado antiquitus inditum, vix alia in lingua notationem, quam ei tribuit Plinius, fundo carentis invenerit. Quid jam extra Italiam regiones, sed

§ XXXII. Justin. 20, 5. Supplem. Liv. l. 10. § XXXIII. Strabo.

in quas infero mari accessus Tuscis fuit, aliter a Græcis, aliter ab Italis appellatos commemorem, ea ratione nominum, ut in sola Germanica lingua certum & convenientem locis intellectum præferant?

XXXV. Eandem insulam *Zanclem* Græci, *Siciliam* Itali dixerunt; rem etiam eandem utraque denotante voce: nam hodieque falcem (cujus figuram insula refert) hoc nomine Germania designat. Cum autem Græci *Libyam* vocant, eam esse ab Tuscis *Africam* nuncupatam ob finiorum multitudinem non absurdum est credere. Nam & finiorum regnum apertissime notat Africæ vocabulum: & genus illud animalium non modo frequentissimum iis locis esse constat; sed etiam urbes fuisse, quæ a finiiis se denominarent, finios divino honore colerent, liberis denique, ut Græci a Diis, ita illi a finiiis nomina imponerent.

XXXVI. Ceterum Tuscorum, undecunque illis nomen aut origo fuerit, & antiquitus summa potentia, & belli socialis tempore magnæ adhuc vires memorantur. Urbes præcipuæ adhuc Pisæ erant, & Luca coloniæ, Volaterræ, Arretium, Cosa. Proximi Etruriæ Umbri habitarunt, Tiberi fluvio discreti, gens antiqua & ampla. Narnia tum & Iguvium Ameriumque & Camertes cum Tudertibus, & ad Tiberim Oriculum, claræ urbes populique erant. Ab his deinde Picenum ab ipsis illis montibus incipit, in quibus Camerinum, hodie quoque antiqui nominis retinens, jacet. Ariminum hi tenebant, Asculumque, unde initium defectionis fuit, & Firmum, clarissima oppida. Vestini Aternum habent, quod nunc *Pescara* nominatur, ad amnem ejusdem nominis, qui medius inter Vestinos, assitosque Marrucinos & Pelignos labitur.

XXXVII. Marrucinatorum Teate fuit, caput gentis: erant & alia oppida, sed frequentius vicatim habitabant. At Pelignos Corfinium nobilitat, arx rebellantium sociorum, &

§ XXXIV. Liv. 21, 32. Servius ad Æneid. X. Plin. 3, 16.  
§ XXXV. Diodor. 20, 59. § XIX, l. Strab. l. 1. Dionys. 1, 19.  
Claver. Ital. antiq. p. 751.

Italicæ appellatione communis omnium civitas. itemque Nafonis origine clarus Sulmo. In latere Pelignorum Vestinorumque Marfi Fucinum lacum accolunt, celebratæ fortitudinis viri, adeo quidem, ut eousque neque de Marfis Romæ, neque sine Marfis triumphatum esse opinio tenuerit. Præcipua urbium Marruvium fuit: deinde Alba ad Fucinum, colonia. Hinc Æquorum veteres fines, sed tum Latio contributi, Carseolis maxime gloriabantur. Sed a Pelignis, & Sagro flumine Samnium longo tractu porrigitur, antiqua fama & maximis urbibus clarum, Æsernia, Boviano, &, quod nunc quoque veteri vocabulo noscitur, Benevento.

XXXVIII. Campaniæ etiam pars montosa Samnitibus connectitur: in qua post Capuam, Cumæ, Puteoli, Neapolis, Nuceria, tum quoque adhuc Pompeji erant, nobilissima oppida. Teanum præterea & Larinum Frentani populi fuerunt. at post Beneventum coluerunt Hirpini: quorum urbes Aquilonia, Abellinum, Æsculanum memorantur. Lucania deinde sequitur magna regio: urbes, Velia, Copiæ, Thuriorum prius, & ante Thurios, Sybaris nomine nobiliores; Grumentum, Potentia.

XXXIX. Hinc deinde per Bruttios & extremum Italiæ angulum Apenninus Siciliam versus sinuatur. Tempus horum erat, Vibo Valentia, & celeberrimæ omnium Rhegium & Locri. Tertia pars Italiæ, quæ monte Apennino & mari infero clauditur, primo quidem Ligurum, deinde Etruscorum populos continet, utraque gente a montibus ad litus porrecta, suumque nomen dante, quam accolit, parti maris. Post Etruriam Latium est Tiberi flumine disjunctum, ubi caput non Italiæ modo, sed prope orbis universi Roma est.

XL. Ampla regio, validi populi, nobilissimæ urbes hac parte Italiæ fuerunt. præter antiquum Latium, Rutuli, & Aurunci ad maris oram: interius Volsci, Hernici, Æqui.

§ XXXVII. Strab. Flor. I, II. § XXXVIII. Ptolemæus.

*T. Liv. Vol. IX.*

B

Lanuvium, Aricia, Tusculum & Præneste Latinos veteres illustrabat: Arpinum Marii tum natalibus gloriabatur; nondum agnito, quanto majus Volſco Romanoque nomini decus Ciceronem peperisset. Et Anagnia caput Hernicorum, Tarracinaque, & Minturnæ, & Formiæ, & Sinueſſa, in Auruncis, opulentæ illa tempeſtate urbes erant.

XLI. Per Minturnas fluvius Liris tranſiit: ejus in læva ripa Sidicini colebant, quorum Teanum oppidum fuit. Ex his Campania rerum omnium affluentia luxuque præ ceteris Italicis celebrata regio. de qua jam occupavimus dicere, quod pars ejus Apennini juga ſequentibus occurrebat. Poſt Campanos Picentini ſunt, ad Pæſtanum ſinum ex veteri Piceno a Romanis victoribus trajecti. Hic Picentia clarum oppidum erat, & Romanorum colonia Salernum.

XLII. Ab eodem ſinu deinceps Lucani Bruttique Italiam, uti dictum eſt, finiunt. Superest quarta, quas fecimus, partium, inter Apenninum & mare ſuperum, quod & Adriaticum vocatur, intercepta regio. Hæc a Venetis, per Umbriam, Picenumque, memoratos antea populos ad Præ-tutinium Hadrianumque agrum pertinet: poſt quos Mar-rucini Frentanique, ipſi quoque inter Apennincolas jam recenſiti; a Frentanis Apuli habitabant, longo ad Adriaticum mare tractu.

XLIII. Hic Venuſia eſt, Horatii Flacci patria, itemque Luceria, tum Romanorum coloniæ. Deinceps extremum Italiæ cornu, Bruttiis oppoſitum (nam iis locis lato hiatu diſcedentes terras maria intrarunt) peninſulam efficit, Meſſapiam antiquitus appellatam, cujus interior pars, Tarentum nobiliſſimum oppidum habet, cum ſinu cognomine: deinde per Salentinos ad Japygium promontorium excurrit. At pars Adriatico obverſa mari Calabria vocatur. in qua Brunduſium eſt cum inclito portu; & cum alio, ſed minoris famæ uſuſque, Hydruntum.

XLIV. Hæc illa Italia fuit, hæc gentes ac urbes, quæ

tum paribus inter se animis viribusque concurrebant. Nam si populos, qui defecerunt, cum Romanis eorumque fidelibus focis compares; vix reperias, utram partium aut hominum numero, aut militum genere, aut munimentis locorum, anteponas. opes quoque, pecuniarum, comectuum, armorum copias æquales; ducum etiam haud impares spiritus artesque deprehendas. Senatus haud dubie Romanus auctoritate rerumque usu longe præstabat; sed horum vim atque velut aciem internæ seditiones & inolitavit hebetabant: Italicum industria firmabat, & concordia, favensque novis cœptis humanus animus, & omnia in principiis meliora.

XLV. Fortuna quoque adesse partibus visa: plerumque superioribus inter initia fociorum rebus; dum in urbe Romana quæstione majestatis, in castris suspicionibus infensa omnia & impedita sunt. Nullum jam Romæ, nisi lege Varia, judicium exercebatur, quo præter alios Q. Pompejus Rufus, & M. Antonius orator causam dixerunt. Cum satis irarum cæcique metus domi esset, acrius exulceravit animos P. Rutilii consulis imprudentia, qui, consilia sua hostibus prodi videns, cum viros patricos, quos secum habebat, criminis ejus reos designasset, rem non perquisitam senatui perscripsit.

XLVI. Neque dubium est, quin magnus inde motus oriturus fuerit, ni mature emerisisset error, verique prodicionis auctores, temere suspectos periculo liberassent. Marci quidam, immixti Romanorum pabulatoribus, & pro focis se gerentes, castra simul ingredi consueverant: inde quæ visu audituque comperiebantur, suis occulte nuntiabant. His supplicio affectis, restincta magis præsens invidia, quam ex suspicaci consulis ingenio evulsa sollicitudo est.

XLVII. Nam & C. Marium, licet propinquum suum, id agere putabat, ut, præsentis anno segniter extracto, ille

§ XLV. Diodor. l. 35. Idem ap. Vales. Cic. in Brut. c. 89. & Tulc. quæst. 2, 24.

septimum consul factus bellum integrum acciperet. Quamquam Mario consilii sui idonea causa erat: *quod enim in hostico bellum esset, trahi oportere* identidem submonebat: *sibi enim aliunde non defuturos commeatus, at hostibus suum agrum inter utriusque partis crebras populationes minime diu sustenturum: interea tironem militem in castris exerceri posse.* Frustra hæc dicebantur, nec ab animo pravo atque contumaci consul impetrare potuit, ne potius damnosam reipublicæ temeritatem suo cum exitio, quam salubria aliorum monita cum incolunitatis famæque magna mercede, sequeretur.

§ XLVII. Oros. 5, 18. Diodor.





JOANNIS FREINSHEMII  
SUPPLEMENTORUM  
LIVIANORUM

LIBER XXXVIII.

IN LOCUM LIB. LXXIII LIVIANI.

---

É P I T O M E

LIBRI SEPTUAGESIMI TERTII.

*L. Julius Cæsar consul male adversus Samnites pugnavit. Nola colonia in potestatem Samnitium venit cum L. Postumio prætore, qui ab iis interfectus est. Complures populi ad hostes defecerunt. Cum P. Rutilius consul male adversus hostes Marfos pugnasset, & in prælio cecidisset, C. Marius, legatus ejus, meliore eventu cum hostibus conflixit. Ser. Sulpicius Pelignos prælio fudit. Q. Cæpio, legatus Rutilii, cum obsessus prospere in hostes erupisset, & ob eum successum æquatum ei cum C. Mario esset imperium, temerarius factus, & circumventus insidiis, fuso exercitu cecidit. L. Julius Cæsar consul feliciter adversus Samnites pugnavit. Ob eam victoriam Romæ saga posita sunt. & , ut varia belli fortuna esset, Æsernia colonia cum M. Marcello in potestatem Samnitium venit. Sed C. Marius prælio Marfos fudit, Herio Asinio, prætore Marrucinatorum, occiso. C. Cæcilius in Gallia Transalpina Salvios rebellantes vicit.*

I. **I**NTEREA, cum inter crebras Italicorum defectiones, etiam domi omnia suspicionibus & mœrore sollicita essent, appareretque, lege Varia multis innocentibus extrema intendi pericula, decrevit senatus, *ne judicia, dum tumultus Italicus esset, exercerentur.* Huic senatusconsulto tribuni plebis intercedebant. Idcirco in concionibus populi frequenter agitata res est, atrociter in senatum invehentibus tribunis. *Quorsum enim, ajebant, legiones imperatoresque rebellibus opponitis, si, quod longe majus est periculum, domi non esse modo fautores hostium, sed etiam præesse patimini, Quirites?*

II. *Nam externam vim forte pari robore non ægre caveas, aut repellas; at quod in ipsis quasi visceribus venenum latet, id nisi mature ejeceris, frustra postmodo invocabis Deos: sine remedio, sine spe salutis, ad extremam usque perniciem grassabitur. Quid senatus populusque Romanus in urbe, quid consules in castris egerint, immo quid acturi sint, citius certiusque ad hostes, quam ad cives perfertur. qua deinde spe geremus bellum, si proditores consiliorum habemus, quos habere auctores debuimus, conscios vitare non possumus?*

III. *Nuper a P. Rutilio consule sunt allatæ literæ: viri quidam nobiles haud obscure prodicionis arguebantur. Quid igitur factum est? Cognatorum, affinium, sed plus etiam eorum, qui eadem in causa sunt, potentia in tantum valuit, ut omnis ea de re non inquisitio modo cessaret, sed etiam sermo conticesceret, relique criminis pro his, qui fuerant indicati, nescio qui viles ignotique homunziones nomine Marforum subderentur. Scilicet aliquis ullius nominis locique in Marfis est, ut apud hostes explorator idoneus, apud suos fide dignus haberi debeat: qui Romanis in castris se fallere speret: qui neminem in tanta multitudine fore putet, a quo agnosci, deprehendi, atque indicari queat?*

IV. *Sed inter pabulatores latuerunt. narra igitur mihi, pabulatores ignotum & promiscuum in castris genus sunt: an vero, ut imperatori visum est, e legionibus & auxiliis delecti milites,*

*interim etiam totæ cum signis suis cohortes emittuntur? Fac autem fuisse. quid vero illi explorent, nisi quæ non amplius in secreto habentur? hic autem non modo, quæ palam fecerat edixeratque consul, sed consulta ejus omnia, quæ modo cum paucis communicasset, & propemodum cogitata enuntiabantur.*

V. *Locum castris constituerat capere; mox vidit præceptum ab Italici. tentabat eorum præsidia; tenebat oppida; ubi minime credebatur existimatos hostes, dabat impetum: omnia tam accurata, tamque recenti cura septa reperiēbat, quam si de industria hostibus in eum locum condixisset. Et tamen hi pro innocentibus laudantur. quis enim unquam hac lege tam certus, tanquam evidenter nocens postulatus reus est, ut non ab iisdem hominibus acerrime defenderetur? An igitur fieri citra periculum vestrum & civitatis potest, Quirites, ut cujusquam salus, aut hujus imperii majestas, sarta testaque sint, donec hi homines, non dicam in urbe vestra, sed in imperiis & consilio publico erunt?*

VI. *En quibus reipublicæ fata, dignitatem Romani nominis, nostra denique nostrorumque liberorum ac conjugum facultates, corpora, libertatemque ac pudicitiam credimus! Hæc tam atrociam quamquam diu jam patimur, erat tamen nonnulla consolatio, quod adhuc dolere vicem nostram, & reipublicæ miserari, postremo accusare proditores licebat. nunc etiam hoc auxilium nobis ereptum eunt, Quirites, tam turpi confessione noxæ, ut quæ iustis lege reddi judicia, isti vetent, vosque & hæc omnia perire malint, quam aut desistere a pernicioso consilio, aut judiciorum subire discrimen.*

VII. *Proh Deum atque hominum fidem! esse in libera civitate, qui hanc sibi potentiam arrogant, ut suo arbitratu eludere leges, tollere judicia ausint! quorsum autem ista licentia pertinet, Quirites? aliudne quæritur, quam ut nudata omni legum præsidio impune prosternatur respublica? Cur enim judicia fugiunt, si tantorum scelerum sibi non sunt conscii: sin vero, cur vivunt in hoc populo, quem oderunt, in hac civitate, quam vendiderunt? Sed vereor, ne forte per calumniam vexare innocentes videar. non enim abnuunt judicia, sed tantum ad res quietas differunt, & pacatiorem statum civitatis.*

VIII. *O stulte simplicem populum Romanum, si patitur his tam crassis præstigiis sibi imponi, quibus ne servilia quidem ingenia circumveniri paterentur! In præsentibus prementibusque malis, & universæ ruinæ metu, celeribus remediis opus est: quæ quisquis in illa tempora rejicit, ubi futuri amplius non sunt, quibus adhibeantur, illum aut egregie fatuum esse, aut summe improbum oportet. Incendio sorte oborto adibus, si quis afferri aquam, & restinguere flammam prohiberet, donec tumultus conquiesceret, obsecro vos, Quirites, qualem esse diceretis?*

IX. *Im pulcherrimum hoc ædificium imperii Romani flagrat bello: lambit ipsam urbem ignis, corporumque & fortunarum vestrarum omnium sedem atque domicilium afflat: & sunt (proh summe Juppiter, vosque Dii Deæque, quotquot urbem hanc incolitis!) qui resistent restinguere cupientibus, atque adeo incendiarios ipsos jubeant tolerari, donec scilicet periculum prætereat. Sed quid opus est pluribus? non difficilis, nec obscura prædictio est. & omen quidem Dii avertant, sed nisi dum vestri juris estis, Quirites, provideritis, ne prodamini: proditis serum & alienum erit pœnas proditoris persequi, cum & reliquarum rerum omnium potestas, & ipsa judicia penes proditores erunt.*

X. *Non deerant tamen, qui pro senatu loquerentur: In æqua omnium libertate plus tamen juris atque commodorum apud nobiles & locupletes esse. iisdem ingentium inolitumque a majoribus longa temporum serie, ut rempublicam ament, cui ultra communem affectum, tot sint pignoribus obligati, quot habeant præ aliis civibus eximia. Sic esse comparatum, ut pro conservatione cujusque rei plus sint solliciti, quibus ejusdem interitu plura sint periura commoda. Neque credi posse, majestatem populi Romani cuiquam majori curæ fore, quam senatui, in quo majestatis ejus universus ferme splendor resulgeat.*

XI. *Scilicet, hos a proavis & atavis assuetos gerere magistratus, imperia, quidquid in urbe sit vel ad dignitatem præcipuum, vel ad rem familiarem expeditum, solos aut primos consequi, jus illud cum tota Italia cupide communicaturos, cujus in possessionem vix cives suos post longa & atrocia certamina recepissent! Non magis hos Patres quemquam admissuros, nedum ac-*

cituros, quem arcere possint, potentia socium, qui olim longè minoribus populi Romani opibus, Latinos idem petentes admisisset. Atque hæc tam esse certæ & perspicuæ veritatis, ut accurata defensione non egeant, potiusque videndum sit iis, qui senatum tili criminatione vexent, quemadmodum se a calumnia, quam senatui, quomodo se tam inepta suspitione liberet.

XII. Quod si forte tam periculosis temporibus aliquid acceptum incommodi, vel adhuc timendum sit: ejus culpam non senatui, sed potius his, qui de senatu querantur, imputari debere. Hos enim nihil aliud agere, dum ægram & sauciam rempublicam necessaria quiete defraudant, quam quod unice optare hostes, & ab his conducti facere atque procurare vellent. Tot illustrium virorum simul deferre nomina, & in capitalem fraudem vocare multos innocentes, nec injuriam æquo animo laturos, nihil aliud esse, quam inter flammias socialis belli, novum & atrocius civilis certaminis incendium excitare.

XIII. Nondum oblitos esse majores natu, cum dirutis Fregellis in socios consiliorum attentius quæreretur, eaque suspitione C. Gracchus afflatus esset, quanti inde exstiterint tumultus, victrici tum & robustæ reipublicæ vix tolerabiles, & exitio futuros, si debili & aliunde impeditæ incubuissent. Sed bono urbis Romanæ nullum tum Q. Varium, aut ei similem fuisse: quem propitii tum Dii, nunc irati populo Romano, in hæc potius tempora servassent, ut exulceratum civitatis statum ad extremum periculi adduceret homo non Hispaniensis, sed Hispanus, & si quid forte Romani sanguinis haberet, ambiguus hybrida.

XIV. Hunc scilicet reipublicæ cura duci, quæ nihil ad illum pertineret; aut ulla honesta causa, cujus in tota vita nihil non sædum atque probrosum esset: quique ipse criminis hujus, per quod negotium aliis facefferet, multis & bonis testibus argui posset! Ceterum tali aliquo, hoc est, vili, impudente, & perditio homine fuisse opus: nec enim alium reperiri potuisse, qui se Romanis equitibus vendicaret, ad horum confirmandum impotentiam tam infami famulatu.

XV. Frustra incusari alios: equitum hanc intemperiem esse, regno judiciorum exsultantium, vel usque ad interitum civitatis.

*Non posse dissimulari, aut nesciri, quæ in conspectu populi Romani sint acta. hoc inspiciente, cupidissime damnatos, quicunque aut publicanorum fraudes severius vindicassent, aut judicia sluduissent emendare, aut quacunq; de causa iratum hunc ordinem habuissent.*

XVI. *Quem enim comminisci causam aliam posse, quod M. Scaurus princeps senatus, quamquam annis & corpore invalidus, sit postulatus: nisi quia & alias semper obstiterit iniqua flagitantibus, & nuper auctor Druso fuerit, judicia ad senatum transferendi? M. Cottam, disertissimum adolescentem, quo alio crimine cecidisse, quam quod P. Rutilium avunculum suum imitatus, rectum animum, & ambitioni impenetrabilem prætulisset. ideo nimirum tantis in illum animis ivisse iratos equites, ne suam quidem infamiam, nedum publicam veritos, si Rutiliani judicii turpitudinem recens invidia renovaret. His tam velocibus ad vindictam hominibus judicia tradi perinde esse, ac si furioso gladius detur inter inermes & imbecillos.*

XVII. *Tam brevi tempore plures consilio & virtute præstantes cives amissos esse, quam fortassis longo bello absumere hostilia arma potuissent. Neque finem fore, donec eadem accusandi licentia duret. Quem enim esse non senatorem tantum, sed omnino honestiorem aliquem civem, cui non fuerit cum his, aut illis sociorum multa familiaritas, & inde suspicionum materies, & criminandi occasio? Jam antea satis in urbe irarum, satis invidiæ & æmulationum esse. hæc tam inimica publicæ salutis opprimenda potius & excidenda esse, quam ut ulro corroboret & augeas.*

XVIII. *Unicum præsentium malorum levamentum, unicam meliorum temporum spem esse in concordia civium repositam. hanc qui studeant abrumper, quibuslibet hostibus pejus timendos atque abominandos esse. Quid enim futurum, si ex senatu aut legatione exciti, quam reipublicæ curam operamque necessario tempore navaturi fuerint, suis periculis cogantur impendere? perituras rei bene gerendæ plurimas occasiones, donec, qui in consilio publico aut curatione aliqua sint positi, sollicitis mentibus, plus de civium suorum injuriis, quam de hostium armis cogitent.*

XIX. Hæc disceptatio cum aliquamdiu tenuisset, tandem melioris partis victoria, saltem in tempus necessariam fessæ civitati quietem præbuit. Interea dum Romæ hæc sunt, & in Marfis a P. Rutilio Lupo consule res non optime geritur; ne in aliis quidem Italiæ partibus, prosperiores Romanorum ducum expeditiones fuerunt. Cn. Pompejum, quamquam repulsus ab Asculo fuerat, adhuc in Piceno agentem, ad Tennam fluvium in Agro Falerino tres simul hostium duces, C. Judacilius, T. Afranius, P. Ventidius conjunctis copiis adorti, fuderunt.

XX. Firmum colonia receptui fugientibus fuit: cujus mœnibus cum se Pompejus clausisset, Judacilius & Ventidius, relicto ad obsidionem Afranio, in diversa loca digressi sunt. Namque Pompejus, quamquam abductæ potiores hostium copię erant, fatis habebat, si, quos superstitēs sibi cædes fugaque fecerat, armare iterum, & donec terror abscessisset, defendere munimenta oppidi posset. a pugnando quidem modis omnibus abstinēbat. In Samnio Vettius Cato L. Julium consulem, cæsis duobus milibus militum, Æferniam cedere compulit: L. Scipio & L. Acilius fervorum habitu elapsi sunt, colonia arctius circumfessa.

XXI. Tum & Venafrum in dextra Vulturni ripa Campanum oppidum, sed vicinum Samnitibus, olei proventu ac bonitate clarum, Marius Egnatius proditione intercept, duabus ibi Romanis cohortibus interfectis. & M. Licinium Crassum M. Lamponius, castra prope virgulta silvasque habentem, incensis, quæ contigua vallo erant, Grumentum concedere coegit: majore tamen metu, quam detrimento, cum exercitus omnis periclitatus fuisset, octingentis omnino militibus amissis.

XXII. Oppidum Lucaniæ Grumentum est, quod si non eodem anno, eodem utique bello & amissum a Romanis, & recuperatum est. Nec excidere memoriæ debet inligne

§ XIX. Orof. 5, 18. § XXI. Liv. Epit. Appian. civil. l. 5. Plin. 15, 2. Front. Strat. 2, 4.

duorum fervorum ad fervendam heram commentum. Hi, cum urbs obsideretur, ad Romanos transfugerant, operæque pretium fecerant. Iidem, urbe capta, discurrentibus ad prædam militibus, ad herilem domum notis viarum diverticulis præcurrerunt, extractamque dominam cum præ se agerent voce vultuque minaces, quoties *quænam esset* interrogarentur, *dominam, & quidem crudelissimam, ad meritum supplicium a se duci* retulerunt.

XXIII. Sic eductam extra muros summa cura occultaverunt, donec, residente ira victoris, periculum omne decederet. Tum vero aperuerunt animos, *dominæ servandæ ergo*, quemadmodum res ipsa fatis loquebatur, *omnia fecisse, neque jus ejus imminutum cupere* professi. Illa, ne beneficio a servis vinceretur, quod unum maximum in potestate ejus erat, utrumque e vestigio manumisit. Inter hæc & C. Perperna cladem ignominiamque non vulgarem passus est.

XXIV. Cum Præfentejo signis collatis dimicaverat hoc eventu, ut, quatuor millibus amissis, superstites plerique armis abjectis vix fuga fervarentur. Ob hoc ademtum ei a P. Rutilio consule imperium est. reliquæ exercitus iis copiis, quas C. Marius ducebat, adjunctæ. Sed & Nola, nobilissima Campaniæ colonia, quæ vim Hannibalis, & illam Punici belli tempestatem spreverat, in Samnitium manus incidit, quibus C. Papius præerat.

XXV. Is, cum suarum partium hominibus re communicata, facile irrupit proditam urbem. Duo millia Romanorum in præsidio cum L. Postumio prætore erant: etiam ad resistendum Nolanis impar manus, nedum ut supervenientem externum sustinere hostem posset. Idcirco haud gravatim acceperunt conditionem, ut postea sub Papio militarent. Hæc venia militibus data: duces comprehensi, &, ne belli quidem more servato, inedia necati sunt.

§ XXII. Appian. Front. Liv. 33, 37. Macrob. 1, 21. § XXIV. Appian. § XXV. Liv. Epit. Appian.



XXVI. Ob has res continuo complures populi ad hostes defecerunt: Nolaque recepta, multas circa urbes C. Papius Italicorum auspicia sequi coegit. Nam & Stabias in sinu maris, inter Surrentum & Neapolim, lactis salubritate celebres, occupavit; & cognomini fluvio impositum Liternum: coloniam quoque Romanam in Picentinis Salernum cepit. Erat hoc Italicis ducibus institutum, ut, augendis copiis intenti, ex captivis bello idoneos sacramento adigerent, etiam valentissimis fervorem in militiam ascitis.

XXVII. Hac ratione Papius, numerosum jam exercitum trahens, præter Capuam & urbi circumjectum agrum, unde eo bello maximi Romanorum exercitus alebantur, totam Campaniam vicinasque regiones impune pererrabat: alios promissis, alios metu ad voluntariam deditionem sollicitando. Sed in Nucerinorum vastando agro (Alfaternos cognomento vocant: nam alia Umbriae Nuceria fuit) quod omnia inferiora fide habebant, nihil injuriæ aut crudelitatis prætermisum est.

XXVIII. Ea res nutantes finitimorum animos impulit, ut amicitiam cum Papio jungerent, decemque peditum millia, mille equites sub eo stipendia facturos darent. Qui ubi venerunt, Acerras ad Clanium amnem, postquam ad societatem belli perlici nequiverant, circumfedit. C. Judacilio quoque non deterior successus per Apuliam fuit, Canusio Venusiaque insignibus oppidis, magnoque numero aliorum, in deditionem armis, aut voluntate incolentium acceptis.

XXIX. Eadem æstate, qua hæc diversis Italiae locis gerebantur, P. Rutilius consul, copiis cum C. Mario divisis, Telonii fluminis utramque ripam duobus castris totidemque pontibus obtinebat. Telonius, per Marfos fluens, apud Reatinos Velino fluvio conjungitur. Iisdem in locis tum C. Vettius Cato sociorum prætor exercitum habebat,

§ XXVII. Cic. de leg. Agrar. Cluver. Ital. ant. p. 1186. Appian.

propius Marianum vallum castra metatus. Is cum Rutilium a. d. pridie Idus Junias, quo die Matri Matutæ sacra fiebant, traducturum esse copias ab exploratoribus didicisset, per tenebras proximæ noctis in valle quadam opportuna haud procul ponte Rutiliano partem copiarum in insidiis constituerat.

XXX. Deinde Rutilium transire amnem passus, invadit nec opinantem, magnaue clade profligat. Multi ex pugna clari nobilesque viri, cum octo millibus militum ceciderunt: ex his magna pars, cum perditis rebus effugium aliud non pateret, in ipsis aquis oppressa est. Consul ipse, telo in caput ictus, paulo post ex vulnere decessit. Hanc Rutilii fortunam superstitio veterum ad spre-tas religiones retulit, *quod inter sacrificandum capite jec-noris non reperto, tamen movere ausus esset*: vana omnino persuasione, nisi quod apparet, facile contemturum salutaria hominum monita fuisse, qui Deorum, ut ipse putabat, ostenta pro nihilo duceret.

XXXI. At C. Marius, qui fluminis inferiorem partem tenebat, cum amnis cruento alveo corpora & arma Romana volvens acta prodidisset, confestim traductis in hostilem ripam copiis, ad expugnanda Vettii castra succedit: eaque, propugnatoribus subito metu oppressis, nec viribus modo, sed etiam numero inferioribus, quia flos exercitus una cum ipso duce aberat, haud magno labore cepit; cladem consulis, sicut consilio, sic etiam eventu meliore, ultus. Cato, castris amissis, in loco, ubi pugnaverat, pernoctavit. postridie, quod exigua commeatus ei copia supererat, albescente cælo profectus est.

XXXII. At Romam fama primum adversæ pugnae vehementer perterruit: major deinde dolor exarsit, cum cruentus in urbem consul referretur, & tot egregiorum virorum funera, sepulcris majorum reddenda, portarentur. eo viso

§ XXIX. Oros. 5, 18. Appian. Liv. Epit. § XXXI. Jul. Obsequ. Oros. Appian. Flor. 3, 18.

ita mœsta & attonita luctu civitas fuit, ut idoneam senatus causam putarit, cur *defunctorum in bello corpora*, quibus *locis occubissent*, humari, neque in urbem referri, juberet; ne metum pigritiamque vulgo incuterent funesta spectacula.

XXXIII. Providenter id factum etiam hostes probaverunt, simili decreto apud suos imitati. Rutilio consule defuncto, quamquam magna pars anni supererat, suffectus tamen nemo est: neque enim L. Julio comitiorum causa ad urbem revertendi otium erat. Prosperiores subinde nuntii nonnihil recrearunt animos. Nam & Ser. Sulpicius Pelignos acie fuderat: & Q. Cæpio, qui legatus fuerat Rutilii, cum magna cæde obsidentium, prosperam eruptionem fecerat. quæ res ei statim honori, mox exitio fuit.

XXXIV. Quippe ob hunc successum senatus censuerat, ut C. Marius, Q. Cæpio Rutilianum exercitum æquato imperio dividerent. Inflatus his Patrum judiciis Cæpio, quod unico hætenus credito duci comparatum se putabat, temerarius factus, præclara initia fœdo exitu corruptit. Namque Pompædus Silo, ferociam juvenis in occasionem suam versurus, accessit ad eum, pœnitentia actorum simulata; quoque magis incautum falleret, duos pueros prætextatos adduxit, cum magno, ut videbatur, auri argenti-que pondere.

XXXV. Nam plumbeas ille massas bracteolis melioris metalli obduxerat. pueri quoque fervilis generis erant: ipse filios suos terebat. *Hæc, inquit, adduxi, Q. Cæpio, fidei meæ pignora: simul, ut adversus iram popularium, spem generis, & partem fortunarum in tuto haberem. Simul enim palam fiet, me fugisse, satis scio, non temperaturos veteres socios, quin, si possint, in me meorumque corpora exquisitissimo cruciatu desæviant.*

XXXVI. Quanto enim plus in meo ductu spei habuerunt, tanto acriori dolore exardescunt: ereptumque a me interpretabuntur, quidquid per me speraverant adipisci posse. Sed nimi-

rum decepimus invicem, deceptique sumus. illi, quo bellum vobis facerem, imperium accepiſſe putarunt; ego, ne ab aliquo violentiore ingenio invaderetur, occupandum cenſui, gravior ſic futurus auctor pacis, quam ſi de inferiore loco conarer. Ceterum neque illorum ardor adducere me potuit, ut vobiſcum decertandum arbitrarer; neque illis ad quietis ſtudiũ inclinandis mea monita ſuffecerunt.

XXXVII. Idcirco, quia jam ultro pacis laudatorem homines efferati ſuſpectabant, & oderant, abjecta ſpe plura perficiendi, ut me ſaltem meoſque ſervarem, cum parte clientium & amicorum huc veni: alios reliqui in caſtris, quia neque dum illis excedere maturum erat, & mihi opportunum, habere, qui, quid ibi rerum agatur, nuntient, & ubi tempus aderit, conſilium, quod in redintegrata amicitia pro munere vobis offero, juvent.

XXXVIII. Maximi opprimendi exercitus occaſio adeſt, Q. Capio, ſed cito diſparitura, niſi conſeſtim injeceris manum. ſi me ſequeris itineris optimum ducem, Veſtlinorum Marſorumque in propinquo copiæ, dum ſine imperatore, ſine certo imperio trepidant, deleri nullo negotio poſſunt. Neque dolum timueris, nemo ſeque & liberos tradit in eorum, quos læſurus venerit, manus. Id minime negaverim, fuiſſe tempus, quo fuerim vobis iratior; ſed ita ut in civilibus diſſenſionibus ſolet. Vim certe & arma quam non probaverim, & mei familiares intime ſciunt; & ipſo rerum teſtimonio ſatis oſtendi poteſt.

XXXIX. Cum a M. Druſo ad leges perſerendas in urbem eſſemus vocati, civeſque mei ſpe atque animis miriſce incaluiſſent, non ſubduxi me quærentibus ducem, hoc animo, ut, quantum fieri ſine certamine poſſet, per me potiſſimum gereretur; ſi bonis artibus proſectum nihil eſſet, impedirem meos, ne nimia cupiditate atque indignatione ad ſceleſta conſilia prolaberentur.

XL. Nihil enim ſane mediocri decretum in concilio fuerat; lectumque agmen virorum pugiones ſub tunicis detulerat, ut, quod aliter nequiret obtineri, vi conſequerentur. Sed ego tantum ab hoc propoſito abhorrui, ut, cum bona quadam fortuna Cn. Domitius nobis occuſſiſſet, levem occaſionem naſtus, mitigaverim

popularium animos; & unde cum atrocissimis minis exierant, & placatos jam quietosque reducerem.

XLII. Semper enim in causa præsenti hic mihi animus fuit, ut nec indignos eo, quod ostendebatur, beneficio nos crederem; nec defugerem quidquam laboris, aut sumtus, dum eo volente populo Romano potiremur: cum invito luctari, neque fœderibus convenire, quæ vobiscum icimus, neque virium nostrarum esse arbitrarer. Sed hæc ita esse aliquando per otium cognosces, in præsentiæ non posulo, ut verbis meis, sed, in quo plus est fidei, ut factis credas.

XLIII. Utra cum parte sentiam, faveant modo cœptis Dii; claro documento futura lux aperiet. nec aliud a te aut senatu præmium paciscor, quam quod post navatam operam studium meum mereri videbitur. Id modo dicam: quoties memoria repeto, quam fueritis semper in munerando largi, constans animum subit cogitatio, fore, ut jus Romanæ civitatis, & quidquid nostri armati possulant, certius meo, quam illorum consilio, & in his, quam in prioribus castris, consequi detur.

XLIII. Ad hæc Cæpio, tum desiderio rei gerendæ acensus, tum fidem hominis, tantis, ut putabat, pignoribus obstrictam, nihil suspectans, Non errasti, inquit, Q. Pompædi, si certius assequendis, quæ cupias, in benevolentia populi Romani, quam in armis tuorum, esse præsidium reris. Multa ille sæpe, non Italicis modo sociis, sed & barbararum gentium rogatus dedit; coactus nihil cuiquam. Tu modo, ut promissæ præstes, dispicito: de ceteris meam esse præcipuam curam volo, nec meritis tuis inferior aut apud me, aut apud senatum populumque Romanum, erit gratia.

XLIV. Multa deinde sciscitantem, an citra periculum suscipi talis expeditio posset? sine cura esse Pompædus jubet. duo in hac deliberatione spectanda Cæpioni, & quantum fidei talia indicantis, & quantum peritiæ credere debeat. Fidei se existimare dedisse maxima omnium, quæ dari possint, pignora: neque recusare, si fallat, quin acerbissimis exemplis ipse liberique plectantur. Quantum ad alterum pertineat, eum se locum semper

*& inter suos, & apud Romanos imperatores tenuisse, ut de eo dubitaturum putet neminem.*

XLV. *Se, cum paucis consociis exisset e vallo, dedisse operam, ut tarde cognosceret exercitus, profectum imperatorem esse: nedum, ut quorsum, aut cujus negotii gratia exiret, quisquam nossët, nisi quem hæc scire interesset.* Hæc non modo credebatur incautus juvenis, sed etiam, postquam vocari concilium e vestigio jussisset, contra dubitantes tuebatur. Nec enim deerant, qui *cavendam hominis astutiam, nec, nisi explorato, quoquam proficiscendum* dicerent.

XLVI. Ceterum quia major potestas penes Cæpionem erat; simul metuentibus, qui resistebant, ne favere sociis viderentur; signis temere motis, qua Pompædus ad suorum castra præibat, exercitus rapitur. Ne id quidem curatum, ut asservaretur ille, aut taciti saltem custodes adderentur. Ut ventum ad locum insidiarum fuit, Q. Pompædus in tumulum quendam præcurrit, quasi dubitans, an inde conspici hostes possent.

XLVII. Ibi sublato, quod convenerat, signo, coortæ insidiæ Romanos, priusquam expedire arma possent, turbant, trucidant: cadit ipse Cæpio, præterea militum ingens numerus. quod ex clade superfuit, alio senatus decreto parere C. Mario jussum est. Cum ita post Drusum fax altera belli socialis extincta in Cæpione esset; non ideo excitatum ab his incendium conquievit. adeo facilius est humanis ingeniis miscere composita, quam turbatis mederi. Quamquam variis Italiæ regionibus certabatur, acerrimus tamen circa Campaniam Mars erat, ubi Samnites, C. Papio Mutilo duce, Acerras gravi obsidione premebant.

XLVIII. Eo cum L. Julius Cæsar consul cum suis legionibus, auxiliumque Gallorum millibus decem, & Numidico Mauroque equitatu occurrisset; Papius Oxyntam, Jugurthæ filium, qui habitus Venusiæ in custodia fuerat, in castra accessit, cultuque regio exornatum popularibus

ostentat. ex eo crebra earum gentium, tanquam ad suum regem, transfugia fiebant: donec fatigatus quotidianæ perfidiae exemplis consul, ceteros omnes in Africam remisit.

XLIX. At Papio tantum animorum supererat, ut, contemtim ad castra hostium ductis copiis, cum nemo contra egroderetur, cohortatus suos, vallum inciperet vellere. Romanus consilio, non metu, quieverat: & intentus in occasionem, ubi, quo voluerat, progressum hostem videt; præparatis omnibus, averfa castrorum porta circummittit equitatum, ipse cum cohortibus eruptionem validam facit, & Samnitum, nihil a tergo hostile metuentem, cum in se totum convertisset, cædendum equitibus suis præbet.

L. Tanta trepidatio & cædes fuit, ut, quamquam propinquo in castra receptu, sex tamen hostium millia caderent. Inde consul, credo, quia neque ad castra Samnitium oppugnanda satis virium erat; & Acerras adversus longiorem obsidionem firmaverat, ne annonam oppidanorum consumeret, exercitum abduxit. Hujus victoriæ tanta fuit lætitia, ut consul ab exercitu *Imperator* appellaretur; Romæ quoque, positis sagis, senatus ad vestitum rediret.

LI. Ne tamen eo minus varia belli fortuna esset, Æsernia colonia cum M. Marcello in potestatem Samnitium venit. sic quidem Livianæ reliquiæ. Sed Orosius aliter tradit: *Sullam cum viginti quatuor cohortibus Æserniam misit, maximo bello, & plurima cæde hostium, urbem sociosque servavisse*. Sane, si, quid scriptum a Livio fuerit, liqueret, ab auctoritate tanti viri difficulter recederem: nunc, quando non eadem negligentibus excerptis fides est, rem cogimur in medio relinquere.

LII. Neque enim aptissimum esset putare, Sullanam expeditionem non justam salutem Æserniæ, sed aliquod ad tempus levamentum attulisse. quis enim servatos esse dicat credatve, quorum ad aliquot forte dies, certe non ultra unum aut alterum mensem, dilata deditio esset? Sed

apud hoc genus scriptores tam crebra est hujusmodi hallucinatio, ut cautissimi quique lectores vix effugiant, quin subinde offendere & adhærescere cogantur: neque se possint, nisi aliunde forte sublevati, de confusa & temeraria rerum, interdum & pugnante secum congerie, extricare.

LIII. Istis quidem temporibus Æternios duplici fossa, valloque circumdatos, frumento adesto, quod ex agris in oppidum comportatum fuerat, ad extremum periculi venisse certum est. Unde mihi probabilis conjectura eritur, propter inopiam commeatuum, paulo post cum M. Marcello deditam, atque inde cognomen *Æternini* huic inditum esse: cum jam non ex bonis tantum rebus, sed etiam ex adversis, inciperent imponi; quemadmodum aliquanto postea M. Antonius, oræ maritimæ dissolutissimus curator, cognomentum Cretici tulit.

LIV. Hanc deinde receptam à consule Sulla urbem existimo. sane in potestate Italorum fuisse, indubitabili argumento est, quod eo bello sic est afflicta, ut jam ætate Strabonis inter urbes numerari desierit. Neque vero L. Sullam multa bello Marfico, priusquam consul fieret, fortiter feliciterque gessisse ignoramus. sed hoc quidem univérse traditur: quid autem figillatim unoquoque loco ac tempore fecerit, nec referunt, qui supersunt; nec supersunt, qui retulerunt.

LV. Ab eadem causa cetera quoque ejus belli latent, aut ex tortuosis obscurisque involucris vix eruuntur. Et hæc quidem difficultas quanto plus infructuosi laboris mihi peperit, tanto magis, ut speramus, apud æquum lectorem proficiet ad veniam, si forte expectatio ejus, magnarum quandoque rerum initiis excitata, deficiente materia subito destituitur. Nam in opere veritatem professio cum fingere alienum & puditum sit; nisi quod antiquitus traditum reperiam, quod asseram, non habeo: neque raro contingit, ut aliquam historiæ partem luculenter alicubi

§ LIV. Peditan. in Verr. 3. Strab. l. 5. Diodor. ap. Vales. Plut. in Sull. c. 8, Eutrop.



descriptam nactus, velut in copioso & navigabili amne, plenis velis invehar; atque idem mox veit in sicco destituar, cum illud flumen, more multorum, quæ, postquam aliquamdiu lætis alveis incesseerunt, subito sub terram absconditi disparent, evanuit.

LVI. Illud tamen vere gloriari possum præstitisse, ne quid intentatum relinquerem, quo accuratior hæc historia fieret: eamque adhibuisse diligentiam, ut neque ab ullo ingenio novum aliquid ex iis saltem, qui essent, auctori-bus erui posse putem: &, cum celeberrimos doctissimosque viros rogaverim multos, a nemine mihi ullius gesti ne minima quidem circumstantia, quam prior non adverterim, potuerit indicari.

LVII. Ceterum, ut ad socialis belli exponendos casus revertar, L. Casarem consulem cum triginta peditum, quinque equitum millibus reperio, locis iniquis exercitus ducto, in Marii Egnatii Samnitis insidias præcipitasse; fugientemque lætica, quod equi successione propter morbum ferre non posset, apud fluvium quendam (neque nomen traditur) cui pons tantum unicus fuerit, majorem copiarum partem amisisse.

LVIII. Teani deinde (Sidicinum fuisse conjecturis assequor) in oppido munito & copioso, concurrentibus ad eum strenue novis militibus, exercitum & arma (nam & hæc inter fugiendum projecta fuerant) reparasse. obsidebat adhuc Acerras in Campania C. Papius, ad quas liberandas omnis illa videtur a consule suscepta fuisse expeditio. Igitur, quamprimum utcunque instauratæ vires placuerunt, & ipse movit Acerras, castrisque positis confedit.

LIX. Socios prior clades, consulem recens, ut solito cautiore essent, admonuerat. Sic utrisque casum pugnae studiose vitantibus, aliquamdiu sine memorabili ullo eventu cellata castris castra habuerunt. Interea C. Marius, ad

quem Rutiliani imperii, post extinctum consulem, summa redierat, male spretum ab illo consilium secutus, suos intra munimenta exercuerat; donec hostes in eam securitatem adduxit, ut nunquam se visuros æquo loco Marium existimarent.

LX. Igitur cum sæpe copiis ante castra instructis potestatem pugnae frustra fecissent Marfi, adhibitam initio curam paulatim remiserunt. Sed ubi satis apud suos animi, & apud hostes negligentiae animadvertit, laceissentem aliquando ferociter hostem subito egressus prælio fudit, & fugientem ad proxima vineta infecutus est. Ibi ne transcendendis sepibus, quod ab hostibus factum ægre fuerat, ordines divellerentur, insidiisque forte latentibus aperiretur occasio, continuit suos.

LXI. Nec ideo minor aut clades hostium, aut populi Romani victoria existit: jam enim, cessante Mario, alias copias, a quibus fusi exciperentur, fortuna providerat. Casu quodam Sulla ex adversa parte vinearum, castris modo positis, commissam esse pugnam, nescio quo indicio, senserat. Quapropter quadrato agmine profectus, cum in palantes fuga hostes incidisset, majorem prope, quam facta inter pugnandum fuerat, stragem edidit. plane quasi fatale foret, ut coepta a Mario hic perficeret opera, majoremque gloriae partem in se traheret.

LXII. Supra sex millia Marforum eo prælio desiderata. Prætor quoque Marrucinatorum Herius Asinius occisus est. armorum aliquanto plus, quam pro caesorum numero, captum: quæ adeo passim fugientes projecerant, ut collectis deinde in unum reliquiis, ad septem millia inermium reperirentur. Neque ideo demittebat animos bellicosa natio. quin ultro, contractis undique copiis, Marium provocarunt ad pugnam; castrisque se tenentem circumvallare instituerunt.

LXIII. Sed ille placito semel consilio, quod mutari

§ LX. Liv. Epit. Appian. § LXII. Plut. in Mar. c. 54. Liv. Epit.

nihil dum attinebat, constanter inhaerens, ad eam ignominiae speciem, & suorum querelis, & hostium insultatione parum movebatur. Ferunt, eo tempore Q. Silonem, cui maxima inter Italicos ex opinione virtutis auctoritas erat, adequitantem castris, Marium his fere verbis inclamasse: *quin tu prodis ad pugnam, si magnus es imperator, Mari, vicissim Marium: quin tu, si magnus es imperator, nolentem pugnare cogis.*

LXIV. Dum inter populum Romanum, Italicosque focios ista geruntur, fama exitiabilis belli, per orbem terrarum sparsa, quidquid usquam latebat irarum, in apertum protulit. Igitur & reges Bithyniae Pontique, & vicinis Paphlagonum Cappadocumque vexandis finibus, & inter sese rixando, verecundiam imperii Romani paulatim exuerunt: & apud ipsos Italiae limites siti populi, antiquis odiis, occasione nova, moti sunt.

LXV. Ex quibus praecipue Transalpinæ Galliae, tum aliae nationes, tum a multis antea ducibus victi triumphatique Salluvii fuere. Credo super alia his addiderat animum, quod Narbonensis provinciae praetor M. Cato, ejus M. Catonis filius, qui consul in Africa mortem obierat, nuper erat ibi vita functus. Sed a C. Caecilio compressi sunt, nec ultra de belli ejus initio aut fine comperi. neque vero quis Caecilius ille fuerit, fatis scio: nisi quod C. Metello Cuprario genitum suspiceris, & ad hunc pertinere veterem inscriptionem putes, quam C. Caecilio C. F. Metello imperatori Italici, qui Argis negotiabantur, posuerunt. Opportuna tamen, non ad praesens modo gaudium, sed in summam rei, victoria fuit: quae nisi nutantes ubique civitates in fide retinisset, haud multo levius exarsurum in Gallia bellum fuerat, quam paulo ante conflatum in Italia saevius utrinque cladibus agebatur.

§ LXIII. Appian. Orof. 5, 18. Plut. Apoph. c. 29. § LXV. Agell. 13, 18. Liv. Epit. Glanderpii Onomast.

JOANNIS FREINSHEMII  
SUPPLEMENTORUM  
LIVIANORUM  
LIBER XXXIX.

IN LOCUM LIB. LXXIV LIVIANI.

---

E P I T O M E

LIBRI SEPTUAGESIMI QUARTI.

*Cn. Pompejus Picentes prælio fudit, & obsedit: propter quam victoriam Romæ prætextæ & alia magistratuum insignia sumta sunt. C. Marius cum Marfis dubio eventu pugnavit. Libertinorum primum militare coeperunt. A. Plotius legatus Umbros, L. Porcius prætor Marfos, cum uterque populus defecisset, prælio vicerunt. Nicomedes in Bithyniæ, Ariobarzanes in Cappadociæ regna reducti sunt. Cn. Pompejus consul Marfos acie vicit. Cum ære alieno oppressa esset civitas, A. Sempromnius Asellio prætor, quoniam secundum debitores jus dicebat, ab iis, qui fenerabantur, in foro occisus est. Præterea incursiones Thracum in Macedoniam populationesque continet.*

**I**NCIPIEBAT tamen emergere populi Romani fortuna, & pristinam imperii assertam armis maiestatem, rebellium fœdere suppliciiis. Picentes in Firmana colonia Cn. Pompeium, Afranio duce, obsidebant. Commodum acciderat,

ut Ser. Sulpicio, fufis Pelignis, otium efferet, ubi majus operæ pretium facere poffet, arma vertendi. Hunc ubi ad fe venturum effer Pompejus intellexit, per internuntios ita cum eo conftituit, ut dicto tempore, dum Pompejus eruptione facta detinet hoftem, eundem a tergo Sulpicius aggreffiatur.

II. Non prudentius confilio, quam feliciter eventu, cœptum fuit. Cum enim Picentes, novos in hoftes animos mirati, ad repellendos intra mœnia Romanos contemptim properarent; ingenti coorto certamine, castra cum nullo, aut invalido præfidio relicta Sulpicius expugnâvit, incenditque. fimul clamor aures omnium, fimul confpectus ardentium castrorum oculos perculerat: cumque, tam vicino hoftium alio exercitu, non tralatitii difcriminis res efferet, & omnia adhuc majora vero repens terror faceret; nullum ultra prælium, fed fuga tantum & cædes fuit, utique, poftquam Afranius, fiftere fuos fruſtra conatus, pugnando occubuerat.

III. Cn. Pompejus, inſigni victoria potitus, ne hoſtibus respirandi ſpatium relinqueret, Aſculum refugientes quam potuit celerrime perfecutus, obſidione oppidum clauſit. Hæc demum victoria Romanis ex diuturno timore fiduciam bene finiendi belli reddidit: ut, quemadmodum ob proſperam L. Cæſaris pugnam togas reſumſerant, ita nunc latum clavum, aliaque magiſtratum ornamenta & inſignia, reciperent. Sub idem ferme tempus prælium C. Marii cum Marſis dubio eventu diremtum eſt.

IV. Quamquam enim ducere bellum Marius ſtatuiffet, ad extremum, ſive tædio victus, ſive ſpe illeſtus, & occaſione oblata, contulit cum hoſte pedem, prælioque decernendi poteſtatem fecit. Neutram eo die aciem ſatis conſtanter pugnaſſe proditum eſt. Nam & retulerunt Romani pedem, & hoſtes conſummare victoriam non auſi, ſua & ipſi in caſtra reverterunt. Unde increpantem ſuos

Marium inter alia dixisse ferunt: *utrumne vestram majorem fuisse putem, an vero hostium ignaviam, hareo. neque vos ora illorum, neque illi terga vestra iniuri sustinuerunt.*

V. Non diu post hoc proelium C. Marius famam suam fenescere videns, per causam valetudinis imperio se abdicavit, cum, *se fesso corpore & nervorum vitiis debili, expeditionem supra vires pudore suscepisse*, diceret. Sane gravibus ante bellis eam gloriam, eosque honores consecutus fuerat, ut jam sexto & sexagesimo ætatis anno bona cum venia gratiaque omnium posset quiescere; si eundem sibi rerum modum facere cupiditas sciret, quem natura demonstrat, & ratio suadet.

VI. Inter hæc novæ defectiones sociorum causam præbuerunt senatui, de inusitato hætenus genere militum cogitandi. Nunquam enim antea libertinorum delectus erat habitus, nili perraro, cum maximi bellorum terrores urbem circumfisterent. Tum vero cohortes duodecim scriptæ, & per præsidia maritimæ oræ Cumas usque distributæ, fortem fidelemque operam imperatoribus & reipublicæ præstiterunt. A. Plotio legato negotium datum, ut Umbros tumultuantes coërceret: Etrusci (nam hi populi recens rebellare coeperant) L. Porcio prætori provincia data.

VII. Cum utroque populo signis collatis dimicatum: victoria, non incruenta tamen, penes Romanos fuit. At senatus, cum novi subinde hostes de veteribus sociis prodirent, ne, qui adhuc in fide persistebant, iisdem causis ad res novandas incitarentur, salubri consilio auctor L. Julio consuli ferendæ legis fuit, *ut, qui ad eam diem populi per Italiam jura fœderis Romani sancta atque inviolata habuissent, cives Romani fierent.*

VIII. Eam legem L. Julius consul ex senatusconsulto & populi jussu tulit. eaque lege universo Latio, & quibusdam Etruscorum, civitas data est. Id non ab iis modo, quibus concessum erat, gratanter exceptum benefi-

§ IV. Plut. in Mar. c. 54. § VI. Appian. Liv. Epit. & l. 10, 21. Macrobi. Saturnal. 1, 12. Oros. Flor. 3, 18.

cium est; sed late per omnem Italiam, ad similem spem erexit animos, populoque Romano mirifice conciliavit. Igitur eadem opera, & ii, quibus fidelibus hætenus fociis usa respublica fuerat, firmissimo adstricti vinculo; &, qui fluctuabant, retenti, bellumque meditantibus tantum non excussa de manibus arma sunt.

IX. Sed neque postea finire bellum alia ratione potuit, quam ut subinde iis, quorum minor in resistendo pervicia fuerat, tum promiscue fociis omnibus Italicis, Lucano tantum & Samnite exceptis, & ad extremum his quoque civitas, pro cuius impetrando jure tantum sanguinis erat fufum, daretur. Dum Italiam intestina bella varie premunt vastantque, non multo quietioribus Asia usa rebus est, crebris regnorum mutationibus, & incerto maxime Bithynorum Cappadocumque statu.

X. Bithyniam, nuper mortuo Nicomede Prusiæ filio, alius Nicomedes, superioris ex Nyfa uxore filius, auctoritate senatus Romani possederat. Sed uti nunquam certamina desunt inter regios juvenes, controversiam ei de regno frater Socrates, cognomento Chrestos, faciebat. Hic, cum viribus minus posset, & Romanis opibus sustentari fratrem videret, ad Mithridatem se contulit; neque Romanis concessurum, & Bithyniæ semper inhiantem. Igitur Mithridates Nicomedem saltatricis filium, & regia fortuna indignum increpans, Socratem, licet minorem natu, tanquam materna origine potiore, exercitu dato, deduxit in regnum.

XI. Duo hinc eodem tempore reges exules, Ariobarzanes Cappadociæ, Nicomedes Bithyniæ, cum odio Mithridatis favorabiles Romæ essent, quamquam dura imperii tempora erant, impetrarunt tamen, ut, quando exercitus non posset, saltem legati mitterentur. Hæc anno superiore acta fuerant, legatique erant profecti M'. Aquillius vir

§ VIII. Vellej. 2, 16. Cic. pro Balb. c. 8. Agell. 4, 4. Appian.  
§ IX. Vellej. Strab. l. 5. Appian. § X. Appian. Mithrid. Memnon.  
Justin. 48, 7.

consularis, & ex prætoriiis Manilius Mancinus. Scriptum quoque fuerat L. Cassio, Asiam cum paucis cohortibus obtinenti, ut restituendis regibus legatos adjuvaret.

XII. Idem & a Mithridate postulatum erat. Sed ille neque defendere ausus, quem constituerat regem, nec adjutum volens, quem expulerat, quievit: legatisque Romanis quædam incusantibus, objecit invicem *quas ipse passus injurias esset, quantamque vim auri, ut Romanos publice privatumve demereretur, erogasset.* Ita legati & Cassius, delectibus per Gallogræciam ac Phrygiam habitis, & adjuncto, qui penes Cassium ante fuerat, exercitu, Nicomedem in Bithyniæ, Ariobarzanem in Cappadociæ regna reduxerunt.

XIII. Socrates ad Mithridatem confugit, & ab eo, ne receptator videretur ejus, qui hostis ab senatu judicatus esset, interfectus est. Nondum enim nudare animum constituerat, ne forte Romanos ad sociorum repetendam amicitiam adigeret; quo diutius intestinis discordiis relinquerentur, plus virium amissuros. interea seque & Tigranem otiose instrui ad tantum bellum, & præparari posse. Quippe duobus offensis potentissimis regibus (nam Tigranes Cappadociam tenuerat) de bello Romanis inferendo facile convenit.

XIV. Cum enim hinc inde legationes commearent; eadem omnibus & acceptæ injuriæ indignatio, & vindicandi cupiditas, & spes in armis erat. *Hoc esse tempus illud, quo tandem deprimi & coerceri superbia Romanorum posset. Homines assuetos impotenti imperio, cum domi satis tuti esse nequeant, arbitria regnorum agere: nullo respectu, quomodo meriti, aut quomodo laturi injuriam lædantur. Tantas esse duorum regum opes, ut vel alterius arma florentem populum Romanum laceßere possint: nedum ille debilis & afflictus conjunctos sustineat.*

XV. Fit inter illos pactum, ut contra communem hostem societas armorum bellicque esset: quod urbium agrorumve captum

§ XI. Appian. Justin. 38, 3. § XII. Diodor. ap. Fulv. Ursin. Appian. Liv. Epit. Justin. 38, 5. § XIII. Justin. 38, 2.



*foret, Mithridati; homines, & quidquid agi ferrique posset, Tigrani cederent.* Quippe Tigranes vasta terrarum spatia, & continuis bellis exinanita obtinebat; tum quoque Tigranocerta condens, amplissimam urbem, hominibus maxime habebat opus: Mithridati populosæ regiones suberant; & accolæ habebat Scythicas nationes, quæ, cum agros nullos, aut steriles haberent, multitudo tamen hominum majorem in modum abundabant.

XVI. Igitur & ad istos, & in vicinam deinde Sarmatiam mitti legatos placuit, *larga stipendia, honoratam militiam, luculentas possessiones* ostentaturos, *operæ contra Romanos navandæ cæta & magna præmia.* Parthi quoque Medique, & Iberi, cum Gallogræcis Bastarnisque in foedus asciscuntur. Hæc ferme rerum Romanarum facies erat, cum Cn. Pompejus Sex. F. Cn. N. Strabo, L. Porcius M. F. M. N. Cato consules, magistratum inierunt. In Campania L. Cæsar contra C. Papium Mutilus castra ad Acerras cum proconsulari imperio habebat, neque certamen aliquod majoris alææ movebatur: tantummodo frumentatione & commætu invicem prohibebant.

XVII. Quibus rebus superior Cæsar, cujus castris fertilissimus ager suberat, eo tandem necessitatis adegit hostem, ut prior motis castris profectionem adornaret. Non poterat in tanta vicinitate castrorum latere, quid ageretur. ergo, præparatis omnibus, tam opportune proconsul signa in abeuntem hostem intulit, ut acie tota turbata, ad octo hominum millia prosterneret, armorum etiam vi magna potiretur. nam super ea, quæ cæsis exciderant, a fugientibus passim fuerant abjecta.

XVIII. Neque deterius ab aliis quoque Romanis ducibus copiisque res sub eisdem dies gestæ. Cn. Pompejus consul Asculanos strenua obsidione urgebat: neque Picentibus ad resistendum vires erant, multis adversis præliis vehementer accisæ. Igitur, ut socios opem orantes obsidioni

eximeret, ingens Marforum exercitus venit. Neque territorius consul, signis collatis magna & felici pugna cum his dimicavit. Duodeviginti hostium millia cum imperatore Franco (nisi forte Afranius fuerit) cæsa sunt.

XIX. Quatuor Italicorum millia, cum densatis ordinibus e media cæde in jugum editi montis evalissent, nivibus & vi frigoris oppressi, in miserabile spectaculum humanæ fragilitatis ita dirigerunt, ut procul visentibus species in acie stantium objiceretur. Sed & propius suggesti patentibus omnes oculis, aperto ore esse videbant, partim stirpibus aut faxis, partim armis innisos, ut mortuos non aliud prius indicium, quam nullo motu mutatus corporum habitus, argueret. Hæc apud Orosium ita sunt tradita, scriptorem haud accuratissimum, & in eadem hac historia secum sæpe pugnantes.

XX. Aliorum probabilior est narratio, Marfos & alios superi maris accolæ, Umbriam Etruriamque adhuc in partibus esse ratos, quindecim hominum millia, per longinquos & difficiles calles, velut auxilio Tuscis misisse. Eos mutata omnia, & cum Cn. Pompejo consule Romanorum exercitum iis locis offendisse: amissisque mala pugna quinque millibus, reliquos per hiemis & locorum asperitatem ad sua redire nisos, cum ad reliqua mala fames accederet, glandibus inopiam sustentasse; donec dimidia ferme pars evaderet, ceteris diversa peste, sed maxime frigoris violentia, extinctis.

XXI. Hæc a Pompejo primis consulatus sui mensibus gesta videri, præter Epitomæ Livianæ seriem, quæ mihi in illis temporum labyrinthis plerumque pro filo Ariadneo est, argumenta rerum ipsarum cogunt. nam & hiemali tempore gesta convenit: & ne ad postremos consulatus ejusdem menses referamus, Marforum expeditio vetat, quam ad Tuscos veluti socios susceperunt; quorum mutata esse consilia, post tempus adeo longum, nescire non potuissent.

igitur ab hac demum pugna consulem Pompejum ad obsidionem Asculanorum revertisse verius arbitror, praesertim quia jam de valetudine L. Caesaris audire potuerat; quem interea, dum ad consulatum petendum abit, deinde in gerendo abest Pompejus, castris ad Asculum praefuisse cognovimus.

XXII. Is enim, postquam, Papio victo, Acerras obsidione liberaffet, bellum Asculanum, quod omitti non placebat, haud dubie senatus voluntate administravit: quousque languido corpore, cum deficere se animadverteret, C. Baebium praesse copiis jussit, si quid sibi accidisset, donec senatus aliter statueret. Eadem igitur hieme, cum ad Asculum Pompejus accessisset, patriae timens Judacilius, Italicorum praetor (erat enim inde oriundus) cum octo cohortibus auxilio obsessis properabat. nuntiis quoque secretis monuerat, *ut, quamprimum tumultus ad praesidia Romana exauditus esset, ipsi quoque validam eruptionem ex urbe facerent, ut hostes ancipiti periculo terrentur.*

XXIII. At illi per ignaviam quieverunt. nec eo fecius Judacilius per medios hostes in oppidum cum parte suorum penetravit. Ibi furens ira & dolore acriter corripuit Asculanos, vocatosque in concionem severissima oratione terruit. *Paulo ante summa mihi votorum erat, inquit, ut penetratis hostium castris, vitato periculo sospes vos intuerer, vos ex hoc loco alloquerer. nunc omnia repente mutata sunt. mallem intra vallum Romanum occubuisse, quam ut hanc tantam ignominiam viderem, vos intueri, hos compellere cogerer, quibus pro summa sua infamia, vel quid nominis sit imponendum, nescio.*

XXIV. *Militesne appellem, qui praetoris imperium spernitis; aut cives, qui vestrorum periculo nihil movemini? Asculani sane vocemini, dum licet; mox enim, si quid prospicio, nullum in Piceno, praeterquam in ruinis, Asculum erit. Nec vero expeditius mihi sit facinori vestro, quam vobis, conveniens nomen reddere.*

*Errorem excusare non potestis admoniti. dementia levis merito vocabulum est. ne metum quidem, aut proditorem simpliciter appelles; in unum confluit multorum atque diversorum scelerum summa turpitudine.*

XXV. *Cum sciretis, quo tempore Romana munimenta periturus accederem; cum sentiretis tumultum, audiretis clamorem, hostium trepidationem cerneretis; exire non potuistis, ut saltem conspectu ipso terrorem Romanorum augeretis, & quia vestrae obtorpuerunt manus, vel ostensis eminus armis, civium vestrorum faveretis victoriae. Quod enim tantum periculum fuit, aut quae adeo periculi species, ut tamen sub aliquo colore vestra latere possit ignavia? Paucae cohortes ab hostium tanto exercitu infestatae, a suis relictæ, perfringere ista castra potuerunt, quorum vos conspectum horretis. quidquamne potest esse certius, quam qui tam exilem manum prohibere transitu non potuerunt, ne munimenta quidem sua fuisse defensuros, si vos viri fuissetis?*

XXVI. *Tantumne his muris, & qui circa sunt, montibus confiditis, ut tutos fore putetis loco, etiamsi audacia & armis non defendamini? Nihil tam munitum est, quod contra mulieres expugnari non possit a viris. Sed quid ego verbis vos ulciscor, quos paulo post Romanorum crudelitas acerbius, quam imprecari quisquam inimicus posset, est vindicatura? Hodie demum aut heri Romanum audivistis imperium: an tot jam ætatibus cum majoribus vestris universa Italia persensit?*

XXVII. *An exciderunt animis Romanæ servitiæ tam expressa monumenta, & quibus illi criminibus acerrime irascantur? Aliudne majore apud illos pœna vindicari solet, quam ubi gentes Italicæ latentem sub blanda sociorum appellatione servitutem aspernantur? Patrum memoria nescio quid moverunt Fregellæ: paucos intra dies dirutæ ad solum deletæque sunt. olim Samnites Bruttique & Lucani cum Pyrrho senserunt: quantis igitur claudibus, quæ vastatione sunt a L. Papirio, Sp. Carvilio castigati?*

XXVIII. *Ad Hannibalem Capua defecit. ergo tantis odiis a Romano oppugnata est, ut potius amissurus Capitolium &*

urbem, quam non expetiturus pœnas a Campano populo videretur. Et illi tamen levius peccaverant. quæ vobis usquam repõta spes est, cum iratis dominis vestra vos ignavia tradiderit, Asculani? parcat scilicet, a quibus interfectos proconsules, interfectos legatos suos, fidem pacis, majestatem imperii, fœderum, hospitii, cognationis, jura omnia violata esse meminerunt? Nisi forte blandiuntur sibi quidam, qui jam olim Romanis approbare fidem innocentiamque suam student. a quorum nominibus si interim abstineo, non est, ut se sperent fallere.

XXIX. Non esse mihi ignotos, quorum invidia metuere spre-  
tum imperium, deserti cives & propugnatores vestri, prodita postremo patria est, matura noxiorum pœna satis ostendet. Quando enim aliorum scelere, aliorum amentia eo deducta res est, ut imminens excidium patriæ indubitanter prospiciam, neque ego superflus ei ero, nec illos patiar, penes quos malorum istorum culpa residet. Cum deinde satis diu atrocibus verbis concionem, præcipue veteres æmulos, qui ob pristinam simultatem tum quoque negligendi imperii auctores populo fuerant, vehementem in timorem adduxisset, (nam armatos, & qui una venerant, & qui in præsidio erant urbis, dicto audientes habebat) ad postremum corripit quosdam Asculanorum principum jussit.

XXX. Quibus ultimo supplicio consumptis, ipse cum ceteris, & honoratissimo quoquo amicorum magnifice epulatus, vinum affatim hausit. deinde cum destinatum morti tempus advenisset, postrema oratione affatus præsentem, in hujusmodi verba prorupit: alterum eorum, quæ in concione promiseram, exsolvi, ne quem proditorum prodita perditaque patria lætari, aut saltem superesse pereunti paterer: nunc alterius etiam præstanda fides est, ne & ipse supersim. Quid contrahitis frontes, amici? quid abominantibus similem vultum fingitis? nihil triste locuti sumus.

XXXI. Non temere mihi captus est moriendi impetus: neque pœnitet incepti pigetve. Idem animus, ad efficiendum, quod pro-

posui, sufficere, qui ad concipiendum sufficit, & quod consilium dictavit ratio, virtus exsequetur. Sane nihil miror, vos moveri cogitatione earum rerum, quas vulgaris error omnium esse acerbissimas finxit. nam & nos in eadem opinione fuimus: & nimirum diu bonorum omnium summum atque maximum vitam esse sumus arbitrati. Sed quo nimirum propius ad consinia vitæ & mortis accedo, dilucidius, quid inter utramque sit, perspicio.

XXXII. Idcirco idem ille, qui sæpe Deorum velut invidiam accusavi, quod mortale hominum genus fecerunt, nunc misericordiam laudo, per quam effectum est, ne ad perpetuam vitam, pejus quam ad metalla damnati, sine remedio, sine spe, aut finis aut modi, gravissima quæque & acerbissima tormenta patere-remur. O nos ingratos, qui optatissimum Deorum beneficium hælenus, tanquam insignem injuriam, criminati sumus! Neque hic numinum benevolentia stetit. Miserta stultitiæ humanæ, miserta fortunæ, ne quis volens nolensque in iisdem arumnis perpetuo ageret, mire dispensavit utramque sortem, ut moriendum vel invitis esset, vivere nemo cogere-etur.

XXXIII. Nam in manu nostra posuit, ut, quem aliquando finem allatura natura esset, eum voluntas, quæcunque optavisset, repræsentaret. Idcirco nemo me putet infelicem, si hoc tempore vita abeo; quod omnium esse oportunitissimum judicavi. Ad annos forte triginta, aut quadraginta, in pari mecum conditione omnes æquales mei erunt. Sed illorum multi pleraque interea temporis patientur, quæ morte tristiora esse ipsi fateantur: ego latus lubensque, non sine solatio cæsorum sæpe hostium, punitorum amulorum, servatæ, quantum in me fuit, patriæ, liber & meæ spontis moriar, neque lamenta matrum atque puerorum, aut interitum patriæ, aut exultantem hostem videbo; neque dominum Romanum patiar, quod nuper unum omnium malorum calamitosissimum simul atque turpissimum esse, Italia tota judicavit.

XXXIV. Ego neminem facere eadem aut jubeo, aut veto: nec, quam mihi sumo libertatem, aliis adimam. ceterum non sit alienum a rationibus vestris, Asculani, si, quem ad depellendam calamitatem sequi ducem voluistis, saltem ad effugiendam sequamini. Hæc locutus venenum poposcit, epotoque, con-

scendit rogam, quem in templo quodam exstruendum curaverat. Factum ejus imitatore neminem invenit, cum laudatores plerosque habuisset. Nec, credo, deerant, qui constantiam mortis probarent, consilium reprehenderent, ut injustum, & intempestivum.

XXXV. Nam & alii sapientiæ magistri, qui tum quoque præ aliis hominibus ratione rectissime uti credebantur, temeritatem consciscendæ necis damnaverunt: & ne molliem fuisse putes, fortissima omnium secta, quæ dolorem ac molestias ne quidem numerandas in malis putat, in eadem sententia fuit. Sane, qui leges universi norunt, & quomodo ab uno & unius sint omnia, dubitare nequeunt, quin ab illius voluntate deflectendum sit nusquam, neque fas sit cuiquam, ex ea, quam assignavit ille, statione, illius injussu decedere. Idcirco quemadmodum juris civilis auctores sanxerunt, fugitivum sui ipsius furtum committere; ita perspicuum est, longe gravius crimen incurere, qui vita sibi adimenda, quam a se non habent, semetipsos, non sponte domini, usibus ejus suffurantur.

XXXVI. Sed neque, si res ipsa vacaret crimine, deligisse tempus idoneum moriendi C. Judacilius videbatur. *Nam si de se tantum esset sollicitus, in eo neque laudem magnam esse: & ita comparatum a natura, ut ubique præsto sit mori volentibus occasio. Nuper Alpinas gentes, deinde Teutonicas multorum millium interitu declarasse, ad mortem properantibus undelibet patere viam. Sed illum patriæ ingentem prætulisse caritatem, cui si prodesse voluisset, non fuisse subtrahendum unicum libertatis defensorem, ducem summum, impigrum militem.*

XXXVII. *Non ita desperatam fuisse rem Asculanam, quin sperare meliora fata licuisset. ita præcipitato exitu prætoris & præsidium detractum salutis publicæ fuisse, & ad merum extremæ fortis omen additum. Perrupisse cum per medios hostes, & ex tanto periculo multos secum incolumes in oppidum induxisset.*

*Reperta & in illo multa armatorum millia, neutiquam pœnitendæ virtutis & animorum. Ad hæc urbem ita sitam, ut difficulter oppugnari posset: ita rebus omnibus instructam, uti necessum & facile fuerit tantum bellum diu ante meditantibus.*

XXXVIII. *Ab hoste potius petendum felicissimi eventus exemplum fuisse. Nullam jam olim futuram fuisse Romam, si principes ejus ad quemvis duriores casum, spem omnem præcidere festinata morte voluissent. Non sic fecisse ne senes quidem Romanos, qui, Gallis urbem occupantibus, ad utramque fortunam parati, nec fugere vitam, nec retinere curaverint. Juventutem certe, quamquam numero invalidam, copiis omnibus destitutam, tamen insigne mortalibus ostendisse documentum, non esse desperandum in malis, sed relinquendum casibus spatium reponendi, quod abstulissent.*

XXXIX. *Multos adhuc per Italiam duces sociorum, magnas passim copias esse: neque mirandum, si, post multa prospera, uno aut altero loco mutabilitas humanarum rerum appareret. Hæc ob alia incommoda dicebantur, & quia res in Campano agro secundiores Romanis erant, ubi L. Sulla Scabias oppidum expugnatum direptumque a. d. pridie X Kal. Majas delevit.*

XL. *Dum ad eum modum Italicæ regiones pervastantur, ipsa quoque caput gentium Roma multis e bello difficultatibus perurgebatur. Inter quæ fœdam in urbe seditionem excivit fœnebre malum, quod afflicta temporum acerbitate patrimonium, pleramque civitatis partem ære alieno obruerant. Olim lata lege pecuniam in fœnore ponere vetitum fuerat, pœna quoque addita, si quis ausus esset fœnerari. legem necessitas hominum, & inolita consuetudo, longo situ obtexerat. Igitur morosi debitores, cum, fœneratoribus ex pacto sortem & usuras reposcentibus, belli mala, & ex iis inopiam suam partim vere, alii falso, utrique frustra obtenderent, legem pridem extinctam velut ab orco revocabant.*

XLI. *Inde cum ingens certamen exarsisset, ferverent-*



que litibus omnia, prætor A. Sempronius Afellio, cui jurisdictionis urbana evenerat, rem ex æquo bonoque componere conatus, frustra fuit. nam, ut fieri amat, apud paucos iusti honestique valebat respectus, cetera turba, aliis indebitum improbe exigentibus, aliis perfide retinentibus debitum, magis magisque contentione & simultate implicabatur. Ibi prætor iudices dare cœpit, qui singulorum cognoscerent causas, & inter legem atque usum varie oppressam æquitatem indagarent.

XLII. Ea res tantam commovit apud creditores commotionem, ut omnia prius audenda putarent, quam id ius referri paterentur, per quod non modo carendum fœnore, sed ultro pendenda multa foret. Igitur L. Cassio tribuno plebis concitante, secunda diei hora, palam in foro, magistratum populi Romani, tum maxime sacra Diis facientem, fœdo exemplo peremerunt. Pro æde Concordiæ Gemellis faciebat, circumstante velut ad sacrificium turba. Ibi ab uno quodam lapide petitus prætor, abjecta patera, contento cursu per forum ad Vestæ fugiebat. Sed exclusus ab aliis, qui præcurrerant, & cum in tabernulam quandam se abdidisset, in ipsis magistratus & sacrificii ornamentis discerptus est.

XLIII. Ferunt tam vecordem fuisse hominum violentiam, ut quidam, apud Vestales latitare Afellionem rati, eo irruerint, unde viriles oculos religio majorum, & multarum ætatum perpetua veneratio submovebat. Neque admirabilior in patranda cæde audacia fœneratorum, quam in celandis ejus auctoribus industria fuit. Senatus, *si quid ejus rei judicasset, libero pecuniam, servo libertatem præmio fore, edici jussit.*

XLIV. Sed ea cura & potentia creditorum fuit, ut in tam atroci cæde, palam luce in celeberrima parte civitatis patrata, index nemo existeret. Hoc puto maximum incitamentum fuisse jubendæ legis, quam M. Plautius Sil-

§ XLI. Liv. Epit. § XLII. Val. Max. 9, 7. Appian. § XLIII. Val. Max. Appian.

vanus tribunus plebis de vi publica tulit. tulit & de Judiciis idem Plautius, adversus equitum improbitatem, adjuvantibus nobilebus, *ut singulae tribus quotannis viros quinquenos denos ex suo numero suffragiis crearent, eo anno iudicatu-  
turos: non excepto, quibus ex ordinibus legerentur.*

XLV. Eo factum est, ut senatores etiam in eo numero, itemque de plebe nonnulli essent. Rogationem Plautiam multi suaserunt disertis & nobiles viri, & inter alios C. Julius L. F. Cæsar. Neque intercedere honeste quisquam poterat, quo minus de vi publica iudicium lege constitueretur. plus fuit cum equitibus negotii; & res ipsa tum difficilior, tum etiam majus, ultra pars obtinisset, victoriæ præmium. Idcirco multis hinc inde agentibus, qui volebant Plautiam legem, *olim iisdem de rebus sapientissime constitutum asseverabant. neque aliud ad consensum ordinum remedium esse.*

XLVI. Cum senatus judicaret, nimiam plebi Patrum esse potentiam visam, etiam quoties non inique judicaretur. Accessisse deinde quorundam improbitatem, aliorum avaritiam, qui amicos aut stipendiarios suos quomodocunque eripere periculis, & eorum causa corrumpere iudicia sueverint. Alios cupiditate magistratum, aliorumque beneficiorum populi, non leges, sed voluntatem vulgi, aut eorum, qui gratiosi apud vulgum essent, spectavisse. Rursus in plebe, ne iudicia illi relinquerentur, velocitatem & vehementiam affectuum, negligentiam in inquirendo, remeritatem in iudicando, & apud obnoxios & egenos paratum gratiæ aut præmiis locum, displicuisse.

XLVII. Nihil igitur neque tum fuisse melius, quam ut ad medium velut ordinem irctur, nec in posterum fore. Sic esse constitutum in omnibus ferme civitatibus, ut principes procliviores ad injuriam sint; imperiti & venalis multitudo: medii inter utrosque neque gravitatis & prudentiæ egeant, neque nimis opibus ad impotentiam sollicitentur: æqualiter ab alterorum sordibus, & ab alterorum ambitione remoti. Neque causam esse, cur

equitibus hæc inferatur injuria, ut quasi male exercita judicandi potestate priventur.

XLVIII. Sane invidiosum id senatusconsultum fuisse, quò legis Variæ dilata judicia sint: sed nemini dubium esse, quin alia re nulla offensi Patres fuerint, quam incorrupta, & gratiæ minisque juxta impenetrabili judicium severitate. Crimini sane datum, quod damnati sint aliqui, quos innocentes fuisse amici eorum ac propinqui distarent: sed nullam adeo perditam in judicium afferri causam posse, ut non aliquibus, & maxime iis, quorum salvos esse reos interest, valde probabilis videatur.

XLIX. Quod si forte aliquando sit erratum, nec equites omnis erroris expertes esse, nec ceterorum quemquam id sibi vere polliceri posse. Communem mortalitatis infirmitatem non ita certis hominibus exprobrandam, quasi ceteri alieni ab ea esse videantur. Olim & in celeberrimis Græciæ civitatibus viros præstantissimos, & Romæ Coriolanos, Camillos, Scipiones damnatos esse, cum nondum equites Romani judicarent. Hoc nimirum jam diu quorundam artibus volvi agique, ut, quatenus abrogari judicia nequirent, saltem ii judices legerentur, apud quos ad nobilitatem, gratiamque & potentiam reorum respectus, & ex cognatione sanguinis, similitudine fortunæ, fortassis & culpæ, parata absolutio foret.

L. Dicebatur contra: falso vocari in suspicionem Patres, quasi judicia legesque ob conscientiam formidarent. Neminem ejus esse ordinis, quin se suosque primum omni culpa vacare optet: deinde, si postuletur reus, apud æquos judices defendi recuset. Neque ideo ab senatu interpositam auctoritatem esse, ut subterfugere judicium rei quirent; sed ut latrocinio verius, quam judicio, equitum, si finis non posset, saltem modus imponeretur. Nihil aliud a Diis immortalibus precari Patres, quam ut legum sacra testaque semper sit in civitate majestas. neque segniter, aut gravate jussuros, ut & Variæ legis, & ceterarum judicia reddantur, quamprimum illorum fuerit emendata ratio.

LI. Neque enim consilium esse, iniquis & furentibus hominibus hanc ultra potestatem dari, ut legem veluti sicam distringant in colla innocentium, & quidquid in civitate sit virtutis

aut gloria eximium, tanquam sublimia papaverum capita decutiant. Id enim instituisse eos agere, qui hactenus plurimum in judiciis polluerint: horumque amentia paucos dissimiles, vellent nolent, accedere coactos. neque mansurum aliquid dignitatis fuisse, ni tardo quidem, sed tanto magis necessario decreto, senatus auctoritatem suam interposuisset.

LII. Eundem, ut omnibus civibus innocentiam suam approbet, hoc imprimis agere, ut legis *Varia* judicia exerceantur: quo omnes intelligant, hactenus multos infantes a nocentibus damnatos esse: & illo crimine neminem magis, quam judicum quosdam, & ante omnes auctorem legis Q. Varium teneri. Neque recusandum equitibus rogationis *Plautia* modum esse, quo delectus judicum ad tribus referatur. Satis in his polere equites: neque populo Romano tam hebetes oculos esse, ut non viderit, qua quisque religione judicem hactenus egerit. nec ergo dubitandum, quin sit optimum quemque ad eandem curam studiose revocaturus.

LIII. Post multam disceptationem hæc postremo sententia tenuit. Eodem anno, postquam actum de civitate danda parti sociorum erat, lex *Plautia Papiria* lata est, a M. Plautio, C. Carbone tribunis, ad regendum jus civitatis pertinens. continebatur, ut, qui *fœderatis civitatibus adscripti* fuissent, si tum, cum lex ferebatur, in Italia domicilium habuissent, & si sexaginta diebus apud prætorem essent professi, cives Romani haberentur. Q. Metellus, Ap. Claudius, P. Gabinius prætores, professos apud sese, in tabulas retulerunt.

LIV. Auctus in immensum Romanorum civium numerus, cum inter tumultum belli, seditionesque domesticas, perplexa variaque difficultate civitatem implicaret, movit senatum, ut de remedio quæreretur. Quippe novi cives, si, quod postulabant, pari omnino jure cum veteribus essent, parum aberat, quin capta ab Italis Roma videretur. numero enim longe superiores erant; &, ne omnia ad se traherent, more ingenii humani, quod nulla prosperitate satiatur, haud immerito timebatur.

LV. Per censores optima & tutissima definiendi juris eorum via erat: sed tempus, quo ex veteri more fieri oportebat, nondum propinquabat. Tandem, ut verum est, utilitati publicæ pristini moris observatio cessit; quod creari censores e republica esse, nullo modo dubitabatur. P. Licinius M. F. P. N. Crassus, L. Julius L. F. Sex. N. Cæsar creati, novos cives tribubus antiquis quinque & triginta non immiscuerunt, sed seorsim recensitis novas constituerunt tribus, quæ post antiquas vocarentur.

LVI. Sic fiebat, ut qui numero superaturi priores cives fuerant, si suffragia iisdem in tribubus ferre sinerentur, ii, reiecti ad extrema, plerumque supervacui fierent, nec ullum in publicis consultationibus momentum facerent. cum enim omne populi scitum majori tribuum parte iubente perinde haberetur, quam si iussum ab omnibus fuisset: simulatque tribus, quæ prius vocatæ fuerant, numerum illum implessent suffragiis, decretum erat; nec ultra reliquæ rogabantur.

LVII. Et tum quidem, non animadvertentibus fociis, aut quolibet pacto civitatem adipisci properis, non inutile id consilium fuit. procedente tamen tempore novas ea res excitavit discordias. Ab iisdem censoribus, quamquam pars populi nulla censa esset, lustrum tamen septimum atque sexagesimum conditum est. Id quoniam sine decreto augurum fuerit, infelix populo Romano fuisse, Veranius in auspiciorum libro prodidit. Opera censoria nulla locata reperuntur; cum vitiis & luxu certamen fuit: quæ peffis nimis opibus orta, etiam in paupertate & ære alieno remanebat. ac iidem, qui iustissima debita expungere non poterant, per summam turpitudinem, pecunia creditorum, quamlibet egentium, ad suam luxuriam abuti postulabant.

LVIII. *Unguenta* igitur *exotica*, hoc enim vocabulum in edicto fuit, *vendi*; *vinum item Græcum Amineumque* (in ea regione, ubi postea Falernum fuit, Aminei fuerunt) *ostonis*

§ LV. Fragm. Capitol. Appian. Vellej. 2, 20. § LVII. Cic. pro Arch.

*aris singula quadrantalia venire*, vetuerunt. Per eadem tempora, cum divisas imperii vires accolarum ferocia sperneret, occasione invitante multa passim latrocinia facta: & frequentibus Thracum incursionibus vexata Macedonia est. laborante enim reipublicæ summa, provincias præfidiis nudari necessum erat: & quamvis egregii prætores, quod copias idoneas non haberent, irrumpentibus barbarorum agminibus male resistebant.

§ LVIII. Plin. 13, 37. Macrob. Saturnal. 3, 20. Liv. Epit.



JOANNIS FREINSHEMII  
SUPPLEMENTORUM  
LIVIANORUM

LIBER XL.

IN LOCUM LIB. LXXV LIVIANI.

---

E P I T O M E

LIBRI SEPTUAGESIMI QUINTI.

*A. Postumius Albinus legatus, cum classi præesset, infamis crimine proditoris, ab exercitu suo interfectus est. L. Cornelius Sulla legatus Samnites prælio vicit, & bina castra eorum expugnavit. Cn. Pompejus Vestinos in deditionem accepit. L. Porcius consul, rebus prospere gestis, fuscisque aliquoties Marfis, dum castra eorum expugnat, cecidit. ea res hostibus victoriam ejus prælii dedit. Cosconius & Lucejus Samnites acie vicerunt, Marium Egnatium, nobilissimum hostium ducem, occiderunt, compluraque eorum oppida in deditionem acceperunt. L. Sulla Hirpinos domuit, Samnites multis præliis fudit, aliquot populos recepit: quantisque raro quisquam alius ante consulatum rebus gestis, ad petitionem consulatus Romam est profectus.*

**I**ISDEM ferme diebus, quibus prætoris urbani fufus in foro suo sanguis est, etiam in castris, ne quid usquam castum sanctumve foret, prætorium virum, A. Postu-

mium Albinum, cum legatus classi præfesset, exercitus, quem ducebat, interfecit. Intolerabili superbia militum in se odia fuscitavisse traditur: sed, quo speciosior furentibus prætextus esset, crimine proditoris insinuatæ faxis atque fustibus opprefferunt. Copias ejus cum L. Sulla, ipse quoque legatus L. Porcii consulis, accepisset, suppliciumque de nocentibus sumpturus putaretur, impunitum esse flagitium passus est.

II. Id eo pertinuisse judicant, ut tanto beneficio obligatos promptiores haberet ad exsequenda, quæ animo destinasset. Jam enim eo processerat cum Mario simulas, ut aut perdendum illum, aut sibi pereundum esse intelligeret: & quia, senescente jam sociali bello, Mithridaticum adesse sentiebat, ad spem consulatus & provinciæ obtinendæ, favorem exercitus aucupabatur. Id licet multi palam incularent, & *in tam atroci delicto impunitam esse facinorosorum audaciam* quererentur, contempsit sermones hominum Sulla, ultro prædicans *consilii sui utilitatem, quod hoc pacto melioribus usus esset militibus, dum fortibus factis eluere turpitudinem admissi niterentur.*

III. Neque vanum id ei augurium fuit. Gerebat tum in Campania bellum, Stabiiisque receptis, Pompejos, haud amplius sex millibus passuum distantes, oppugnabat. Ad auxilium obsessorum L. Cluentius accurrerat, fiduciæ spirituumque plenus adeo, ut intra passus omnino quadringentos castra sua Sullanis opponeret. Sulla, quamquam magnam suorum partem pabulatum emiserat, contumelia stimulus, protinus ad hostes movit signa: sed, numero victus, tum quidem in sua castra se recepit. Ceterum, ubi pabulatores reverterunt, assumtis illis Cluentium denuo adortus, magna cum cæde profligavit.

IV. Cluentius, motis in mediterranea castris, cum ingentia ad eum Gallorum auxilia venissent, animo recepto ad Pompejos iterum duxit, si pugnandi copia fieret, haud

§ I. Plut. in Sull. c. 11. Oros. 5, 18. Liv. Epit. Diodor. l. 37. Polyæn. Strat. l. 8. § III. Oros. Vellej. 2, 16. Appian. civ. l. 1.



detrectaturus certamen. Ibi Sulla, quo paratiores ad prælium milites haberet, in concionem vocare iussis, ita cœpit: *Non ut tanquam adversus novum hostem, quæ fieri velim, admoneam, neque ut virtutem vestram verbis exstimulem, vobiscum agere constitui, milites; pariter enim & obsequium vestrum mihi, & animum præteritis præliis approbastis: sed quia toties pulsus hostis denuo hæc signa & hos vultus intueri sustinet, hoc tantum a nobis dedecus amoliri conantem ut adjuvetis, cohortandos existimaui.*

V. Cur enim victoriam nostram in ullo pretio ponimus, si cladem suam non sensit hostis? aut quorsum tollimus animos, si ille nondum demisit? Prorsus extorquenda confessio est, ut victos se fateantur, quos repulimus. ea nimirum res non ad novam tantum acquirendam laudem, sed etiam ad retinendam, quam paravimus, vehementer pertinet. Quamdiu in vicino castra Cluentius habebit, quis credet nos vicisse? quo auctore aut mihi speratos honores, aut vobis digna labore vestro præmia senatus decernet?

VI. Fortuna partium utrarumque comparabitur, & tantundem hostis, quantum Romanus, adversi prosperique rumoris auferet. Simili timoris ac audaciæ vicissitudine uterque exercitus, & fugisse hostem, & repetisse dicetur. Hoc igitur de nobis senatus populusque Romanus nuntium, inter aliorum exercituum victorias & gratulationes accipiet, ut ubivis locorum res Romana haud dubie superiori, hic tantum ancipiti Marte dicatur dimicare? Qua enim re inferiores aliis sumus, ut patienter feramus, post omnes collocari? Numerus, arma, copiæ, lacerti, non aliis in castris meliora. nam ut de nobis ducibus nihil dicam, nisi post viginti ferme annos omnibus Africanis, deinde Gallicis atque Cimbricis bellis, postremo in Cilicia & Cappadocia, sic esse cognitos, ut nunquam operæ nostræ consiliiue aut rempublicam, aut exercitum penituerit: eosdem sane homines, eadem arma intueor, quibus sæpe hoc ipso bello hostium maximæ copiæ, & munitissima præsidia cesserunt.

VII. Non enim, quasi nihil sit a nobis gestum, queror: aut aliud incuso, quam quod nondum ad id fastigium gloriæ pervenimus, quod virtuti vestræ, & felicitati nostræ debetur. Tan-

tum enim, nec diffiteor, *Fortunæ* favorem omnia vatum haruspicumque responsa, & cujusque generis divinationes constanti prædictione spondent, ut, quæ sunt hætenus a vobis gesta, minime quidem pœnitenda illa aut contemnenda, magnitudine eorum, quæ speramus, non vinci modo, sed etiam obscurari & obrui factum sit.

VIII. Idcirco quoties imperia nostra accipitis, non hominis, sed *Deæ* ductum vos sequi cogitate: ejusque *Deæ*, cujus in arbitrio res humanas omnes esse fitas, prudentes simul futuriq; uno ore pronuntiant. Nec igitur me piget ad hujus beneficium maxime referre, quidquid a me fuerit præclare optabiliterque gestum, ne ingratus adversus ita meritam sim, aut benevolentiam ejus in iracundiam mutem. Est enim & huic numini suarum injuriarum sensus; & facile fastidit eos, a quibus fastiditur.

IX. M. Reguli casum quis ignorat, florentissimi, priusquam *Fortunam* contemneret, postea longe miserrimi ducis? Athenienses *Timotheum* *Cononis* filium habuerunt, qui laude bellicarum rerum gloria non inferior, quam pater, ingenii præterea & doctrinæ magna ornamenta adjecerat. Sed ista omnia, postquam *Fortunam* offendit semel, minime profuerunt. Cum successissent ei omnia mirabiliter, æmuli pinxerunt in tabernaculo sedentem, pendente supra caput *Fortuna*, quæ civitates in rete dormientis compelleret.

X. Id homo vanus cum tolerare nequivisset, &, aliqua forte re gesta, publice negasset, ex ista laude *Fortunam* posse quidquam decerpere, ab eo die fuit infeliciissimus. Mihi vero hoc temperamentum placet, ut vigilantiam, consilium, audaciam præstandæ homini censeam, eventum lubentius referam ad Deos. ita demum necessum erit prospere evenire omnia, si neque nostro officio defuimus, neque cum injuria potentioris indebitam gloriam affecimus. Sed hæc quidem aliquanto verbosius exsecutus sum, milites, quod non in præsentia tantum intelligere vos cupiebam, quid mihi propositi esset; sed in posterum quoque sciretis, qualem ducem, & quibus præstatis fultum sequeremini.

XI. Cetera jam vobis nota sunt, rebusque ipsis perspecta;

neque mihi severitatem in noxios, nec erga fortiter facta liberalitatem defuisse. quamquam & hoc adscribo Fortunæ, quod mihi sic animatos milites dedit, ut præmia creberrime, supplicia non sæpe repræsentarem. Quamquam sane incusor a multis, quod æquo melior, etiam scdissimorum facinorum pœnas a fontibus non exigam. Verum enimvero, milites, ita mecum inii rationem, dandum esse hominibus spatium, ut contractam, nescio quo furore, noxam, pœnitentia magis, quam pœna, eluant: & ubi forti adversus hostem opera, tantum profuerint reipublicæ, quantum crimine & exemplo nocuerunt, ipsi veniam, respublica tot cives incolumes habeat. sin vero sceleri addiderint ignaviam, ne ipsi quidem recusent, quin servili cum cruciatu necentur.

XII. Hæc vobis me dicere, quibus nuper A. Postumius Albinus præfuit, non ignoratis. Apud majores nostros, cum simili facinore sublati ab exercitu M. Postumius Regillensis esset; jussu populi acriter exercita quæstio est. nunc aliena judicia ne timeatis: vestra in manu est, qualis manere vos exitus debeat. ferro, non suffragiis, hæc casu decidetur. Victores virtus absolvet: igna-vos, ut hostile ferrum pepercerit, legum vindicta consumet. Cum ejusmodi oratione L. Sulla milites cohortatus esset; eamque conditionem maxime, qui pœnas interfecti ducis timebant, cupide accepissent, promissos paratosque, & ad omnia prolixè opera pollicentes in aciem eduxit.

XIII. Eo tempore, ut maximi quique mortalium conatus levi subinde casu eluduntur, res per se haudquaquam magni momenti, præcipua tamen Sullanæ victoriæ causa fuit, Romanorum insigni fiducia inflammatis animis, & hostium alacritate extincta. Gallus quidam insigni proceritate, qui inter auxilia Cluentii merebat, cum ex diversa acie fortissimum quemque ad singulare certamen provocasset, ab exigue staturæ Mauro confectus, tantum pavoris popularibus suis iniecit, ut vix primum telorum conjectum sustinerent.

XIV. Gallorum fuga sociorum quoque commovit ordi-

nes, perterritosque & turbatos, tanquam imbelles pecudum agnien trucidandos hosti præbuit. neque pugnantium fugientiumque minus triginta millia periisse referuntur. Ceteri cum duce Cluentio, nihil tutum arbitantes, priusquam ad Nolam cursu pervenissent, castra ante ipsam urbem posuerunt. Sulla, non amplius moratus, quam donec hostium castra expugnasset, sive deditis Pompejis, sive post tantam suorum cladem mature venturis in deditionem, protinus victorem exercitum ad persequendas rebellium reliquias in agrum Nolanum ducit.

XV. Eo loci cum castra communivisset, accidit, ut ante prætorium forte immolanti, subito ex infima ara anguis erumperet. Felicissimum id prodigium esse C. Postumius haruspex interpretatus, hominem fortunæ nihil non credere solitum facile impulit, ut nulla interposita mora exercitum adversus hostem educeret. Atque sic evenit, quemadmodum in commentariis suis sibi sæpe accidisse ipse prodidit, ut temere festinata expeditio prosperius caderet, quam si matura deliberatione cautoque consilio suscepta fuisset.

XVI. Nam in tantam consternationem conjecit Italicos, ut post pugnam parum constanter initam, refugientes ad urbem circum ipsos muros caderet: quia Nolani, ne simul irrumperet hostis, non amplius una porta ad recipiendos suos aperire audebant. Inter occisos ipse quoque dux Cluentius pugnando cecidit: & cum eo viginti militum millia desiderata sunt. Hic quoque florentissima Samnitium castra in potestatem victoris venerunt. Et, quod miraculo proximum est, in tam magnifica victoria, *ne unum quidem de suis militibus amisisse Sullam*, memoriæ proditur: ut jam non sine causa, cum omnium cognominum haberet potestatem, *Felicitis* appellationem ceteris prætulisse dicas.

§ XIV. Liv. Epit. Oros. Cic. de divin. 1. Val. Max. 1, 6. I lug. in Sull. c. 17. § XVI. Appian. Oros. Liv. Epit. Eutrop. 1. 5.

XVII. Non igitur minor, quam pro re, lætitia & exultatio in castris Romanis fuit. Postumiani milites, hostili sanguine civilem fatis expiassè crediti, venia, ceteri laudibus, omnes præmiis amplissimis donati, vicissim & ipsi ducem raro, nec nisi paucis omnino concessio, honore affecerunt. Certe, *se ab exercitu ad Nolam obsidionali corona donatum, cum Italico bello legatus esset*, & scripsit ipse in commentariis Sulla, & in villa Tusculana, quæ postea fuit Ciceronis, pinxit.

XVIII. Eam solebat e gramine viridi servatus exercitus dare, ubi virtute insigni ducis liberata ab instanti excidio castra essent. Igitur seriem rerum atque temporum examnanti ad Nolam accepta videtur, ad Pompejos merita. Interea temporis Cn. Pompejus consul, relictis ad obsidionem Asculanam idoneis copiis, in Vestinos, vicinam Picentibus gentem, expeditionem fecit: eosque multo certamine ita domuit, ut palam inter se de deditioe agerent.

XIX. Cui ferme tempori colloquium cum P. Vettio Catone, quod se tirone præsentè habitum Cicero scribit, assignari potest. ad quod cum frater consulis Sextus evocatus Roma venisset, eumque Cato salutasset, *quem te appellem?* inquit. At ille, *voluntate hospitem, necessitate hostem*. Dum prospere Pompejo locis plerisque expeditiones cedunt, alterius quoque consulis haud pœnitenda gesta fuerant: neque postremus eo bello imperatorum, Marfos aliquoties fuderat, multisque locis acrem strenuumque ducem gesserat.

XX. Sed in ipso cursu prosperitatis, spes amplas, gloriamque illustrem, cum ipsa vita posuit. Dum enim ad Fucinum lacum castra Marforum oppugnat, & propemodum exploratam in manibus victoriam habet; accepto vulnere, mortuus prosternitur. Cum incertus cædis auctor esset, circa C. Marium C. F. suspicio hæsit, quasi patris

§ XVII. Plin. 22, 6. § XVIII. Appian. Liv. Epit. Cic. Philip. 12, 11.

fui contumeliam vindicare proditorio facto studuiffet. Lucium enim Porcium ferunt, cum eafdem haberet legiones, quæ fuperiore anno fub C. Mario militaverant, fuccellu lætum, per jactantiam dixiffe, *C. Marium non majora feciffe.*

XXI. Hanc ipfi vocem letalem fuiſſe putant, nihil nec a perfidia, nec a crudelitate Mariana abhorrente ſententia. Ceterum mors conſulis adeo exterruit Romanos, ut non modo victos fere hoſtes omitterent, ſed ipſi quoque vincerentur. Felicius in Japygia a C. Coſconio præ-tore geſta res eſt, qui adjutore Q. Luccejo (cujus filius Italici belli hiftoriam, non meliori, quam ceteri, fato, ſcripſit) Samnites acie vicit: Marium Egnatium, nobiliſſimum hoſtium ducem, occidit: Salapiam, Cannas, alia oppida complura in deditionem accepit.

XXII. Circa Canuſium, quod obſidere aggreſſus fuerat, acriter cum Samnitibus dimicatum eſt, magna utrinque cæde, donec prior Romanus exercitum Cannas reduxit. At Trebatiſ Samnitium ductor inſecutus, cum inter duo caſtra medium Aufidi flumen eſſet, optionem detulit Coſconio, *ut vel in ſuam ripam pugnandi cauſa deſcenderet, cujus rei poteſtatem ſe ei, abduſto, quantum ſatis eſſet, exercitu faſturus: vel eadem conditione tranſitum ſibi concederet.*

XXIII. Coſconius, altera conditione accepta, ut ſuam intra ripam admitteret hoſtem, ſimul ille trajecerat, ſigna intulit. neque tantum pepulit Samnitē, ſed trans flumen fuga evadere conatum ita cecidit, ut ad millia hominum quindecim occumberent. a ceteris & dūce Trebatio, perniciem non ipſorum virtus, ſed Canuſina mœnia depulerunt. Coſconius, vaſtato Larinati & Venuſino agro, & qui Piceno cognominis in Apulia eſt, Aſculano, in Pædiculorum fines tanto terrore incubuit, ut univerſam gentem biduo proximo in fidem acciperet.

XXIV. Eadem æſtate L. Sulla, captis ad Nolam Samni-

§ XX. Vellej. Liv. Epit. Oroſ. Entrop. § XXI. Liv. Epit. Dio-dor. l. 37. Appian. Cic. ad famil. 5, 17.

tium castris, per Campaniæ montes in Hirpinos movit, eumque populum Asculanæ urbis calamitate perdomitum recepit. Asculanenses, cum in eandem diem, qua Romanus ibi castra ponebat, Lucanorum auxilia expectarent, tempus ad deliberandum poposcerant. Sulla, intellecta fraude, legatis longam orationem orsis, *nihil opus esse otioso sermone apud occupatos* præfatus, *unius horæ spatium se dare* dixit.

XXV. Interea suis dat negotium, *ut magnam vim sarmenorum colligant, fascibusque effectis, admoveant ad murum*, quod is multa materia exstructus fuerat. Cum inter hæc hora præterisset, ignem supposuit fascibus, territofque obsessos ad deditionem adegit. Nec eo minus diripi oppidum iussit, sive quia dilata in extremam necessitatem deditio fuerat; sive captum potius, quam deditum, videri maluit, ut milites præda delinitos, benevolos sibi addictosque efficeret.

XXVI. Quod si forte ideo fuit in hos severior, ut ceteros metu parium malorum ad alia consilia cogeret, non fuit opinione falsus. Nam Asculanensium calamitas ceteris Hirpini nominis urbibus documento fuit, ut, celeriter missis legatis, imperata facturas nuntiarent. Sed metus erat, ne duriores a victore conditiones dicerentur. Idcirco ad mitigandam ejus iram, qui missi fuerant, ita fere verba fecerunt: *Oratores pro gente nostra venimus, L. Corneli, ut, quando eam stultitiæ suæ poenitet, quomodo tibi populoque Romano satisfieri posset, disceremus.*

XXVII. *Est quidem nonnulla nobis sollicitudo, ne fortasse recentium irarum memor, vindictam exercere in obnoxios, quam clementiam malis: sed plus tua nos moderatio consolatur; quam quia semper amavisti, quoniam erat tibi ingenita, nunc profecto non abjicies, postquam haud inferiorem inde, quam ex tot victoriis, exstitisse tibi gloriam comperiisti. Nemo eorum, quos mala mens, aut aliorum persuasio eo adegit temeritatis, ut hostes*

§ XXIV. Appian. § XXVI. Auctor de Vir. ill. c. 75. Liv. Epit.

*esse vestri, quam socii, præoptarent, vim tuam sensit, nisi quam diu rectis mentis se præbuit intractabilem.*

XXVIII. *Nec adversus hos tantummodo tua mansuetudo enituit; sed & Romanos milites, cum multorum opinione facinus inexcipiabile fecissent, pro summa tua humanitate & prudentia ita conservasti, ut tibi nunc gratias agat respublica, seque melius hostium sanguine, quam supplicii civium, vindicatam esse fateatur. Quidni ad nostram quoque spem trahamus tam nobile exemplum? Neque plus, quam illi, peccavimus: neque minor postea ad ea, quæ volueris, nostri usus erit.*

XXIX. *Illi nominare neminem possunt, in quem initium aut partem culpæ transferant: sponte exarserunt. nos contra sententiam seniorum, consensus tot gentium, & potentiora nostris vicinorum arma, & juventutis atque vulgi nusquam satis coercita temeritas, bello Romano implicuit. Nec tamen hæc ideo dicimus, quasi causam nostram defendere conaremur: (satis indignationem vestram Hirpini meruimus:) sed ut appareret ratio, cur in minore delicto non impudenter a clementissimo imperatore parem spe-remus veniam, quam in graviore concessam aliis vidimus.*

XXX. *Sed senatus populi que Romani non abhorrentem a tua lenitate sententiam nuper perspeximus, cum nonnullis, qui arma contra tulerant, non veniam modo, sed etiam civitatem dedit. Atque hoc jam antiquitus alterum post victricia arma firmamentum urbis Romanæ fuit, quod Italas gentes maxima semper & obvia, non dicam mansuetudine, sed prorsus pietate excepit, communis omnium parens. Ne ad aliena exempla abeamus, domesticis instructi, majores nostri non minus clementiam, quam virtutem Romanam experti sunt: semel, cum inter Samnites adhuc censeremur, quo tempore P. Cornelius Rufinus, avi tui proavus, primum illis sævus reddidit: iterum, Punico bello secundo, quando societatem Hannibalis secutos Q. Fulvius consul recepit, verbis tantummodo castigans, quamquam satis diu & præfracti fuissent in partibus, nec nisi ad Bruttios & extremum Italiæ angulum Hannibale compulso, pœnitentiam approbassent.*



XXXI. Placuit Diis ista lenitas, dederuntque, ut complures alii populi ad societatem populi Romani reverterentur, per longa deinceps annorum spatia durantibus usque ad infelix hoc bellum obsequiis. Eundem exitum, ut speramus, nunc quoque dabunt, eoque optabiliorē, quod & redibunt in fidem vestram, quā defecerunt: & perpetuam vobiscum amicitiam colent, suo malo iterum elossi, non aliter Italiæ salutem atque dignitatem salvam esse posse, nisi Romam imperare patiatur, secundo post principem terrarum urbem loco contenta.

XXXII. Satis constat, nonnullos populos de pace petenda deliberare, nec alia re magis retineri, quam timore, ne duriora imperentur, quam ferre queant. de his profecto dubium esse non potest, quin, simul nobis veniam datam cognoverint, protinus in partes vestras sint transaturi. Hos, ut fit, alii alique sequentur, & quam Italiam majores vestri per multas ætates perdomare vix potuerunt, eam universam paucis mensibus recipietis. Ceterum quia neque tibi consilio nostro opus est, & nos deprecatum magis commissum, quam purgatum, venimus; omissis, quæ in illam partem dicerentur, supplices pronique te rogamus, & per communes Deos, perque hanc parentem utrorumque terram obtestamur, ut unius anni crimen tot aliorum perpetuis meritis, & paucorum defectionem tot millium constanti fidei obsequioque dones.

XXXIII. Rari apud nos sponte, reliqua multitudo coacta deceptæve ferrum adversus vos strinxerunt: & pro his ausis vastatus ager, cæsæ cohortes nostræ, maxima urbium capta direptaque satiare victoris iram potuerunt, ut, occisis captisque auctoribus & concitoribus belli, reliquorum necessitati aut errori placatus ac lubens ignosceres. Hoc & nostris precibus te concessurum esse sperabant, qui propterea nos legarunt, quia propter constantiam in Romanis partibus ab adversa factione multa perpessos, apud vos gratiosos fore arbitrabantur: & si nostri non habentur ratio, ad alios neque paucos, neque contemnendos deprecatores respice.

XXXIV. Respice Minatium hunc Magium, qui avitana in populum Romanum fidem, dubiis temporibus, singulari studio

ac virtute retulit. Satis sit illi, cœsus civium strues, & fumantia patricæ tellû vidisse: ne universum suæ gentis excidium usurpare oculis, festinare manu cogatur. Idem orare puta tot Heranicorum militum in Romanis castris millia, quorum sortem fidelicque operam tuo quoque testimonio haud semel ornavisti.

XXXV. Hos profecto, cum alienissimi semper ab omni crimine fuerint, aliena culpa perire durum esset. Perisse autem putabunt, ubi civitatem suam omnibus belli cladibus pervastari, & quod necessum est tali tempore, eodem exitio nocentes innocentes, ut quisque occurreret, involvi videbunt. Neque enim quisquam est vere Italus, tam ab omni pietate remotus, ut inter hunc patriæ calamitatem, salutem suam magni æstimet. Sed & liberos parvos, matronasque & virgines occurrere fac animo tuo: quorum omnium haudquaquam ambigua est innocentia: cum vero cogitabis viduarum atque pupillorum lacrimas, qui viros suos, qui parentes sanguinem vitamque pro imperio populi Romani allegabunt profudisse; jam ipse profecto pro humanitate tua judicabis, potius in gratiam tot insontium noxios dimitti, quam horum crimine affligi meliori fato dignos, oportere.

XXXVI. Erat tum adhuc alienus ab omni crudelitate Sulla, aut saltem, ut esse videretur, studebat. Idcirco non modo benigne respondit legatis, sed etiam paulo post excessit Hirpinorum finibus, in Samnium tendens, ut ipsam belli socialis arcem excinderet. Sed Papius Mutilus Samnitium ductor, in ipsis finibus cum valida manu excubans, aditus obsidebat. Igitur Sulla, cum se in eas angustias demississet, ut circumveniri facile posset, colloquio petito, de conditionibus pacis agitare cum hoste cœpit, varie rem trahens, donec occasionem evadendi nancisceretur.

XXXVII. Ubi satis remissam Samnitium attentionem vidit, & propter inducias omnia negligentius administrari; silentio noctis profectus est, relicto in castris buccinatore, ut tanquam mutandis vigiliis classicum per solita intervalla caneret. ea res fidem manentis eodem loco exercitus in-

cauto hosti fecit. Quarta vigilia commissa, buccinator agminis fuorum secutus vestigia, vacua hostibus castra reliquit: militesque ad unum omnes incolumes, cum impedimentis tormentisque in tuta pervenerunt.

XXXVIII. Inde L. Sulla, longo circumitu usus, qua minime venturus putabatur, irrupit: Samnitesque improvise discrimine ita terruit, ut, occisis plurimis, ceteros in fugam conjiceret. Dux hostium Papius, prosequentibus fuorum paucis Æterniam faucibus pervenit. Sulla, captis Samnitium castris, ad Bovianum perrexit. Præcipuæ claritudinis illa tempestate Bovianum erat, tribusque arcibus & communi gentis concilio superbiebat. Sulla, divisis copiis, cum ipse ad urbem signa admovens Bovianenses in se convertisset; alios longo flexu circummissos, *quam primum possent arcium expugnare* jubet: futurum ratus, quod accidit, ut eam in partem, unde initio se ostendisset, concurrentibus oppidanis, segnior de remotioribus cura esset.

XXXIX. Ubi captam arcem ex fumo (sic enim convenerat) cognovit; ipse quoque tota mole oppugnare urbem cœpit. Tribus omnino horis fortiter ab obsessis repugnatum est: inde cum & a capta parte urbis decurrente Romano, anceps metus circumfisteret; profligatis defensoribus, Sulla Boviano per vim potitus est. Deinde late circumlato belli terrore, cum aliquot populos recepisset, appetente hieme ad petitionem consulatus Romam profectus est: certa quidem spe consequendi honoris, cum tot tantæque res, quantas raro quisquam alius, ante consulatum confecisset; eamque sibi fortitudinis prudentiæque conciliasset exultationem, ut apud cives magnus dux, maximus apud socios, apud hostes etiam fortunatissimus haberetur.

XL. Igitur cum togam candidam sumisset, comitiis consularibus, pæne omnium civium suffragiis, anno ætatis suæ undequingagesimo designatus est. Ea comitia certamen haud tralatitium habuerunt, C. Julio Cæsare consulatum contra leges petente. Sed quoniam ad ea tempora

accessum est, quibus frequens mentio facienda Cæsarum, & alias, & propter eum Cæsarem, qui postea dictator fuit, errorem parere legentibus posset: simul ut illius ævi domesticæ discordiæ penitus intelligantur, non abhorrere a præsentī instituto judicavi, si de hac familia, & præcipue iis hominibus, qui tum maxime floruerunt, pauca, nec injucunda scitu, proderem. Igitur Julii, cujus gentis familia Cæsarum fuit, antiquissimæ originis fuerunt: cum genus ad Julum referrent, Æneæ filium, quem Æneam Anchise & Venere genitum vetus fabula prædicabat.

XLI. Qui primum Juliorum hoc cognomine discriminauit gentem, cum cæso matris utero prodisset in lucem, ex eo casu appellationem traxisse non absurde creditur. Eum ante tempora Hannibalici belli vixisse oportuit. ex eo enim Cæsarum in historiis mentio frequentatur. Sed primus omnium Sex. Julius Sex. F. Sex. N. Cæsar consul fuit, L. Oreste collega, ad annum urbis conditæ quingentesimum nonagesimum sextum. Nepos hujus esse potuit Sex. Cæsar C. F. qui cum L. Philippo gessit consulatum, cum bellum sociale inciperet: potuit & L. Julius Cæsar L. F. Sex. Nepos, qui sequenti anno consul res eodem illo bello gessit, & mox censuram adeptus est. Sed ut illa certo affirmari non possunt, ita hoc minime controvertitur, L. Cæsaris fratrem hunc, de quo dicere cœpi-mus, C. Cæsarem fuisse.

XLII. Igitur Cajus ille Cæsar, claritudine generis & fratrum, (nam matre Popillia natus erat, quæ antea Q. Lutatium Catulum pepererat, Cimbrica victoria celebrem) præterea ingenii felicitate elatus, ad summos honores magnis animis contendebat. nam inter primos sui temporis oratores numerabatur, & nativo quodam facetiarum lepore omnes superabat. Is ante biennium Sex. Julio, L. Philippo consulibus, in curuli ædilitate quotidianis fere concionibus de republica accurate habitis, magnam & gra-

§ XL. Diodor. ap. Valot. Vellej. 2, 17. Sueton. in Cæs. c. 6.  
§ XLI. Plin. 7, 9.

tiam vulgo, & auctoritatem quæriverat. His ille fretus, cum ædilitus esset, omissa prætura, consulatum ambire cœperat. Sed tribuni plebis P. Sulpicius, quamquam familiaris Cæsaris, & P. Antistius, extraordinariam petitionem refutabant.

XLIII. Iisdem C. Marius se aggregaverat. nam ex disciplina illorum temporum, contentiones in republica vi ferme & armis dirimebantur. Idcirco divisus vulgi studiis, magnæ ex hac causa seditiones exstiterunt. *Jus populi* Cæsar extollebat, & *pro eo senatum judicasse*, cum T. Quinctium Flamininum, M. Fulvius, & M. Curius tribuni plebis similiter consulatum, transcendens mediis honoribus, petere non paterentur. Neque penituisse aut judicii sui Patres, aut suffragiorum populum; cum paucis annis opulentissimum Macedoniæ regem, fortis, si quis unquam, & felix imperator, maximo Romani juris incremento superasset. Neque tamen aut ætate parem sibi Quinctium, aut causa fuisse: se ædilitate functum olim, illum ex quæstura petisse consulatum.

XLIV. Quin & nonnullos, priusquam magistratum ullum curulem gessissent, consules factos. Ita P. Sulpicium Galbam, cum in Italia Hannibal esset, ita M. Valerium Corvum, cum Gallicis tumultibus arderent omnia, summis honoribus admotos: hunc quidem admodum adolescentem. adeo, nihil in candidatis præter virtutem spectari, populo Romano semper placuisse. Idcirco postea quoque duos Scipiones, alterum magnis quidem rebus, sed sine magistratu gestis, alterum non ædilitium, sed candidatum ædilitatis, ad idem fastigium evectos. Magna se quidem asserre exempla, sed eorum, qui tum demum explicare virtutem animi potuerint, postquam campum ipsis gloriæ consulare nomen imperiumque aperuisset.

XLV. Sibi quoque licere de suis rebus sperare ampliter: laudique potius, quam vitio vertendum, si maximorum virorum imitator esse cupiat. Esse sibi nobilitatem nulli gentium, quas nomi-

§ XLII. Cic. de Orat. 2, 11. Diodor. l. 38. § XLIV. Plut. Plin. Liv. 28, 38. 32, 8 & 40, 9.

nasset, imparem: neque recusare, quin cum quolibet istorum, sed nondum consule, conferatur. Acres populo Romano esse oculos, acutas aures: quomodo domi se quisque, quomodo militiae gesserit, diligentiam ejus non fallere. Se quaesturam & aedilitatem sic gessisse, ut satis magna speret dedisse documenta industriae, vigilantiae, humanitatis. nec in bello segnem aut ingloriam operam navasse imperatoribus; & saepenumero donatum ab his laudatumque virtutis causa esse.

XLVI. Hoc sibi non pudendum ad summos honores iter videri, etiamsi praetura declinet. quam minime quidem a se sperni: sed neque praeturae deesse candidatos idoneos; & in praesentia hunc esse rerum statum, ut se consulem, quam praetorem, multis modis utiliorem reipublicae futurum confidat. Fortasse Deos immortales hoc fratribus Juliis servavisse decus, ut alterius victoria sagum toga mutaretur, per alterum plane exstingueretur sociale bellum. Suos adversarios nihil asserre, quo minus jure petat consulatum, jure obtineat. tantummodo mores atque usum civitatis ingerere, tanquam sit in eo genere perpetuum quidquam, aut esse possit.

XLVII. Ab isto more saepe recessum, multis exemplis doceri posse, si actum placeret agi. neque causam esse, cur non hodie populo Romano liceat, quod unquam licuisset. Nuper in uno homine continuatos per quinquennium consulatus satis ostendisse, nihil in his rebus tam fixum immotumque haberi, ut mutari ex causa nequeat. Concessum cuilibet esse, ut de se quantumvis magnifice sentiat: concessum & adversariis, ut, si velint, secus opinentur: sed in beneficio populi summum arbitrium relinquendam eidem populo esse. hunc optime judicaturum, quo loco C. Caesarem esse oporteat.

XLVIII. Contra haec tribuni legum omnibus argumentis validiorem auctoritatem allegabant. Populi certe haudquaquam ambiguum jus esse, nec illud patrono C. Caesare indigere, aut quocquam alio, tribunis salvis. Sed nullis aliis in causis aequae manifestam esse populi sententiam, quam in legibus ferendis, quoties consensu jubeantur: tum enim ad maturitatem judicii acce-

§ XLV. Cic. pro Planc. c. 27. § XLVI. Cic. Tusc. quaest. 3, 19. § XLVII. Cic. de harusp. resp. c. 20.

*ædere concordiam voluntatis. Quibus igitur vere sit propositum, auctoritatem populi tueri, iis ante omnia laborandum, ut legum facta testaque sit veneratio. Esse autem leges, quæ magistratus ordine capi gerique jubeant, neque liberum cuique sinant, protinus ab infimis ad summos transilire. Has aut servandas omnibus, aut abrogandas in universum esse; aut profecto solvendum legibus, qui contra has magistratum concupiscat, extra hæc nihil esse, quod fieri citra juris & legum omnium abolitionem queat.*

XLIX. Sane pauca exempla adduci possè, in quibus aut ob causam exceperit aliquos populus, aut per imprudentiam affectumve lapsus conniverit: sed infinito esse plura servatarum legum, & quoties tale aliquid tentatum fuerit, minime quieta comitia fuisse. Nunquam igitur defuisse, præsertim ex collegio tribunatio, qui immoderata cupientibus resisterent. Quod si quatuor aut quinque consulatus extra ordinem datos suum in favorem trahere Cæsar velit; quanto pluris æstimandum, quod in centenis aliquot tribuendis populus ne latum quidem unguem a more & lege recesserit? Non se contemnere Cæsarem, honoribusque omnibus, quos ei capere per léges liceat, dignum arbitrari: sed non existimare, tantam in eo virtutis excellentiam conspici, ut propter eum spernendæ leges sint, & , quod negatum sit omnibus, uni tribuendum.

L. Satis mature consulem eum futurum, ubi hunc honorem habuerit populo, ut contra ejus voluntatem legibus declaratam petitioni injustæ desinat insistere. Si semel hoc iter aperiatur hominibus, omnes protinus ad summos honores provoluturos, priusquam populo Romano specimen ullum animi sui consiliique gerundis inferioribus præbuissem. Consulibus summam rerum permitti. id adeo factum iri temere, si summus populi Romani magistratus, non amplius culmen honorum, & perspectæ virtutis præmium sit, sed gerendæ reipublicæ tirocinium fiat. Sane Cæsari adesse nobilitatem, facundiam, industriam. sed multos esse in urbe suuurosque pares: plures etiam, quibus, si non meritum idem, tamen eadem cupiditas insit. qui & ipsi tanquam debitum exacturi sint, quod cuiquam fuerit tributum, a quo se non existiment notabiliter superari.

LI. *Quem vero C. Cæsari concessurum hanc virtutis dignitatisque palmam, cum cum C. Cæsar Valeriis, & Scipionibus, & sexies consuli C. Mario ambiguum facere contendat? Nunquam defutura certamina, si cujuslibet cupiditati aperiatur septus legibus locus. Et has non aliam ob causam latus, quam ut contentiones amputentur: ipsumque populum, licet plane liberrimum sui juris arbitrum, tamen sibi legum hos cancellos circumdedisse, ut in magnis negotiis, & quæ valde ad rempublicam pertinent, non quidem ademptam, sed tamen a semetipso constrictam voluntatem esse, neque temere solvendam, quæ alligata consilio sit, intelligat.*

LII. *Diu hæc utrinque multis concionibus agitata cum essent, bonisque omnibus causa C. Cæsaris displiceret, simul adversarii ejus vim intentarent, victus aut territus Cæsar petitione abstinuit. L. Cornelius Sulla, ut supra indicavimus, & cum eo Q. Pompejus Q. F. A. N. Rufus, designati sunt. Nec tamen ideo extinctum illud contentionis civilis incendium est, quin postea in bellum apertum erumperet. Quamquam enim belli civilis faces Marius & Sulla indubitanter fuerunt: tamen ab illa quoque contentione profecti fomites magis excitarunt alueruntque conceptas aliunde flammæ; magna P. Sulpicii culpa, qui a bonis initiis & optima causa, nimia contentione, & popularis favoris aura ad ferrum & arma profectus est.*

§ LII. Ascon. in Scaur. Cic. de harusp. resp. c. 20.





JOANNIS FREINSHEMII  
 SUPPLEMENTORUM  
 LIVIANORUM  
 LIBER XLI.

IN LOCUM LIB. LXXVI LIVIANI.

---

E P I T O M E

LIBRI SEPTUAGESIMI SEXTI.

*A. Gabinius legatus, rebus adversus Lucanos prospere gestis, & plurimis oppidis expugnatis, in obsidione castrorum hostilium cecidit. Sulpicius legatus Marrucinos cecidit, totamque eam regionem recepit. Cn. Pompejus proconsul Vestinos & Pelnos in deditiōnem accepit. Marsi quoque, a L. Muræna, & Cæcilio Pinna legatis aliquot præliis fracti, pacem petierunt. Asculum a Cn. Pompejo captum est, cæsis & a Mam. Æmilio legato Italicis. Silo Pompædus, dux Marsorum, auctor hujus rei, in prælio cecidit. Ariobarzanes Cappadociæ, Nicomedes Bithyniæ regno a Mithridate Ponti rege pulsus sunt. Præterea incursiones Thracum in Macedoniam populationesque continet.*

**I**N Lucanis interea clades accepta est, legato amisso A. Gabinio, qui multa iisdem in regionibus, multa in Marsis strenue feliciterque gesserat, & plurima oppida pu-

gnando ceperat. Sed ille, dum fufis aliquando Lucanis victoriam urget, in oppugnatione castrorum hoftilium interfectus eft. Ex diverfo legatus Cn. Pompeji confulis Ser. Sulpicius Marrucinos cecidit, totamque eam civitatem recepit. Vefitini quoque Pelignique, miffis ad confulem oratoribus, in fidem accepti funt. Sub id tempus cum C. Vettius Pelignus a cohortibus fuis ad Cn. Pompejum duceretur, fervus ejus gladio militis, a quo trahebatur, educto, dominum interemit; ftatimque, poftquam hero confuluiffet, *tempus effe prolocutus fibi profpiciendi*, in fua viscera retorfit ensem.

II. Marfi quoque, a L. Muræna, & Cæcilio Pinna legatis aliquot præliis fracti, pacem petierunt. Quis ille Cæcilius fuerit, & unde habuerit non alibi lectum cognomentum Pinnæ, in tantis ejus ævi tenebris frustra requifivi. Nec absurdam conjecturam effe arbitror ftatuentium, non Pinnam iftarum rerum auctorem, fed Pium, Q. Metelli Macedonici filium fuiſſe, quem inter præcipuos ejus belli duces nominari conftat. Cum hic ftatus rerum per Italiam eſſet, tantis calamitatibus, & defectione fociorum anxii, quotquot arma retinebant, communi decreto Corfinium deferunt; Æſerniam in Samnitibus publici confilii fedem ftatuunt, creatifque prætoribus quinque, quos inter Pompædus Silo fuit, huic propter ſummam opinionem virtutis imperium in omnes tradunt.

III. Atque is, collegarum fedula opera uſus, magnas brevi copias paravit, ut adjunctæ veteribus ad millia virorum triginta pervenirent. præterea fervis manumiffis, &, prout tempus ferebat, armatis, libertinum exercitum, haud multo pauciores millibus viginti, cogit. equites præterea mille funt effecti. Cum his copiis Mamercus Æmilio ſe oppoſuit, qui tum legatus exercitui Sullano præerat. Inter hos apparatus Aſculana obſidio ad finem venit. Ab

§ I. Liv. Epit. Oroſ. 8, 18. Flor. 3, 18. Appian. civ. l. 1. Macrobi. Saturnal. 1, 2. Seneca de benef. § II. Vellej. 2, 15. Diodor. l. 37.

hac urbe primus belli turbo eruperat, &, licet eodem tempore per plerasque Italiae regiones adversarum partium exercitus colluctarentur, hic tamen plurimum laboris sanguinisque exhaustum est, unaque die circa hanc urbem quinque & septuaginta civium Romanorum, amplius sexaginta millia Italicorum signa contulerunt.

IV. Tandem Pompejus, Asculum ingressus, selectis, quos in triumpho ducturus erat, principes omnes praefectosque & centuriones sejuges caesos securi percussit: fervos praedamque sub hasta vendidit: libera corpora dimisit innoxia, sed rebus ademptis omnibus: urbem ipsam dirutam incensamque evertit. Mox Romam profectus ob res isto bello fortiter prospereque gestas de Asculanis reliquisque Picentium, paucis prius diebus, quam consulatu abiret, a. d. VI Kal. Januarias triumphavit.

V. Ductum in triumpho P. Ventidium multi scriptores haud futilem ob causam annotant, quod hic post annos ferme quinquaginta idem Capitolium, quod tum triumphatus vidit, triumphans invectus est. Adeo inexpectatis interdum eventibus admonemur, donec vita maneat, nulla fortuna neque confidere nimium, neque perterrer. Cum deinde L. Cornelius Sulla, Q. Pompejus Rufus magistratum inivissent, Mamercus Aemilius cum Q. Pompædio Silone collatis signis dimicavit. Ejus praelii victoria penes Romanos fuit, quorum haud ita multi occubuerunt: de Italicis ad millia sex sunt desiderata.

VI. Sub idem tempus Q. Metellus Pius, qui C. Cosconio successerat, Venusiam, Apuliae nobilem urbem, firmo praesidio instructam, expugnavit. Adhuc tamen conatu magis, quam viribus, Italici resistebant, & ne desponderent animos, modicis interdum successibus recreabantur. Silo Pompædus Bovianum oppidum receperat. ejus victoriae tam immoderata laetitia fuit, ut vel in honorem du-

§ III. Liv. Epit. Vellej. Flor. 2, 21. Orof. 6 IV. Flor. Marmor. Capitol. Val. Max. 6, 9. Agell. 15, 4. Plin. 7, 43. § V. Diodor. l. 43.

cis, vel ad referendam Romanis vicem, Pompædio triumphus decerneretur, isque Bovianum triumphans invecus est. quod in omen acceptum: nam in urbem victam laurea deportata, hostibus tradidisse victoriam visus est; utique postquam proximo deinde prælio, cum Ser. Sulpicio apud Teanum congressus, amisso exercitu, una cum Obfidio alio Italicorum duce oppressus est.

VII. Pompædio, præcipua tanti incendii face, extincto, sive Sulpicius illum, sive, ut alibi relatum est, Q. Metellus Pius occidit, cum neque consilium Italicis, neque copiarum tanto bello pares superessent, odii adversum Romanos tantum fuit, ut in alium pæne orbem legatos ad Mithridatem mitterent, quem studere rebus novandis acceperant. Cum præbita his audientia esset, princeps legationis, *Samnites, ait, atque Lucani, & qui alii per Italiam populi eodem fœdere continentur, tertium jam annum atrociter bella cum Romano gerunt; cujus equidem neque causa tibi ignota esse, neque casus atque vicissitudines possunt.*

VIII. Idcirco licet multos illorum duces exercitusque fuderimus, partim etiam deleverimus, castris urbibusque maximis atque munitionibus expugnatis, atque captis: tamen & nos cum validissimo potentissimoque hoste colluctantes, crebris atque vehementibus detrimentis quassari contigit. Plus tamen aliquanto fraude, quam armis, Romani profecerunt; passim per civitates serendo fovendoque principum discordias: quod ipsis per suæ factionis homines plerumque non fuit difficile, multis adhuc servitutem & otium laboriosæ libertati præferentibus.

IX. Hoc tamen fuit in aliquorum defectione boni, quod secreto, quidquid in consiliis aut castris agrum fuerat, arctius coit fortissimorum populorum fide animisque indissolubilis & invicta societas. Nullæ amplius voces belli mala deplorantium audiuntur: nulla pacis, nisi quæ libertatem firmet, usquam habetur mentio. hoc omnes propositio sumus, ut præ dominatione Romana

§ VI. Liv. Epit. Diodor. Vellej. Jul. Obseq. § VII. Orof. 5, 18. Jul. Obseq. Liv. Epit. Autor de Vir. ill. c. 63.

leve nobis videatur, quidquid ingerere calamitosi hominibus ini-qua fortuna potest.

X. Ceterum ab ista forte procul adhuc virtute nostra & munere Deorum absumus : neque deteriores armis nostris eventum fore, quam fuit causa, speramus. Sed præ ceteris duo sunt maxime, quæ fiduciam nostram augeant. Nam etiam post acceptum bello hoc incommoda, virium nostrarum haud sane pœnitet : & multos ubique reges atque populos non aliis oculis intueri Romanam magnitudinem scimus, quam a nobis aspiciatur ; nisi quod nos, quanto propiores huic pesti fuimus, tanto priores & penitus perspeximus insatiabilis populi improbitatem.

XI. Jam enim a primis initiis imperandi licet non æque manifestam, æque tamen magnam cupiditatem habuit : cui ut resisterent majores nostri, nihil inexpertum, suas opponendo opes, sollicitando alienas, reliquerunt. Sic & Pyrrhus a nobis, & postmodum Pœnus Hannibal adjuti sunt : neque desitissent Antiocho aut Philippo regibus auxilia nostra, si inferre bellum Romanis in Italia, quam accipere domi maluissent. Sed illos quidem suus error, aut invidia numinum in diversa consilia transtulit, ut tuum decus esset, Italiam, quid autem Italiam ? immo gementem sub Romano jugo terrarum orbem liberasse.

XII. Licet enim, præter paucos servituti natos homines, nemo usquam tam insolentium dominorum imperia patienter ferat : tacent tamen, aut mussant plerique, aniris aut viribus imbecilliores. Sed & quibus adhuc astu majore, quam modestia, parcitur, dum securos & incautos aliquando quævis occasio subjacet ; aliena mala, tanquam ad se minime perventura, otiosi quietique intuentur. Idcirco te esse unum omnium cognovimus, a quo & sperandum auxilium tantis necessitatibus, & petendum esset.

XIII. Animi tui magnitudinem, quam & corporis dignitas manifesta fide oculis monstrat, ignorari gesta tua plurima atque amplissima nequaquam patiuntur. Ex iisdem potentia tua & aucta est, & inclauit ; quibus utriusque rebus neminem tibi putamus præsentium regum comparari posse. Ferocissimas enim Scytharum gentes, quibus neque Persarum magni reges, neque victor horum Alexander, imponere jugum potuerunt, pene par ita domuisse,

*ut alii tibi non obscure serviant, alii nomine sociorum eadem ferme faciant, quæ victis imperantur.*

XIV. *Nam vicinos quidem reges, nisi quibus pacem & amicitiam præstas, sic assuefactos habes, ut, placato te, regnare illis liceat; cum iratus fueris, sibi sentiant exsulandum esse. Atque idem amico atque affini Tigraue uteris, quo nemo regum tibi est magnitudine rerum gestarum & imperii similior. Sed hæc tamen omnia nequidquam adessent, nisi tua singularis & pæne divina prudentia tibi dictaret & tempus utendi, & modum. Jam olim, (nec enim abstrusa aut ambigua loquimur,) olim, inquam, te ambitionis & avaritiæ Romanæ piget. idcirco & legatis eorum sæpe viriliter respondisti, & cum eadem tecum superbia vellent agere, qua ceteros terrere consueverunt, effecisti, ut intelligerent, sibi cum libero rege plenoque animorum, & ad omnia parato, negotium fore.*

XV. *Quin & illorum iniqua decreta haud semel ferro rescidisti: ut scirent vicini reges, minus illis in amicitia Romana præsidii, quam in tua offensa periculi esse. Pro quibus ausis, quæ tibi sint apud populum Romanum reposita præmia, simul ille vacuus a propioribus bellis fuerit, ignarus esse non potes. Sic quoque legati illius atque proconsules minantur, fremunt, plane præ se ferunt bellum, suis copias parant, sociales excitant: ita agunt omnia, ut, quamvis derideas conatum, animus tamen appareat.*

XVI. *Non dubito, quin inter ista memineris, quam arroganter olim Marius, deinde Sulla, tecum egerint; quam non teste denuntiaverint tibi periculum, indixerint servitutem, nisi dederis operam, ut æque armis ac jure sis potior. Atque hæc jam noverant populi principesque nostri: nos plura etiam & certiora usarpavimus oculis; ut jam prorsus certi simus, non inutilem legationem nostram, neque metuendam desiderii nostris a te repulsam esse. Quos enim eadem causæ ad arma coegerunt, iidem animi, vota paria conjungunt; de iis dubitari non potest, quin ad communem utilitatem fido federe sint sociaturi consilia & vires.*

XVII. *Quod igitur tibi nobisque faustum atque salutare Dii faxint, arma, viros, naves, commeatus, pollicemur in Italia*

*bellaturo : ad transitum , ad receptum , omnesque opportunitates belli , urbes nostræ patebunt : duces itinerum , participes consiliorum , socii laboris periculique erimus. Id modo fixum tibi sit animo , non alibi rectius cum Romanis , quam in Italia bellari. absit a te levia mens , quæ Syriacos olim reges , quæ Macedonicos decepit , cum eadem illis dicerentur.*

XVIII. *Nullum tuis regnis a Romano , aut aliis tantum periculum est , quod non a quolibet præfectorum tuorum propulsari queat. neque spes & occasio te teneant domi , vicina subacturum. Etsi facilis ista esse possit , non erit tamen diuturna possessio. Nemo unquam eripere populo Romano occupato quidquam potuit , quod ille cum multiplici usura vacuus non reciperet. Jugulum petamus , & tanquam pestiferi draconis obteramus caput ; donec illud salvum fuerit , inani labore ceterum corpus vexaturi.*

XIX. *Quemadmodum flumina longo cursu aucta , ne exundent , molibus ac crepidinibus ægre coercentur ; ad ipsos fontes averti carpique nullo negotio possunt : ita , nisi Romanæ potentiae scaturiginem & fontem in potestate habeas , impetum nequidquam moraberis , quin violentia sua , quidquid oppositum fuerit , evertat , & ocius , serius , omnia ubique regna , nationes omnes obruat. Mithridates , re cum suis deliberata , nescio quomodo minoris , quam pro Italorum expectatione , negotium illud faciens , venturum se in Italiam respondit , simul atque Asiam subegisset.*

XX. *Credo , longinquam a domo militiam laboriosam simul atque sumtuosam fore ratum , adhuc vicinorum societas Romanis vires perhorruisse , ne , dum appetit aliena , suo regno spoliaretur. Neque Tigrani fatis poterat fidere , ut suspectos maxime pares habent , quicunque cupiunt opibus excellere : verebaturque , ne ille , perdomitis aliis , neque Pontum , si daretur occasio , sperneret. Terrebarur & Pyrrhi Hannibalisque exitu , quorum , licet a plerisque Italiae gentibus adjuvantur , in alieno solo bellantium cito consenuerit exercitus : difficilibus , licet haud a maximo intervallo , supplementis.*

XXI. *Hæc omnia vitari posse maximo cum emolumen-*

to sperabat, si vicinam sibi Asiam occuparet. Eam rem quoque facturam animos Italicis focis: atque ita diuturno bello atteri posse Italiae vires, ut neque, si rursus conjungantur, valde sint sibi futuræ formidabiles. Sane consilio huic institit, quamquam omnia legati pollicerentur, & e Ponto facilem in Thraciam trajectum ostenderent; Thracæ porro & ipsos bellum Romanis facere. horum ope per Macedoniam & vicinas regiones paucis diebus ad Jonium mare penetrari posse.

XXII. Neque diu cunctatus exercitum conducit, Ariobarzanem ac Nicomedem reges, alterum Cappadocia, alterum Bithynia exacturus. Sed, antequam hoc bellum exponatur, quo regna ista jure, quibus finibus tum fuerint, quasque nationes urbesque habuerint insigniores, enarrari pretium fuerit, Mithridatica bella lecturis, quæ haud postremam historiæ Romanæ partem, illius quidem ævi, constituunt. Quidquid terrarum longo tractu inter Heracleam & Trapezuntem, nobiles urbes, Euxini fluctibus alluitur, ab eo mari appellationem apud veteres nactum est, ut Pontus vocaretur.

XXIII. Propius Heracleam Bithyniæ conjunctum Ponto regnum fuit, ad Propontidem deflectens. At orientem versus Cappadocia in mediterranea procurrens, inde Armenia, ad meridiem Tauro monte terminatur. Inter Bithynos atque Cappadoces ita sparsa erat Galatia, ut ab septentrione Pontum & Paphlagoniam, (Ponti enim pars etiam Paphlagonia nec absurde censerî potest;) a meridie Phrygiam Lycaoniamque contingeret. Omnes istæ regiones in ditione Persarum fuerunt. a quibus ea pars, quæ tum communiter Cappadocia dicebatur, in duas divisa præfecturas, postea totidem regna peperit: quorum alterum Cappadocia proprie, aut cum adjectione Cappadocia ad Taurum, interdum & Magna Cappadocia, alterum Pontus, sive Cappadocia Pontica cœpit nominari.



XXIV. Priore præfecturæ decem continebantur: quarum sub Tauro erant Melitena, Cataonia, Cilicia, Tyanitis & Garfauritis. Melitena, ceteris Cappadociæ partibus mitior, olei quoque & vini optimi ferax, Armeniæ majori prætenditur, a Sophenæ præfectura medio Euphrate divisa. Nomen huic Melita dedit, a Semiramide, ut volunt, condita. trans flumen etiam ad hanc partem Tomisa pertinuerunt, insigne castellum. Cataoniæ inter Amanum & Antitaurum sita planities, Comana habuit, Bellonæ templo memorabile nomen, & Apollinis Cataonis fanum: castell. in montibus munita, Azamora & Dastarcum.

XXV. Cilicia, quæ vocabatur Cappadociæ præfectura, sede regum nobilitata fuit Mazacis. quam urbem postea *Cæsaream* vocarunt Cappadoces, in dictatoris Cæsaris honorem. Altera urbium, nam duæ omnino fuerunt antiquis temporibus in Cappadocia, Tyanitidi præfecturæ nomen dedit, ipsa quoque Semiramidis opus. At in Garfauritide postea Archelais fuit, Claudii Cæsaris colonia. Præter has præfecturas fuerunt & aliæ quinque, Lavinasena ad Euphraten fluvium, Sargaraufena, Saravena, Cammanena, & Morimena, superioribus obscuriores.

XXVI. Fluvii celebres, Halys Archelaidem præterfluens; Sarus, qui per media Camana labitur; Pyranus, per Cataoniam decurrens; præterea Lycus, & hunc excipiens Iris, & inter Morimenen & Galatiam terminus gentis, idemque causa nominis Cappadox. At Mithridatis paternum regnum, præter Pontum continebat, quidquid gentium ab Haly fluvio usque ad Tibarenos & Armeniam coluit. Etiam intra Halyn delibaverat Cappadocum & Paphlagonum agrøs. Nec longe Bithyni aberant: quippe ubi per Propontidem in Euxinum intraveris. Quæ regiones Bithyniæ partem, deinde Mariandynos Heracleæ subjectos, mox Paphlagonas, usque ad fluvium Halyn habuerunt. cetera ad Propontidem usque Chalcedonem fuerunt Bithynorum, Galii fluminis ostiis fines eorum terminantibus.

XXVII. Maxima urbium Nicomedia fuit. deinde Nicæa: item Prusa, quam ab Hannibale conditam de Prusæ nomine, reges Othomanici ante occupatam Adrianopolim regni sedem habuerunt. Flumina Bithyniæ Syrium, Lapidas, Pharmacias, Alces, Crynis, Lylæus, Scopius, memorantur; &, qui Bithyniam a Galatia determinabat, Hieras. Erat & Hylas fluminis & lacus nomen, ab Herculis amatio deductum, si fabulis lubet credere, juxta Prusadem urbem, diversam ab utraque Prusa. nam & altera fuit Bithyniæ Prusa, ad Hippium amnem.

XXVIII. Ab his regionibus, Cappadociam & Bithyniam dico: quasdam partes abraferunt Gallogræci, de quibus post prolixam Livii descriptionem taceo. Sed Paphlagoniam Halys fluvius ab ortu terminabat, a meridie Galatia: ad occasum Bithyni & Mariandyni habitabant; versus septentriones mare Euxinum erat. Amastris horum erat non incelebre oppidum, majorisque adhuc famæ Amisus & Sinope. Neque refert, has interdum Ponto vindicari: nam regionum istarum terminos non minus, atque gentium jura, Mithridatis ambitio turbavit; reductis in ditionem plerisque populorum, quos enarravimus.

XXIX. At antiquitus Ponticæ gentes fuisse videntur Mariandyni, Mosynœci, Caucones, qui jam ætate Strabonis nulli superfuerunt, Chalybes, qui & Chaldæi, Tibareni, Macrones Euboicorum credita colonia. Nam tota illa Ponti ora, Græcorum frequentata navigationibus, plurimas gentis ejus urbes habuit, quarum celeberrimæ fuere Trapezus, & Heraclea. Annium Ponticorum nobilissimus Phasis, cum urbe cognomine ad ostium. Pyxites Trapezuntem alluit: flumen Jasonium memoriam retinuit antiquissimæ Græcorum heroum expeditionis.

XXX. Sed & alia multa per eas regiones in Pontum Euxinum permeant flumina, tanta quidem vi aquarum, ut terra, quam continuo interant amnes, implendum ali-

§ XXVII. Plin. 5, 32. Solin. c. 54. Strab. Ptolem. § XXVIII. Strab. Plin. § XXIX. Strabo. Scholiast. Apollon.

quando illud mare Polybius disputaverit. Hæc igitur regna quamquam suos quæque reges ab antiquissimis temporibus habuissent; tamen propter viciniam locorum, & linguæ morumque commerciis varie mixtos populos, crebræ, ut fieri amat, rixæ, deinde bella oriebantur. Et ut graviora fere humanis remediis mala sunt, connubia regum, mixtusque affinitate sanguis, adeo non finiebat veteres controversias, ut non alia fecundior novis gignendis materies esset.

XXXI. Inde auctis odiis, cum etiam imperii amplificandi insana libido Mithridatem stimulare, temperare non potuit, quin subinde ex occasione temporum vicinos infestaret. Et antea quidem Nicomedem etiam Ariobarzannemque expulerat: &, quamquam reduci a Romanis tulisset, tanquam imbecillitatem sibi exprobrantes aspiciebat. Illi vicissim, salvo tam potente vicino, nequidquam restituti videbantur. & accedebant a Romanis ducibus stimuli, qui, prædarum & gloriæ spe, bellum undecumque cupiebant confurgere.

XXXII. Igitur operam dederant, ut cum minacibus ad Mithridatem mandatis senatus nomine legati mitterentur; bellum denuntiantes, *ni, quos populus Romanus vicina regna obtinere jussisset, quieti in possessione manere pateretur.* Ille ultro multa questus, *quanta patientia tot contumelias concoxisset,* demonstrat: *quantasque opes publice privatimque colendo Romanos profudisset. nunc etiam, licet provocatum, neque inermem, quiescere malle, modo finis injuriarum fiat.* Et fides promisso fuit. sed non eadem Nicomedi modestia mansit, quem Romanorum ducum hortamenta, & inopia pecuniæ invitum ad arma compulerunt.

XXXIII. Nam & iis, a quibus reductus in regnum fuerat, multa erat pollicitus: & passim ab incolentibus Asiam Romani nominis hominibus magnam vim nummorum fecerato abstulerat. Igitur in ditionem Mithridatis irruptio-

§ XXX. Polyb. 4, 40. § XXXII. Diodor. ap. Fulv. Ursin. OroL 6, 20.

ne facta, usque ad Amastrim urbem prædabundus processit. Mithridates enim, quamquam paratas habebat copias, occurri vetuerat, quo pluribus paulo post & speciosioribus causis bellum sumeret. Ubi reversus in Bithyniam Nicomedes est, Pelopidam legatum Mithridates ad Romanos duces milit. Is, commemorato *veteris societatis jure*, quod a majoribus acceptum, constanter atque fideliter multis neque levibus officiis Mithridates coluisset, nunc autem, ait, injuria pro gratia redditur.

XXXIV. *Ademta regi Phrygia est, ademta Cappadocia, quarum hanc proavis suis debitam pater Evergetes recepit, illam opera bello Aristonici navata præmium accepit. si tamen præmium vocare possumus, magno auri pondere ab imperatore vestro emam: & olim a Seleuco Callinico in dotem datam proavo regis. Sed illa sane, quia paulo longinquiora sunt, silentio, & si vultis, etiam oblivione sepeliamus. Ista vero recentia qui possumus? quod Nicomedem os Ponti intercludere, agros usque ad Amastrin populari finitis, prædamque avertere, cujus æstimationem novistis ipsi rectius, quam ut a quoquam debeatis edoceri.*

XXXV. *Et ista quidem hoc modo gesta sunt, non invalido, nec imparato ad prohibendum rege; sed ut vos ipsos spectatores eorum, quæ fierent, testesque haberet. Quæ quia non auditu, neque incertis, aut suspectis auctoribus, sed coram visu accepistis; ergo igitur amicus atque socius rex (hæc enim nomina fœderum tabulis continentur) hoc a vobis sociis amicisque suis petit, ut adversus Nicomedis injurias auxilio sitis, aut injuriarum coerceatis auctorem. Ad hæc Bithyni: (nam & ab Nicomede legati aderant:) Quam justas contra Mithridatem inimicitias Nicomedes gerat, ignorare nemo potest, qui meminerit, paulo ante Socratem Ponticis armis instructum Bithyniam invasisse: quieturum certe, fratribusque ætati concessurum, ni fuisset a Mithridate ad parricidiale bellum instigatus.*

XXXVI. *Et hæc contra illum Nicomedem fiebant, qui a vobis erat Bithyniæ rex constitutus. Unde non nostra magis, quam vestra,*

6 XXXIII. Justin. 38, 5. Diodor. Appian. Mithrid. § XXXIV. Justin. 38, 5. Appian. § XXXV. Memnon. Appian.

*Romani, hæc censenda injuria est. Quorum ille nomen amicitiamque quanti faciat, ex aliis quoque gestis ejus pronum est intelligere. Populus Romanus Asiaticos nos reges in Europam transcendere vetuit. Sed hic Chersonnesi pleramque partem possidet: atqui Europæ regio Chersonnesus est. Sed omittimus plura hostilis erga vos & contemtoris animi, quæ protulit, indicia commemorare.*

XXXVII. *Majora enim, &, nisi in tempore obviam itis, acerbiora sunt, quæ exspectantur. Quorsum enim ingentes illi apparatus, tot propriæ copiæ, atque illa cum tot aliis regibus & populis fœdera pertinent? quæ & tranquille victuro supervacaneæ sunt: nec profecto contra Nicomedem providentur. Præter domesticas vires socios Thracum, socios Scytharum, populos habet. Habet & Armeniæ regem non amicitia modo, sed etiam affinitate, conjunctum. In Syriam, in Ægyptum missitat, ut illorum quoque regum benevolentiam paret.*

XXXVIII. *Naves porro testas cum habeat trecentas, alias insuper exædificare non desinit: gubernatores atque proretas, magnis propositis præmiis, ex Ægypto & Phœnicia sollicitat. Scilicet superbum animum Phrygia & Cappadocia amissæ angunt: quod contra vim & astutiam Ponticam, vestra recepistis, aliena, quibus debebantur, reddidistis. Ille primum dolor animum Mithridatis avertit a vobis, Romani: ille cum invidia metuque magnitudinem vestram intueri cogit inimicum hominem, & sub obtentu nostrarum inimicitiarum, occasiones contra vestrum imperium captantem.*

XXXIX. *Quare neque dubitare possumus, vos, quemadmodum viros prudentes decet, factorum ipsius, quam verborum, majorem habituros rationem esse: ne, aut ob fictum amicitiae nomen, vestros optima fide amicos Mithridati prodatis; aut vestrum senatusque de hoc regno judicium a communi hoste sperni violarique feratis. Post hæc iterum admissus in consilium Pelopidas, si quæ veteres adversus Nicomedem querelæ sunt, earum judicium vobis, inquit, deferimus, Romani. Sed hæc postrema, quæ ipsi aspexistis, ditionem Mithridatis minui, claudi mare, prædas ex agris agi, nulla disceptatione egent.*

XL. *Sed denuo vos rogamus, ut aut prohibeatis ejusmodi facta; aut passo indigna Mithridati opitulemini; aut postremo non intercedatis suas injurias vindicaturus, neutris partibus imixti.* Hæc iterante Pelopida, licet jam ante Nicomedi auxilia polliciti erant, movebantur tamen Romani dictis, & amicitiae nomine, cujus adhuc inviolata erant fœdera: neque facile, quomodo responderent, inveniebant. tandem vafro perplexoque responso, *neque Mithridatem a Nicomede vexari passuros, neque bello peti a Mithridate Nicomedem*, dixerunt. Simul Pelopidas, arguere dictorum obscuritatem cupiens, a concilio dimissus est.

XLI. Hæc ubi Mithridati audita sunt, *se vero jam haud obscure læsum a Romanis esse* testatus, Ariarathen, unum ex filiis, in Cappadociam mittit: quam ille antea quoque tenuerat. Atque is, victo Romanorum duce Maltino (qui & Mancinus alibi scribitur) ejectoque Ariobarzane, cum igni ferroque pleraque vastavisset, haud magna mole regnum occupavit. Tum remissus ad Romanos duces Pelopidas, in hunc modum verba fecisse dicitur:

XLII. *Quam indigna rex Mithridates passus sit, Phrygia Cappadociaque spoliatus, id equidem, Romani, nuper audivistis. Quas deinde, vobis insipientibus, injurias eidem Nicomedes intulit, eas, cum vindicare deberetis, negligere maluistis. denique societatis amicitiaeque implorantibus fidem, ita respondistis, ut, tanquam læssemus alios, non ab aliis læsi essemus, non videri e republica vestra diceretis, Nicomedem & Bithynos violari. Idcirco ipsi causam præbuisistis recentibus Cappadociae turbis. Vester ille neglectus, vestraque in responsis ambages, Mithridatem in hæc consilia coegerunt. Jamque vos ad senatus vestri judicium vocat, Romam legatos missurus de rebus omnibus.*

XLIII. *Vos interea videritis, ne quid, inconsultis Patribus, temere moliamini. quantum constari incendium belli possit, ex potentia Mithridatis aestimatum haud est difficile. Supra vicies centena millia passuum paternæ ditionis tenet: ipse magnam*

adjecit terrarum partem, Colchorum bellicosos populos, Græcorumque & barbarorum quotquot supra Pontum nationes incolunt. Jam Scythiis, Tauricisque, & Bastarnis, & Thracibus, & omnibus, quæ Tanain Istrumque fluvios, & Mæotidem paludem circum gentes habitant, promissimos ad imperia sua socios habet.

XLIV. Porro Tigranes Armenus gener illi, Parthorum rex Arsaces socius & amicus est. Navium quoque magnum possidet numerum: isque augetur quotidie. neque instruendis ornandisque ulla pars apparatusum deest. Sed & Bithyni nuper de Syriacis Ægyptiisque regibus mentiti minime sunt, quos equidem, si bellandum sit, nostros fore non ambigo. sed & nuper possessam vobis Asiam, Græciamque & Africam, nobis accessuras reor: ipsiusque Italiæ haud contemnendam partem, quando illa quoque impotentiae vestrae & injuriarum pertæsa, bellum contra vos inexpiabile gerit.

XLV. Atque illud bellum cum conficere nondum potueritis, irritatis Mithridatem, nunc Nicomedem ei, nunc Ariobarzanem immittendo. & verbis amicitiam præferentes, hostium opera facitis. Quapropter, si quid actorum pœnitet, vel nunc punite vestros in amicos injurium Nicomedem, quod si feceritis, magnæ vobis auxilia contra Italicos a rege polliceor. Hæc ratio si displicet, aut insidiosam istam amicitiam abrumpite; aut Romanam in jus eamus. Hæc ubi dicta sunt a Pelopida, Romani orationis insolentia commotiores, Mithridatem abstinere Nicomede & Cappadocia jusserunt; hanc enim Ariobarzani se reddituros: Pelopidam continuo abire castris, neque reverti, nisi rex imperata fecisset.

XLVI. Discedenti custodiam addi placuit, ne quos obiter in via corrumperet. Haud absimilis legatorum, quos deinde ad senatum Mithridates misit, oratio, Patrumque ad eam responsum fuit. petentibus, siquidem amicus populi Romani Nicomedes esset, illum auctoritate sua ad satisfaciendum compellerent; sin vero, Mithridatem sibi consulere paterentur: neutrum concessum est. minæque insuper additæ, nisi Cappadociam Ariobarzani redderet, & omitteret Nicomedem. Eademque die coactos abire legatos nuntiare regi suo jusserunt,

*ne quem deinde mitteret, donec mandatis senatus paruisset.*

XLVII. Sic irritatis utrinque animis, qui per Asiam erant Romani duces, non expectato senatusconsulto populi jussu, ex Bithyniæ Cappadociæque & Paphlagoniæ delectibus exercitum coegerunt; additis etiam Gallogræcorum auxiliis. Simul L. Cassii, qui Asiam obtinebat, convenire jussus est exercitus: copiarumque auxiliares omnes eundem in locum conductæ. Deinde partiti inter se vires: Cassius, ubi Bithyniæ Gallogræcia committitur, castris cepit locum: Manius Aquillius, qua irrupturus in Bithyniam Mithridates credebatur, confedit.

XLVIII. Cappadociæ finibus Appius Claudius præsedebat. Copiarum his erant equitum peditumque, quadragena circiter millia. Naves etiam aderant, quibus præfecti Minucius Rufus, C. Popillius angustias Ponti apud Byzantium observabant. Præter hæc Nicomedes suum habebat exercitum, quinquaginta peditum millia, sex equitum. Neque minus Mithridati virium erat, centum quinquaginta millia proprii militis, cum equitum millibus quadraginta: naves tectæ trecentæ, centum dicota: deinde reliquus apparatus tantæ expeditioni non impar.

XLIX. Prætoribus Neoptolemo maxime & fratre ejus Archelao utebatur, nobilissimis viris, & genus ad regem Argivorum Temenum, cujus inter posteros & Magnus Alexander fuit, referentibus. Sed ipse rex per se administrabat plurima. Auxilia ex minore Armenia Arcathias Mithridatis ipsius filius adduxerat, decem equitum millia. Dorylaeus phalangem regebat: Craterus curribus falcatis præerat, numero centum triginta.

L. Hæ tum ab utraque parte copiarum erant, cum primum Romana arma Mithridaticis collisa sunt. Primum inter Nicomedem & duces Mithridatis (ipse enim aberat) prælium fuit apud flumen Amniam, ubi Nicomedes exercitum

§ XLVI. Entrop. l. 5. Oros. 6, 2. Diodor. ap. Fulv. Ursin. Appian. Mithrid. § XLIX. Joseph. de bello Judaic. 1, 17.



suum instruxit. At Pontici, cum in universum quadraginta peditum, decem equitum millia haberent, quia phalanx sequi non potuerat, præter Arcathiae equitatum, quosdamque falcatorum curruum, tantummodo levem armaturam adduxerant. idcirco, ne a multitudine Bithynorum circumvenirentur, tumulum quendam faxosum mediocri præsidio occuparunt.

LI. Animadversum a Bithynis consilium est, & ad recuperandum collem magnæ copiae missæ. Igitur Neoptolemus, ubi dejici suos videt, salutem omnium in eo verti ratus, ut locus teneretur, celeriter ad opem ferendam advolat, Arcathia quoque in partem periculi accito. Hoc ubi Nicomedes conspexit, universum rapit agmen, & post acre certamen, multo sanguine fuso, Mithridaticos in fugam agit; illustri victoriæ futurus compos, nisi Archelaus cum suis mature persequentem fugientes a latere invalisset.

LII. Hujus virtute & prudentia mirifice commutata pugnae fortuna est. Nam aversum in se Nicomedem, jamque concepta spe vincendi, & impatientia moræ calidius instantem, servatis ordinibus sensim recedendo tantisper tenuit, donec Neoptolemo retinendi suos, aciemque redintegrandi, spatium esset. Deinde conversus in hostem quadrigas falcatas immisit, non sine clade Bithynorum: ceterum major, quam pro damno, terror erat. Fœditas spectaculi magis, quam vis hostium, turbavit ordines: cum calidis adhuc vulneribus semineces viros, divisa corpora, truncos artus in multo sanguine volutari, aliorum membra hastis aut falcibus curruum rotari cernerent.

LIII. Perterritis Archelaus a fronte, Neoptolemus & Arcathias collectis, qui fugerant, a tergo incubuere. Diutamen utrisque resistere Bithyni, donec, plerisque cadentibus, Nicomedes solutis ordinibus abiit. Fugientem in Paphlagoniam secuti sunt, qui potuerunt: ceteros prælium confecit, aut in potestatem victoris tradidit captivitas. ca-

fra quoque cum pecunia Nicomedis capta sunt. Hæc pugna Romanos etiam duces haud mediocriter commovit: quod per expeditos tantum & equites, cum gravis armaturæ robur abesset, rem tantam confectam esse, nulla locorum opportunitate, nullo hostium errore adjuvante Ponticos, ne numero quidem æquo, sed consilio ducum & virtute militum, cernebant. Captivos ad se adductos Mithridates comiter affatus, viatico dato dimisit domum, ut inter initia rerum utilem clementiæ famam acquireret. Circa eadem tempora Thraces, qui non sine dolo Mithridatis Macedoniam populabantur, magnam iis locis ex vastitate famem & frumenti caritatem effecerunt; donec a prætore Macedoniæ C. Sentio superati, cum rege suo Sathimo ad patrias sedes reverterentur.

§ LIII. Curtius 4, 15. Appian. Mithrid. Diodor. ap. Vales. Liv. Epit. Cic. Verr. 3. Plut. in Sull. c. 22. Oros. 6, 2.

---

# JOANNIS FREINSHEMII SUPPLEMENTORUM LIVIANORUM

LIBER XLII.

IN LOCUM LIB. LXXVII LIVIANI.

## E P I T O M E

LIBRI SEPTUAGESIMI SEPTIMI.

*Cum P. Sulpicius tribunus plebis, auctore C. Mario, perniciosas leges promulgasset, ut exsules revocarentur, & novi cives libertinique distribuerentur in tribus, & ut Marius adversus Mithridatem Ponti regem dux crearetur, & adversantibus consulibus Q. Pompejo & L. Sullæ vim intulisset, occiso Q. Pompejo consulis filio, genetro Sulla; L. Sulla consul cum exercitu in urbem venit, & adversus factionem Sulpicii & Marii in ipsa urbe pugnavit, eamque expulit. ex qua duodecim a senatu hostes, inter quos C. Marius pater & filius, judicati sunt. P. Sulpicius, cum in quadam villa lateret, indicio servi sui retractor, & occisus est. servus, ut præmium promissum indicii haberet, manumissus, & ob scelus proditi domini de saxo dejectus est. C. Marius filius in Africam trajecit. C. Marius pater, cum in paludibus Minturnensium lateret, extractus est ab oppidanis: &, cum missus ad occidendum eum servus, natione Gallus, majestate*

*tanti viri perterritus recessisset, impostus publice in navim delatus est in Africam. L. Sulla civitatis statum ordinavit: exinde colonias deduxit. Q. Pompejus consul, ad accipiendum a Cn. Pompejo proconsule exercitum profectus, consilio ejus occisus est. Mithridates, Ponti rex, Bithynia & Cappadocia occupatis, & pulso Aquillio legato, Phrygiam, provinciam populi Romani, cum ingenti exercitu intravit.*

I. **L.** SULLA, Q. Pompejo consulibus, provinciarum ea ratio cum esset inita, ut Sulla, qui tum adhuc Romæ erat, simul per res Italicas posset, Asiæ & Mithridaticum bellum, cum exercitu, quem hactenus duxerat, provinciam haberet: P. Sulpicius tribunus plebis, perniciosis legibus ferendis, priusquam vetus illud consopitum incendium esset, etiam foedius aliud atque horribilius auctore Mario confiavit. Quippe C. Marius (ut est insatiabile honorum & potentiae humanum ingenium, quoties ratione contempta cupiditatum imperio regitur) post amplissimos triumphos, & consulatum sexies gestum, miserum se putabat, si in tanta populi Romani fortuna, quidquam ad laudem eximium, cuiquam alteri relinqueretur.

II. Atqui jam & bellis & bellorum præmiis vigorem an-  
nosque consumserat, gravis corpore, etiam nuper imperio ob senectutis incommoda abdicato. Igitur dum conficiendis socialis belli reliquiis Sulla consul in Campania distinetur, C. Marius Asiaticæ laureæ desiderio P. Sulpicium Rufum impellit, ut ademptam Sullæ provinciam sibi decernerat. Erat alioqui in magna invidia consul, quod, uxore Cœlia per causam sterilitatis dimissa, Cæciliam duxerat Q. Metelli pontificis maximi filiam. Id multi nobilium ægre ferebant, & populus indignabatur. tanta erat ejus femine æstimatio, ut hujus matrimonio judicarent indignum, quem dignissimum consulatu judicaverant.

§ 1. Vellej. 2, 18. Appian. Jo. Antiochen. ap. Vales. § 15. Plut. in Sull. c. 13. Appian. Orat. 5, 19.

III. Hac animorum inclinatione Marius cum Sulpicio uti cupiebant, infaustis ominibus, & ad graviora reipublicæ mala perventuris, quam unquam antea sustinuisset. Idque significatum multis prodigiis putant. Flamma ex hastilibus signorum cum emicuisset, vix restingui potuit. Corvi tres pullos in conspectum hominum allatos devoraverunt, & reliquias reportarunt in nidum. Mures in templo quodam sacrum aurum roserunt. e quibus cum feminam unam æditui cepissent, in muscipula quinque musculos enisa, tres eorum devoravit.

IV. Sed nihil fuit horribilius, quam quod sereno cœlo tubæ vox insonuit, lugubre & valde acutum canens, ut homines ad vehementiam sonori clangoris cohorrescerent. Ex his Tusci haruspices *mutationem rerum instare* prædicabant. Dumque his rebus operam dat senatus in æde Bellonæ, passer in conspectu omnium cicadam ore correptam intulit: ejusque parte abjecta, & in fano relicta, cum altera parte avolavit.

V. *Id portendere secessionem agrestium urbanorumque responderunt haruspices: quorum alteri cicadæ in morem streperent vocibus, alteri similiter atque illi ruri exigenter vitam.* Nihil horum Sulpicium a cœptis remorabatur, mira pravitate hominem; ut improbitate non modo superaret ceteros, sed secum ipse certare videretur. Crudelitatem enim maximam pari audacia avaritiaque miscuerat: neque tantum erat ullum flagitium, cujus vel turpitudine absteret a patrando, nec pœnitentia post factum duceretur.

VI. Quid multa? civitatem Romanam propalam vendebat libertinis & inquilinis: & mensa in foro posita pretium numerabat. Tria circa se habebat hominum milia cum ensibus, & ad omnia paratam equestrium juvenum multitudinem. sexcenti erant delecti, quos *Antisenatum* vocare consueverat. Saturnini, seditiosissimi hominis, omnia laudare solitus, *cunflationem* in præcipiti homine,

§ IV. Plut. § V. Jo. Antiochen. ap. Vales. Plut. in Sull. c. 15.

T. Liv. Vol. IX.

G

& *timiditatem* in furibundo reprehendebat. Idem, cum tulisset legem, *ne quis senator amplius quinque millia nummorum aris alieni contraheret*, ipse moriens debuit centies vices.

VII. Talis vir, a Mario immixtus in rempublicam, vi ferroque destinata perficere conatus est: cum ingenium etiam facundiamque a bonis initiis & rectissima voluntate ad ancipitia & prava transtulisset. Præcipuæ Sulpicii actiones erant, *ut exsules, quibus causam dicere non licuisset, revocarentur; novi cives, libertinique distribuerentur in quinque & triginta veteres tribus, &* cujus gratia cetera fiebant, *C. Mario Mithridaticum bellum decerneretur.*

VIII. Sed exsules ne reducerentur, ipse nuper intercesserat: jam immutata voluntate, verba cavillando eandem legem referebat, *non exsules a se reduci, sed vi rejectos*, dictitando. quasi non iidem essent, utro nomine appellarentur: aut quasi de vocibus, non de rebus, controversia in republica esset. Libertinos autem, & qui modo de sociis facti cives fuerant, ideo distribui in veteres tribus volebat, ut plus in suffragiis illorum roboris esset. quippe homines callidi, si hos, numero veteribus civibus facile superiores, jure æquassent, nihil fore existimabant, quod illorum opera non assequerentur, & quo minore negotio rem perficerent, de bello Mithridatico interea silentium agebant.

IX. Ne sic tamen tenere propositum potuerunt, cum ei rogationi veteres cives præfractis animis resisterent, resque interdum ad fustes & faxa pervenisset; L. Sulla ad opem reipublicæ ferendam, ab Italici belli conficiendis reliquiis, alieno tempore avulsus est. Vehementer enim accisæ fociorum vires erant. Lamponius tantum & Cleptius cum parte Lucanorum erant in armis: Samnitesque & Sabelli Nolam & vicina Nolæ retinebant. Igitur Sulla profectus jam ad exercitum, qui Nolam obsidebat, fuerat: receptisque plerisque circa præsidiis, haud procul fine belli aberat.

§ VI. Plut. in Mar. c. 57. § VII. Vellej. Ascon. in Cornel. Liv. Epit. Rhetorica ad Herenn. 2, 28. § IX. Appian. civ. l. 1. Diodor. l. 37. Vellej.

X. Sed urbano tumultu excitatus, accurrit Romam, ut collegam tribunitiis furoribus repugnantem adjuvaret. Consilio tamen magis, quam viribus, grassari placuit; ne patriæ incumbentem pestem, si arma corripuissent, alia peste viderentur repellere. Igitur iustitio in dies aliquamultos indicto hoc agebant, ut comitia differendo legis impediendæ idoneam aliquam occasionem tempus fuggeret. At Sulpicius, iustitio valere iussu, suos in forum educit, admonitos, *ut pugiones sub vestibulis secum ferrent: iisque, adversus quoscumque opus esset, ne consulibus quidem exceptis, uterentur.*

XI. Sic instructus ad ædem Castorum pergit, ubi forte concionem consules habebant. ibi *ferias*, ut *parum rite editas*, arguere orsus, postremo *tolli eas a consulibus* jubet, *comitiisque legum tempus atque locum dari.* Tum vero consulibus adversantibus, in nervum erupit furor, strictisque mucronibus vis intentatur: cadit inter alios Pompejus adolescens consulis filius, idemque alterius consulis generus: pater Pompejus clam elabatur: Sulla, qui in domum Marii confugerat, sive, ut ipse in commentariis prodidit, *cinctus inimicorum gladiis consultandi causa secesserat*, cum inde rediisset in forum, iustitium ex voluntate Sulpicii solvit.

XII. Ideo Sulpicius reliquit magistratum Sullæ, cum eundem Q. Pompejo abrogaret. Ita dimissus ad exercitum Sulla, cum Capuam venisset, unde rebus omnibus ordinatis ad bellum Asiaticum pergere statuerat, P. Sulpicius legem, cujus ergo turbæ istæ excitatæ omnes fuerant, perferret: *Cajumque Marium pro Sullæ Mithridatici belli imperatorem esse* jubet. Mittitur e vestigio Gratidius, propinquus & legatus Marii, cum alio tribuno militum, qui Nolanum exercitum ad Marium perducant. At Sulla, cognitis, quæ

§ X. Appian. § XI. Plut. in Sull. c. 16. & Mar. c. 57. Appian. Liv. Epist. Vellej.

in urbe fierent, jam ad legiones venerat prior, vocataſque in concionem ita erat allocutus:

XIII. *Quæ per hoſce dies in urbe geſta ſunt, milites, ea varie ad vos perlata eſſe exiſtimo, ut ferme ſolent, quæ incertis auctori- bus, aut vago rumore, differuntur. Quo magis ad vos properan- dum eſſe cenſui, ut in communibus injuriis mutui aſpectus ſo- latio uteremur: & vos, quid mihi ſit in præſentibus conſilii; ego, quid vobis voluntatis, cognosceremus. Nam ſiquidem populi Romani conſulem, imperatorem veſtrum, una cum concordia collega cogi in ordinem, violari minis, terri cæde cariffimorum oportuit: cauſam non dico, quin adverſarii noſtri cupitis fruantur. Sin ve- ro paucorum importunitate victum conſulare imperium, cædem cla- riſſimi juvenis, conſulis alterius fugam, alterius periculum, do- minantes in urbe noſtra, quos anno in adverſa acie ſtantes, ferro ac virtute vicimus, vobis mihiſque juxta intolerandum eſt: quid fieri in rem noſtram publicamque ſit, conſideremus.*

XIV. *Sed mature decreto opus eſt, donec conſultare commu- niter, & agere, quæ volumus, licet. Si enim neſcitis, mihi bellum Mithridaticum, vobis ego imperator eripior. C. Mario tradimini: niſi tamen vos ille faſtidiat, & alterum exercitum nupero com- militio notioſorem malit. Atquæ provinciam illam, & has legiones ſenatus mihi dederat: & ego jam ad trajiciendum omnia para- veram, lætus & feſſinans, non ut mihi tantum gloriam trium- phumque ex veris hoſtibus quærerem; ſed etiam, ut vobis ali- quando referrem gratiam: voſque, tot exantlatis me duce pro re- publica laboribus, Aſiaticarum opum larga & facili copia dit- tarem; quo reliquam deinceps ætatem in otio locuplete & hono- rato degeretis.*

XV. *Sed hæc & alia nobis ereptum eunt injuſtiſſimi morta- les. quod ſi vobis volentibus eſt, doleo & quieſco: ſi, quod jure datum eſt, per injuriam auferri non ſinitis, non me ſubtraham vobis ducem. ad capeſſenda juffa promti paratique eſte. Ad hæc verba, quamquam nihil apertius de propoſito ſuo dicere erat auſus, ſueclamatum a militibus eſt, facile, quid vel-*



let, interpretantibus, *bono esset animo, & recta duceret ad urbem*. nec enim imperatoris tantummodo vicem dolebant, sed de sua quoque erant solliciti, ne forte Marius ad bellum, ut rebantur, facile & quæstuosum alio potius exercitu uteretur.

XVI. Igitur tribunos a Mario præmissos lapidibus coeperiunt: signisque correptis, properant Romam. Ibi quoque populus inquietus & discors agebat: aliis *unicum ducem Marium* efferentibus in cælum; aliis *ad curandum corpus, senio & morbis confectum*, *Bajas faceffere* jubentibus. Nam in Misenensi villam C. Marius posuerat: quam postea L. Lucullus centies festertium emit. Sed Marius, ut se vegetum paremque militiæ muniis ostenderet, quotidie in campo inter juvenes exercebatur: miserantibus multis, qui perspiciebant, quam inane ob præmium, vir ab ima forte ad summam profectus, post septuagesimum ætatis annum, inhabile propter carniū moleū corpus (nam in senectâ obfuscus evaserat) & fracta laboribus membra fatigaret.

XVII. Sed magis ridicula erat, quam cupiditatibus suis obtendebat, causa: cum *ideo se concupivisse imperium* diceret, *ut filium adolescentem artes bellī ipse præsens edoceret*. Inter hæc, cum occisos, quos ad exercitum miserat, tribunos, Sullamque cum sex legionibus venire ad urbem comperisset, ipse vicissim quosdam amicorum Sullæ occidit, bonaque cæsorū diripuit. Itaque miserabilis Romani populi conditio erat, cujus principes, nusquam certa spe salutis, aut ulla concordie fide, alii ex urbe in castra, alii ex castris in urbem confugiebant. Nam, excepto quæstore uno, ceteri tribuni præfectique signa patriæ inferenda abominati, Romam se receperant. Contra ab iis, qui vini Marii Sulpiciiue insolentiam metuebant, in castra Sullæ, tanquam ad asylum, concurrebatur.

XVIII. In urbe senatus suæ potestatis non erat, sed ad nutum tyrannorum circumagebatur. His volentibus, ex

§ XV. Jo. Antiochen. Appian. Plut. in Sull. & Mar. § XVI. Plin. 18, 6. Plut. Vellej. 2, 18. § XVII. Appian. Plut. in Sull.

magistratibus ejus anni duos ad L. Sullam misit, Brutum & Servilium prætores. Ii, cum ad exercitum venissent, paulo animosius locuti in extremum discrimen inciderunt, ut, confractis fascibus, prætextisque dereptis, vix & agre corpus incolume referrent in urbem, ipso aspectu, quorsum jam seditionis furor evalisset, offensuri. Marius, quantum in tali trepidatione potest, ad defensionem se comparat. Sulla triginta peditum, quinque equitum millia adducens, ad urbem intendit cursum: præter alia, quibus incitabatur, per somnium quoque stimulantibus geniis.

XIX. Nam quæ Cappadocum instituto Romæ colebatur Dea (Lunam, an Minervam, an vero Bellonam interpretarentur, ipsi quoque dubitabant) eam assistere sibi per quietem vidit Sulla, fulmenque porrigere, recitatique inimicorum ejus nominibus, ad singula præcepisse, feriret: atque illos, tanquam ad ictum concidentem, evanescere. Id visum collegæ narravit, qui, cum laude & gratulationibus occurrens, ad omnia operam suam promiserat. Interea secundi, deinde tertii ab urbe legati venerant, quibus, causam consilii tam præcipientis requirentibus, idem responsum omnibus datum: *ad liberandam tyrannide patriam iri*. postremo tamen adjecit, *si senatus cum Mario & Sulpicio descendere in campum Martium velit, nihil se, nisi de communi sententia, acturum esse*.

XX. Sed Marius Sulpiciusque, neque fidei se inimici credere ausi, neque satis parati ad resistendum, novam senatus nomine legationem mittunt. cujus hæc mandata fuere: *Neminem magis, quam ipsos consules, scire, quanto-per se semper senatus laborasset, uti amborum, & præcipue L. Sullæ, pro præstantissimis in rempublicam meritis, quam amplissima dignitas foret. Ceterum eam esse conditionem Romæ, ut sæpe contra voluntatem senatus populi jussa valeant: præsertim ubi propter metum majoris mali, prudentissimus quis-*

§ XVIII. Plut. in Mar. c. 58. & in Sull. c. 17. § XIX. Appian, Plut.

que concedendum temeritati multitudinis putet. Id adeo nuper etiam accidisse, iis ferendis legibus, a quibus haud minus reliqui Patres, quam consules ipsi, abhorreant.

XXI. Verum enimvero, in libero populo multa ferenda esse potentioribus, donec arte & occasione corrigantur. Ita Gracchorum olim, ita postea Saturnini rogationes, quæ feruentibus populi studiis nulla vi potuissent impediri, tempore captato citra tumultum abolitas esse. Idem nunc quoque fieri posse de iis, quorum iniquitate se læsum consul Sulla conqueratur.

XXII. Nihil antiquius esse senatui, quam ut inter claros & potentes viros, quæ inciderint controversiæ, citra publici status periculum, ex æquo & bono componantur. Eundem animum & C. Marium, & P. Sulpicium præ se ferre: nec dubitari, quin par maneat & consulibus in communem patriam pietas. Nihil opus esse armis, ubi civili modestia transigi melius possit. nec adhuc admissum tam inexpiabile quidquam, ut ad extremæ desperationis auxilia veniri oporteat. Tempore tantummodo & modica patientia rem indigere. Igitur hoc unum deprecari Patres, ne per præcipientem iracundiam omnis concordiæ spes abjiciatur. Omnia conventura, modo hanc dent consules senatui veniam, ut ne propius quinque millia passuum ab urbe castra metentur, donec Patres conscripti consultare amplius de præsentibus possint.

XXIII. Ad Pietas hæc agebantur. id tabernis nomen erat, ad quintum decimum ab urbe lapidem via Lavicanæ sitis. Ibi responsum a Sulla legati abstulerunt, in loco castra positurum: idque, ipsis audientibus, more militiæ statim imperatum est. At hæc simulatio consulum erat. nam ipsi, consilio intellecto inimicorum, dum legati, velut impetrato, quod volebant, læti redeunt Romam, L. Basilo, C. Mummi præmissis, citato agmine sequuntur. Sulla Esquilinam portam cum vicina parte occupandam cum legione una sumserat: Collinam cum alia legione Pompejus:

ad sublicium pontem tertia, quarta pro muris ad sublidium stare iussa est. duæ hostili fremitu animoque in urbem irruerunt. Ibi cum juxta collem Esquilinum Marius Sulpiciusque cum tumultuaria manu occurrissent, miserrimum facinus factum est, ut in ipsa urbe non per seditionem, & correptis temere telis, sed aperto Marte signis canentibus in justæ pugnae faciem, tum primum post Romanam conditam inter cives concurreretur.

XXIV. In hoc prælio cum Sullanos non oppositus modo hostis, sed desuper e tectis jaculantes patres familias urgerent: consul ipse, correpto signo, in primam aciem procurrit: fugamque militis religione signorum & præsentia ducis cohibet. simul ad omnia respiciens, vocari ex sublidii legionem, & interea delectos ex præsentibus, circumire Suburrana via, & a tergo includere hostes jubet. ipse, correpta face, contra eos, qui de tectis saxa atque tegulas jaciebant, *subdi ædificiis ignem* imperat, *sagittariosque tela ignita immittere.*

XXV. Ita detrusus ad ædem Telluris Marius, plebem ex domibus, itemque servitia ad pileum vocat. Sed potentior promissis metus fuit. tres tantummodo repertos ajunt, qui conditionem acciperent. Sulla per sacram viam in Capitolium pergens, quo se Marius cum suis receperat, cum milites quosdam suos obviam diripere vidisset, eundem delicti supplicii locum esse voluit, coram statim in conspectu omnium punitis. ab eadem modestia, dejectis a Capitolio cum cæde multorum inimicis, custodias per omnes regiones urbis posuit; totaque nocte cum collega pervigil, obivit omnia, ne quid a victoribus per insolentiam in urbanos committeretur. Orta demum luce, vocato in concionem populo, *tempora reipublicæ* deplorant, *tribunitio vento ad talia præcipitia compulsæ. hac necessitate coactos ad consilia necessaria magis, quam optanda, descendisse.*

§ XXIII. Appian. Plut. Flor. 3, 21. Liv. Epit. Jo. Antiochen.

§ XXV. Flor. Val. Max. 8, 6. Plut. in Mar. c. 58. Orof. 3, 19.

XXVI. *Revocandum itaque majorum morem, quo obtinente nihil tale accidisset; neque de re qualibet postea ad populum ferri oportere, nisi de ea deliberatum ante in senatu foret. Centuriata quoque comitia ex lege Servii regis, non ut postea assuevissent, tributa haberi, consultius esse. Non aliis rationibus reduci civium concordiam, & publicæ rei tranquillitatem posse, quam si a temeritate populari ad maturitatem Patrum consilia, & ab egentissimi cujusque audacia, ad circumspeditionem locupletium, suffragia revocentur. Tantum ferme cuique fidei amorisque in rempublicam, quantum in privata spei atque opum, esse.*

XXVII. Sic tribunorum plebis vehementer accisa potestate, quibus imaginem nomenque tantum sine vi reliquerunt: cum etiam ob paucitatem senatorum contemni amplissimum ordinem animadverterent consules, tributis comitiis (ut aliquid dare populo viderentur) ex equestri ordine honestissimum quemque allegerunt, numero trecentos. Viri deinde duodecim a senatu hostes judicati, Sulpicius inprimis & duo Marii: deinde P. Cethegus, Junius Brutus, Cn. & Q. Granii, P. Albinovanus, M. Lectorius, Q. Rubrius Varro, & præterea duo alii senatores, quod, *seditione concitata, consulibus populi Romani arma opposuissent, servosque vocassent ad pileum.* Aqua igitur & igni his interdictum, adjecto, *a quocunque impune occidi, aut ad consules adduci posse.*

XXVIII. Bona quoque eorum publicata: & perquisitores missi, qui caperent profugos, aut occiderent. P. Sulpicius, cum in Laurentinis paludibus, villæ cujusdam latebris occultaretur, indicio servi sui retractus & ab equitibus oppressus est. Caput occisi relatum Romam, & pro rostris propositum: servus, qui secundum edictum consulum libertatem indicii præmium ferre debebat, manumissus; statimque cum insignibus novæ libertatis, ob scelus

proditū heri de saxo præcipitatus est. In alios quoque viros claros, qui reperiri potuerunt, velut jure sævitum. At Marius post fugam ex urbe desertus a turba, per tenebras in prædium quoddam, quod habebat in Solonio, qui campus est agri Lanuvini, se conjecit.

XXIX. Unde, cum filium ex vicinis agris Q. Mucii auguris, cujus ille filiam duxerat, necessaria petere jussisset, Ostiam descendit, repertoque navigio, quod unus amicorum Numerius paraverat, cum privigno Granio, filii reditum non exspectans, abnavigavit. Interim adolescens imminens exitium fide & astu villici evasit. Cum enim eum in prædio Muciano deprehendisset dies, ad comprehendendum eum suspicione ducti equites properabant. Ibi enim latere Marios posse propter affinitatem rebantur, & quia Mucius hostem Marium judicare noluerat. quod ejus nobile factum non est silentio prætereundum. Cum L. Sulla victor armatis circumdedisset curiam, eoque C. Marium hostem decerni cupienti nemo auderet negare: solus Q. Mucius sententiam dicere noluit.

XXX. Atque mitius instante Sulla, *non ita*, inquit, *gladios tuos extimesco, ut propter has senilis sanguinis tenues reliquias, hostem judicare C. Marium sustineam, a quo Italiam & hanc urbem conservatas memini.* Hujus igitur villicus, nihil a fide heri animoque dissentiens, Marium adolescentem inter fabas abditum imposuit plaustro, bubusque junctis, per medios inimicos deportavit in urbem. sic acceptis ab uxore, quorum præcipuus tum usus erat, ante lucem ad mare pergit; & cum forte solventes in Africam nautas invenisset, navem conscendit. Major patri Mario cum ventis & tempestatibus lucta fuit, ingruentibus in eum velut manu facta malis.

XXXI. Ferente vento litus Italiæ legens, Terracinam evitare nautas jussit, Geminium, cujus ibi magnæ opes

§ XXVIII. Jo. Antiochen. Vellej. Liv. Epit. Val. Max. 8, 5. Orof. 5, 19. Flor. Plut. in Mar. c. 58. Cic. de divinat. 1, 36.

§ XXIX. Val. Max. 3, 8. § XXX. Liv. Epit. Plut.

erant, timens, inimicum hominem, & Sullanis partibus deditum. Ceterum illis enīse parentibus, magna vis ventorum a mari coorta, navigium procellis, & ipsum nausēa sic fatigavit, ut vix apud Circejos applicare posset. ibi ob tempestatis fēvitē, & quia deficiebant comēatus, exscētio facta est. sed anxiis, & in momenta temporum extrema quæque exspectantibus, incerta omnia intutaque, &, ut sit in magno metu, præsētia quæque molestissima videbantur. Terram hostilem vitarent; inimicum erat mare: occursum metuerent hominum ob pericula; non minus metuendæ ob penuriam solitudines erant. fero in bubulcos paucos inciderunt, qui dare quidem nihil poterant egentes egentibus, sed agnitum Mariū *celeriter jubebant se subducere: paulo enim ante magnam affuisse equitum manū, quæ illum quæreret.*

XXXII. Plurima tum malorum imago circumfistebat hominē. nudus, desertus, inops, inter mortis & contumeliarum assiduos terrores, Italian, quam honoribus imperiisque suis toties ornaverāt, semel iterumque defendērat, ut hostilem terram fugere cōgebatur. Jamque etiam comites tædio & inedia fatiscēbant: cum, omīssa militari via, in profundum nemus secessit. Ibi cum ærumnosam sane noctē exegisset, cogente inopia, & corpore, donec aliquid superesset virium, usus, secundum litus incessit, adhortans comites, *ne deficerent animis, neve spes suas extremas, & promissa numinum immatura mollitiē corrumpērent.*

XXXIII. Sibi enim, cum ruri adolescentulus ageret, id ostentum evenisse, ut septem pulli aquilini cum ipso nido in sinum ejus deciderent. parentibusque suis consultos haruspices respondisse, fore se mortalium omnium clarissimum, summumque imperium uti septies capeſſat, fatale esse. Id quidem sæpe jactasse Mariū in confesso est; rei vero fidem naturæ avium periti derogant, negantes, aquilam plura duobus ova parere. Sed tamen id vere seu falso expositum, Mario tum temporis profuit, ut ad extrema omnia spem animosque comites sui durarent. Sed ubi ad passus bis mille quingen-

tos Minturnis abfuerunt, fimul equitum alam ad fe tendentem eminus confpexere, fimul duas naves onerarias, prope litus, per quod incedebant ipfi, vela facientes. igitur ad has citato curfu delati, projectis in mare corporibus annatant.

XXXIV. Et Granius quidem, altera navium exceptus, in Ænariam infulam trajecit. Marius corpore gravior, multo duorum fervorum labore vix fublevatus, & in alteram impositus eft. jamque aderant equites, & nautas clamore cientes *appellere* jubebant: *aut faltem præcipitato in aquas Mario, quo inftituiffent curfum, pergere.* Sed supplicante cum lacrimis fene, domini navis, poftquam diu fluctuaffent animis, negarunt fe ejicere virum poffe. Deinde ubi cum atrocibus minis equites citi recefferunt, iterum immutata mente, ad Liris amnis oftia prope terram jecerunt ancoras; hortatique Marium, *ut ad cibum capiendum, corpusque rectius curandum tot afflictum incommodis, in terram exfcenderet, donec, qui flata hora flare debebat, ventusurgeret,* fublatis velis in gramine accumbentem reliquerunt.

XXXV. Ita derelictus ab omnibus hominibus, diu in litore fine voce jacuit: poftquam ægre fe recollegit, per invia & uliginofa loca, oppletaſque cœno & aquis foſſas defecta membra trahens, tandem ad tuguriolum venit, in quo fenex quidam, paludibus purgandis operam dare folitus, habitabat. Ad hujus pedes fe abjiciens, obteftabatur, *fervator atque adjutor eſſe vellet hominis, ſi præſentem tempeſtatem effugiſſet, majora opinione præmia reddituri.* Ille, ſive olim viſum recognoſcens, ſive ex aſpectu virum haud vulgarem judicans, placide reſpondit: *ſi quidem quietis egeret, poſſe tugurio uti; ſin vero inimicos aliquos fugeret, monſtraturum ſe aptiorem latebris locum.*

XXXVI. Ibi dum juxta profluentem in cava ripa, multa arundine levibuſque farmentis contectus ſedet, ſubito ad aures accidit clamor, increpantium ſenem, & ubi Ma-

§ XXXIII. Appian. civil. l. 1. Plut. § XXXV. Appian. Plut.



rium abscondisset jumentum ostendere. Nam quosdam eorum, qui a Geminio ad retrahendum Marium quoquoversum emissi fuerant, ad illud tuguriolum casus detulerat. Is tumultus hominem prodicionis certum subegit, ut exutis vestibus in paludem se immergeret, oculis tantummodo ac naribus exstantibus. Sic repertus extractusque, ut erat nudo corpore, limo cænoque deformis, injecto in collum loro, Minturnas rapitur: & dum, quid facto opus esset, magistratus deliberant, custodiendus ad ædes Fanniæ mittitur, quæ ob veterem offensam irata Mario putabatur.

XXXVII. Nam sexto ejus consulatu, repudiata a C. Titinnio Minturnense, causam dixerat. Titinnius ampla dote spoliare cupiverat mulierem, impudiciæ crimine objecto. Sed Marius, causa cognita, *Fanniam impudicam videri pronuntiavit, multamque ei dixit sestertium nummum*: Titinnio præcepit, *ut dotem mulieri restitueret; quod, quam impudicam esse scisset, eam pecuniæ insidiatus duxerat, diuque matrimonio ejus usus fuerat*. Fannia tamen beneficii magis, quam injuriæ, memor, quibuscunque potuit officiis adjuvit. Unde Marius hilarior, collaudata mulieris voluntate, *fore sibi reddendæ gratiæ potestatem* lætus gestiensque prædicat: *ejus enim rei certum se modo omen accepisse*.

XXXVIII. Pudet referre vanissimæ superstitionis fordes: nisi vel ideo magis sunt referendæ, ut intelligamus, quam turpi dementia orbem terrarum Christiana disciplina liberaverit. Post tantam rerum experientiam, vir animo gestisque rebus maximus, quam a ratione impetrare non poterat tranquillitatem, ab alini obtutu ac voce sumfit. Nam cum ad Fanniæ domum adductus erat Marius, relicto pabulo prorumpens e foribus animal, ex adverso Marii constitit: & blande hominem intuitus, luculentumque rudens, ad vicinum fontem procucurrit. Idcirco Marius *salutem portendi fatus, obferari januam cubiculi, ut se quieti daret*, jussit.

XXXIX. Interea magistratus, *sine mora de medio tollendum*

§ XXXVI. Liv. Epit. Vellej. 2, 19. Val. Max. 8, 2. Plut. § XXXVII. Plut. Val. Max. § XXXVIII. Val. Max. 1, 5. Plut.

*esse* decreto, Cimbrum quendam mittunt de reliquiis Marianæ victoriæ, qui eum conficeret: quod omnes oppidani misericordia clarissimi viri foedum occidendi ejus ministerium abnuebant. Sed ille, cubiculum ingressus, ubi Marium esse cognovit, abjecto gladio profugit, *Marium se non posse occidere* clamitans. Quidam ajunt, *ingenti flammæ ex oculis Marii promicante territum hominem: auctum deinde terrorem, postquam assurgens e lecto senex, terribili voce, Tunc, homo, C. Marium audes occidere, inclamasset.* Minturnenses profecto homini divinitus injectum timorem, salutemque Marii cordi esse Diis interpretati, mutata sententia, quem paulo ante necari jusserant, repente incolumem volunt: nec ipse sibi deest, ad quosvis, etiam infimum & vilissimum quemque, tendit manus, preces, spem, fata, fabulam suam de aquilis, de asino, varie miscet.

XL. Tandem consensu omnium cum viatico & veste collata ad naviculam publice instructam deducitur. Sed properantibus obstabat religio, quod per lucum Maricæ, quam & *Circen* frequentius vocant, ad mare iter erat, quem præcipuæ sanctitatis Minturnenses habebant: neque fas putabant, efferri quidquam earum rerum, quæ semel eo illatæ forent. Sed ceterorum dubitationem unius senis alacritas solvit: qui, *nihil irreverens, aut ingratum Diis esse* clamitans, *quod ad C. Marii salutem pertineret*, cum parte rerum, quæ ad mare portabantur, per lucum primus evasit.

XLI. Pingenda deinde curavit ista Marius, tabulamque votivam in fano Maricæ suspendit. Sic in perparvum impositus navigium, lacrimis, votis, ominibusque prosequente Minturnense populo, evitatis, quantum poterat, terris portubusque omnibus, vela in altum fecit. Forte ad insulam Æliariam delatus, cum ibi Granium & nonnullos amicorum reperisset, una in Africam cursum intenderunt. Sed quia penuria aquæ laborabant, in agro Erycino Sici-

§ XXXIX. Val. Max. 2, 10. Plat. Liv. Epit. Appian. Cic. pro Sext. 6, 22. Strab. l. 5.

liæ fecerunt exscensionem. ibi quæstoris Romani cura dispositi equites propemodum egredientem navi Marium excipere. Aquatores ferme sexdecim interfecti sunt. Marius, propere soluto navigio, Meningem tenuit, Africæ insulam, quæ hodie *Gerbarum* vocabulo est notior.

XLII. Hic de filio suo cognoscit, *illum cum P. Cethego saluum, ire ad Hiempſalem, sive Mandrestal* is fuit: cui patrive ejus Numidiæ partem, capto Jugurtha, Marii maxime opera senatus dederat. Hinc recepto nonnihil animo, statuit in Carthaginienſem agrum transmittere. Ibi cum in locis solitariis vastisque federet, venit ad eum licitor Sextilii, qui tum Africam proprætore obtinebat. De hoc Marius, neutram in partem meritis, humanitatis tamen aliquod officium expectabat. At licitor *decedere eum provinciæ* jussit, *ni malit in se, ut hostem ab senatu judicatum, decerni*: torveque intuentem, & vocem nullam emittentem Marium rogavit tandem, *ecquid renuntiari prætori vellet?* ibi Marius, *nuntia*, inquit, *vidisse te C. Marium in Carthaginis Magnæ ruinis sedentem*: duobus clarissimis exemplis inconstantiam rerum humanarum prætoris animo figurare, non inepte conatus.

XLIII. Hic ad eum cum Cethego filius venit, Albino-vanusque, & ceteri exsules. ii Numidarum dolos, non sine digno, qui notetur, casu evaserant. Marium adolescentem miris in speciem officiis colebat regulus; sed quia discedere cupientem morabatur crebrius & apertius, quam ut per benevolentiam facere credi posset, suspicionem illi, & ex hac ardentius abeundi desiderium iniecit. Igitur ob formam a pellice regia dilectus, cum ejus amorem aversatus eousque fuisset, tum amplexus occasionem est; ea-que juvante, cum amicis fuga capta, ad patrem penetravit.

XLIV. Magna erat gratulatio, quod post ancipites tot casus, qui de se suisque sæpius utrinque desperassent, salvi fo-

§ XLI. Cic. pro Planc. c. 10. & pro Sext. Appian. Plut. § XLII. Appian. Cic. ad Quir. c. 8. Plut. § XLIII. Appian. Plut.

spitesque se vicissim intuerentur. Inter hanc dum in litore obambulant, forte scorpiones inter se pugnantes Marius pater videt. Erat ille vir huic stultitiæ generi deditus, & ut facile est delirantibus artem ex errore facere, valere se talia interpretandi calliditate putabat. Igitur averſatus hoſtilitatis omen, non diſtulit conſcendere piſcatorium navigiolum, & curſum in Cercinam dirigere. & opinio-nem prudentiæ ejus fors velut dedita opera confirmavit.

XLV. Vix in altum evecti erant, cum miſſos a Numida vident equites eo ipſo in loco vagantes, unde navem conſcenderant. Sic inter Africi maris inſulas, quia plus inſidiarum in continente timebat, quod reliquum erat hie-mis, C. Marius exegit. Dum ad hunc modum inimicus L. Sullæ terra marique jaçtatur; ipſe rerum omnium potens, ſtatum civitatis ordinabat: non victoris inſolentia, ſed propemodum ad juſtum legitimumque modum. Igitur & æris alieni perplexam atrocemque controverſiam, quæ nuper ad prætoris Romani necem pervenerat, ex æquo bo-noque lata lege Unciaria decedit.

XLVI. Ejus legis cum argumentum lateat, nomen eſſe videtur indicio, duodecimam debiti partem remiſſam de-bitoribus fuiſſe. Comitia deinde, priuſquam proficiſcere-tur in provinciam, habuit: in quo negotio manſuetum ſe præbuit, & omnimodis popularem. Nam & Nonium ſo-roris filium, & Ser. Sulpicium, quamquam ſubniſi ſua commendatione eſſent, ignominioſe repulſos civiliter tu-lit; *jucundum ſibi eſſe dictitans, videre populum, libertate re-cepta, vel contra auctores beneficii utentem.*

XLVII. Conſulem quoque L. Cinnam deſignari paſſus eſt, licet iniquum ſibi, & partibus adverſum ſciret. Ju-rejurando tamen adegit, nihil novaturum. iſque in Capi-tolio multis præſentibus, ſilice lapide comprehenſo, *ſi fal-leret, precatus Deos fuerat, ita ſe quoque projeçtum vellent;*

§ XLIV. Plut. Val. Max. 1, 5. § XLV. Appian. Liv. Epit.  
§ XLVI. Plut. in Sull. c. 19.

cum dicto lapidem emittens manu. Sed & collegam ei Cn. Octavium addidit, compertæ modestiæ virum, cujus maturitate Cinnam, si ruere cœpisset, sperabat retineri posse. His ita curatis, consulari potestate contentus, præmissis ad Capuam exercitu, coloniis per Italiam deducendis operam dedit.

XLVIII. Sed adversa factio, ubi cessare metum armorum videt, ad pristinum consilium revoluta, locupletes præsertim, & feminae quædam prædivites, nihil non, ut exules restituerent, moliebantur. Etiam consulum vitæ dicebantur insidiæ fieri, quod iis se salvis, tenere posse propositum inimici non putabant. Sed Sulla, belli Mithridatici decreto imperio, tutior ab ejusmodi periculo videbatur: Q. Pompeji miseratio subibat animis, quod is nihil ad prævalidas reprimendas inimicitias virium habebat. Ideo provincia ei Italia cum exercitu, qui tum sub Cn. Pompejo proconsule merebat, populi jussu datur.

XLIX. Offendit ea res Cnæum, &, ut novo nec antea audito scelere præberet exemplum, incitavit. Hoc enim primum anno consulis Romani sanguine polluta castra, imbutæque militum manus sunt. Quippe consul Pompejus, ad accipiendum exercitum profectus, & intra vallum acceptus, cum postridie concionem haberet, cedente in speciem proconsule, satis læta habere initia imperii visus est: sed mox majore turba quasi audire concionantem cupientium concurrente, ab iis, quos ad eadem proconsul subornaverat, cum sacrificare jam inciperet, interfectus est.

I. Proconsul, diffugiente consulis comitatu, tanquam nescius omnium tulit se obviam, &, re scilicet cognita, graviter increpavit tanti sceleris auctores. sed statim rediit cum iis in gratiam, receptoque imperio, non est passus dubitari, cujus ope consilioque interceptus consul foret. Neque senatus vindicavit: majore talibus temporibus castro-

§ XLVII. Diodor. ap. Valef. Plut. Appian. Liv. Epit. § XLIX. Vellej. 2, 20. Liv. Epit. Appian. Val. Max. 9, 7.

*T. Liv. Vol. IX.*

*H*

rum, quam curiæ, potentia. Hac re comperta, consul Sulla intentiorem corporis sui custodem egit, nunquam non fido septus amicorum, etiam per noctem, præsidio. neque diu moratus, Capuam ad exercitum profectus, militibus commeatuque & ceteris bello necessariis in classem impositis, ad Mithridaticum bellum navigavit.

LI. Neque res Asiaticæ adventum ejus parum desiderabant. ita tempore & occasione Mithridates utebatur. Huic regi tum in se magna erant omnia, tum, quæ sibi dare nemo potest, fortuna providerat. Opes atque potentiam illustrabat genus a septem Persis illustri serie deductum, & Artabanes regni conditor. Sed præcipue auctoritatem ei parant prospera & magna belli primordia, quod tanta in eo vis esse videretur, ut, cum primum inciperet moveri, tota regna, nullo magnopere adhibito conatu, raperet.

LII. Neque majus aliud ad movendam quolibet inclinationem animorum instrumentum est, quam commodo conatorum eventu parta felicitatis fama. Igitur fortunæ instandum ratus, post victum a suis Nicomedem, ex Amaseno campo, ubi auxilia variarum gentium recensuerat, per Paphlagoniam incessit, centum quinquaginta millium exercitum ducens. Inde expulso obiter Pylæmene rege, ad Scroba montem, ubi Bithyniæ Pontique confinia sunt, deflexit.

LIII. Non longe abhinc M. Aquillius castra posuerat, & post infelix prælium cum reliquiis suorum Nicomedes. Ibi ex præcursoribus centum omnino Sarmatæ, quæ acerrima equestribus præliis gens est, octingentos Nicomedis equites nacti, profligant Bithynos, quosdamque eorum captos adducunt ad regem. Ille ex priore instituto hos quoque, viatico dato, dimittit in patriam. Ita vim aliis Pontici regis, militumque virtutem; aliis, clementiam præ-

§ LI. Flor. 3, 5. Polyb. 5, 43. Sallust. ap. L. Ampel. § LII. Memnon. Oros. 6, 2. Eutrop. Appian.

dicantibus, cum ab utraque causa popularium animis Nicomedes diffideret; non expectato Mithridatis adventu, versus L. Cassium retrocessit. Manius, fuga Bithynorum nudatus, cum solus resistere tantis copiis non posset, in tutiora loca cogitabat recedere; sed eum Neoptolemus Mithridatis purpuratus, cum Armenio Menophane, sub horam diei septimam assecuti, pugnare coegerunt.

LIV. Habebat sub signis equitum quatuor millia, pediatum decuplum, sed victus ab hostibus, ferme decem millia militum in proelio amisit: ceteræ copię dissipatæ in diversa abierunt. Aquillius, ad Sangarium fluvium fuga delatus, licet jam nox tegeter terras, transmissio statim flumine, postea Pergamum venit. Castra quoque ejus capta sunt. Sed Mithridates, captivos, sicut antea facere consueverat, cum Asiatici essent, comiter allocutus, cum vestibus & viatico ad suos quemque redire passus, tantum excivit benevolentiae, ut certatim ad eum omnia deficerent: legatique magno numero accederent decreta civitatum afferentes, quibus regem ad se vocabant, *Deum atque Servatorem* appellantes. & quocunque venisset, obviam effusis cum splendida veste omnibus ordinibus, summa lætitia excipiebatur.

LV. Neque Cassius & Nicomedes, & qui alii legatorum Romanorum iis locis erant, inhibere impetum properantis, aut opponere se ruenti Asiae audebant: frustra quoque tentatis Phrygum auxiliis, cum homines ad militiam ineptos exercere irritum labore instituissent; dimiserunt omnes, & a castello Phrygiæ, quod Leonum appellant caput (eo enim propter munitionem loci convenerant) diversi abierunt. Cassius Apameam reduxit suos, Nicomedes Pergamum, Mancinus Rhodum ire constituit. A Pergamo Nicomedes, ut conspectu suo plus moveret senatum, in Italiam navigavit.

LVI. Hoc ubi auditum est iis, qui occludendis Pontici

§ LIII. Tacit. hist. 1, 79. Appian. Memnon. § LIV. Justin. 38, 3. Diodor. ap. Vales. Cic. pro Flacc. c. 25. Appian. § LV. Plut. Themist. c. 52. Appian. Strab. 1, 12. Justin. 38, 3. Liv. Epit.

maris faucibus ad Byzantium excubabant, partim diffugerunt; alii majore flagitio naves quoque Nicomedis traderunt Mithridati. Bithynia omni paucos intra dies recepta, rex Mithridates civitates obiens, pecunias apparatusque belli ubique ab hostibus relicta colligebat: ceterum, quo clementius imperium speraretur, debita publica, simul ac privata, remittebantur. His ita ex praesenti usu ordinatis, vocatos in concionem milites accurata oratione ad virtutem cohortatus, *intentos in signum professionis esse* jussit; omnibusque, uti voluerat, paratis, Phrygiam Romani populi provinciam cum ingenti exercitu irrupit: ominisque causa, ubi quondam Magnus Alexander stativa habuisse dicebatur, castra posuit.

---



JOANNIS FREINSHEMII  
SUPPLEMENTORUM  
LIVIANORUM

LIBER XLIII.

IN LOCUM LIB. LXXVIII LIVIANI.

---

E P I T O M E

LIBRI SEPTUAGESIMI OCTAVI.

*Mithridates Asiam occupavit : Q. Oppium proconsulem, item Aquillium legatum, in vincula conjecit : jussuque ejus, quidquid civium Romanorum in Asia fuit, uno die trucidatum est. Urbem Rhodum, quæ sola in fide permanserat, oppugnavit, & aliquot præliis navalibus victus recessit. Archelaus, præfectus regis, in Græciam cum exercitu venit ; Athenas occupavit. Præterea trepidationem urbium insularumque, aliis ad Mithridatem, aliis ad populum Romanum civitates suas trahentibus, continet.*

I. **M**ITHRIDATES, simul tantum aggredi bellum ; vimque Romanam laceffere coepit, eo prosperitatis cursu. est usus, ut proniora ei omnia, quam votis optare ausus esset, viderentur. Phrygiam, & Mysos, & minorem Asiam nemine obsistente percurrrens, maximas urbes, opulentos populos, citra sudorem atque sanguinem recipiebat. Lyciam quoque ac Pamphyliam, & cetera ad Joniam usque.

dimissis passim ducibus, occupavit. Laodiceam Lyco flumini impositam, Q. Oppio proconsule cum equitibus & mercede conductis tenente, praecone tantum ad moenia missa, in deditionem accepit.

II. Laodicensis enim, offerri sibi veniam audientes, si Romanum ducem tradidissent, nihil cunctati, dimissis mercenariis, Q. Oppium comprehensum ad Mithridatem adduxerunt: ludibrio addito, ut lictores eum cum fascibus praecederent. Et hunc quidem rex cetera illaesum, vinculorumque immunem, quocunque pergeret, circumducebat, proconsulem Romanum a se captum civitatibus gentibusque obiter ostentans. Sed in M. Aquillium, postquam & ille in manus ejus incidit, multa asperitate usus est: quod is & legationis Asiaticae, & belli contra Ponticos summi praecipuus auctor exstitisset.

III. Hunc Mitylenis ex aegritudine decumbentem, Lesbii, maximam a Mithridate inituri gratiam, si vivum traderent, robustissimos juvenes in miserum, a quibus comprehensus atque victus est. Alii quoque Romanorum eadem perfidia correpti: nisi quod unus adolescens hostilem saevitiam voluntaria morte antevertit. Quo magis crimini Manio datum, quod vir triumphalis & senex, vitae desiderio victus, extremae servitutis mala perferret. Rex enim vinculis & verberibus atque omni supplicio excruciatum asino miserum imposuit: secumque ducens in agmine subinde, *Manium se esse*, proclamare coegit: donec in Pergamenam urbem ventum est. ibi, ut ipsi non modo, sed etiam universo nomini Romano exprobraret avaritiam, aurum liquefactum in os ejus infudit.

IV. Inde, praefectis ubique impositis, Mitylenen adiit. mox in Joniam usque processit, ac Magnesia, deinde Ephesi, gratanter exceptus est. Ephesi cum aliis rebus omnibus eximia in regem studia declararunt, tum etiam Romano-

§ I. Appian. Liv. Epit. Flor. 3, 5. Plin. 5, 26. § II. Liv. Epit. Appian. § III. Liv. Epit. Val. Max. 9, 13. Appian. Diodor. ap. Vales. Vellej. 2, 18. Cic. pro Scaur. & pro leg. Manil. c. 5. Plin. 33, 3.

rum, quas in urbe sua collocaverant, statuas everterunt, quo nomine non ita multo post acerbe mulctati sunt. Ex Jonia revertenti Stratonicea portas clausit, non ignobilis Cariæ civitas. Igitur post deditionem pecuniam exegit ab oppidanis, præsidiumque imposuit. Dum in his curandis occupatur, forte puellam egregiæ formæ conspicatus, Monimæ nomen erat, Philopoemenis Mileſii filiæ, aureos ei quindecim millia dono misit, concubitus virginis expetens.

V. Sed illa pudicitiam divitiis anteposcente, cum nec expugnare blanditiis animum ejus posset, neque vim adhibere vellet: eo postremum adductus est, ut justas cum ea nuptias contraheret, missoque diademate, *reginam* appellaret. Hæc per otium agendi tempus regi Romanæ urbis discordiæ dabant: quibus prohibitus Sulla maturare expeditionem nequiverat. Sed & nummariæ rei difficultas non parvum festinanti impedimentum se objecerat. tantum inopiæ uno intestini belli biennio effectum erat.

VI. Neque deerant omnino pecuniæ, sed paucos intra sinus condebantur. quos inter Cn. Pompejus Strabo, qui Aſculum omni refertum opulentia ceperat, de tantis manubiis in ærarium intulerat nihil: bellator fortissimus, sed avaritia inexplebilis. Igitur loca, quæ in circumitu Capitolii sacerdotibus & sacris jam a Numæ temporibus erant dicata, subjecta hæstæ, & publice divendita sunt. Auri inde redactum millia librarum novem: ea sola tantum ad bellum proficiscenti de publico data pecunia est.

VII. Interea Mithridates pluribus exædificandis navibus operam dabat, quo Rhodios, quæ, ceteris deficientibus, aut vi abstractis, sola civitas Asiatica, præter Magnetas Sipyli accolæ, in fide Romana mansit, ad obsequium cogeret. Cognito deinde, cives Romanos, quorum ingens crâs per Asiam negotiandi gratia dispersus numerus, passim apud urbes destinatis suis impedimento esse conari; consilium

§ IV. Entrop. Appian. Strab. l. 14. Plut. in Lucull. c. 36. § VI. Oros. 5, 18. Plut. in Pomp. c. 1. Appian.

cepit crudelissimæ calliditatis, clam misso ad magistratus locorum edicto, uti ad diem trigesimum, postquam datæ eæ litteræ essent, quotquot in suis quique urbibus haberent Romani generis homines, cum liberis & uxoribus, atque etiam libertis, qui Italici sanguinis essent, occiderent.

VIII. Cæsos autem inhumatos projici jubebat: bona cum intersectoribus partiebatur. Sed & minæ adjectæ erant, si quis aliquem ex eo numero aut celare vivum, aut sepelire mortuum ausus esset. contra, servis heros interfectoris libertatem, debitoribus dimidium æris alieni præmii loco promittebat. Dubites, scelestius hæc a rege excogitata, an ab Asiaticis facta sint. Postquam constituta dies affuit, miserrimæ per omnes Asiæ urbes spectacula edebantur.

IX. Notabilis inter hæc Trallianorum amentia fuit: qui quos in urbe sua habebant Romanos, ne videlicet hospitali sanguine polluerent manus, Theophilo Paphlagoni jugulandos locaverunt, tanquam interesset. Atque illud singulari sævitia monstrum, compulso intra ædem Concordiæ contrucidavit; etiam manibus quorundam abscissis, quibus Deorum complexi simulacra fuerant. Neque magna illa Diana contra furorem Ephesiorum tueri supplices suos potuit: neque Pergamenorum Æsculapius, quo minus ad ipsa pulvinaria gladiis aut sagittis interficerentur.

X. Adramytteni nando salutem querere visos inter ipsas undas consecuti trucidarunt; infantibus fugientium liberis pelago meris. Caunii quoque, qui, devicto Antiocho, Rhodiis attributi, deinde ab horum dominatu Romanorum beneficio liberati fuerant, Italos ad sacratam urbis curiam concurrentes ab ipsis aris diripuerunt: raptosque ab ulnis matrum infantes ante ora ipsarum, ipsas deinde, & postremo viros eorum, interfecerunt. Soli omnium, qui Mithridatem verebantur, Coi, Romanos in Æsculapii tem-

§ VII. Liv. Epit. Val. Max. 9, 2. Flor. 3, 5. Cic. pro leg. Manil. c. 76. § VIII. Oros. 6, 2. Appian. Vellej. 2, 18. Auctor de Vir. ill. c. 77. Diodor. ap. Vales. § IX. Acta Apost. Athenæus 5, 14. Appian.

plum introductos, vetusto asyli jure tutos præstiterunt.

XI. Hac tam improvise clade, intra eandem diem diversissimis locis extincta hominum circiter octoginta milia esse, satis intra auctores constat. Neque silentio præterierim atrocem Theophanis Lesbii calumniam, qua viri innocentissimi P. Rutilii famam lacerare est conatus: *Rutilii scilicet hortatu Mithridatem tantæ savitiæ consilium cepisse*. Ceterum Theophanes illis quoque temporibus, quibus recens harum rerum erat memoria, se potius turpissime mendacem, quam Rutilium improbum ostendit: liberalibus literis perquam illiberaliter usus, qui in historia scribere de Rutilio falsa crimina non erubuit, non ob aliud, quam quia Rutilius de patre Cn. Pompeji vera scripserat.

XII. Colorem fingenti nonnullum præbuit Rutilii, qui tum Mitylenis agebat, cum Romani occiderentur, incolunitas. Sed ille, comperto, togatos ad necem quæri, præfens periculum vestitus mutatione vitaverat. quæ cautio aliis etiam passim per Asiam salutis fuit. Sed hæc atque talia revolventi animo illa subinde cogitatio occurrat, eos, qui rerum gestarum monumenta conscribunt, nihil magnopere aliud, quam errorum atque suppliciorum humanorum commentarios, texere.

XIII. Atque utinam hujus tantæ calamitatis causam, ut investigare non difficile, ita tollere promptum esset! Sed nos bellum cum natura suscepimus, ejusque certum & immutabilem ordinem, cujus auctor statorque Deus est, neque scire curamus, neque respicere: deinde optime consultata male cecidisse quæsti, nos absolvimus, fatum & nescio quam fortunam incusamus. Atqui nobis hoc jam a primo rerum conditore inditum insertumque fuerat, ut, qui hæc omnia regit, neque bonis adversum, neque contumaciter pravis placabilem intelligere possemus. Eundem tanta esse sapientia, tantisque viribus novimus, ut neque

§ X. Appian. Memnon. Val. Max. 9, 2. § XI. Plut. in Pomp.  
§ XII. Cic. pro Rabir. c. 10. Athenæus.

[illegible][illegible]

1. The first step in the process of the investigation is the identification of the problem. This is done by the investigator, who is usually a member of the research team. The investigator will identify the problem by looking at the data and trying to find out what is going on.

[illegible]



gisque confirmabantur animis, paratasque ad audendum, si qua occasio se dedisset, naves habebant.

XX. Forte in onerariam ex regiis, præter portum vela facientem, Rhodia dicotos invec̃ta fuerat. ab hoc initio, cum utrinque ad suorum auxilium multæ naves adremigassent, in acre certamen contentio evaluit. Diu atque vehementer est pugnatum, cum dissimillimis causis par utrorumque robur esset. Rhodiis ars gubernatorum, ordo navium, peritia remigum aderat: præfectorum quoque dexteritate, & navalium sociorum virtute præstabant. Pontici maritimarum rerum rudes, non minus inter sese, quam ab hostibus turbabantur: ita quidem flagitiose, ut Chia navis quæ Mithridati militabat, in prætoriam, qua rex ipse vehabatur, illisa, magno illam impetu concussam tantum non deprimeret.

XXI. Animis tamen æquabant hostem, quod sub oculis Mithridatis pugnabatur, cui fidem suam virtutemque approbare cupiebant. Ad hoc multitudine navium superiores circumdare hostes, & in medium acceptos undique urgere nitebantur. Sed id periculum Rhodii eadem, qua prius, arte vitarunt: trirememque unam cum ipsis viris captam remulco trahentes, multis armamentis atque spoliis onusti in portum redierunt. At postquam, recensitis navibus, abesse quinquere mem videre, ignari ab hostibus captam, quæsitum eam velociores ceteris naves sex de omni numero longarum emittunt: in his Damagoras erat, classis Rhodiæ præfectus.

XXII. Vicissim a rege naves quinque & viginti occurrere jubentur: quas Damagoras cum ad solis occasum usque cedendo elusisset, recedentibus invec̃tus duas deprefisit; totidem ad importuosa Lyciæ litora compulit: &, inter hæc nocte consumpta, postridie Rhodum reversus est. Mithridates, cum tanto paucioribus par esse non potuisset, in Chios effudit iram, totique civitati minatus, guberna-



torem navis, quæ in suam accurrerat, cum proreta supplicio affecit. Sub eisdem dies, cum pedestris exercitus regis onerariis & triremibus adveheretur, repentinus turbo partem earum navium in Rhodium litus impegit.

XXIII. Rhodii, impigre evecti in afflictam tempestate sparsamque classem, naves quasdam cum viris quadringentis abripuerunt, alias perforatas merferunt alto, aut injecto igne exusserunt. Nescio, hac an superiore aliqua navali pugna captus Leonicus fuerit, qui se acerrimum salutis regiae defensorem aliquando ostenderat. hunc igitur ut recuperaret, quotquot habebat Rhodiorum captivos, pro uno corpore reddidit. Deinde obfirmato ad expugnationem animo, simul ad navale aliud prælium, simul ad tentanda mœnia cogitationes intendit.

XXIV. Forte proditores quidam clivum ei monstraverant, juxta Jovis Atabyrii delubrum, qua parte qui primè extruxerant mœnia, quod altitudini situs confiderent, breviori contenti muro fuerant. Sed clivum ascensu non difficilem esse transfugæ confirmabant. Igitur noctu copiis in naves impositis, *silentio admovere naves* jussit, *donec in Atabyro monte fax tolleretur*; deinde, *quanto possint cum clamore ac impetu, ad locum cuique assignatum decurrere*. Nam ita partitus erat operas, ut, donec pars exercitus cum scalis ad mœnia vim tentat, alii ad portum terrorem facerent.

XXV. Sed id quidem consilium, ut multa alia ejusdem, casus elusit. Excubiæ Rhodiorum, cum forte surdum strepitum audivissent, ignem extulerunt. id prope Atabyrum factum Mithridatici putantes, signumque suum arbitrati, ex altissimo silentio simul repente omnes horribilem clamorem ediderunt. Rhodii contra, alacriter clamore reddito, cum ad mœnia confertim currerent, regios, ne per noctem aliquid auderent, absterruerunt. luce dein orta, ut homines non ad prælium, sed ad furtum noctis egressos, haud magna mole submoverunt.

XXVI. Ad Ifidis tamen fanum haud mediocris illatus terror est, ubi sambucam duobus navigiis junctis impostam Mithridates applicuerat, & ab ingenti machina, plurima simul tela hastasque late spargebat, & arietem inde ad pulsanda mœnia admovebat. Juxta frequens manus cum multis scaphis aderat, scalas ferens, & oppugnationi parata. Resistebant tamen egregie Rhodii, neque laboribus aut periculo fatigabantur; donec Mithridatem major vis amovit: nam & sambuca præ pondere subsedit, & Ifidis apparuit species, copiosum ignem, fulminis in modum eidem machinæ immittens.

XXVII. Postremus hic adversum Rhodios conatus regis fuit. Frustra videbat operam copiasque & tempus perdi ad firmissimam urbem, quæ portuum murorumque munimentis, omnique apparatu parem eo tempore non habebat; & a peritissimis rei nauticæ hominibus, atque inter sese legibus optimis egregie conjunctis defendebatur. Ad Patara hinc ductus est exercitus: ubi iterum iniquos expertus est, quos vocabant, Deos. Cum enim, quia machinis exædificandis materia deerat, lucum Latonæ dictum succidere cœpisset, minaci somnio territus destitit.

XXVIII. Sunt, qui *lucum Furiarum succidi cœptum scribant, sed ingenti risu, cujus auctor non apparebat, deterritos, qui in opere crant, inde cum haruspiciis jussu Furiis virginem Mithridates immolaret, e jugulo puellæ risum ortum.* Igitur, Pelopida Lycium bellum administrare jussu, principem amicorum Archelaum cum magnis copiis in Græciam misit. ipse Pergamum secedens delectibus agendis, parandisque armis, & interim Monimæ amoribus operam dabat: simul cognoscebat causas Asiaticorum principum, quorum petitus infidiis dicebatur, quive *res novare, aut omnino Romanis studere* arguebantur.

XXIX. Inter hæc, Sulla adhuc in Italia faciente appa-

§ XXVI. Jul. Obseq. Appian. Solin. c. 14. § XXVII. Appian. § XXVIII. Jul. Obseq. Appian. Plut. in Sull. c. 21.

ratus, variisque impedimentis retento, Cn. Octavius, L. Cornelius Cinna consulatum inierunt. Cinna, licet ultimis execrationibus, nihil contra Sullæ rationes, & ordinatam ab eo rempublicam, facturum se adstrinxerat, fidem adeo non præstitit, ut nihil magis haberet cordi, quam quemadmodum Sullam citissime ex Italia submoveret, ne consiliis suis impedimento esset. Deinde ad diversa consilia detrusus, cunctanti, & reliqua prius ex usu suo componere volenti, accusationem struxit; diemque dicendam curavit per M. Verginium tribunum plebis.

XXX. Ea fuerant erantque tempora, ut deesse criminandi materia non posset. *Hominem superbum & ambitiosum dicebant olim prædicare solitum, sibi summam in omnes & omnia potentiam deberi. Ab hac cupiditate, non ab aliqua injuria sua, exstimulatum fuisse, ut nefarium patriæ bellum inferret, dominamque gentium, & hostilibus armis intactam urbem, civis, &, si Diis placeret, consul expugnatam captamque cruentus ingrederetur.*

XXXI. Scilicet egregium impio facinori colorem induci, quod decretam ab senatu provinciam inimici eripuissent: eam injuriam hominem generosum pati nequivisse. Sane datum Mario jussu populi Mithridaticum bellum: neque referre, si prius L. Sullæ senatus idem decrevisset. Non minoris aestimandum fuisse Marium toties consulem, quam fuerit in primo consulatu: neque cum Q. Metello Numidico Sullam comparari posse: neque minus modo fuisse juris populo Romano, quam ante annos viginti fuisset.

XXXII. Sed tum quoque Numidiam provinciam, quamquam ab senatu Metello decretam, populum Romanum C. Mario dedisse, neque ideo Metellum urbi bellum indixisse. Sullam vero, ne quidem sanguine aut exsilio tot illustrium civium satiari potuisse, aut vindicta, licet nimis sane fuerit, placari, ne ultro rempublicam everteret, statumque immutaret civitatis. Scilicet non dolore, nec cupiditate ultionis, sed spe

*Et desiderio regnandi, impetum in leges, in mores, in populum Romani jus auctoritatemque fecisse. quorsum enim alias tribunitiam coercere potestatem vellet, nisi ut ipsum invaderet arcem libertatis? Ferme quadringentorum annorum experimentis esse cognitum, tribunatum plebis quasi Palladium populi esse, quo sublato, interire ipsum, aut certe servire, necessum sit.*

XXXIII. Ex diverso non amici modo Sullæ, sed qui omnino quietem ac pacem amabant, tribunatum, omnium in urbe seditionum unicam originem, recte atque ordine justos intra fines cohibitum, asseverabant. Neque Sullam aut sine causa, aut ultra modum, aut postremo solum fecisse, quæ fecerit. Hominem sociali bello de republica optime meritum, consulem populi Romani, vigentem ætate & armorum gloria, nihil fecisse novum aut mirum, si eripi datam ab senatu provinciam ægre sit passus. sed neque e republica fuisse, ut ad tantum bellum exacti jam ævi, exhaustarum virium, & cui modo difficilis in Italia militia fuisset, trans mare mitteretur.

XXXIV. Sed nec ibi substituisse adversariorum insolentiam: verum etiam ad sanguinem ac cædes erupisse. Filium consulis, eundemque consulis alterius generum, occisum: patrem ejus fuga, socerum dissimulatione & temporibus obsequendo, vix retinuisse vitam. Sullæ vero sicuti dolorem non injustum, ita modestiam in victoria singularem fuisse. De sententia senatus & optimi cujusque constitutam rempublicam, liberrima magistratum comitia fuisse.

XXXV. Atque hæc omnia socio & adjutore Q. Pompejo gesta; ut duorum consulum voluntate ac consensu fierent. neque aliud oppressos tyrannide factionum Patres optavisse. Quid vero stultius, siquidem violentia arguatur Sullæ, quam irritare impetum, quo violata omnia modo ac eversa queraris. Scilicet L. Cinnam novum consulem, & Verginium hac balbutie tribunum, laturos tempestatem, cui summa gloria belli, summaque facundia viri, C. Marius, P. Sulpicius succubissent!

XXXVI. *Et iis cum incipientibus adhuc Sullæ opibus negotium fuisse; nunc pugnandum fore cum confirmatis. Eosdem illos milites, qui nullo dum exemplo portas urbis hostiliter essent ausi recludere, nunc feliciter tentatam vim, quoscunque juberet imperator, incunctanter adhibituos. Præterea quod neque fieri oporteat, neque possit, ut Sulla legibus reus peragatur; id hoc tempore neque optandum postulandumve fuisse. Universam Asiam erumpentes ab Euxino Ponto barbaros velut diluvio inundasse: trucidata tot civium Romanorum sædo exemplo esse nulla: regem nomini Romano inimicissimum instare, urgere.*

XXXVII. *Ab eodem fidelissimos socios, unicam hostilium successuum moram, Rhodios oppugnari. His temporibus detineri paratum ad hæc corrigenda imperatorem, eorum potius esse, qui perditam, quam qui salvam rempublicam cupiant. Sane etiam iis, qui abessent reipublicæ causa, negotium creari lex Memmia vetabat. Igitur ejus beneficio L. Sulla, tribuno & iudicibus valere jussis, in Asiam est profectus. Iisdem diebus, quo Sullana classis quæ Italia solvit, multa Mithridati terribilia ostenta objecta esse memorant. & inter alia Victoriæ, adulatione Pergamenorum tali artificio fabricatam, ut quasi de cælo descendens, coronam Mithridati imponeret, cum ferme caput ejus attigisset, subito & occulto machinæ vitio hæsisse, dimissamque e manibus ejus coronam de theatro ita procidisse humi, ut confringeretur: non sine ingenti horrore populi, ut regis ipsius consternatione.*

XXXVIII. *Inter hæc profectus in Græciam cum magna classe Archelaus, Cycladas in potestatem regis redegit; aliasque item insulas ad Maleam usque: Eretria quoque & Chalcide, totaque simul Eubœa potitus. Eo tempore Delus a Metrophane præfecto regio direpta est: cum sine muris & præsidio, sacrorum veneratione ad id tempus defendi soleret. In eo tumultu convulsam a barbaro quodam Apollinis Delii simulacrum, & in mare per contumeliam missum, ferentibus undis ad Laconicæ oppidum Bœas appulisse autu-*

§ XXXVII. Plut. in Sull. c. 30.

T. Livii Vol. IX.

1

mant, ubi deinde fanum Apollinis *Epidelii* cognomento Boeatae dedicarunt.

XXXIX. Alia quoque diversis insulis castella a regiis expugnata sunt: occisis ubique circiter viginti hominum millibus, maximam partem Italicis. Ea loca Atheniensibus Archelaus attribuit, a quibus defecisse dicebantur. Athenas enim regiis partibus Aristion quidam adjunxerat; adeo nullis vel ad cogendum, vel ad suadendum praesidiis instructus, ut nihil relinquatur haec legentibus, quam Graecam levitatem admirari.

XL. Eum Aristionem ex Aristotelis, vel, ut alii malunt, ex Epicuri schola sophistam, Athenienses ad Mithridatem legatum miserant: & rex benigne acceptum, quoniam magni aestimabat Athenienses habere socios, in amicorum cohortem receperat: ejusque opera in legationibus ad Graecas urbes utebatur. Atque ille saepe domum militando literas, *gratiam suam, regisque magnitudinem extollebat. hujus amicitiam si amplecterentur, & multas a Romanis dictas futuros lucri; & restituto populi imperio, maxima publice privatimque a rege munera impetraturos esse.*

XLI. Ita levissimae parti populi facile persuasum est: & cum appareret, quid esset futurum, optimates, qui Romanorum partium erant, mature excefferunt. cum quibus & princeps Academiae Philo Romam profectus est. Interim Aristio cum sacra, quae in Delo fuerat, pecunia, & duorum milium militum praesidio, quod Archelaus adjunxerat, Athenas rediens, tempestate abreptus apud Carystios appulit. Hoc ubi populo Atheniensi compertum, longae naves ad deducendum eum mittuntur, cum sella argenteis pedibus fulta.

XLII. Advenientem effusa civitas excepit, plerique caeca in Mithridatem benevolentia, quidam ut spectarent inopinatum fortunae ludum; quod obscurus, ancillae filius, adscriptitius Athenarum civis, majore fastu, quam Roma-

§ XXXVIII. Appian. Flor. Plut. Memnon. Pausan. l. 3.

§ XXXIX. Appian. § XL. Posidon. ap. Athenæ. 5, 13. Pausan. l. 1.

§ XLI. Pausan. Cic. in Brut. c. 59. Appian. Posidon.

norum magistratuum spectatus quisquam fuerat, adventabat. Occurrerant inter ceteros & Bacchici artifices, *Libe-  
rique junioris* (ita Mithridates vocari cœperat) *nuntium, ad  
communem focum, epulasque & sacrificia* invitabant. nam  
propter felicem ejus reditum sacra faciebant, &, præcone  
publice proclamante, libabant.

XLIII. Ille in domum splendidissime instructam degres-  
sus, postridie cum insigni vestitu, & annulo, cui Mithri-  
datis insculpta effigies erat, cum magna antecedentium  
prosequentiumque turba, in publicum processit. Jam arctatæ  
plateæ erant exitum ejus præstolantium turba, in maximusque  
peregrinorum oppidanorumque numerus spontanea con-  
cione Ceramicum impleverat. circa ipsum præcipue pre-  
mebat inter se populus, satellitum vicem comitantibus ha-  
statis, qui, ut populo placerent, hoc munus rapuerant. alii  
pro magno ducebant, si vel vestimenta hominis possent  
contingere.

XLIV. Ante porticum Attali exstructum tribunal erat,  
unde concionari proconsules Romani consueverant. Hoc  
conscenso, Aristion, circumspectans in orbem, deinde subla-  
tis in cælum oculis, *Res ipsa me cogit, Athenienses, patriæ-  
que caritas*, inquit, *ut, quæ mihi comperta sunt, non reti-  
ceam: vicissim eorum, quæ dicenda sunt, gravitas, & incredibilis  
rerum conversio vocem intercludit.* Adhortantibus deinde cun-  
ctis, ut proloqueretur: ergo igitur dicenda sunt, inquit, *qua-  
lia ne per somnium quidem exspectare quisquam potuisset.*

XLV. Rex Mithridates Bithyniam obtinet, atque Cappa-  
dociam; Asiam præterea omnem ad Pamphylios usque & Ci-  
licas. Reges Armeniorum Persarumque in satellitio habet;  
Mæoticosque regulos, & qui Ponti universum illum ambitum  
per triginta stadiorum millia possident. Romani vero duces,  
Q. Oppius Pamphyliæ proconsul in vinculis sequitur, Ma-  
nius Aquillius consulatu functus, & Siculo triumpho insignis;  
Bastarnam quendam quinque cubitorum hominem, catena eas-  
dem vinctus, sed equitem pedes, sequitur.

XLVI. *Cetera togatorum turba vel ad ipsa numinum simulacra effudit spiritum, vel, abjecto patrio cultu, palliorum beneficio servat. Civitates autem omnes angustioribus, quam hominem fas est, honoribus exceptum, Deum fatentur & nuncupant. oracula quoque passim hunc designatum a Diis dominum & rectorem orbis canunt. Sed & adsunt ab ipsa Italia legati; adsunt & ab ipsa Carthagine; &, ad evertendas Romæ opes, amicitiam regis & societatem expetunt.*

XLVII. Hæc ubi dixisset, silentio interposito, cum capita inter se conferre homines, & de rebus tam inopinatis dislerere videret; perfricuit frontem, &, resumto sermone, *Quid igitur vobis consulam? inquit. Quid enim aliud? quam ut rempublicam sine certo imperio diutius esse ne sinatis. Senatus Romanus urbis nostræ ad se revocavit arbitrium: vetuitque magistratus officio fungi, priusquam ipse, quid fieri vellet, constituisset. Ergone clausas aspiciemus Deorum ædes, squalentia gymnasia, theatri hanc solitudinem, & hoc silentium fori? sacram Jacchi vocem non audiemus amplius? Quid autem Deorum responsis consecrata Pnyx? quid vetustissimis religionibus venerabile Castorum templum? ipsæ denique philosophorum scholæ? perpetuane oblivione damnabuntur, & velut in capta dirutaque urbe conticescent?*

XLVIII. His atque talibus animatum vulgus, & inter se tumultuarie collocutum, in theatrum se proripit, &, quod bene vertat, imperium atque præturam Aristioni decernunt. Ille cum in orchestram ascendisset, gratiis populo actis, postremo hæc adjecit: *quandoquidem ergo reipublicæ summa ad vos rediit; vestris autem sententiis ego lectus sum princeps: æquum est, ut non minus ego possim, quam universi potestis, atque polletis. statimque juris usurpandi causa, nomina quorundam, quos collegas esset habiturus, edidit.*

XLIX. Neque multos post dies, præsidio militum Archelai fretus, apertè arripuit tyrannidem, grassarique in

§ XLVIII. Pausan. l. 1. Posidon. ap. Athenæ. 5, 13. Appian. Mithrid.



optimum quemque aut locupletissimum mira ferocia & crudelitate cœpit. Unde cum ex urbe multi profugerent, custodias in portis posuit. at illi noctu e muris demittebantur. Igitur emissis, qui fugientes persequerentur, equitibus, multi ab his occisi sunt, alii in vinculis retracti. Sæpe inter hæc prodibat in concionem cum armato satellitio, *multosque fludere Romanis insimulans, resque novas moliri, ac clam ad profugos missitare*, complures hoc crimine sustulit: aliis ademitt bona, tantumque his rapinis congestit nummorum, ut etiam puteos aliquot compleret pecunia: nec enim civium tantum, sed etiam peregrinorum facultates diripuit. sed nec a Delii Apollinis pecunia sacrilegas abstinuit manus.

L. Quoties alicui dixisset perduellionis diem, inter iudices ipse quoque suffragium ferebat. sic, qui semel factus esset reus, elabebatur nemo: eratque tantundem, postulatū aliquem hoc iudicio, quam convictum atque condemnatum esse. Unde ceteri exterriti, simul deferri nomen suum intellexerant, in exilium proficiscebantur. Sed Aristion, fuga illorum minime contentus, sanguinemque sitiens, ter denis appositis militibus, ne quis egredi se invito ingredive posset, portas custodiebat: & quotquot ab insidiatoribus passim per agros dispositis excipi potuerant, eos indicta causa excruciatos supplicio capitis afficiebat. sed & inter ipsa tormenta multi emoriebantur.

LI. Cum sic quoque præsentium malorum sensu, minas impendentium vincente, multi profugerent; edixit per præconem, *ut sub occasum diei domi suæ quisque esset; nec inde postea, vel cum laterna aut funali egrederetur*. Ceterum Athenis hunc in modum ad Mithridaticas partes adductis, Archelaus, tanquam arce belli usus, alias quoque Græciarum civitates a Romanis abalienavit. Inter hos Achæi fuerunt, & Lacedæmonii, cum universa Bœotia, nisi quod una Thespiensium urbs obsidionem pati maluerat. nam Thebani,

sive propter amicitiam Atheniensium, sive levitate quadam animorum, ultro partibus accefferunt.

LII. Inter hæc Metrophanes, qui Delum spoliaverat, cum regia classe vagatus, agros circa Demetriadem, itemque Magnetas, & si qui alii dominationem regis abnuebant, populabatur. Sed hunc Bruttius Sura, C. Sentii Macedoniam obtinentis legatus, cum paucis suis navibus aggressus, navem unam cum hemiolia depresse; & omnes, qui his vehebantur, inspectante Metrophane, concidit. quem contentis velis fugientem negotiatores, qui crudelitatem regionum Deli effugerant, ex insidiis adorti, nova clade affecerunt. Bruttius ad Sciathum insulam appulis navibus, ubi prædarum receptaculum barbaris erat, oppidum expugnavit, servos in crucem egit, liberorum amputavit manus.

LIII. Inde profectus in Bœotiam, cum mille præterea hominum equites peditesque ex Macedonia ad eum pervenissent; ruenti torrentis instar Archelao, parvis copiis, sed excellenti animo prudentiaque fretus se opposuit. Apud Chæroneam cum Archelao & Aristione triduo continuo est dimicatum; & contra horum vim atque potentiam Bruttii virtus invicta stetit. Cum æquo Marte certatum esset; Archelaus, eo ipso se inferiorem judicans, quod superior esse non potuisset, omissa Bœotia ad mare cessit: donec Lacedæmoniorum Achæorumque auxiliis auctum, Romanus amplius lacessere non ausus, Piræei munitionibus se continuit, ad id usque tempus, quo præmissus a Sulla L. Lucullus quæstor, *abstinere Bruttium aliena provincia* jussit. Tum enim vir laude dignissimus, quamvis omnia supra votum procefferant, & integritate ejus allecta Græcia Romanam amicitiam respiciebat, ne quid præter leges faceret, in Macedoniam reversus est. Archelaus, discessu Bruttii cognito, Piræcum admota classe statim recepit.

§ LI. Plut. in Sull. c. 21. Appian. Mithrid. Memnon. Pausan. l. 3 & 9. § LIII. Plut. Appian.

JOANNIS FREINSHEMII  
SUPPLEMENTORUM  
LIVIANORUM  
LIBER XLIV.

IN LOCUM LIB. LXXIX LIVIANI.

---

E P I T O M E

LIBRI SEPTUAGESIMI NONI.

*L. Cornelius Cinna, cum perniciosas leges per vim atque arma ferret, pulsus urbe a Cn. Octavio collega, cum sex tribuni plebis: imperioque ei abrogato, corruptum Ap. Claudii exercitum in potestatem suam redegit, & bellum urbi intulit, arcessito C. Mario ex Africa cum aliis exsulibus: in quo bello duo fratres, alter ex Pompeji exercitu, alter ex Cinnae, ignorantes concurrerunt: & cum victor spoliaret occisum, agnito fratre, ingenti lamentatione edita, rogo ei exstructo, ipse supra rogam se transfodit, & eodem igni consumptus est. Et cum opprimi inter initia potuissent, Cn. Pompeji fraude, qui, utramque partem fovendo, vires Cinnae dedit, nec nisi profligatis optimatum rebus auxilium tulit, & consulis segnitie confirmati Cinna & Marius quatuor exercitibus, ex quibus duo Q. Sertorio & Carboni dati sunt, urbem circumfederunt. Ostiam coloniam Marius expugnavit, & crudeliter diripuit.*

**L.** SULLA ex Italia profecto, L. Cornelius Cinna consul, homo foedus & seditiosus, occasionem novandi res

adesse ratus, corruptus insuper, ut suspicio fuit, septuagies fextertio, perniciosas ferre leges cœpit; ab iisdem illis orsus, quas nuper, auctore Mario, P. Sulpicius in tribunatu promulgaverat: *ut novi cives in omnibus tribubus suffragia ferrent.* ad quam legem sciendam ex universa Italia civium novorum multitudo ingens concucurrit. E diverso veteres, & quicunque quieta republica gaudebant, refragabantur. Apparebat enim, rem ad revocandos exfulum spectare; renovandamque malorum istorum acerbicatem, unde paulo ante vix eluctata civitas fuerat.

II. Idcirco postquam Cinnani cum sicis veste tectis in forum convolaverant, *antiquas in tribus recipi* postulantes, melior pars civitatis ad consulis Octavii domum, ne ipsa quidem inermis, confluit. Is, quorsum evasura res esset, animo circumspectans, ubi majorem tribunorum partem intercedere legi audivit, sed eosdem a novis civibus stricto ferro de Rostris deturbari; ad auxilium ferendum per sacram viam cum magno civium agmine decucurrit in forum, disiectisque adversariis, Cinna reverentia parvis potestatis, & solita ingenii lenitate declinans, in ædem Castorum deflexit.

III. At comites ejus, non expectato consulis jussu, impetum in novos cives fecerunt: caelisque non multo minus decem millibus, reliquos ad ipsas usque portas urbis insentiunt. Cinna cum, præter expectationem suam, fufos fugatosque a paucioribus multos videret, per urbem discurrebat, fervitia ad pileum vocans. Sed, accedente nemine, pulsus ab optimatibus in Campaniam contendit, omnes, quas in itinere adierat, urbes cohortatus, *ut jus civitatis nuper acceptum totis animis tuerentur, pecuniasque conferrent.* Hoc apud Tiburtes & Prænestinos, & alios, qui ad Nolam usque colunt, egit.

IV. Neque senatorii ordinis viri adjuvandis Cinnæ cœptis deerant, C. Milonius ante alios, Cajus Marius, ma-

§ I. Liv. Epit. Appian. civil. l. 1. Vellej. 2, 20. Diodor. Flor. 3, 21. § III. Vellej. 2, 22. Appian. Liv. Epit. Plut. in Sertorio. c. 6. Agell. 14, 8. Val. Max. 8, 2.

gno illi Mario cognominis, & ob tribunatus repulſam inſenſus Sullæ Q. Sertorius. Nam poſt Atiniam legem, ſenatores tribunatum plebis petebant: cum antiquitus contra fuiſſet, quia tum tribunis plebis intrare curiam non licebat, ſed, ſubſelliis ante valvas poſitis, conſulta ſenatus examinabant. Igitur Sertorius, Sulla conſule, tribunatum petens, illo adverſante cupitis exciderat: neque enim conducere ſuis rebus Sulla arbitrabatur, ut, quam deprimeret poteſtatem cupiebat, eam viro acri atque diſerto committi pateretur.

V. Quippe Sertorius ita verſatus in foro fuerat, ut adhuc adoleſcentulus nonnullam in urbe potentiam cauſis agendis comparatam obtineret; & poſtea ſenator, ſi claros oratores paucos excipias, ea exiſtimatione ageret, ut non alius ejus ordinis ſolutius acutiſque dicere putaretur. Ceterum cum ex urbe Cinna profuiſſet, ſenatus ei, quod rempublicam conſul deſervuiſſet, & ad libertatem vocaſſet ſervitia, magiſtratum abrogavit: in locum ejus L. Cornelio Merula, qui flamen Dialis erat, ſuſſecto. His Cinna compertis, cum Capuam veniſſet, ubi Ap. Claudii exercitus erat, conciliatis ſibi tribunis, & quotquot forte ab urbe ſenatores aderant, conſulari habitu in publicum progreſſus, mox profuſis abunde lacrimis, *diſcedere cum ſacriſ*

VI. *Et hos quidem*, inquit, *veſtro haſtenus beneficio habui, cives, populi ſuffragiis creatus conſul. ſed inconſulta plebe, honorem mihi ſenatus abſtulit: acerba omnino ignominia, ſed in qua plus veſtram irarſcor vicem, quam meam doleo. nam mihi quidem unius anni magiſtratus, vobis in omne tempus jus veſtrum, &, ſi animadvertitis, libertas periit. Quid enim poſtea demereri plebem ſtudeant candidati? aut quorſum vos comitiorum potentes, veſtraque in manu conſulatus atque imperia eſſe creditis, ſi tam infirma atque inſtabilia beneficia*

§ IV. Plut. in Sertor. c. 3. Cic. in Brut. c. 48. Liv. Epit. Ap-  
pian. Auſtor de Vir. ill. c. 69.

*vestra sunt, & quæ bene de vobis meritis dedistis, ea per male meritos tam facile auferuntur?*

VII. Simul multa de republica, multa de suis injuriis questus, veste lacerata, de tribunali defiliit, & in mediam concionem missò corpore, diu jacuit humi; donec permoti misericordia, qui aderant, erexerunt hominem, & in suggesto reposuerunt; redditisque liëtoribus, *bono animo esse* jussuerunt: *se, ubicunque opus esset, auspicia ejus secuturos.* Hac inclinatione vulgi usa pars tribunorum antea corrupta, conscendit tribunal, sacramentoque dicto, suos quisque in verba L. Cinnæ consulis adegit.

VIII. Quibus rebus perfectis, circum urbes sociorum discurret, qui nuper erant in civitatem lege Julia recepti; quocunque advenisset, tali ferme oratione usus: *Consulem populi Romani, an vero exsulem ad vos venisse putatis, interest, cives. Illum mihi honorem libera civium suffragia dederunt: hanc fortunam captus adversariorum potentia senatus imposuit. cum utra parte vos sentiat, tamen dubitare non debeam, malo tamen ex vobis coram cognoscere. Mihi sane curæ cordique fuit, ut, quæ vobis concessa dataque dicitur civitas, ejus jure commodisque vere frueremini: neque veteribus civibus meis fieri injuriam rebar, si per me effectum esset, ut vobiscum, hoc est, cum amicis cognatisque suis, stabili pace atque concordia coalescerent.*

IX. Sed videte, quanta sit hominum iniquitas, & quanta invidia: nullam potius civitatem suam, quam vobiscum esse communem, volunt. Idem ille senatus, cujus nunc nomen sceleratissimi consiliis præscribitur, paulo ante senserat, non alia ratione retineri imperium, pacari Italiam, servari urbem posse, quam si fidelissimi sociorum, data civitate, in eandem causam pertraherentur. Atqui hoc consilium, cum non prudens modò & humanum, sed etiam felix fuisset, eoque pacto sociale bellum ad tenues redactum reliquias esset: exsistere tamen, qui per summam improbitatem turbare composita mallent, quam turbis desideratum diu sinem imponere.

X. Igitur qui paulo ante quibusdam Italicis gentibus male

resistebant, quamquam, adjuti a ceteris, non quidem penitus quietam domi rempublicam, sed tamen tolerabiliter agitatam haberent; iidem, nondum plane exstincto veteri bello, novum & civile parant: super priores hostes, partem antiquorum civium, & omnes eos populos, quorum auxilio prius usi sunt, adversarios habituri. Nam profecto aut graviter fallor, aut ii non estis, qui deludi vos feratis, sub tam iniquis & impudentibus dominis, pristinam servitutem novo nomine toleraturi.

XI. Etiam mancipia, quæ ære nostro paravimus, cum emittuntur manu, in quam conditionem venerint, intelligunt; neque minui sibi datam libertatem patiuntur; & de injuria patronorum querentibus jus redditur: homines ab ultima origine liberi, quondam æmuli, mox socii & auxiliatores urbis Romanæ, verba sibi dari patienter scilicet ferent! immo vero jus suum, si modeste agendo nequiverint obtinere, iisdem illis armis, quibus meruere, vindicabunt. Omnium enim, quibus nuper decreta est civitas, eadem nunc causa est, etiamsi fortasse dispari via hanc ad causam pervenerint. aliis enim, quia pro nobis pugnarunt, aliis, quia contra nos pugnarunt minus atrociter & diu, civitatem dari placuit; obventuram neutris, nisi alteri amare virtutem suam populum Romanum, alteri timere, utrique æstimare docuissent.

XII. Atque utinam iisdem animis, quibus promittendam sibi civitatem senatus censuit, præstare voluisset! nihil nunc his esset contentionibus opus: & in alta pace ac florente republica, veteres simul novique cives mutæ benevolentiae concordiaeque fructus lætissimos caperent. Sed sive Deorum hæc ira est, nullam diuturnam felicitatem humanis rebus relinquendum; sive hominum tanta importunitas, ut concessam a Diis quietem possit evertere; omnia nunc in contrarium versa sunt: & ultimæ propemodum desperationis indicio, ipsa in morbum remedia verterunt.

XIII. Proh Deum hominumque fidem, ideo nimirum datam sociis civitatem esse, ut cum iisdem deinceps civili bello collideremur! At vero aut nunquam datam iis civitatem oportuit, aut bonæ datam fide. O disorta hominum ingenia! o

*corruptas mentes! Amicissimos modo populos subito tumultu dissiluisse; repletam armis Italiam, ferro atque igne vastatam; extrema & fecisse socios, & passos esse, quisquam sanæ mentis crediderit pro nomine tantum, non pro jure civitatis? An vero existimare potuerunt, vos, qui in media republica Romana nati plerique & educati eslis, decipi tam turpiter posse, ut appellatione civium Romanorum contenti, quo jure, quaque conditione Romani cives agerent, non requireretur?*

XIV. *Nimirum improba cupiditas dominandi, & suum ad lucrum trahendi rempublicam, ita excæcavit animos, ut homines cetera non stupidissimi, tantam hanc tamque singularem amentiam videre atque deprehendere nequeant. Igitur festivo sane consilio, cum aliquanto pluribus darent civitatem, quam essent ipsi, a quibus dabatur; quinque & triginta tribus veteri populo relicta sunt: majori longe numero hominum octo videlicet attributæ. At vero quis nescit, ita comparatum esse Romæ, ut maxima quæque negotia tributis comitiis peragantur?*

XV. *His magistratus creantur, qui civibus omnibus præsent: his sciscuntur leges ipsis quoque magistratibus imperaturæ: nec aliud, nisi per has, ad pleraque sacerdotiorum iter est. postremo quibus de criminibus ad populi judicium itur, suffragiis tribuum decidenda res est. Vos autem, hoc est, universa hæc Itatorum multitudo, paucas & extremas in tribus coniecti, tota vita vestra, ne semel quidem ad suffragia vocabimini. Quorum igitur hominum in his causis, quibus tota ferme respublica continetur, nullæ aut exiguæ partes sunt, eos vocabulo civium appellari quid refert, si ab omnibus negotiis publicis, haud secus atque peregrini, abarcentur?*

XVI. *Hæc ludibria vos pati non posse quis miretur, cum ex veteribus Romanis, quotquot æqui justique amantes, & pacis tranquillitatisque studiosi fuerunt, ferre nequiverint? Nec enim ego solus hujus causæ sum amplexus æquitatem: multis & mecum, & ante me idem judicium studiumque fuit. Sed ista repetentem animum acerbus dolor occupat: nec enim C. Marii, P. Sulpicii miserabilem casum quam sine lacrimis ac luctu recordari, quorum hic a nefariis latronibus crudeliter in-*



perfectus est; illum post tot consulatus, summa gloria gestos, in gravi & sollicito exilio steriliū insularum tristes latebræ tegunt.

XVII. Et quis postea patronorum vestrorum incolumitatem speret, ubi P. Sulpiciū summa nobilitas, & ingenium, & tribunitia potestas; C. Mariū multiplicati honores, amplissima res gestæ, triumphatus Jugurtha, urbs & Italia haud dubie conservata non defenderunt? Est tamen quorundam animis hæc innata generositas, ut officium anteponant securitati; & vivere cum dedecore, quam perire per virtutem, acerbius putent. An inter hos ego locum ac nomen merear, ii viderint, quorum causam tam invisam domi, summorumque hominum morte aut exilio terribilem, nequaquam timide aut cunctanter suscepimus.

XVIII. Sed neque armis adversariorum petiti, nisi tentata ultima spe, reliquimus urbem; & postea minime despondimus animum, in negotio semel probato susceptoque, vel ad extremum spiritum perseveraturi. Et dederunt Dii, ut præmium huic esset constantiæ; cæptumque probatum numinibus, secunda statim fortuna sequeretur. Nam qui apud Capuam erat fortissimus exercitus, tribunis præfæctisque & optimo quoque manipularium ad bonam causam ulro accedentibus, sacramento mihi rogatus est; & Prænestini, Tiburtes, ceteri plerique populi, qui inter Capuam & urbem interjecti sunt, omnia polliciti, haud aspernandam pecuniæ summam contulerunt.

XIX. Aliis etiam passim inclinantibus ad communem causam, eas propediem copias habebō, adversus quas inimici nequeant consistere. Nam ut impetu magis, quam consilio, ferri improbitas solet; omnia in eo esse rati, si res urbanas per vim ad sua commoda componerent, adversus ea, quæ possent aliunde accidere, nihil providerunt. Caput factionis, homo insigni audacia L. Sulla, quasi nihil referret, esse in civitate, qui armatum & furem legibus agere reum sustineret; cum quinque legionibus, quod firmamentum partium istarum fuit, in longinquam militiam profectus est.

XX. Cn. Pompejus, qui alterum exercitum obtinet, nec amicus esse Patribus, nec sperare amicos potest, occiso consule, qui missus ab senatū ad accipiendas copias ejus venerat. In

*ipsa urbe multa sunt hominum millia nostras sequentium parates. In Italia Samnites & Lucani, quamquam accisis opibus, bellum sustinent: ut quantum decessit viribus, tantum accessisse animis videatur. quæ postquam omnia recogitaveritis cum animo vestro, non ad bellum magis invitari vos, quam ad victoriam, reperietis. Non erat difficile concitare propensos ad arma, nec aliud magnopere ad rebellandum, præterquam ducem, requirentes.*

XXI. Qui Latini nominis erant, nihil se ornatiores auctioresque fremebant hac nova lege civitatis. Honestius majores suos in una tamen veterum tribuum suffragia tulisse, quamcunque fors quoque tempore dedisset: jam separari tribus antiquas, tanquam consortio Latinorum polluerentur: novas & plane supernumerarias fieri, quibus adscripti haberentur ludibrio, nominis Romani participes, juris exsortes. Certe sapienter olim a Servio rege constitutas centurias, ut egens & injuncta sæx populi speciem haberet æqui juris, vis omnis penes honestiores esset. verum in præsentia nec causam huic aslutiæ, nec locum esse. multas habere Latium familias, Romanis nec genere, nec censu impares. neque sibi posse fucum tantum fieri, ut nomen pro re, & umbram pro corpore accipiant.

XXII. Igitur aut vere futuros cives Romæ; aut si hoc potiri non detur, vanum vocabulum abjecturos. aliud majores suos olim, seque ipsos modo meruisse, & quotidie mereri, quam ut pro continuis laboribus ac periculis suis, ludibrio haberi ab Romanis debeant, nullam habituris civitatem, si Latio conspirandi cum cetera Italia voluntas venisset. Hæc Latinis, & si qui alii pro Romanis adversus socios steterant, dicebantur. At apud alios populos, qui, positis armis, recepti in civitatem fuerant, plus adhuc irarum erat. Acceptis nuper cladibus nondum ad cicatricem pervenerat vulnus; & novæ injuriæ sensu violentius recrudescebat.

XXIII. Præcipue quorum postremo tumultu interfecti fratres liberive ab Octavianis fuerant, vindictæ cupiditate flagrabant. Sed & exfules, quorum plerosque non aliam ob causam urbe pulsos credebant, quam quod favere illis

lis putarentur, quamprimum reduci, valde existimabant ad rationes suas pertinere. Cum hic omnium sensus esset, haud difficulter obtinere Cinna potuit, ut dicta sua faventes exciperent: brevique tempore formidabilem civitati potentiam comparavit. Nam neque Itali segniter pecuniam virosque præbebant; & affluebant ab urbe quotidie, quibus præfens respublica displicebat.

XXIV. Idcirco ex delectibus novorum civium triginta legionibus effectis, ut auctoritatem atque gratiam viribus adderet, C. Marium, ceterosque exsules, ad communionem consiliorum & spei evocavit. Interea Cn. Octavius, L. Merula consules adversus provisam tempestatem follis mœnibusque reparandis muniebant urbem: machinas locis idoneis disponebant: &, quia non abundabant copiis, Metelloque procul agente, longa spes auxiliorum erat, circum urbes imperio parentes, & in Cisalpinam Galliam missitando, exercitum contrahebant.

XXV. Ad Cn. quoque Pompejum proconsulem legati iverant, qui ad Adriaticum mare, ubi reliquæ adhuc Italicorum, M. Lamponio, Ti. Cleptio ducibus, agebant, exercitui Romano præerat. Sed ille, quia frustratus spe continuandi consulatus fuerat, nihil ad rempublicam, sed ad suam utilitatem omnia consilia referens, ita se dubium, & inter utrosque ancipitem gessit, ut Cinnanæ factioni, quam ab initio facillime evertere potuisset, vires daret, nec nisi profligatæ jam optimatum causæ succurreret.

XXVI. Adunato igitur exercitu, cum ante portam Collinam castra posuisset; eodem & Cinna cum Sertorio supervenit, neque multo abinde intervallo castra metatus est. Pugna deinde inter Sertorium & Pompejum commissa, cum ad sexcentos cecidissent, interventu noctis diremta est. Eo tempore accidit res sæva & horribilis, ut Pompejanus miles fratrem ex adversa acie ignorans ignorantem

§ XXIII. Plut. in Mar. c. 69. Appian. civil. l. 1. Vellej. 2, 20. Liv. Epit. § XXIV. Sallust. Diodor. l. 37. Vellej. Liv. Epit. § XXV. Oros. 5, 9. Liv. Epit. Vellej. Appian.

interficeret. *Eum deinde, cum mortui corpus spoliando fratrem agnovisset, ingenti lamentatione edita, rogam exstruxisse memorant; &, consensu rogo, cum eodem se gladio transfixisset, quo fratrem occiderat, commune cum illo bustum habuisse. Miserabile hoc facinus & erat, & videbatur: sed tot hominum utrinque millia, cum ista detestarentur, haud leviora committebant.*

XXVII. In hoc articulo rerum C. Marius, ceterique ex Africa ad Telamonem Hetruriæ portum appulerunt. Erant cum his equites Mauri, & quidam Italogum, quos in Africam æstus bellorum, aut aliæ causæ expulerant, in universum haud amplius mille. Sed ad nomen Marii concurrentibus multis, cum & ergastula armaret, & ex liberis hominibus agricolarum pastorumque robustissimos centuriaret, brevi ad sex hominum millia coacta sunt: quibus in naves quadraginta impolitis, cum Cn. Octavium virum optimum esse nosset, Cinnæ se statuit adjungere; præmissis, qui venire Marium, consuli que dicto audientem fore, nuntiarent.

XXVIII. Ea de re cum ad consilium Cinna retulisset; ceteri præter Sertorium omnes cupide recipiendum censebant: *summam in viro virtutem cum pari peritia rei militaris, propemodum certam spondere victoriam, quibus accessisset. In urbe, in Italia, in provinciis ubique notum C. Marii nomen, ubique amplum atque honoratum esse. neminem ferme militem veteranum ullis in castris Romanis inveniri, qui sub hoc imperatore non meruerit. neque ignotum, quantam vim apud militares animos memoria ducum habeat, quorum auspicio vicerint, quorum beneficio dona, honores, divitiis, famam sint consecuti.*

XXIX. Sed & in magistratibus, quos togatus in urbe gesserit, multam materiam opportunitatemque demerendi homines, conciliandique animos habuisse. Quibus rebus jam olim in tanto optimatum odio invisus contra potentissimam factionem steterit; iisdem inclinatum jam & infractam, si præsentibus viribus conjunctus,

§ XXVI. Oros. Liv. Epit. Plut. in Mar. c. 6j. & Sertor. c. 6. Appian. Flor. 3, 2.

*adjuvet & adjuvetur, facile pessumdaturum. Sane deceptas ab Sulla legiones, pellendo ex urbe Mario, contra vim improvisam haud satis parato, commodasse manus: sed non ideo extinctam hominis audaciam existimationemque esse. quin contra accessisse aliquid ad utramque, prodigiis Deorum, & inclinatione hominum brevem status mutationem præfagientibus.*

XXX. Idcirco citius, quam de reditu ejus sciri potuerit, rerum omnium inopem, sola nominis Mariani admiratione ac favore, exercitum & classẽ comparavisse. Præterea nihil magis convenire consulis actionibus, qui de restituendis exsulibus tantopere depugnarit, quam C. Marium recipi, exsulum omnium haud dubie principem. idque nisi fiat, apud multos orituram suspicionem, aliud simulatum illis contentionibus, aliud quæsitum esse. Præterea cavendum, ne velut hac repulsa irritatus, in contrarias partes transeat, homo contumeliæ omnis impatiens, & ad vindictam præceps. Nunc occupari eum, retinerique benevolentia posse: ubi hoc tempus prætermisissum fuerit, seram neglectæ occasionis penitentiam fore.

XXXI. Adversus hæc atque talia, Q. Sertorius omnia alia censebat, sive tanto viro præsentem minoris se aestimatum iri putans; sive probabili causa motus, acerbiter Marii, & implacabilem in victoria animum procul rebus urbanis habendum existimabat. Is ergo hunc maxime in modum differuit: Quæ de virtute atque gloria C. Marii dicta sunt, neque ab inimicis ejus negantur: & ego neminem eadem ætate imperatorem cum hoc comparari posse arbitror.

XXXII. Ceterum, quemadmodum reliqua, quæ oriuntur & occidunt, statâ crescendi minuendique tempora habent, neque fines a natura præscriptos transilire possunt: ita & humanæ virtutis suus ortus, deinde maturitas, postremo, quæ illam exstinguit, senectus est. Nec aliter de gloria judicaverim: multorum hodie vix nomina cognoscuntur, quos scimus vetustis temporibus clarissima fama floruisse. Priorem autem gloria virtutem esse necessum est,

§ XXXI. Plut. in Sertor. c. 7.

T. Liv. Vol. IX.

K

*cum hanc illa consequatur. at quæ posterius orta sunt, diutius manent. eo fit, ut non idem utriusque sit finis atque terminus, sed ferme tum præcipue vigeat fama, postquam longa ætate, aut morbo corporis, aut alio veluti situ virtus emarcuit.*

XXXIII. Idcirco cum nulla fuerit unquam respublica magnorum ducum feracior, ubi commentarios historiæ Romanæ atque annales omnes evolveris, neminem reperies, cui ad hos annos ille vigor animi ac corporis, quem virtutem vocamus, duraverit. Unde sapienter a maioribus nostris constitutum est, ut post quinquagesimum annum militiæ sit vacatio; a quinto & sexagesimo senator venire non cogatur in curiam; in comitiis de ponte sexagenarii deiciantur. Quæ profecto illis non placuissent, nisi senectus ita corporis animique vires enervaret, ut iidem homines, postquam ætate mutati sunt, minime iidem esse videantur.

XXXIV. Hæc mihi visa sunt in præsentî consultatione diligenter attendi debere: ne decepti & opinione falsi, alium quæramus Marium, alium adipiscamur. Nam ille profecto Marius, qui Jugurthæ fregit ferociam, qui Cimbro Teutonisque decantatissimis pugnis contudit, olim est mortuus. nomen tantum & hæc velut umbra Marii superant, quam nuper L. Sulla, postquam semel contemnere ausus est, nullo labore profigavit. Ab illo tempore calamitatibus & miseriis conflatus, quales etiam juventutis exstinguere vigorem potuissent; quod robur ad communem causam, quas ille vires affèret?

XXXV. Sed fac, alia sorte C. Marium, quam ceteros mortales, vivere: tempori & annis licere in illum nihil, quod tamen res ipsa refutat; an igitur recipiendus est? Ego vero, admirentur licet, qui ad pauca respicientes cetera non animadvertunt, ego, inquam, vel ob hoc ipsum dicerem recipiendum esse minus. L. Cinna consul, ceterique duces omnes, sub unius senis umbra latere videremur, ab hoc defendi, huic debere victoriam.

XXXVI. At vero quæ nos tanta necessitas subigit, ut, alienam gloriam supra modum extollendo, nostram existimationem infra meritum deprimamus? Res nobis est cum optimatibus, Sul-

la discessu propemodum exarmatis. Sub segni duce tiro exercitus, tumultuario contractus delectu, & urbis vastæ aliis munitionibus indigens munitio, graviora scilicet, quam sustineri queant a nobis, bella minantur? At nobis præter veteres copias, arma virosque omnis Italia subministrat: passimque concurrentibus ad signa civibus novis, cohortes paulo minus trecentas effecimus. Inne sumus, aut videri volumus, ut, tantis instructi exercitibus, non pecuniæ, non comæcatus indigi, hoc bellum conficere desperemus, nisi alterius virtute atque opinione adjuvemur?

XXXVII. Sic quoque, bello propemodum profligato, paucisque ad summam victoriæ reliquis, horum omnium gloriam arbitriumque Marius rapiet, amulorum impatiens (quod vitium, cum alia minuantur annis, in senectute sit validius) & ubi de potentia agitur, fidei haud sane tenax. Quantis ille suspitionibus nuper L. Rutilium consulem legatus torserit, omnes scimus. & quamvis, qua est astutia, mire innocentiam simularet, minime persuasit reputantibus, qualis in Q. Metellum fuisset. Neque enim est expectandum, ut, qui junior senem, prætorius consulem, legatus imperatorem non est reveritus, is cuiquam juveni senex & sexies consul concedat.

XXXVIII. Hoc ingenio virum apud hostes nostros, quam nobiscum esse, longe malim: adeo nihil moveor curis metuentium, ne ad partes optimatès transeat. Transeat vero, & ibi potius consilia turbet, amulationes exerceat, ceterorum conatus ambitione & discordia moretur! At vero magnum nobis præsidium detrahemus, idemque adjiciemus adversariis. Ego vero non video, quid his rebus asserre momenti queant decrepitus imperator, & piscatoria navigia, & manipulus pastorum cum agrestibus armis. Ille sane classem & exercitum vocet: nos collectam ex agris & ergastulis multitudinem esse comperimus. cujus generis arma consociari nostris, si nos pati possimus: milites non ferent, quotquot sunt Romani nominis & sacramenti memores.

XXXIX. Sane extremis temporibus servos armari necessitas defendit: sed ubi hæc abiit, honestorumque militum est copia,

*nemo prudens hoc dedecus ultra sustinebit. Hostibus potius hanc optemus infamiam, ut civibus suis ereptum ire suffragia & tribus servili manu dicantur. nihil æque retinebit in partibus eos, qui jam coiverunt ad communem causam: & dubitantes explicabit. Ceterum ego plus timeo, ut vel hic accedere nostris adversariis, vel illi hunc recipere velint. Odit, odioque est nobilitati: neque tanto temporis tractu, postquam ille semel accessit ad rempublicam, ulla occasio premendi invicem fugillandique prætermissa est. Ideoque nuper, cum de eo L. Sulla consul ad senatum retulisset, præter unum hominem, adolescentis Marii socerum, nemo Patrum fuit, cujus ille sententia hostis non judicaretur.*

XL. *Quis credat, tantillo tempore sensum atque memoriam tantæ injuriæ excidere animis potuisse, ut fida concordia stabilique fœdere conjungantur? Marius his corpus suum salutemque credet, a quibus proximo anno hostis judicatus est? an illi causam suam, urbemque aut exercitum committent Mario, cujus irritabilem animum non ignorant, recenti offensa, nihil aliud quam ultionem meditari. Scilicet Cn. Octavius ea de re ad senatum referet; tam eminente in Sullanam factionem studio, ut delectus ab Sulla fuerit, quem tecum, L. Cinna, immo contra te consulem faceret? Decernent vero tum alii, tum vero cupidissime Q. Catulus, post interversum Cimbrici belli decus semper obliquus?*

XLI. *Quintus autem Metellus, & Cn. Pompejus, qui soli nunc justos exercitus habent, hunc enisè recipient, juvabuntque: ille paternarum inimicitarum heres; hic tam cupidus imperiorum, ut traditum consuli exercitum, nece illius repetere non sit veritus. nedum ille recipi exsulem finat: eum præcipue, quem in hanc fortunam ex nimia cupiditate provinciæ & exercitus incidisse norit. Nempe si decretum ab senatu bellum Mithridaticum adimere L. Sulle Marius voluit, & propemodum potuit: quid Pompejo relinquitur spei, a quo non modo retentus contra voluntatem Patrum exercitus, sed etiam missus ab senatu consul occisus est? Enimvero hæc vel præcipua nobis cautio esse debet, ne hominem, tot atque tantis inimiciis obrutum,*



ita complectamur, ut in nos expetere odia ipsi debita possint.

XLII. Multi haud dubie nostras, aut etiam neutras partes sequentium, ubi nunc nobiscum esse audient, odio meturve illius in adversa castra conjicientur. Igitur modis omnibus id aspernari ac rejicere consilium debemus, quo nobis & difficilius bellum fiat, & invidiosior victoria. Nam ille, ubi fortuna nos adjuverit, vindicare privatas inimicitias communibus armis volet: & supra naturam favam atque sanguinariam, contumelias suas & pericula nuperæ fugæ in consilium adhibebit. Nondum hæc erat passus, cum ob tribunos ab exercitu lapidatos, quamquam ante fores ultor esset, multos insignes viros propter amicitiam Sullæ necavit: quantas illum strages editurum putemus, ubi vacuus metu, incensus malis, arbitrio suo de inimicis vindictam sumet?

XLIII. Sed ea res multa cooperiet infamia victoriam nostram, summoque nos pudore ac tristitia conficiet, qui utique non sanguinem civium, sed concordiam, & reipublicæ salutem, & sua cuique jura integra atque illæsa optamus, & his gladiis non aliam ob causam cingimur. Accedit adolescentis Marii simillima paternæ naturæ perfidia & crudelitas: quem ubi receperis, consul, jam noveris, qua sit agendum modestia, ne te ille puer, jam insigni specimine indolis edito, L. Porcium esse putet. Erant & alia, quæ moneri utiliter potuissent, sed ego aut hæc, quæ dixi, suffectura vobis credo, aut nihil profecto futurum satis.

XLIV. Quid igitur C. Mario suam offerenti operam respondetur? Dicam equidem, quod sentio: quidlibet potius, quam recipi. Sed hoc forte neque indignum nobis, neque rebus præsentibus inutile fuerit, ita responderi: Quod C. Marius, qui cum eo sunt, operam suam L. Cinnæ consuli, reique publicæ obtulit, id rite ab eo factum, omnique favore dignum videri. Ceterum L. Cinnæ consulis opes in præsentia tantas esse, ut propediem ad urbem, certa spe boni successus, admovere signa decreverit. Inimicorum coercita pravitate, curæ consuli fore, ut & ceteri, qui essent per vim ejecti, & præsertim Q. Marius, quantocius restituantur. Interea posse illum se tenere tutis locis: omnes hostium copias ab illo in se advocaturum esse.

*consulem. & si præter spem urgeatur, ad primum nuntium, quod satis sit ad præsidium ejus, copiarum affore. Ita nec invidia aliena onerabimur: & si quid utiliter in rem nostram conari Marius poterit, id nihilo segnius, & citra fraudem nostram fiet.*

XLV. Hæc ubi sunt a Sertorio dicta, L. Cinna, recte quidem atque salubriter admoneri, fatebatur: ceterum pudore se contineri, ne Marium excludat, quem in societatem belli ultro advocasset. Ibi Sertorius excipiens, atqui ego, inquit, quod sua sponte Marium in Italiam venisse arbitrabar, eam sententiam dixi: quod si accitu tuo adest, transacta res erat, neque revocari in deliberationem debebat. Ita receptum Cinna appellavit proconsulem, fascesque ad eum, & alia magistratus insignia misit. Sed ille convenire hæc exsulis fortunæ negando, sordidatus atque squalidus lento passu incedebat, misericordiam concire studens: sed prominebat atrox animus; effleratumque potius calamitate, quam domitum, torvitas vultus indicabat.

XLVI. Salutato consule, & ad milites oratione habita, de bello deliberatum inter duces est. Oppugnandam esse urbem conveniebat, invitante præter alia consulis Cn. Octavii segnitie, non tam imperitia, quam intempestiva legum cura, occasiones corruptentis. inter quæ, jubentibus multis, ad defensionem urbis libertate propofita, servorum auxilio vi; negavit, servis se contra leges daturum cum civitatem, unde C. Marium legibus parens arceret. At longe alia Cinnæ ratio erat, qui, quatuor factis exercitibus, pro numero ducum (nam præter Cinnam & Marium, scilicet Q. Sertorius, Cn. Papirius Carbo ducebant) Tiberim amnem clauferant. Ex adverso urbis Cinna & Carbo habebant castra: supra urbem Sertorius, infra C. Marius confederant: & pontibus ubique impositis, dimissisque ad diripiendos negotiatores lembis, ne quid importari in urbem posset, prohibebant.

§ XLV. Plut. in Sertor. c. 7. & Mar. c. 70. Liv. Epit. Diodor. ap. Valer. § XLVI. Flor. 3, 21. Appian. civ. l. 1. Plut. Liv. Epit. Oros. 5, 19.

XLVII. Ostiam quoque coloniam proditione quorundam expugnavit Marius, multisque in ea perentis civibus, opidum nefanda strage diripuit, omnibus avaritiæ, libidinis, sævitieque exemplis ibi editis. Ab alia parte Ariminum, missis eo copiis, Cinna redegit in potestatem: quo factò, quæ in Togata Gallia collectæ copię erant, excludantur. Unde arctæ in urbe res esse incipiebant, tantam multitudinem cito premente comineatuum inopia; variisque interim obortis difficultatibus, cum longe omnia auxilia essent, populus animis, senatus consilio, magistratus auctoritate, concordia omnes dejicerentur; multoque plus virium divisa in partes Roma haberet, quo se opprimeret, quam quo defenderetur. Hæc nimirum illa est Romana respublica, cujus magnitudinem omnes mirantur; & sollertissimus quisque rebus suis optime consultum existimaret, si ad eadem pervenire sineretur!

XLVIII. Enimvero nusquam illustriora documenta existunt, quam nihil sit in opibus atque potentia, bellique virtute boni, si scientia desit utendi. Quemadmodum enim Herculi furenti longe fuisset satius, armis membrisque uti non potuisse, quam librasse gravem clavam, & volucres emisisse sagittas, quibus semetipsum carissimis pignoribus spoliaret; ita civitati præstat exiguas habere vires, quam prægrandes, quibus in suum exitium abutatur. Ego certe, si detur optio, ejus civitatis civis esse minime vellem, quæ gentibus omnibus imperare diceretur; ceterum per intestinos tumultus nemini suorum salutem atque dignitatem tutam præstare, vel in horam posset. Igitur concordie studendum fuerat; quæ non nisi justitia & bonis moribus continetur.

XLIX. At pro his quidem ubique nunc perfidia, perjuria, sordes, ambitio, luxus invaluit: quibus rebus homines nihil aliud, quam lædere & lædi, docentur. Ergo his proximis annis, nullum ferme toto orbe terrarum im-

perium fuit, quod non sævissimis motibus concuteretur. Et sicuti singulis hominibus facilis in morbos ex bono corporis habitu transitio est; ex mala valetudine in commodiorem ægre eluctamur: ita, quid de moribus hujus ævi sperandum videatur, nolo ominari. Certe parum abest, quin optimi quique sapientissimique desperaverint, quando jam soli deponunt imperia, qui soli fortasse, si hæc emendabilia rerumpublicarum vitia forent, emendare potuissent.

---

# JOANNIS FREINSHEMII SUPPLEMENTORUM LIVIANORUM

LIBER XLV.

IN LOCUM LIB. LXXX LIVIANI.

---

## EPITOME

LIBRI OCTOGESIMI.

*Italicis populis a senatu civitas data est. Samnites, qui soli arma retinebant, Cinna & Mario se conjunxerunt. ab iis Plautius cum exercitu cæsus est. Cinna & Marius cum Carbone & Sertorio Janiculum occupaverunt, & fugati ab Octavio consule recesserunt. Marius Antium, & Ariciam, & Lanuvium colonias devastavit. Cum nulla spes esset optimatibus resistendi propter segnitiam & perfidiam & ducum & militum, qui corrupti aut pugnare nolebant, aut ad diversas partes transibant, Cinna & Marius in urbem recepti sunt: qui, velut captam, eam cædibus & rapinis vastarunt, Cn. Octavio consule occiso, & omnibus adversæ partis nobilibus trucidatis, inter quos M. Antonio eloquentissimo viro, L. & C. Cæsare, quorum capita in Rostris posita sunt. Crassus filius ab equitibus Fimbriæ occisus. Pater Crassus, ne quid indignum virtute sua pateretur, gladio se transfixit. Et citra ulla comitia consules in sequentem annum se ipsos renunciaverunt: eodemque die, quo magi-*

*stratum inierant, Marius Sex. Licinium senatorem de saxo de-  
jici jussit; editisque multis sceleribus, Idibus Januariis decessit:  
vir, cujus si examinentur cum virtutibus vitia, haud facile  
sit dictu, utrum bello melior, an pace perniciosior fuerit. adeo,  
quam rempublicam armatus servavit, eam primo togatus omni  
genere fraudis, postremo armis hostiliter evertit.*

I. **I**N his angustiis cum deprehensa respublica esset, omnia circumspiciens senatus, nulla satis aut matura, aut firma praesidia reperiebat. L. Sulla, in quo spes esse maxima potuisset, procul in Graecia gerebat cum Mithridaticis copiis bellum: servitia si arriarentur, plus dedecoris allatura, quam auxilii, putabant. Unicum erat haud poenitendum, ut in tali tempore, consilium, *ut Italicis omnibus, modo arma posuissent, civitatem darent. Ita & illos, &, qui adhuc eo bello implicatus erat, Q. Metelli exercitum, velut communi patriae succursuros.* Sed Italicorum nemo ferme, praeter Lucanos & Samnites, supererat. Lucani Cleptio & Lamponio ducibus Asiam, oppidum munitum in Brutiis, longo tempore inani conatu obsederant: Rhegium etiam oppugnare conati erant; si potiti ea urbe fuissent, Siciliam petaturi. Sed praetor insulae C. Norbanus, magnitudine apparatus territis Italici, periculo Rheginos eripuit.

II. Ergo Lucani, beneficio senatus usi, Sullanis partibus se adjunxerunt. Ceterum id quidem in praesentia modicum gaudium fuit: quod infirmior ea pars sociorum, & in ultimum Italiae angulum submota erat. Samnites, qui jam soli arma retinebant, Campaniamque & superiores regiones vexabant, conciliare, majus operae pretium fuerat: sed dum honestas conditiones senatus expectat, a Mario, nihil non tribuente, praeventus est.

III. Q. Metello Pio consules eo de negotio scripserant, castra contra Samnites habenti, *ut, quibus posset conditioni-*

§ I. Liv. Epit. Diodor. l. 37. Idem ap. Fulv. Ursin. Appian. civ. l. 1.

*bus, cum iis transfigeret. Sed illi civitatem non sibi modo, sed etiam iis, qui ad se transfugissent, paciscebantur; præterea prædæ undecunque ablatam retinebant: postremo, captivos atque transfugas omnes sibi restitui, postulabant. quæ tam inhonestæ, cum neque Metellus, neque Patres concederent; Cinna, quid ageretur, sentiens, auctore Mario, quæcunque petissent pollicitus, Samnites partibus suis adjunxit. Ab his deinde, cum Romam arcessitus Q. Metellus esset, A. Plautius cum exercitu oppressus est.*

IV. Inter hæc Appius Claudius tribunus militum, qui Janiculo præerat, ut Mario beneficii, nescio cujus, gratiam referret, circa diluculum semiaperta porta eum intromisit. Cinna quoque cum parte exercitus eadem ingressus est, statimque ad captæ urbis rumorem Sertorius & Carbo accurrerunt. Sed Octavio consule, & Cn. Pompejo celeriter arma opponentibus, locum tenere non potuerunt. Circum hæc tempora Cinnae insidiis petitus Cn. Pompejus, consilio adolescentis filii, quem postea Magnum terrarum orbis agnovit, est conservatus. Is, a virili toga commilitio patris affluens, contubernalem L. Terentium habebat, quo plurimum & familiarissime utebatur. sed corruptus a Cinna Terentius ita partes cum fociis diviserat, ut illi tabernaculum ducis incenderent, hic per insidias tolleret Pompejum.

V. Tam atrocis propositi indicium cœnanti Pompejo delatum est. quo dissimulato, adolescens hilarius etiam solito bibit, & cum Terentio, qua solebat, comitate agere perseveravit. Deinde cubiculum ingressus, ubi proditoribus fatis persuasum esse, quod volebat, censet, clam subducit se a tabernaculo, firmaque patri circumposita custodia, eventum quietus expectat. Interea Terentius, Pompejum in eodem contubernio dormire putans, clam e cubili surgit, correptoque gladio lectum Pompeji repetitis ictibus confodit.

§ IV. Liv. Epit. Appian. Plut. in Mar. c. 70. & Pomp. c. 5. Vellej. 2, 29. Cic. pro leg. Manil. c. 10.

VI. Hinc orto tumultu, magna consternatio incessit copias, odio ducis, & ad defectionem pronis animis, ad quamlibet occasionem mobiles. jamque diripi tentoria, summi arma cœperant: neque proconsul obviam ibat, offerre se tumultuantibus non ausus. adolescens Pompejus, mediis agminibus immixtus, prehendebat milites, lacrimabatur, supplicabat: postremo, abjecto in porta castrorum corpore, *illac jubebat transire fidem mutaturos*: donec multo fletu, & deformitate spectaculi retento militi rediit pudor, & præter octingentos, qui jam ad Cinnam transferant, reliquus exercitus pacatus, imperioque proconsulis restitutus est.

VII. Minime tamen diuturnus receptæ potestatis usus Pompejo fuit. Paulo enim post utrumque exercitum pestilentia invasit: & de Pompeji copiis hominum millia undecim, de Octavianis sex desiderata sunt. Deinde ingens apud Romam tempestas orta est, & castra, præcipue Pompeji, tam crebris percussa fulminibus, ut ruere cœlum videretur. Arma signaque passim tacta, milites, & quidam ex illustribus exanimati sunt, ipse quoque proconsul fulmine afflatus interiit. Tam improvisum viri exitum, singularis etiam exsequiarum ignominia comitata est. Quod enim imperio & maximis exercitibus instructus, periclitanti patriæ tempestive subvenire neglexerat, in tantum populi Romani odium venit, ut lectum ejus, cum ad rogam efferretur, diriperet; corpusque omni contumelia affectum, unco traheret.

VIII. Dum ista fiunt, Marius, relictis supra infraque urbem ad arcendos commeatus præsidii, ut etiam ex agris subvectionem omnem amputaret, vicina oppida, in quibus populi Romani horrea erant, subito aggressus, Antium, & Ariciam, & Lanuvium, & præterea nonnullas alias colonias, vi aut proditione potitus, deletis propemodum habitatoribus, devastavit. Inde, priusquam aliis ex locis importari



aliquid rerum necessariarum posset, Appia via urbem petens, assumtis ceteris ducibus, intra tertium decimum lapidem castra posuit. Contra ab urbe consul Octavius, cum P. Crasso & Q. Metello venientibus occurrit: virtute numeroque militum non inferior; neque impar negotiis, nisi quod rebus turbatis eadem omnia custodienda credebatur, quæ composita republica erant constituta.

IX. Inde lenta & impedita consilia quasi vinctum constrictumque hostium audaciæ præbuerunt: qui omnia ausi, duces, milites, ad extremum fervos, quibus quemque poterant artibus promissisque excitabant. Exercitus Pompeji post interitum proconsulis, Q. Metellum ducem optaverat. *sub impigri viri ductu, neque virtutem sibi, neque fortunam defuturam esse.* Q. Metellus, quod ea res contra leges fieri videretur, legatos cum minis & conviciis *adire consulem* iussit, & *illi audientes dicto esse.* At vero milites consulem, ut segnem & rerum imperitum, aspernati, signa ad hostes transtulerunt. Crebra inter hæc & ex urbe transfugia fiebant, servitiorum maxime, cui generi, circummissis ad urbem præconibus, libertatem Cinna promiserat.

X. Eo jam perventum erat, ut spes resistendi nulla superesset. ducum alias segnities, alias perfidia rem corrumpebat. militum quoque corruptum vulgus aut pugnare nolēbat, aut palam transibat ad hostes. Urbanæ plebis, si annonæ inopia diutius premeretur, desperatio, haud minus formidini optimatibus, quam superiora, erat. In tantis angustiis convocato senatu, plerique mutato consilio *mitendos ad Cinnam legatos* censebant, *de conditionibus pacis acturos.* *Nihil civili bello funestius: omnesque præ illo tolerabiles calamitates esse.* Optandum sane fuisse, postquam eo Deorum ira perventum esset, ut pars modestior vinceret: sed *adversus vim majorem resisti non posse.*

XI. *Omnia expertos, ut sibi atque urbi consulerent, nihil proficere: quin ipsis remediis morbum invalescere. Transitione*

§ VIII. Jul. Obseq. Plut. Liv. Epit. Oros. 5, 19. Appian. Dio-  
dor. ap. Vales. § IX. Liv. Epit. Appian.

militum & plebis auctas Cinnæ Mariique in immensum copias : & plures propemodum inde militare , quos ipsi , quam quos hostes , sacramento rogassent. Reliquorum etiam magnam partem , corpore apud ipsos , animo votoque cum adversariis agere. Non igitur dubitandum , quin mittendis legatis tentanda sit compositio. C. Marium , L. Cinnam , illum senectam suam & tot magnifica non ita clausurum ; hunc primo consulatu & maturitatem votorum , & summi loci dignitatem , non ita inchoaturum , ut ille gestis honoribus , hic speratis , indignus videri debeat.

XII. Quod si quis dissidere malit , & præfago animo futurorum malorum acerbiter enarrare : ei hoc fore cogitandum , neque illa evitari , hac quidem ratione , & provocari præterea plura posse. Non ita cum rebus humanis agi , ut quolibet tempore teneri queat tuta & periculorum expers via. plerumque de eo tantummodo deliberari , utro modo miseriarum sit futurum minus. Sane non esse inanem metum eorum , qui vehementiam Cinnæ , qui asperitatem Marii timeant. sed , ut omnia quam possint procedant pessime , in paucos forte experituram calamitatem : populum certe Romanum , urbemque in tuto fore.

XIII. Neque scire ipsos , qui hanc sententiam dicant , utrumne illorum sanguine satiare cupiditatem ultionis inimici velint : sed ita existimare , sibi subcunda potius extrema omnia esse , ut urbem servent , quam committendum , ut , suæ incolumitatis gratia , rempublicam inexplicabilibus malis involvisse dicantur. Mortem cuivis tolerandam esse : felices , qui ob patriam oppetierint , feliciores etiam , si antevertant avertantque populi cladem : cui , si trahatur obsidio , fame pereundum sit ; si pugnando vincat hostis , ferro. Quod si forte Cinnæ aut Marii suspecta quibusdam sit fides ; pactis obligari , & jurejurando posse. & ut sic quoque non omnia respondeant votis , mitiorem tamen sperari victorem posse , cui conditiones & preces , quam cui arma opposueris.

XIV. His atque talibus pauci , & præcipue Q. Metellus , obfistebant. *Vellem equidem* , inquit , aut civibus nostris modestia , aut senatui animus constitisset : nulla exstitissent civilia bella ; aut compressa in ipso exortu fuissent : neque nos no-

*va deliberationis egeremus. Sed quia pessimi quique omnia audent, boni omnia formidant: in hunc nimirum statum res pervenit, ut leges ab his cogamur accipere, quibus, si leges valerent, nullus esset consilendi tota Italia locus. Mihi sane etiam servari rempublicam, consuli civibus, parci vitæ tot millium, parci incolumitati placet. sed sera hæc est, postquam nulla nobis restat quæ servari respublica possit, deliberatio: & reliquiis ejus quemadmodum rectissime consulatur, ambiguum faciunt, qui placitam nuper sententiam, ob duriores quosdam eventus mutaverunt.*

XV. *Dudum enim concors senatus censuit, contra vim fugitivorum & exsulum, armis defendi rempublicam oportere. nunc eandem illam sententiam damnant plerique, qui tulerunt; dum legatos mitti jubent, & velut cum justis hostibus de pace agi. Sed id quidem sine maximo tum pudore, tum etiam incommodo, fieri a nobis nequit. Sic enim omnia tot mensum decreta una opera rescindimus: & paucorum exsulum potentiæ cedere senatus majestatem patimur; eoque & malorum confirmamus audaciam, & bonos exarmamus, pauloque minus quam victos tradimus inimicis.*

XVI. *Qui enim hætenus omnia pro communi salute promte eniseque fecerunt, quique facturi fuerunt postea: ii, Patrum timore perspecto, semel concident animis; & fortasse non expectatio, donec in commune transigatur, sibi quisque propitios celeri obsequio efficere velit, quos paulo post habendos sibi dominos intellexerit. Atque ipsa illæ transfugia, quibus concussi quorundam animi contremiscunt, ab hac dubitatione magis, quam ab ulla alia causa profecta sunt; mansuris in fide plerisque, si, quanto conatu oppugnari rempublicam vident, tanto consensu defenderetur. Contra famem multa remedia excogitavit necessitas: conferendo in publicum, quod privatim quisque continet, dimittendo frumentum, emittenda inutili turba, sæpe quæsitæ repertaque est avertendi extremum exitium opportunitas.*

XVII. *Denique hoc ipsum Capitolium teneri contra Gallos nequivisset, si tam mollis adversus famem illa ætate fuisset Romana juvenus. Sed nunc, ajunt, non est res cum Gallis: Ma-*

rius & Cinna ante portas sunt, & ceteri, qui videlicet Romano sanguine orti, pietatem patriæ præstabunt, civibus veniam, patris fidem. Hei mihi, quam celeriter pœnitebit vos hujus opinionis, simulatque horum in potestate corpora vestra, conjugumque & liberorum erunt! Neque mihi hæc ignorare, aut contemnere videmini, sed tædio præsentium quidlibet malle. Sed hoc parvi infirmique animi argumentum est, neque ferre valentis, quæ ad sunt, neque duraturi in iis, quæ elegerit.

XVIII. Quibus autem forte decretum est, omnia pro patriâ pati; pro hoc opes fortunaſque suas, pro hoc spiritum atque vitam profundere: rectius cum ad utilitatem præsentium, tum ad famam posteritatis facient, si potius in tuenda civitate dignam viris mortem obeant, quam si, deserta traditaque, tyrannorum arbitrio aut cum cruciatu intereant, aut cum ignominia vivant. Magna vis est ad audenda quælibet, etiam singulis & contemtiis hominibus, si semel cupiditatem abjecerint vitæ: multos atque egregios viros, quibus ea ratio: fuerit, ne designata exsequantur, vix ulla potentia fatis arceat.

XIX. Omitto Scævolas, & Coclites, & Curtios, & tot decoræ nomina, quæ liberis vestris inculcare soletis, ut horum exemplo amare patriam discant: meminimus eorum, quæ vidimus ipsi, multas sæpe urbes, cum ad extremum necessitatis venissent, constantia defensorum servatas: alias, cum servari potuissent, molitie civium deditas, tristissima quæque passas esse. Sunt nobis adhuc militum fortissimorum fidelissimorumque haud spernendæ copiae: est melior hæc, & amantior patriæ pars populi: arma, machinæque supersunt: urbs diligentia consulum, quoad fieri potuit, munita est.

XX. His rebus non desperem tamdiu resisti hostibus posse, donec fortuna aperiat meliori spei locum. Multa, cum desperata pro insanabilibus essent, subito aliquo casu commodiorem in statum reducta sunt. Aliqua inter duces factionis oborta suspicio, res apud pravos & æmulos vulgata, mutabit omnia. ipsum urbis periculum irrovabit multos, ut misereri, & succurrere velint: & sunt egregia cum alii populi, tum qui Cisalpinam Galliam colunt, in rem Romanam fide. summusque noster pudor foret, si

*diutius illos Ariminum, quam Cinnam & Marium, defendentibus nobis, Roma moretur.*

XXI. *Si nulla spes sit alia, Sullam revocemus: aut si hæc quoque intolerabilis mora videatur; ipsi potius concedamus novis civibus, quod petunt. Ubi senatum populumque habebunt hujus beneficii auctores, Cinnam & ceteros ejusdem sortis non ultra morabuntur.* Frustra hæc in tanto plurium metu dicebantur. Idcirco cum legatio decerneretur, Q. Metellus, urbis salute desperata, ut melioribus se temporibus servaret, in Ligures primum, deinde ex Liguribus in Africam est profectus.

XXII. Legatos, priusquam inciperent fari, L. Cinna interrogavit, *ad consulemne, an vero ad privatum venirent?* Hærentibus illis, deinde ad consulendum senatum in urbem reversis, magna etiam ingeniorum civium multitudo ad Cinnam se contulit: multi famem veriti; pars major jam ante illis partibus addicta, & ad nudandos animos opportuna tempora captans. Inde mirifice confirmatus animo Cinna, sub ipsis mœnibus Romæ extra jactum teli confedit. nec enim Octavius objicere sese audebat, transfugiis & legationibus omne homini consilium, omnemque propemodum mentem eripientibus. Senatui non plus animorum, quam Octavio, supererat. Cinnam pro consule habere, id vero erat exauctorare Merulam, quem sanctissimo sacerdotio præditum, sine ulla sua culpa, juxta partis honoribus exui triste; contra, Cinnæ non obsequi exitiosum habebatur.

XXIII. Ut rebus trepidis solet, utilibus honesta cessarent: & L. Merula consul, egregii civis officio functus, verbis in senatu, deinde ad populum factis, *Ego vero, inquit, si præter hos fasces nihil impedimento paci est, paratus vobis dux & auctor ad concordiam ero. quod igitur senatui populoque Romano bene vertat, consulatum, quem invitatus accepi, lubens ecce depono.* Post abdicatum a Merula magistratum,

§ XXI. Plut. in Mar. c. 7. Liv. Epit. Appian.

*T. Liv. Vol. IX.*

**L**

legati ad Cinnam, tanquam consulem, remissi sunt. neque multa iis mandata dari tempestivum fuit. id unum Cinna, *ut cædibus temperaturum juraret*, rogabatur. Ille jurare per superbiam abnuit, *se tamen volentem negavit cuiquam mortis causam fore*.

XXIV. Octavium etiam, qui circumita urbe per aliam portam erat ingressus, moneri jussit, *abstineret publico, ne quid ei se invito accideret*. Hæc de loco superiore, tanquam consul, legatis respondit. Ad curulem ejus Marius adstabat tacitus; sed eo vultu, ut nihil aliud quam vindictam & cædes meditari appareret. Neque multum intercessit moræ, quin senatus verbis *Cinna atque Marius in urbem venire* rogarentur. Marium enim diserte addiderant, non ignari, Cinnæ quidem nomen his factis obtendi; ceterum potissimum eorum auctorem Marium esse.

XXV. Cum ad urbem ventum, & Cinna cum satellitibus ingressus esset; Marius substitit ad portam, &, acerbum subridens, *exsulibus patere aditum* negavit. Idcirco Cinna operam dante, lex de restituendis exsulibus statim referri cœpit. neque ultra expectatum, quam ut tres aut quatuor tribus suffragia ferrent. tum irrupit in urbem velut captam, fugitivorumque delectum agmen trahens, quos *Marianos* appellabat, cædibus atque rapinis omnia vastavit. aliis quoque portis exercitus inundabant urbem: iisque mox oclusis, adversariorum, & sub hoc nomine, quorumcunque volebant, domos diripiebant.

XXVI. Jam antequam in urbem Marius irrumperet, Cn. Octavius sublatu e medio fuerat. Amicis fugam suadentibus, sive Marii Cinnæque juratis promissis fidens, sive potius haruspicum ludibriis retentus, quam in vanitatem proclivi credulitate agebat, in Janiculum cum aliquot illustribus viris & parte copiarum concessit. *Indignum enim atque turpe facinus* ajebat *se commissurum esse, si patriam consulari imperio præditus desereret*. Igitur illa sella curuli, ma-

§ XVIII. Diodor. ap. Valef. Vellej. 2, 22. Appian. Plut.  
§ XXIV. Vellej. Plut. Diodor. Appian.

gistratus insignia retinentem, adstantibus juxta lictoribus, Cinnæ jussu præmissus cum equitibus Cenforinus invasit. Ibi quoque hortati ad fugam amici equum obtulerant; ille, ne surgere quidem dignatus, necem in ipsa curuli expectavit.

XXVII. In sinu interemti tabellas repertas esse cum signis Chaldæorum ferunt, illustri ad coarguenda artis inania documento. Caput cervicibus abscissum Cenforinus ad Cinnam attulit, a quo missum in Rostra est, ut, quo loco caput spectatum P. Sulpicii foret, proponeretur. Tum deum revelli terra caput potuisse, quod nulla apparente causa ex simulacro Apollinis abruptum diu ante fuerat, ferunt: expleto scilicet eventu prodigii, quod *ad suum exitium pertinere* Octavius ipse prædixerat.

XXVIII. Consultatio deinde ducum tenuit, *quemadmodum victoria uterentur, pacemque firmarent*. Pro suo quisque ingenio censebat: sed nemo vel lenitate Q. Sertorium, vel sævitia C. Marium adæquabat. Sed ille nec auctoritate par erat Mario, &, quidquid dicere poterat, jam a Mario cum assensu ceterorum videbat occupatum. Nam rogatus sententiam Marius, ut erat inter iram toleratæ fortunæ, & lætitiæ emendatæ, parum animi compos, ita cœpit:

XXIX. *Siquidem ea de re deliberatis, L. Cinna consul, ceterique senatores, legati & præfecti, quemadmodum in præsentia, quod vultis, obtineatis, mea sententia res non indiget. Nam acerbissimi paulo ante inimici vestri, ultro vobis reditum in patriam, reditum ad honores, ad facultates, principem in civitate locum, legum, de quibus decertatum est, lationem, & alia hoc genus liberaliter offerunt. Sin vero, non quid illi vobis offerant, intuemini, sed hoc potius, quemadmodum ad ea, quæ cupiatis obtinere, nihil sit illorum consensu aut beneficio opus; magnopere interesse arbitror, ut, quæ me hujus reipublicæ non rudem, sed ætate ac usu inter primos, res ipsæ docuerunt, hoc tempore non dissimulem.*

§ XXVI. Vellej. Plut. Flor. 3, 21. Val. Max. 8, 1. Jul. Obseq.  
§ XXVII. Diodor. l. 38.

XXX. Jam olim in civitate nostra duæ velut partes fuerunt: altera Patrum, qui nescio cur optimates vocentur; altera libertatis, quæ, quia multitudini præcipue grata esse debuit, non abs re popularis est nominata. Neque nos hujus discordiæ auctores sumus, sed, simulatque regum ex urbe submota potestas est, senatus jura regia sibi vindicare voluit. plebs, quam in regibus non tulisset dominationem, eam ab aliis civibus pati, indignum intolerandumque judicavit. Ab eo tempore, quidquid per leges aut armatas quandoque discordias actum est, id omne eo pertinuit, ut vel in multitudinem dominari pauci cuperent; vel adversus cupiditatem paucorum, jus suum populus assereret.

XXXI. Inter hæc quandoque præstantes virtute ac meritis viri exstiterunt, qui ex æquo invidiam nobilitatis, & levitatem populi odissent: ii, tanquam solliciti cantique gubernatores, inter pugnantes ventos ita direxerunt vela, ut quam minima jactatione & offensa, ac fieri per tempora reipublicæ posset, tranquillitatis atque securitatis portum obtinerent. Sed & ipsi illi, quoties destinatis, qua institerant via, potiri posse desperarunt, indignatione & odio efferati, quod effici persuasione ac moribus nequibat, vi & armis assequi tentaverunt.

XXXII. Ab his velut fontibus, tanta jam ætate, prorupit immensa vis undarum atque fluctuum, quæ rempublicam, toties crudelissimis tempestatibus vexatam, in eum statum redegerunt, quem inviti gementesque videmus. Sed nimirum, quemadmodum in humanis corporibus, quoties tentata morbo sunt, optare quidlibet licet; fieri, nisi quod natura patiat, non potest: ita in hac gravissima civitatis ægitudine, non qualibus quis malit, sed quæ sunt ad præsentem usum accommodatissima remedia, iis utendum est.

XXXIII. Etiam medici devenire ad ferrum & ignem solent, ubi leniora remedia pertinax morbus respuit: neque scævitia ad urendum secandumque, sed misericordia hominis, & servandæ eum proposito votoque, adducuntur. Idem ego hoc tempore sequendum nobis exemplum autumo, quibus in periculosissimo civitatis morbo, de idonea medicatione deliberandum est. Sane, si



esset aliqua medendi suavior ratio, illam potius adhibendam esse dicerem : sed quia mihi compertum est, hoc genus morbos non emendari timida curatione, sed augeri solere ; nemo mirabitur, si, quod in corpore meo salubriter expertus sum, idem in republica tentandum arbitror.

XXXIV. Cum molesti mihi varices essent, exsecandos præbui. non aberat acutissimi doloris sensus ; sed tanti esse valetudinem arbitrabar. Sunt etiam, credite mihi, sunt in præsentia quidam velut reipublicæ varices, quos etiam cum dolore quodam corporis excidi, ad sanitatem profuerit. Neque hic mihi clementiam aliquis, aut misericordiam nominet. Sæpe is animus ægris est, ut interire morbo, quam liberari cum aliqua molestia malint : his qui parcendo nocet, quam qui offendendo consultat, crudelior est.

XXXV. Præterea summæ dementia res esset, eos incolumes pati, quibus mox, si forte iterum convalescant, dandum jugulum fuerit. Parcamus sane Sullanis hominibus, si illi Gratio, si Sulpicio, si nostrorum cuiquam pepercerunt. Nam illi quidem atque alii multi crudeliter interfelli sunt ; nos beneficio fugæ prius, nunc virtute nostra & armorum tutela, vivimus : carituri vita, simul his carere cœpissimus. Quemadmodum igitur amentem potius, quam misericordem, vocaremus, qui feram bestiam, cum occupare telo posset, abstinere istu, mox ab ea devorandus : ita nulla posset existere satis acerba nostræ stultitiæ accusatio, si vivere sineremus eos, a quibus toties petiti ad necem sumus : ut sint videlicet, qui nos nostrosque & has omnino partes funditus tollant.

XXXVI. Ut enim semel explicate dicam, quod res est : decutienda sunt Sullanarum partium capita. non nisi his remotis, stabiles nostræ in rempublicam opes erunt. Quin & illud addidero : tamen si nostram causam, quod abominor, oderint Dii, atque omnia nobis acerba atque funesta efficiant ; tamen, si maturatione de inimicis nostris ultionem sumserimus, hanc nobis voluntatem, hanc felicitatem non poterunt eripere. Mihi sane, ut

*me vobis indicem, morti similis vita videbitur, si eadem luce fruentem aspiciam Catulum, beneficii, quo servatus est, perpetuum obtestatorem: si Caesarum, si Crassorum odiis vicem nequeam reponere: si Metellos tolerare diutius, & Antonios cogar.*

XXXVII. *Sed neque vos, opinor, licet mitiorem aliquis animum sinulet, inimicos vestros vivere, atque adeo valere patienter feretis. nisi forte collegam tuum lubenter amplecteris, Cinna consul, a quo multa tuorum occisa millia, te expulsam urbe, omni deinceps contumelia vexatum meministi. Quid si L. Murela tibi occurret, tertius hujus anni consul, cujus nomen non alia, quam per summam injuriam tuam, irrepere in fastos potuisset? Ceteri vero perquam tibi jucundi sunt futuri, quorum hæc omnia decreta sententiis, peracta voluntate, opibus animisque defensa novimus.*

XXXVIII. *Quod si quis forte ab hac ratione dissentiat, cum primum adhortor, ut, priusquam obloquatur, maturius secum dicta mea perpendat: deinde, siquidem perstare in sententia velit, commonefacio, ita temperet, ut tamen amicior nobis, quam hostibus, esse videatur. Cum ita Marius dixisset, & plerisque eadem crudelitas esset, alios auctoritas illius, & horum inclinatio deterreret; huc concursum, pactorumque & jurisjurandi neglecta fide, multi insignes viri necati, & capita, velut jam recepto more, posita in Rostris sunt.*

XXXIX. *In his C. Atilius Serranus vir consularis, & P. Lentulus fuerunt. C. Cæsar Strabo hospitis Hetrusci scelere proditus, in penetibus suis trucidatus est; M. Bæbius sine ferro manibus, ferarum more discerptus, deinde cum C. Numitorio per medium forum uncis carnificum raptatus est. M. Antonium consularem villicus in prædio suo celabat. sed simplicitate fervi, & scelere cauponis res est prodita, cum a tenuis fortunæ homine, generosius vinum, & solito crebrius, emeretur. Marium epulis accumbentem detecti Antonii indicio sic exultasse ferunt, ut, cla-*

§ XXXVIII. Appian. civ. l. 1. Cic. de Orat. 3, 3. Val. Max. 5, 3. Flor. 3, 21. Plut. in Mar. c. 74.

more edito, manibusque complois, ipse profecturus ad necandum fuerit, nisi foret ab amicis cohibitus.

XL. Missi cum P. Annio tribuno milites, cum ad Antonium venissent, sic hominis eloquentia veluti constricti stetisse dicuntur, ut post longam expectationem ascendens ad visendum tribunus, intactum adhuc repererit, coactusque fuerit ipse commodare Marianæ scivitiæ manum. Caput Antonii relatum ad Marium, & in ipsis mensis appositum est: nec ipse abstinuit, quin suis manibus avide tractaret, Anniumque, recenti sanguine inadentem, in sinum suum reciperet. Ejusdem imperio L. Cæsar, qui consulatū & censuram gesserat, apud seditiosissimi & vilissimi hominis Q. Varii bustum, a C. Finibria, crudelissimo Cinnae satellite, tanquam piacularis hostia immolatus est.

XLI. Duo Crassi, cum in fuga essent, ab equitibus Fimbriae sunt occupati. filium in conspectu patris equites interemerunt: pater, ne quid indignum sua virtute pateretur, sua se manu interfecit. Capita omnium pro Rostris sunt proposita, ut haud minus acerbitalis ostentatio cædium haberet, quam patratio habuisset: cum in foro Romano locus tota urbe celeberrimus, quem hostilium navium spoliis majores adornaverant, clarissimorum virorum capitibus, tanquam ornamenti causa dispositis, oppletus videretur.

XLII. Marius præcipue furebat, & Cinna jam ferme fatiato, etiam, quos ipse noverat inimicos, interfectis, nec dum poterat quiescere. jubebatque promiscue omnes ad se adeuntes occidi, quibus ipse manum non porrexisset. inter quos & Q. Ancharius vir prætorius, cum sacrificantem in Capitolio Marium adivisset, ut religionis veneratione propitium haberet, ante oculos tyranni in ipsa æde confossus est. Quinque dies continuos, totidemque noctes ista scelerum omnium duravit licentia. neque cadavera se-

§ XXXIX. Vellej. 2, 22. Plut. Flor. Val. Max. 9, 2. Liv. Epit.  
§ XL. Auctor de Vir. ill. c. 70. Appian. Liv. Epit. Cic. pro Sexto  
c. 21. & pro Scaur. Diodor. ap. Vales.

peliri permissum erat, & in liberos conjugefque interfecto-  
rum indigna, maxime a servis, perpetrabantur.

XLIII. Neque ipsi inter se cædibus atque rapinis sedi-  
tiosi abstinebant. Inter hæc publicationes bonorum assiduæ  
erant, & magistratuum coacta abdicatio; Sullanarumque  
eversio legum, & amicorum ejus, quotquot corripì potue-  
rant, internecio. Metella quoque uxor cum liberis Sullæ  
vix effugerunt periculum, cum domus ejus atque villæ  
incendio delerentur. Hoc tempore mirifica sane populi  
Romani abstinentia fuit. Cum enim occisorum domos præ-  
dæ multitudinis exposuissent victores, negant *inveniri quem-*  
*quam paulo honestiorem civium potuisse, qui ullam ex his rem*  
*cuperet attingere.*

XLIV. Post tot mala, tanquam eo rerum statu legibus  
in civitate esset locus, L. Merula, & Q. Catulus, suborna-  
tis accusatoribus, rei fiunt. Merulam propter ablatum, li-  
cet nullo ambitu, honorem Cinna oderat; Q. Catulo ira-  
tus erat Marius, quasi Cimbrico bello servatus, malam pro  
beneficio gratiam retulisset, exsilii sui acerrimus auctor.  
Sed ludibrium illud judiciorum ambo dedignati, sponta-  
nea morte functi sunt. Merula, deposito apice, (quod api-  
catum flaminem mori triste & inauspicatum urbi habe-  
batur) idque se fecisse scripto testatus, in ipso Jovis sa-  
crario incidit venas, porrectoque super altaria sanguine,  
Cinnanæ partes consecravit. quo in homine propemodum  
ipsa sacerdotii religio extincta est; cum in locum ejus ne-  
mo factus flamen septem & septuaginta annis reperiat.

XLV. Nam C. Cæsar, annum agens septimum decimum,  
a Mario Cinnaque destinatus, victoria Sullæ sacerdotium  
amisit. Pro Catulo deprecari Marium necessarii, ne inco-  
lunitatem quidem, sed exsilium orantes, nullam ab sæ-  
vissimo mortalium exprimere vocem potuerunt, præter

§ XLII. Appian. Diodor. Plut. in Sertor. c. 7. § XLIII. Plut.  
in Sull. c. 64. Val. Max. Ammian. 30, 28. Appian. § XLIV.  
Val. Max. 9, 12. Flor. Vellej. Diodor. 54, 11. Ruald. in Plut.  
Animadv.

hanc sæpe repetitam, *moriatur*. Igitur inclusus loco, qui nuper calce fuerat oblitus, multum inferri ignem iussit; atque ita suffocato spiritu, extinctus est. Inter hæc misertus patræ & civium Q. Sertorius, qui solus inter ceterorum furorem omni maleficio abstinuisse fertur, damnata Marii sævitia, privatim appellavit Cinnam, & miseriarum urbis postulavit modum: servosque Marianos, cum a Cinna sæpius cohibiti, nihil de sceleribus remitterent, acceptis ab eo Gallorum auxiliis, eodem loco castra habentes noctu circumdedit, & ad unum omnes, hominum non minus octo millia, delevit.

XLVI. Sic anno magistratus exacto, Cinna consules in annum sequentem, se iterum, C. Marium septimum, citra ulla comitia renuntiavit: spei de septem consulatibus eventu meliore, quam sperandi causa fuerat. Hujus anni triste & minax exordium, cetera paulo quietiora tempora exceperunt. Sed eodem die, quo novi consules inierunt, cum maxime sacra in auspicio anni & magistratuum patrio more fierent; C. Marius filius tribunorum plebis quendam sua manu occidit, caputque consulibus misit, duobus prætoribus igni & aqua interdictum est: Sex. Licinius fenator de saxo Tarpejo consulis Marii jussu præcipitatus.

XLVII. Sed efferam hominis immanitatem Idus Januariæ finierunt. Laboribus & senio exhaustum, præsertim fama de Sulla exterruisse dicitur, quem, finito bello Mithridatico, adesse victorem, & amissorum vindicem audiverat. adeoque hoc est creditum, ut a quibusdam voluntaria morte sublatus existimetur. Certe cum amicis de adventu Sullæ, deque fortunæ vicissitudine multa differuisse dicitur: & negasse, *sapientis videri, toties expertæ illius inconstantie se committere*. Hinc in morbum cum incidisset, & ex morbo in delirium, summa hominum lætitia ad inferos, quo infinitam ante se mortalium vim præmiserat, descendit.

§ XLV. Sueton. Cæs. c. 1. Vellej. 2, 43. Cic. Tusc. quæst. 5, 19. & de orat. Diodor. l. 38. Plut. in Sertor. c. 7. & in Mar. Appian. Oros. Liv. Epit. § XLVII. Cic. in Brut. c. 90. Liv. Epit. Diodor. ap. Vales. Auctor de Vir. ill.

XLVIII. Vir, cujus si examinentur cum virtutibus vitia, haud facile dixeris, utrum bello melior, an pace perniciosior fuerit. quamquam & bello pestilens, quam rempublicam armis & consiliis servaverat, eandem in pace aliis consiliis, & mox inter bella civilia iisdem armis hostiliter oppressit. Ceterum ut sanguinarii hominis ne funus quidem sine dolore civitatis atque luctu principum esset; C. Fimbria, homo perditæ audax, Q. Scævola mandavit occidi. compertoque deinde, sic esse vulneratum, ut vivere possit, diem ei dixit. ac interrogatus, *ecquid igitur integerrimo sanctissimoque viro esset objecturus?* Hoc ipsum, inquit, quod ferrum maligne recepit.

§ XLVIII. Cic. pro Sext. Rosc. c. 12. Val. Max. 9, 11.

---

JOANNIS FREINSHEMII  
SUPPLEMENTORUM  
LIVIANORUM

LIBER XLVI.

IN LOCUM LIB. LXXXI LIVIANI.

---

E P I T O M E

LIBRI OCTOGESIMI PRIMI.

*L. Sulla Athenas, quas Archelaus, præfectus Mithridatis, occuparat, circumfedit, & cum magno labore expugnavit. urbi libertatem, & civibus, quæ habuerant, reddidit. Magnesia, quæ sola in Asia civitas in fide manserat, summa virtute adversus Mithridatem defensa est. Præterea Thracum in Macedonia continet gesta.*

**E**XPOSITIS Romanæ urbis calamitatibus, ad Mithridaticum bellum, & res interim a L. Sulla gestas, revertendum est. Sulla quinque legiones cum auxiliariis aliquot cohortibus & equitum alis in Græciam transvexerat. Deinde, collectis ex Ætolia Thessaliaque comitatibus & auxiliis, postquam satis instructus esse visus est, in Atticam adversus Archelaum ducere instituerat. Per Bœotiam erat iter, cujus pleramque partem per legatos recepit: eadem levitate animorum deficientibus a Mithridate civi-

tatibus, quam paulo ante ad Mithridatem a Romanis deſciverant.

II. Quo in genere Thebani, ſicut urbis magnitudine & gloria caput Bœotiæ habebantur, ita præcipuæ ad mutandos focios inſtantia documenta dederunt. Sed metum & imbecillitatem ſuam allegabant, *quod omnibus circa ad regias partes tranſeuntibus, reſiſtere tantæ potentia nequiviſſent, quam neque reges maximis exercitibus inſtructi, neque Aſia Græciæque auxiliis ſubniſi Romanorum duces ſuſtinuiſſent. Modicas civitati ſuæ vires fuiſſe, etiam proſperrimis temporibus. tum vero præter antiquiora, bello Achaico ſic eſſe debilitatam, ut vix recuperare ſexaginta illis annis, tenuem priſtinæ dignitatis ſpeciem potuerit.*

III. Proinde magnopere a L. Sulla contendere, ut non tam deſectionem ſuam, quam deſcendi cauſas reſpiciat. & ſiquidem ſtudio ſit a ſe ac voluntate peccatum, puniat noxios: ſin vero invitos cognoverit a ſocietate Romana diſceſſiſſe, det neceſſitati veniam, cui ignoſcere omnes ſoleant. Plane eum his temporibus fuiſſe Italiæ & urbis ſtatum, ut inde neque imperator tantus, neque exercitus ſperari potuerit. Majorum ſuorum in populum Romanum frequentiora delictis exſtare merita: ſe quoque ſemper ejus populi majeſtatem fide optima coluiſſe; porroque daturos operam, ut eniſe faciant omnia, quæ poſſint a ſe in tam exigua fortuna proficiſci.

IV. Neque ſibi latiore diem ullum fuiſſe, quam quo data Romani imperatoris ſit copia. ſubeſſe quidem metum, ne forte ſua rejiciatur purgatio: ſed ſpem tamen majorem, fore, ut pro nomine Romani & ſua clementia, placatum ſe propitiumque deprecantibus Sulla exhibeat. At ille, cum pro tempore pauca reſpondiſſet, in Atticam contendit. Ibi pugna cum hoſtibus commiſſa, poſtquam Ariſtionem in urbem, Archelaum intra Piræei munimenta compulit, parte copiarum ad obſidendam cum Ariſtione urbem miſſa, ipſe Piræeum ſibi



oppugnandum fuisse, ubi regii cum prætore suo mœnibus a Pericle olim structis se incluserant.

V. Bello enim Peloponnesiaco, Pericles in munitionibus Piræi spe victoriæ collocata, murum ex quadrato lapide ingentis magnitudinis, ad altitudinem cubitorum quadraginta circumduxerat. Nec dubitabatur, superiorem utique urbem vel sedendo expugnari posse, quod magna rerum necessariorum penuria inerat. Sed frequentes Roma de novis rebus nuntii, festinare potius cum periculo, quam cum multa temporis jactura tuto vincere, cgebant.

VI. Igitur scalis ad Piræum admotis, magna vi conatus est perrumpere: donec omnia nequidquam expertus (nec enim segnius se regii defendebant) ad compingendas omne genus machinas Eleusinem & Megara concessit. operibus enim oppugnare Piræum cogitabat. eum in usum artifices, ferrumque, & catapultæ, aliusque apparatus, decem millibus mulorum jugis, ex urbe Thebana advehantur: donec inopia materiæ (multa enim opera corrupta & incensa ab hostibus, aut suo pondere procumbentia peribant) facris quoque lucis injecit manum, & Academiam, nobilissimum orbis terrarum gymnasium, quo non erat alius in suburbanis nemorosior locus, proximumque fama & amœnitate Lycæum, arboribus nudavit.

VII. Longi etiam muri, qui ad urbem Atheniensem a portu pertinebant, subruti, faxa trabesque struendis aggeribus præbuerunt. Forte miles cæspitem ferens, fulmine exanimatus prociderat: ob eam rem consultus haruspex, *quod percussus in opere miles, caputque jacentis in oppidum versum esset, introitum & victoriam respondit Romanis, sed non nisi post diuturnum laborem significari.* Has inter moras & sumtus obsidionis, cum rei nummariæ difficultas incessisset, L. Sulla sacros Græciæ thesauros in promiscuum pe-

§ IV. Pausan. l. 1. Plut. Appian. § V. Appian. Plut. Diodor. ap. Vales. § VI. Sulpic. ap. Cic. fam. 4, 12. Plut. Appian. Jul. Obseq. Pausan. l. 9.

cuniæ usum vertit, Olympia & Epidauro jussis advehi pulcherrimis pretiosissimisque donariis.

VIII. Delphos quoque Caphis nomine missus est, natione Phocensis, ut ab Amphyctionibus ornamenta templi acciperet. nam aut tutius apud se fore illa scripserat; aut, si absunta essent, non deteriora redditurum. Caphis cum venisset Delphos, auditum ex adytis citharæ sonum scripsit Sullæ: accepitque responsum, gaudentis, non indignantis esse cantum. ageret igitur, & numine propitio sacrum aurum argentumque ad se deportare ne dubitaret. Postea quoque per jocum dictitasse ferunt, dubitare se non posse de victoriâ, qui Deorum stipendio militaret.

IX. Erat inter regum donaria dolium argenteum, ea mole ac pondere, ut extrahi jumentis nequiret. id concidere coacti Amphyctiones, statum Græciæ, & mutatos interdeterius dominos miserabantur. olim T. Quintium & L. Æmilium, Romanos duces, itemque Man. Glabionem, illos Macedonum regibus, hunc Antiocho devictis, ultro honorem opesque delubrorum auxisse. nunc lapsis in pejus moribus, postquam inimicos quacunque re superare principes Romani studeant, largitionibus ad perfidiam luxumque corrumpi milites, hisque obnoxium imperatorem, vilissimo teterrimoque hominum generi servire, quo optimis quibusque nobilissimisque dominetur.

X. Ceterum Sulla, neglectis Græculorum querelis, ad quæstorem L. Lucillum sacros thesauros misit, cui eundem in Peloponneso monetæ negotium imposuerat: ipse redigendis in potestatem Athenis omnem animi cogitationem intendebat. Gloriosam victoriam vetus urbis factura fama erat; utilem, locorum ad omnia opportunitas. super hæc Aristionis vecordia stimulabatur, importunissimi & improbissimi scurræ, qui continentibus dictis in ipsum, aut Metellam, quæ impuditiæ arguebatur, iracundum animum mira vindictæ cupiditate inflammabat.

XI. Ceterum urbem fame urgere satis visum. Piræeum

§ VIII. Diodor. ap. Valef. Plut. in Lucull. c. 3. § X. Plut. in Sull. Hieron. in Jovin. 1, 56. Flor. 3, 5. Appian. Mithrid.

spes nulla capiendi, nisi per arma, supererat. Sed hæc tamen prodicione juvabantur. duo servi Attici, quidquid in oppido fiebat, glandibus plumbeis inscribebant. eas deinde glandes fundis ejaculabantur ad Romanos. Id ubi sæpius fieri ad Sullam relatum; ille, re considerata, cum semper eventum respondere nuntiatis comperisset, *diligenter colligi glandes emissas, & ad se referri*, iussit. Unde cum aliquando decretam in certum tempus eruptionem didicisset, insidias erupturis struxit; multisque interfectis, aliis in mare compulsis, magnum obsessis detrimentum, & plus aliquanto terroris intulit.

XII. Crescebat interea indefesso labore militum agger, cum Archelaus ex diverso tures opposuit, unde cujusmodi missilia late spargerentur. accitis deinde, quæ Chalcide & per reliquas insulas agebant, copiis, cum etiam remiges armasset, numero quidem militum longe superavit Sullam, cum etiam a principio majores aliquanto copias habuisset. idcirco minime ratus cunctandum, proxima post acceptum supplementum nocte, validam eruptionem in opera Romanorum fecit. Circa tertiam vigiliam, cum facibus improvisa turba exsiliens, alteram testudinum, & quidquid in ea machinarum stabat, incendit. neque potuit defendi. sed intra proximum decennium aliud excitatum eodem loco opus stetit.

XIII. Sulla, ignaviæ suorum iratus, cohortem & centuriones, quorum stationem hostis perruperat, *illam ignominie causa extra vallum tendere, hos galeatos & discinctos perscrutare in principiis*, iussit. Deinde ligneam turrin, quam contra suum aggerem Archelaus erexerat, modis omnibus incendere studens (plurimum enim impedimenti obsessis afferebat) submotis valida impressione propugnatoribus, ligna circumponi, faces subjici iussit. Ceterum conatus iste irritus fuit, non concipiente ignem materia, quod eam multo alumine Archelaus obleverat. Dum hæc aguntur,

missu Mithridatis Dromichaetes cum novis Thracum auxiliis affuit.

XIV. Archelaus igitur, pugnandi facturus copiam, aciem ita applicuit oppido, ut a mœnibus quoque adjici ad Romanos tela possent: alios deinde facibus armatos *intra portas signum erumpendi expectare* jussit. Prælio commisso, fugientes suos impigre obfistens Archelaus redire coegit in hostem: unde vicissim Romana acies pedem referre cœpit. Sed a Muræna cohibiti resisterunt: simul, qui lignatum exiverant, reversi; itemque alii, qui ignominiae causa seorsim tendebant, accurrerunt. horumque strenua opera factum est, ut regii, duobus militum millibus amissis, intra muros compellerentur.

XV. Archelaus, dum ad retinendos suos tota mente conversus, salutem suam negligit; oclusis jam oppidi portis, fune in mœnia subductus est. Sulla, ob egregiam operam laudatis militibus, demtaque iis, qui notati fuerant, ignominia, cum appetere hiemem videret, relictis ad opera præfidiis, castra ad Eleusinem movit. Equitabilis eo loco planities erat. & eo genere copiarum hostes abundabant. Igitur Sulla, ne eorum pateret incursionibus, fossam profundam a montibus ad mare ducere cœpit. hoc opus prohibitori hostes, quotidiana modo ad fossam, modo pro mœnibus Piræei certamina moverunt. abundabant enim multitudine, marique libero utentibus, & exponere suos ubi volebant, & recipere, & quocunque opportunum videretur, trajicere, in promptu erat: rerum quoque necessariarum copiam suis efficere, penuriam hostibus ex facili poterant.

XVI. Igitur Sulla, missis ad Rhodienses certis hominibus, classem arcessit. Quod ubi, regiis mare obtinentibus, parum procedebat, *L. Lucullum in Ægyptum & Africam proficisci ad corroganda a regibus & maritimis civitatibus navium auxilia* jussit, quibus instructus Rhodiorum classem

securius deduceret. Lucullus neque maris incerta, neque vim hostium veritus, hieme media cum paronibus Græcis tribus, totidemque Rhodiorum dicrotis solvit. Cretaque partibus adjuncta, Cyrenas transmisit. Erat tum pessimus Cyrenaicæ rei status, quæ post testamentum Apionis, magis sine rege, quam in libertate relicta, neque defensa ab Romanis, domi satis negotiorum habentibus, in seditiones & tyrannidem inciderat.

XVII. Cujus quam intolerabilis sævitia fuerit, ab uno documento intelligi potest: quod Nicocrates ad portas urbis custodes apposuit, qui mortuos, cum efferebantur, igne ac ferro admoto tentarent, ne quis simulatione mortis effugere tyrannidem posset. Ceterum illum ingens animi mulier Aretaphila, concitato in eum fratre tyranni Leandro, sustulerat; deinde ipsum etiam Leandrum, postquam finilem se gerebat ei, quem interemerat. Accesserant & finitimorum bella. igitur licet excisa tyrannide ad optimates respublica redisset, tamen nec auctoritas illis, nec concordia aderat; cum a recenti dominatione timidis necessario suspectus fieret, quisquis supra ceteros ingenium animumque habere credebatur.

XVIII. Cum his temporibus L. Lucullus supervenisset, velut divinitus missum pacis libertatisque instauratorem amplexi, *ut leges sibi ferret*, oraverunt, *quibus deinceps civitas regeretur*. Ille, recensitis veteribus legibus, maxime quas olim Ecdemus & Demophanes Megalopolitani rogatu Cyrenæorum tulerant, additisque ex præsentī usu aliis, rempublicam eorum belle composuit. Id ubi perfectum est negotium, eadem hieme in Ægyptum inde navigavit. In eo cursu plerisque navibus piratarum audacia depressis, aut captis; ipse incolumis & sospes Alexandriam pervenit, eximioque honore & magnificis a rege honoribus cultus est.

§ XVII. Plut. de virt. mulier. c. 34. Polyæn. Strat. l. 8.

§ XVIII. Plut. in Lucull.

XIX. Nam & quadruplum ejus, quod aliis hospitibus assignari consueverat, ei decretum est: & munera e talentis octoginta missa, quæ tamen ille non accepit. Ptolemæus tum iterum regnabat, *Lathuri* cognomento a ceteris distingui solitus: quem post fratris Alexandri necem, Alexandrini ad vetus regnum e Cypro revocaverant. Nam matrem Cleopatram Alexander, Alexandrum Ægyptii bello persecuti occiderant. Neque adhuc plane motus omnes extincti erant, quamquam Thebas, quæ defecerant, triennii bello recepisset Ptolemæus, adeoque redegisset humiles, ut vix memoria pristinarum opum, quibus nulla civitas copiosior fuit, relinqueretur.

XX. Igitur dum his in locis varia per impedimenta Lucullus detinetur, L. Sulla manum militum frumenta ex Piræeo Athenas portantium, cum ipsis sarcinis interceptit. prodita enim ea res glandium inscriptione fuerat. Eodem die ad Chalcidem cum Archelai fratre Neoptolemo feliciter dimicatum est. legatus L. Sullæ Munatius, mille quingentis militibus interfectis, aliquanto pluribus captis, duce quoque hostium fauciato, pretium operæ fecit. Parvo post tempore, cum sopitis custodibus mœnia Piræei negligenterentur, Romani milites, scalas machinis imponentes, in murum evaserunt, & quos primum objecerat casus, obruncarunt.

XXI. Excitato inter hæc tumultu, vigiles partim in opidum, quasi jam captis mœnibus, desilierunt: alii magnis animis certamine inito, hostes, occiso, qui eos ducebat, præcipites abegerunt. Hoc invitati successu regii, non contenti periculum repulisse, eruptionem fecerunt, quo loco altera Romanorum turris exædificata fuerat. incendiissentque, nisi, continuato per noctem diemque labore, Sulla, qui ex castris auxilio accurrerat, restitisset. Cum deinde aliam ex adverso turrim Archelaus struxisset, diu ex vici-

§ XIX. Euseb. Porphy. Pausan. § XX. Cic. Acad. Appian. Mithrid.

nīs paribusque munitionibus omni genere telorum certatum est: donec Sulla viginti simul plumbeos graves globos catapultis excuti iussit.

XXII. Horum impetu multi hostium occisi, & quod præcipue desideratum fuerat, labefactata turris Archelai, cum ruinam minitaretur, intra mœnia reducta est. Interea magis magisque gliscebant in urbe Athenarum fames. nam frumenti quidem parum inerat; & tyrannus chœnices hordei in quatrimum, gallinarum verius, quam hominum, dimensum dividebat. Sed hac necessitate Atheniensium cognita, licet cunctanter, de integro tamen Archelaus delectos cum cibariis misit. & quia prodi consilia sua animadvertat, eodem tempore circum portas validam opperiri manum iussit, ut, Sulla in frumentatoribus capiundis occupato, cum facibus ad incendenda Romanorum opera profilirent.

XXIII. Utrisque pro spe expeditio fuit: Sulla commeatum portantes excepit; Archelaus aliquot machinas corripit incendio. Circa eadem tempora filius Mithridatis Archathias cum alio exercitu in Macedoniam irrumpens, Romanorum modicas copias haud ægre expulit; omnemque Macedoniam in præfecturas divisam, idoneis hominibus distribuit. Deinde magno cum apparatu contra Sullam profectus, haudquaquam parem spei eventum habuit, circa Tidæum morbo extinctus.

XXIV. Tanto minore molestia Romanus imperator cœpta perurgens, Athenas, ut omnem non modo commeatum, sed etiam fugam interciperet, castellis circumdedit: quo plures in exhausta urbe clauderentur, eo celeriore ex fame dedicionem sperans. Ad Piræum vim adhibere consultius visum;eductisque in iustam altitudinem aggeribus, machinæ impositæ. At Archelaus, terra clam egesta, exinabat opus, donec subsidente mole prodita res est; deductisque machinis, Romani aggerem repleverunt. Deinde

contra cuniculos Archelai aliis effossis cuniculis, & sub ipsa moenia productis, sæpe sub terra inter fossiles, ut forte sibi occurrerant, hastis gladiisque pugnatum est.

XXV. Hæc dum ita fiunt, Romanus, multis ab aggere machinis admotis, muros ariete quatiebat. neque ante desitum, quam parte muri dejecta, proxima turris contento militum labore incenderetur, inque ipso, quem ceperant, muro præsidium statueretur. Simul cunicularii, suspensa trabibus moenia, pice, stipula atque sulphure multo affusis, & igne subiecto, concremarunt. Ibi cum alia post aliam pars murorum arderet, & superstantes gravi ruina opprimerentur, etiam qui longius a periculo aberant, commilitonum interitu territi, despondere animos cœperunt.

XXVI. Summa enim contentione a Romanis pugnabatur: cum Sulla, fessis integros submittens, *hunc unum restare laborem* clamitaret; neque reliquum quidquam faceret, quo minus promissis, imperio, minis, modo hos, modo illos ad spernenda pericula, murosque vi transcendendos incitaret. Neque minus animorum, aut industriæ Archelao supererat, percussis atque faucis, corpore atque animo recentes subinde iubenti succedere; donec fatigatos iniquo prælio milites Sulla miseratus, receptui cecinit: cum ejus diei fortuna pari inter se robore præliatos, etiam detrimento amissorum utrinque militum æquavisset.

XXVII. Archelaus, ne noctem quidem suis quietam abire passus, reparandis moenium ruinis operam dedit: intra murum multas exstruxit munitiones, in lunæ speciem sinuata fronte, quo pluribus ex partibus in hostem missilia jacerentur. Eas, dum adhuc recens labor facilius machinis cederet, magna vi oppugnare Sulla cœpit. sed undique telis expositus, cum multos occidi vulnerarique cerneret, abjecta spe capiendi per vim oppidi, ut commeatum inopia cogeret ad deditionem obsessos, de reliquo abstinuit oppugnatione: claudi tantum aditus, ne qui exire, neve ingredi impune possent, iussit.

XXVIII. Ipse, parte copiarum assumpta, Athenas per-



rexit: ubi graviolem in dies annonam factam, & jam ad extrema necessitatis perventum intellexerat. Jumentis enim omnibus absumtis, etiam oleribus & herbis vescuis, vulgo jam a tegulis parietinisque Parthenion (*urceolarem* herbam Latini vocant) in victum vellebatur. alii calceamentorum ampullarumque coriis morabantur deficientem spiritum: etiam humana corpora coeperant in cibum verti. Nam frumenti quidem medimnus mille denariis aestimabatur. Neque hoc tristissimum pereuntibus erat, sed quod tyrannus Aristion in ea publica penuria quotidie cum suis compotioribus hilariter epulabatur; nec modo fatiscientes media cives, sed etiam extinctum olei inopia Minervæ sacrum ignem, in levi ponebat.

XXIX. Hierophantidi, (summæ ea religionis in urbe sacerdos erat,) heminam tritici petenti, heminam piperis misit. Urbem ita affectam Sulla nactus, protinus circumvallare instituit, ne quisquam inde evadere posset. Interca sæpe rogatus ab Atheniensibus Aristio, cum diu negavisset, semel etiam supplicantes ei cum senatoribus sacerdotes sagittis abegisset, tandem familiarium aliquot ad Sullam oratores de pace misit. At illi sceleribus & crapula vecordes, stolidi & minime accommodati temporibus oratione, nihil quod præsens usus postulet, sed vetera urbis decora, Theseosque Eumolposque, & Medica tropæa prædicabant.

XXX. *Neque tibi decorum fuerit, ajebant, Imperator, neque tutum, eam excidisse urbem, in quam singularis Deorum furor semper exstitit. adeo quidem, ut & hanc præcipua benevolentia semper complecterentur, & inde potissimum in ceteras gentes emanare beneficia sua vellent. Jam a principio cum urbem nomen esset imponendum, duos de Consensibus de hoc honore certavisse satis constat: & cum oleam Minerva, Neptunus equum produxisset, pacis omen præferentibus Diis, quorum arbitrio*

& XXVIII. Plin. 22, 18. Plut. in Sull. c. 17. Diodor. ap. Vales. Flor. 3, 5.

commiffa lis fuerat, viciffè Palladem, quam Athenam vocamus, deque hujus vocabulo appellari Athenas cepiffè.

XXXI. Ita propter nos & equum, tam accommodatum uſibus humanis animai, & oleam, cui præferri arborum nulla jure poteſt, vita accepit. Duratque illa etiam nunc certo divinitatis argumento, & quos præferimus ramos, inde decerpſimus. Sed & Cereris munus, Triptolemique currum, & hinc ad alias terras exportata frugum ſemina referre poſſemus; cum adhuc glandibus miſeri mortales veſcerentur. Quin & præter oleam ſuauiſſimæ pomorum ſici hæc terra eſt genitrix: & hic primum, expreſſis Eumolpi ingenio uvis, vina fluxerunt.

XXXII. Quæ jam alia in univerſum genus humanum exſtent urbis hujus merita, ſi recensere vellemus, dies potius & vox, quam argumentum nos deficeret. Ut pauca obiter indicemus, lanificii uſum nudis aut male veſtitis monſtravimus; & cum in ſpecubus antiqui habitarent, Euryalus & Hyperbius cives noſtri, lateritias exædificare domos docuerunt. Judiciorum etiam ordinem hominum primi tradidimus, ab ipſis Diis acceptum, quo tempore nomen Arcopago Mars dedit; qui primus ibi capitis dixit cauſam, ob Halitrothii cædem.

XXXIII. Sed & civitatem ante alios optime conſtituimus populari ſtatu, cum ejus nullum adhuc exemplum exſtaret. Sed & certamina, quibus corpora exerceantur commentum ſumus; gymnicosque inſtituimus agonas, ungendique tradidimus morem: & quo magnificentius Panathenæica celebrarentur, primus hominum quadrigas rex noſter Erichthonius junxit. idem, inquam, Erichthonius, qui & ſignandæ pecuniæ fuit auctor. Nec jam enarrare volumus, quid pictura Polygnoto, quid Pericli res nautica deceat. Literas certe & ſacundiam, quibus ornamentis te quoque ſcimus excellere, omnemque humanitatem, jura, leges a nobis habere ſatentur, quotquot habent. Sed & majores veſtros, qui tantæ magnitudinis fundamenta jecerunt, non puduit, miſſis

§ XXX. Plato Menexen. Cic. de legg. Ovid. Metamorph. § XXXI. Ovid. Metamorph. Diodor. 5, 60. Juſtin. 2, 6. Ælian. Viſt. var. 3, 38. Plin. 7, 54. § XXXII. Juſtin. Plin. Ælian. Pauſan. 1. 5.

*huc legatis, Solonis inclitas leges describere: unde mox duodecim illæ tabulæ prodierunt, quas apud vos tanquam omnis publici privatiq[ue] juris fontem atque normam, ingenui pueri inter præcipua disciplinarum edocentur.*

XXXIV. *Tam antiqua sunt nostræ urbis in Romanam officia: quæ deinde multis temporum opportunitatibus toties reculta auctaque sunt, ut nulla Græciæ civitas pluribus imperatorum vestrorum senatusq[ue] honorificis decretis gloriari possit. Nullum enim ferme in Macedonia, aut Asia, aut Græcia gestum bellum est, in quo non insignis erga populum Romanum exstiterit Atheniensium fides. Cujus rei quem ampliore ipso populo Romano testem producemus, & quidem universo? semper enim, & in omni re, quod optima fide gestum est, id Attica gestum Romani soletis dicere.*

XXXV. *Quæ vero contra barbaros majores nostri toties gessere, quamquam forte invidiosa esse ob magnitudinem gloriæ videantur: tamen quia pro misera posteritate majorum allegare virtutem prodest, commemoranda sunt. Sed unde potius, quam ab iis temporibus gentibusq[ue] ordiemur, in quibus cum vester aliquis dolor fuerit, erit aliqua etiam ex relata hostium ultione voluptas? Gallis, cum Italiæ magnam partem, mox etiam Macedoniam Græciamq[ue] innumeris copiis oppressissent, ad Thermopylas majores nostri occurrerunt: terraque & mari fortissime decertando, magnam Græcorum multitudinem servarunt.*

XXXVI. *Quid antiquioribus adhuc temporibus, o Dii, & custos urbis Minerva! quæ tum urbs, aut regio, aut insula prope longeve fuit, quæ non aliquo præclaro Atheniensium facinore nobilitaretur? Marathon victoriæ Medicæ æternum monumentum ex oculis hominum & agro nostro deleri poterit: e memoria quidem rerum gestarum & admiratione posteritatis nunquam delebitur. Quid deinde Themistocles & frater ejus Agesilaus? Quorum hic, interfecto principe purpuratorum Mardonio, quem Xerxem esse putaverat, quasi regem hac audacia non satis terruisset,*

§ XXXIII. Virg. Georg. Plin. Allian. Pollux l. 9. Justin. Cic. pro Flacc. c. 26. & de orat. 1, 45. Liv. 3, 31. § XXXIV. Vellej. 2, 23. § XXXV. Pausan. l. 1.

*injecit foculo manum, tales affirmans omnes Athenienses esse: non absimilis illi Mucio, unde adhuc Scævolarum familia Romæ perdurat.*

XXXVII. *Themistoclis autem iam nota sunt facinora, ut omnis historiæ oporteat esse rudem, qui ista non teneat. Superbissimum enim regem, & tantis instructum copiis, quantas aut antea, aut postea habuit nemo, nobili ad Salamina prælio fregit: deinde rem multis millibus improbam, unus consilio perfecit, ut universa Europa maximis adhuc viribus subnissum expelleret. Theseo vero duce Amazonicas pugnas, & quidquid ab eo heroe factum est, non modo vetus memoria loquitur, sed passim nobilium artificum opera demonstrant.*

XXXVIII. *Ne jam Thrasybulos vobis, & Cononas adducamus, & Cynægiros, & omnem illam clarissimorum imperatorum, fortissimorum virorum manum; Periclem tamen indictum abire non sinimus, ut simul virtutem ejus, simul studium urbis nostræ in virtute honoranda prodamus. tantus enim ille vir fuit, ut novus ei honor decretus fuerit, duobus connexis oleæ ramulis capite cincto. probaruntque & rem, & auctores universi populi; atque inde claros viros coronandi consuetudo orta, statimque vulgata est. Neque transeundus Phocion est, licet ætas ejus in Philippi & Alexandri tempora incidit, quorum potentia & fortuna summorum virorum obscurare famam potuisset.*

XXXIX. *Nec tamen illi sic officere nomini Phocionis potuerunt, quin strenuum virum, optimumque civem fuisse sciamus: qui, cum quadragies quinquies exercitum duxerit, semper absens electus prætor, tamen integritate vitæ, civilibusque artibus hodie est notior. Atque ea hominis mentio publicæ laudis admonet: cum eadem & civitatis nostræ fuerit in utroque genere præstantia, ut ingeniosissimi homines disputent, belline an vero sapientiæ studiis Athenæ fuerint clariores? An enim ulla pars disciplinæ est, in qua laudabiliter versari humanum inge-*

§ XXXVI. Strab. l. 9. Stobæus form. 7. Plut. § XXXVII. Pausan. § XXXVIII. Val. Max. 2, 6. Plut. in Phoc. c. 11.

nium possit, quam non aut invenerint nostrates, aut præ ceteris excoluerint?

XL. Ut enim a poetis ordiamur, quod genus e doctis antiquissimum est, comædiæ tragædiæque plurimos atque nobilissimos auctores Athenæ tulerunt. Quamquam profecto comædiam scribere vetitum Arcopagitis est, ne severitatem judicum populari hilaritate corrumpant: tamen & in vestris theatris fabulæ nostræ spectantur, & ingeniosior quisque poetarum habetur, quo propius abest a nostris. Tragædiæ vero, quæ maximas in vita habet utilitates ad omnem bene ferendam fortunam, & primum inventorem, & scriptores adeo excellentes hæc civitas peperit, ut tanto jam tempore nemo sit repertus, qui sapientiam Euripidis, facundiam Sophoclis, grandiloquentiam Æschyli possit imitari.

XLI. Oratores autem præstantes civitas nostra plures eadem ætate habuit, quam reliquæ propemodum omnes, omnibus annis. E quibus equidem Lysias, & Æschines, & Demosthenes, non tanquam oratorum, sed tanquam eloquentiæ nomina audiuntur. Et ut pictores, statuarios, aliosque artifices, quorum tamen insignis etiam est gloria, & quidquid ingeniorum diversis studiis occupatum fuit, silentio transeamus: quis ignorat, nullibi terrarum meliores exstitisse doctores ejus, quæ vitam regit, sapientiæ?

XLII. Solon & Socrates, & cum Platone Xenophon, & tot profectæ a Socrate familiæ, quarum etiamnum successio durat, notiora sunt miracula, quam ut dici debeant; majora, quam ut possint. Ob tot urbis decora mirum non est, si maximi præstantissimique reges, uti vincere Athenas magnificum, ita perdere inhumanum judicarunt. Possemus hic Philippum nominare Macedonum regem, possemus Alexandrum. sed ne tibi talia commemorando, fastidio simus, imperator; præsertim, quia pro humanitate atque eruditione tua nihil horum nescis; has tantum adjiciemus preces, ut clarissimorum regum tueri judicium velis, atque clementiam imitari, quemadmodum imitaris & virtutem.

XLIII. *Ne lubeat tibi vastare ædificia hujus urbis, a qua primum tradita mortalibus est ædificandi scientia. noli fame premere frugum parentem: noli bello vastare tot heroum patriam, artium omnium domicilium, religionum atque sapientiæ templum, & Pythii testimonio ac voce, Græciæ Prytaneum.* Sed huic orationi non aliter, atque hac vecordia dignum erat, Sulla respondit. *Abite, inquit, beati: & hæc tam pulchra declamaturis adolescentibus præcipite. Ego enim senatus populique Romani missu, non discendi gratia, sed ad puniendos rebelles adsum.* Dum hæc aguntur, forte fenum in tonstrina fermonem habitum exploratores ad Sullam retulerunt. tyranno maledixerant, quod negligenter servaret urbem, facilesque ad Heptachalcum aditus incustoditos sineret.

XLIV. Imperator, haudquaquam spernendum indicium ratus, media nocte cum expeditis ad locum venit; & quia non difficilis superatu videbatur, admoveri statim scalas, & evadi in murum jubet. Primus omnium M. Tejus in summum enisus, cum occurrentem sibi hostem feriret, objectu galeæ fregit ensen: nec cessit tamen loco, sed, donec alii commilitones supervenirent, restitit. Sic expugnatae sunt a Sulla Athenæ, Kalendis Martiis. Romani, diruto, quidquid inter duas portas, Piraicam & Sacram, murorum fuerat, magno cum terrore ingressi, strictis ensibus ad cædem rapinasque discurrerunt: non defectionem tantum Atheniensium, sed suas contumelias, & jacta obsidionis tempore convicia, immitis ingenii viro acriter vindicante.

XLV. Erat omnino fœda tum eorum, quæ fierent, species, tum factorum memoria & notæ. *Multis in domibus condita in usum ciborum humana membra reperta; tantumque cruoris ea nocte fusum ferunt, ut, præter alias urbis partes cædibus & cadaveribus oppletas, totus Ceramicus ad Dipylon usque sanguine fluxerit: ejusque rivos etiam in suburbium ma-*

§ XLIII. Flor. 3, 5. Justin. 2, 66. Athenæ. 5, 1. Plut. in Sull. c. 18. & de garrul. c. 8. § XLIV. Vellej. 2, 23. Plut. Flor. 3, 5. Appian. Memnon.

*nasse quidam retulerint.* Non enim a Romanis tantum obvii sternebantur, sed ingens oppidanorum numerus, acerbiora morte metuens, desperatione sibi necem consciscibat. Aristion cum paucis in arcem confugit, incenso prius Odeo, ne materia illius ad oppugnandam arcem hostibus usui esset.

XLVI. Sullam, ne urbem dirueret, non quidem mandata senatus absterruerunt, quibus tum quidem parum fuisset commotus: sed Romanis senatoribus, qui cum Sulla erant, adjuvantibus, exsules Atheniensium Midias & Calpion extremis precibus evicerunt, *ut miserrimæ civitatis aliquas esse reliquias pateretur.* Igitur postridie, jam fatiata nonnihil vindictæ cupiditate, veterum Atheniensium laudibus commemoratis, *ingratissimos hominum, ut ipse dicebat, in honorem sacrorum suorum, atque antiquorum heroum conservavit: multos se paucis, & vivos mortuis donare distitans.*

XLVII. Servilia deinde corpora venditurum edixit: *ceteris concedere libertatem; suffragia legum & magistratuum non concedere, quod hostili in se atque populum Romanum animo fuissent. posteris tamen illorum ea quoque reddere.* Sic antiquissima & nobilissima Græciæ civitas, cum plurimorum bellorum pericula, seditionumque & tyrannidis violentissima mala superasset; quo tempore vix timeri tale quippiam potuisset, Aristionis opera in eam calamitatem adducta est, ut extremum exitum vix evaderet. *Sullam quoque postea gavisum esse ferunt, quod iræ, cujus potens non erat, haustus indulgisset, ut tamen urbem non excinderet: idque inter præcipua fortunæ suæ beneficia numeravisse.* Nunquam tamen pristinam deinde recuperare speciem Athenæ potuerunt: & mœnia tum a Romanis diruta, circiter annos trecentos quinquaginta jacuere; donec, imperante Valeriano, contra Scytharum incursiones reficerentur.

XLVIII. Per eadem tempora aliis quoque locis inter

§ XLVI. Flor. 3, 5. Plut. Appian. § XLVII. Plut. Apoph. Romæ. c. 31.

Romanos Mithridaticosque duces varia fortuna certatum est. Asia ferme tota regis erat: nisi quod ab obsidione Rhodi repulso, etiam Magnetes fortissime resistebant. Hi & alias plurimum damni regiis attulerant: & Archelaum, paulo ante, quam in Græciam iret, fines suos effusa populatione devastantem, multis barbarorum necatis, fauciverant. Inde cum maximo exercitu circumfessa oppugnataque urbs eorum a Mithridaticis prætoribus esset, summa virtute defensa est.

XLIX. In Thracia atque Macedonia prosperiora omnia regiis erant. Thraces, Mithridatis partes secuti, duce filio regis Arcathia, deinde Dromichæte regii sanguinis Thrace, capta Amphipoli, numerosis agminibus Macedoniam & propinquas illi regiones invaserant. Horum incursionibus Epirus & reliqua Dodonam usque afflicta sunt: ipsum Jovis Dodonæi templum sacrilegas eorum manus non effugit. Delphicum quoque delubrum, postquam antiquioribus temporibus bis incensum fuisset, tum tertium a Thracibus inflammatum est.

L. Iis post Arcathiæ mortem Taxiles cum imperio præerat, qui, Atheniensium obsidione audita, cum Elateam Phocidis urbem circumfideret, copias in Atticam transducere instituit. Habebat autem sub signis centum peditum, decem equitum millia, cum nonaginta curribus falcatis; per se validas ad quodlibet bellum vires, nedum si Archelao jungeretur. Quo minus committendum Sulla ratus, ut post captam urbem, ad reliquas munitiones tempus teneret, obsidioni arcis Curionem præfecit: Piræeum summis viribus oppugnavit. neque prius destitit, quam, repulsis continua telorum imbre propugnatoribus, muri recentis lunatam partem convelleret.

LI. Sed cum optato laboris eventu, non statim præmium etiam speratum affuit. Quippe interiorem murum

§ XLVIII. Pausan. l. i. Liv. Epit. Tacit. Memnon. Diodor. ap. Vales. § XLIX. Plut. Pausan. § L. Flor. 3, 5. Crof. 6, 2. Appian. Mithrid. Plut. Plin.



Archelaus struxerat; &, quasi nihil dum actum foret, subeunda erat integra oppugnationis alea. Neque hoc semel atque iterum factum esse dicitur: sed ea fuisse utrisque defendendi expugnandique contumacia, ut sex & amplius muri perumpendi Romanis ante plenam victoriam fuerint.

LII. Tandem urgente Sulla, ipsisque militibus per iram, & quia, expugnato Piræo, cetera belli facilia fore credebant, supra fidem humanarum virium connisis, Archelaus in opposita quæque ruentium infana pervicacia victus, cessit loco: seque in Munychiam & circumflum undis Piræei regionem recepit. Victores, ædificiis plerisque incendio ac ruina deletis, in quibus & navalia fuerunt, & celebratum Philonis armamentarium, tanta arte distributis spatiis, ut mille navium instrumentum caperet; ultro non potuerunt progredi, quod neque classem haberent, neque sine navibus sequi Archelaum possent. Igitur omisso illo; relictisque idoneis præfidiis, L. Sulla cum maiore parte exercitus, & Græcorum populorum auxiliis, ut venienti novo hostium exercitui occurreret, in Bœotiam contendit.

JOANNIS FREINSHEMII  
SUPPLEMENTORUM  
LIVIANORUM  
LIBER XLVII.

IN LOCUM LIB. LXXXII LIVIANI.

---

EPI TOM E  
LIBRI OCTOGESIMI SECUNDI.

*Sulla copias regis, quæ, Macedonia occupata, in Thessalias venerant, prælio vicit, cæsis hostium centum millibus, & castris quoque expugnatis. Renovato deinde bello, iterum exercitum regis fudit ac delevit. Archelaus cum classe regia Sullæ se tradidit. L. Valerius Flaccus consul, collega Cinnæ, missus, ut Sullæ succederet, propter avaritiam invisus exercitui suo, a C. Fimbria legato ipsius, ultimæ audaciæ homine, occisus est, & imperium ad Fimbriam translatum. Præterea expugnatae in Asia urbes a Mithridate, & crudeliter direpta provincia, incurionesque Thracum in Macedoniam, referuntur.*

I. **E**XPEDITIO I. Sullæ, quemadmodum nihil tam obnoxium hominum judiciis est, quam imperatorum consilia, a plerisque reprehendebatur, quod, relicto Attico agro, ubi propter asperitatem locorum pauci pluribus resistere possent,

*Bœotia campos & apertam planitiem, numero præsertim equitum tanto inferior optavisset.* Ceterum Sulla præter insitam audaciam motus causis minime inanibus videbatur, quod retenta Munychia Archelaum hoc intelligebat agere, ut du-  
cendo bello Romanos in regione sterili, commeatum inopia premeret. Ager enim Atticus ne per pacem quidem tantam alere multitudinem poterat: subvectionem annonæ ipse mari, Taxiles terra, haud magno negotio erant prohibitori.

II. Adversum hæc ea ratio Sullæ erat, ut cum hoste potius solo, quam simul adversus hostem famemque dimicaret. Ad hoc periculo L. Hortensii movebatur: quem acrem virum & propositi tenacem, cum copiis non pœnitendis ad se ex Thessalia pergere, hostes autem in Thessaliam irrupisse noverat. & nisi subveniretur, ne ubicunque deprehensus pugnam vel cum exitio fumeret, metuebat. Sed Hortensium quidem Caphis Bœotius per aliam, quam qua venturum barbari opperiebantur, viam circumduxit; donec superato Parnassi dorso, tenuit Tithoream. munitissimus natura locus est, alto circum & præcipiti rupium velut vallo claudente: cui quondam Phocensium pars, inundante Græciam Xerxis exercitu, salutem atque libertatem debuisse dicitur.

III. Huc ubi longiore via secuti hostes penetrarunt, Hortensius toto die impetum eorum haud difficulter repulit; noctu deinde tacito agmine profectus per loca confragosa pervenit Patronidem, ibique ab occurrente Sulla receptus est. Hoc adjuncto milite, non ultra mille quingentos equites, peditum millia quindecim Romanæ copię efficiebant. accensa deinde Græcorum, qui nuper ab Archelao defece-  
rant, auxilia, ita augebant numerum, ut tamen ne trientem quidem hostilis multitudinis æquaret.

IV. Igitur Archelaum (nam & hic accitus a Taxile in Thessaliam accurrerat) ceteri duces ad prælii tentandam

§ I. Plut. § II. Memnon. Diodor. ap. Vales. Plut. Liv. Epit. Herodot. 8, 32. Pausan. l. 10. § III. Appian. Mithrid. Plut.

fortunam indefinenter hortabantur, donec consensu omnium victus (nam trahere bellum haud absurdo consilio statuerat) in aciem suos eduxit. Præter veterum copiarum reliquias, & quæ postea Dromichætis ductu venerant, etiam Arcathiæ nullo adhuc incommodo imminuta agmina, & quæ subinde Mithridates submittebat, Taxiles e Macedonia adduxerat: in universum hominum millia centum viginti numerabantur, mixta e variis gentibus acies. Thracæ plerique & Pontici; Scytharumque & Gallogræcorum auxilia, tum ex Phrygiæ, Bithyniæ ceterarumque provinciarum, quæ jugum regis acceperant, delectibus coacta Juventus. suos cuique gentium ductores, summæ Archelaum rex præfecerat.

V. Sulla castris locum in Elateæ finibus ceperat: sed quia neque collis, quem obtinebat, arduus, & lata circum planities erat; cum neque loco fideret, & terreri hostium multitudine animadverteret suos, intra vallum se continuit. Id cum continuis aliquot diebus factitatum esset, contemnere hostem regii cœperunt, &, quo ferebat animus, injussu ducum pabulatum excurrere. Panopeum Bœotiae urbem sine certo imperio tum deletam ferunt: Lebadæam cum celebri Trophonii oraculo direptam. dolebat in oculis suis fortunas sociorum diripi Sulla, sed militem formidine nondum liberatum certamini non audebat objicere. laboribus ergo atque operum tædio putabat adduci posse, ut potius pugnam poscerent.

VI. Ipse, missis ad Archelaum legatis, pacis mentionem interposuit, inducias quoque pactus: quo securiorem efficeret hostem, & castra sua in tutiorem locum transferret. Utrique consilio sicuti ratio affuerat, fortuna & successus affuerunt. Tertio die, postquam derivando Cephissi flumine, fossisque ducendis fatigari cœperant, prætereuntem forte Sullam magno cum clamore prælium poposcerunt. Ille, non *pugnam cupientium, sed laboris pertæforum, hunc cla-*

*morem videri increpans; tamen, si viri estis, inquit, en vobis locum, quem extemplo capiat. Simul ostendit arduum præruptumque collem, ubi quondam ad confluentes Asopi Cephisque arx Parapotamiorum steterat.*

VII. Ad hunc occupandum eodem tempore missi ab Archelao chalcaspides ibant. sed eximia Romanorum alacritate prævenit eos Sulla, locumque communivit. Ut jam redire militibus virtus, & armorum fiducia cœpit, Sullæque exploratores retulerunt, *castra hostium non magno plerumque præsidio custodiri, ceteros ad prædam, frumentive aut pabuli convehendi gratia passim evagari: redeuntes, ubi per noctem ignibus, interdium fumo, adventum suum significassent, portis patentibus intromitti: eaque secure & negligenter omnia agi; quantoque plus ducum ipsis, tanto minus obsequii esse: occasionem usum, magnum barbaris detrimentum, & quia nec opinantibus acciderat, majorem ex securitate metum attulit.*

VIII. Frumentatorum aliquo numero excepto, cum robustissimum quemque interfecisset, reliquos, a quorum imbecillitate nihil metuebat, resumptis armis suis pergere fecit cum iussit. Cum in vicinum castris locum obscura jam nocte ventum esset; *Ne vos fugiat, inquit, quam salutis concessæ mercedem postulem, excitatis ignibus signum, quod inter vos convenit, vestris date. ubi redditum ab illis signum fuerit, ad castra succedamus, apertas haud dubie portas reperturi, ubi vestræ & propinquo voces agnoscentur. In hoc non magis victoriam meam, quam vestram incolumitatem sitam esse scitote. quod si quis forte fugam, aut prodicionem tentare voluerit: a me providebitur, ut nullo neque nostro damno, neque suorum commodo, extremos sibi cruciatus arcessivisse intelligat.*

IX. Omnia, sicut Sulla optaverat, obedienter facta. eventus etiam affuit. Recepti pro amicis late per tota castra terrorem cædemque ediderunt. His incommodis, & quia

§ VI. Memnon. § VII. Plut.

barbari, temere vastando culta, penuriam sibi commeatuum ex magna copia fecerant, Archelaus ad Chalcidem retrocedere statuit, ubi e maritimis subvectionibus abundaturus commeatu erat: dum Romani fame ac inopia rerum omnium in vastatis agris attererentur. Non fallebat Sullam, quid hostis moliretur: igitur discedentem provide secutus, neque se dabat in discrimen, & illum, qualia voluisset, itinera facere prohibebat.

X. Ita ventum ad Chæroneam est, Plutarchi nobilis philosophi natalibus illustrem, qui rerum istarum historiam composuit. Erat inter auxilia Romana Chæronensium cohors: quæ, patriæ periculo mota, oravit Sullam, *ne hostibus esse prædæ pateretur*. Sulla & illos ad præsidium patriæ occurrere iussit, & cum una legione Gabinium tribunum militum eo misit. tantaque Romanorum diligentia fuit, ut in servando oppido Chæronensium ipsorum, licet inflammata studia præveniret. Barbari, spe potiundi oppidi amissa, in Thurio (confragosum admodum & præruptum supra Chæroneam cacumen est) valido collocato præsidio, haud procul inde castra posuerunt.

XI. At Sulla, æstimato loci ingenio, cum barbaros suam ipsos multitudinem inutilem effecisse, sibi vel ad inferendum gradum, vel ad referendum abunde spatii, illis angusta omnia & impedita cerneret; quod hætenus detrectaverat, prælium appetere cœpit, hostemque laceffere. Quapropter bifariam divisis copiis, sinistro cornu L. Murænam præfecit, in dextro curaturus. novissimam aciem cum subsidiariis cohortibus Sulpicius & Hortensius legati obtinebant, ita dispositi, ut circumventuris aciem Romanam hostibus se objicerent: id enim ob numerum barbarorum, & quia equitum levisque armaturæ copiosam manum ostentabant, futurum rebatur.

XII. Erius cum Homoloichō & Anaxidamo Chæronensibus, ut occulto calle in Thurium evaderent, missus,

ducibus illis ex improvîso regios perculit. Totum enim Romanorum exercitum adesse rati, per invia præcipiti timore ferebantur; suisque ipsi armis se induebant. Ad tria millia hominum ibi cecidisse creduntur. Reliqua multitudo partim in Murænam, instructa jam acie stantem, incidit; partim ad Archelai castra delata, turbavit instruentium ordines sedulitatem, atque omnia terrore & tumultu permiscuit. sero tum Archelaus, quam iniquum in locum se conjecisset, intellexit. equitibus igitur celeriter immixtis, inferentem jam signa Sullam submovere conatus est.

XIII. Sed pulsi in abrupta equites parum aut hostibus moræ, aut suis præsidii attulerunt. Iterum ad perumpendam Romanorum aciem sexaginta currus falcati processerunt. Sed quoniam justo spatio, quod maxime concitandis cum impetu quadrigis necessarium est, destituebantur; lente invecos Romani diductis ordinibus cum plausu, & tanquam in circensi ludicro alios postulantes, sine noxa transmiserunt. ubi dum hærent, haud molli ad convertendum flexu, equi & aurigæ a subsidiis Romanorum impune sunt telis obruti. Sic quoque integrum Archelao erat, castrorum munitionibus se tueri, & subeuntem ad impedita Sullam, pari locorum fraude involvere. Sed ille, quacunque tandem causa (nam & tum, & postea varie dubitatum est) educere suos maluit, &, quoniam in propinquo jam Muræna erat, constipatam in angustiis multitudinem confertis ordinibus opponere.

XIV. Quindecim fervorum millia, qui ad promissam libertatem regiis partibus se adjunxerant, in fronte porrectis hastis stabant. Romani, Saturnalia hæc esse conclamantes, gladios, abjectis extemplo pilis, ad cædenda hastilia strinxerunt. Sed quia ob densos hostium ordines tarde res procedebat, subducta gravi armatura, velites immixti sunt, totamque illam aciem glandium telorumque grandine proturbarunt. Interim dextrum suorum cornu ita Archelaus

produxerat, ut inclusurus Romanum agmen videretur. ibi Galba & Hortensius raptim ductis cohortibus, in latera hostium facturi impetum, accurrerunt. sed prævenit eos equestris hostium procella, sensimque recedentes ad montana, exclusit a cetero exercitu, submotosque circumvenit. Maximum ea parte periculum erat, quod in conspectu Archelai (nam & ipse aderat) alacrius a barbaris pugnabatur.

XV. Idcirco Sulla, qui nondum ad conjectum teli venerat, propere cum valido equitum globo laborantibus succurrit. Ea res, & quod ex pulvere conjectabat, imperatorem advenire, terruit Archelaum, ut, omiſſa pugna, ad dextrum Romæ cornu properaret, id, dum sine duce esset, sperans facilius in fugam verti posse. Sub idem tempus Taxiles contra Murænam chalcaspidas instituit ducere: diversisque e partibus ortus clamor, montiumque repercussu multiplicatus, distinuit Sullam, quo potius & prius ad ferendam opem advolaret. deinde celeriter capto consilio, Hortensium cum quatuor cohortibus Muræne subsidio milit: ipse cum quinta, & quos habebat, equitibus ad suum cornu rediit.

XVI. Commissum jam ea parte prælium erat, & paribus utrinque animis viribusque pugnabatur. Ergo ubi imperator, & cum eo peditum equitumque novum robur affuit, haud ultra dubitatum est, quin hostes terga verterent. Imperator, de Muræna sollicitus, protinus in illam partem victricia agi signa jubet. At jam sibi quoque oppositos Muræna, concitatis hortatu & exemplo suo militibus, egregie fuderat. Reliquus igitur labor insequendi hostem, cædendique fugientes fuit. Magnus ibi numerus, & multo, quam in prælio, major occisus. nam ut sagaciter Sulla conjecerat, angustiae locorum non minus fugam hostium, quam pugnam impediabant.

XVII. Castra tamen & magna pars exercitus servari po-



tuissent, nisi exclusi fuissent ab Archelao, qui eo confugerant. Sed ille redire in prælium jubebat: nec animus ple-  
risque deerat, sed sine ducibus, sine signis, ne loco qui-  
dem ad pugnandum apto, confusis ordinibus, & sua mul-  
titudine impediti, neque referire hostem poterant, & mul-  
ti a suis obterebantur. Tandem magna parte trucidata,  
ultimis reliquorum obtestationibus expugnatus Archelaus  
aperuit portas. sed fera & perniciosa hæc misericordia fuit.  
simul cum fugientibus. Romanus miles irrupit, captisque  
castris, victoriam consummavit.

XVIII. Hostium ea die centum millia cæsa perhiben-  
tur: non supra decem millia cum Archelao Chalcidem  
perfugerunt. Neque tanta de asperrimis gentibus victoria  
plus duodecim Romanis abstulit, si quidem commentariis  
Sullæ credimus. *quatuordecim desideratos fuisse scribit; sed  
ex eo numero duos sub vesperam revertisse.* Ob hujus victo-  
riæ lætitiâ ludos Thebis apud Œdipodeum fontem eden-  
ti, missi a Curione, *captam Athenarum arcem, tyrannumque  
in Minervæ templum confugisse,* nuntiant: cum eodem die,  
ut postea compertum est, victoria Sullæ Athenis Curioni  
nuntiaretur. multiplicatum deinde spe alterius victoriæ gau-  
dium est, *cujus certa se promissa ab Trophonio afferre, Q;  
Titius, negotiari in Græcia solitus, affirmabat. etiam Salvie-  
nus legionarius miles, adstitisse sibi speciem Jovis ea maje-  
state, quæ Olympiæ viseretur, asseruit: finem civilium bellorum,*  
qualis mox consecutus est, *prædicentem.*

XIX. Lætus his imperator, ut præsentia constitueret,  
judicibus ex aliis Græciæ civitatibus excitatis, Elatensibus,  
quod Taxili Mithridatis præfecto portas clauserant, libera-  
tatem, quam Macedonico Philippi bello amiserant, reddi-  
dit. Thebanos dimidio agri multavit, & quod inde pro-  
venisset in posterum, pro donariis, quæ Olympiæ, & Del-  
phis, & Epidauri abstulerat, Jovi, & Apollini, & Æsculapio  
consecravit. Armorum deinde hostilium acervum Gabino

cinctu, patrio more Diis belli præsidibus cremavit: monumentumque felicitatis prælii Marti, Victoriæque, & Veneri dedicandum curavit.

XX. Cum inter hæc ex continuis laboribus modica quiete fatis refectos cum corporibus militum animos putaret, Chalcidem cum exercitu profectus est. Sed quia navibus carenti facile præcludi aditus poterat, præsidii, ubi profuturum judicabat, dispositis, Athenas perrexit, ut poenas de nocentibus sumeret. Fœdum omnino pestiferumque tyrannum Aristion egerat, & ad luendum supplicium, divinitus in potestatem Romanorum traditus videbatur. Cum enim obsessi munimento loci se diu defendissent, tandemque penuria aquæ deditionem coacti essent facere, *ea ipsa die horaque, cum arx Curioni est tradita, sereno cælo repente nubes conglomeratas esse, copiosumque imbrem cecidisse, memoriæ proditur.*

XXI. Sulla Aristionem templo extractum venenum coegit bibere: ceteros ejus satellites, quive magistratum sub ipso gesserant, quive quovis modo sibi aut populo Romano fuerant adversati, in Ceramicum conclusos, sorte decimum quemque ad capitale supplicium eduxit. Pecuniæ ex arce non spernenda vis egesta. quadraginta maxime pondo auri, sexcenta argenti, reperta fuisse memorantur. Ceterum in his dum occupatur Sulla; L. Valerii Flacci adventu audito, ut Græciam petenti occurreret, in Thesaliam movit. Ejus L. Flacci mentio cogit, ut ad urbana negotia exponenda prævertam.

XXII. Consul Cinna, M. Mario collega mortuo, in locum ejus Flaccum asciverat. Domi forisque nihil incunctum, aut etiam mediocriter turbatum erat. Arma jam in urbe cessabant: sed mœsta omnia suspectaque, tantis undique irarum odiorumque causis, & animis & oculis hominum occurrebant. Inter alia non leviter civitatis con-

§ XIX. Pausan. l. 1 & 10. Plut. Appian. Diodor. ap. Vales.

§ XX. Plut. Appian. Pausan. § XXI. Plut. Cic. in Brut. c. 9. Vellej. 2, 23.

cordiam magnitudo æris alieni, & labefacta fides concusserat. Ei malo ut remedium afferret, turpissimam legem L. Flaccus consul tulit, quadrante creditoribus solvi iussu, ut jam injuriæ perfidiæque publicus auctor, non immeritas pœnas, violatis societatis humanæ vinculis, dedisse videatur, altero statim anno a C. Fimbria, legato suo, contra jus fasque interemtus.

XXIII. Inter mala civitatis etiam monetæ fraudes patrimonialia privatorum affligerant. Iis ut obviam iretur, de probandis denariis (octoginta quatuor e libra signari iustum erat) tribuni plebis legem promulgaturi, ut res nummaria de communi sententia constitueretur, collegium prætorum adhibuerunt. Sed edictum communiter conscriptum Marius Gratidianus prætor, ut omnem populi favorem in se averteret, ceteris ex composito pomeridianum tempus expectantibus, statim a subsellis ad Rostra contendens, suo unius nomine proposuit. Tantaque legis ejus gratia fuit, ut per omnes vicos ei statueret, & ad eas tus & cerei ponerentur.

XXIV. Cnæi quoque Pompeji, qui postea Magnus est appellatus, judicium idem annus habuit. Peculatus erat obfurta Strabonis postulatus, & quod in Asculana victoria liberos & plagas venatorias munere patris acceperat. Dixerunt pro Pompejo Q. Hortensius, & L. Philippus jam senex, *se non immerito, cum sit Philippus, Alexandri studiosum esse*, dictitans: quod jam id nomen a multis Pompejo imponi cœperat. Egit & pro se Pompejus ita constanter, & præter ætatem diserte, ut commotus ea re prætor Antistius, qui judicium exercebat, filiam ei nuptum offerret.

XXV. Accepta conditione, Pompejus cum paucos post dies absolveretur, a populo Thalassionis inclamatum nomen est, quod tum inter festivitatem nuptiarum solebat celebrari. Plurimum tamen ei Cn. Carbo patronus profuit, magna tum potentia: cujus acerrimo studio, atque

§ XXII. Plin. 33, 6. Cic. de off. 3, 20. § XXIV. Senec. de ira 3, 16. Plut. in Pompej. c. 6. Cic. in Brut. c. 65.

enisa opera defensus est. Asiæ deinde & Græciæ bella respicientibus non magis hostis Mithridates, quam imperator Sulla, terrori erat. Igitur fit senatusconsultum, quo *L. Flaccus consuli bellum Mithridaticum & legiones duæ decernuntur, adjectum, ut siquidem in potestate senatus Sulla esset, adiutore illo; sin vero, tanquam hoste uteretur.* Hæc audita moverunt Sullam, ut in Thessaliam duceret.

XXVI. Inter hæc Archelaus acceptam terra cladem, utcumque maritimis expeditionibus farsiens, archipiratæ magis, quam magni ducis more, circum insulas vagabatur. Sed ad Zacynthum, exscensione facta, cum obsidere oppidum instituisset, ab oppidanis ductu quorundam Romanorum, qui forte ibi negotiabantur, nocturna eruptione territus, e vestigio conscendit naves, Chalcidemque inglorius rediit. Eodem & Dorylaus Philæteri F. cum novo exercitu venit.

XXVII. Idcirco ad Sullam, cum vix Melittæensium fines (Thessaliæ oppidum Melittæa fuit, quod & *Melitea* vocabatur) attigisset, frequentes undique nuntii accurrerunt, omnia, quæ recepisset a tergo, non minoribus, quam antea, copiis per Mithridatis præfectos opprimi. Rex enim, comperita exercitus sui strage, uti par erat, territus, animum tamen minime desponderat, quin ex novis delectibus, & quos antea collegerat, octoginta hominum millia classi imposita, cum Dorylao duce mitteret. Atque is, cum Chalcidem appulisset, celeriter recepta Bæotia, ferox & exultabundus Sullæ congressum optabat, Archelaumque deterrere orsum negligebat: fama quoque dispersa, *non sine prodicione ducis tot bellatorum millia tam facile deleri a Romanis potuisse.*

XXVIII. Enimvero circa Tilphossum, reverso Sulla, levibus præliis Romanæ virtutis experimentum cepit; adeo mutata sententia, ut postmodo princeps, *ducendum esse bellum, sumtibusque & tempore atterendum Sullæ impetum,* censeret. Sed ubi, castris ad Orchomenum positis, loci fiducia

§ XXV. Val. Max. 5, 3 & 6, 2. Appian. Memnon. Plut.  
§ XXVI. Strab. 1. 10. Plut. Appian. § XXVII. Plut. Orof. 6, 2.

spem Archelao dabat, quod equitibus, qua parte virium regii præstabant, opportuna planities se pandebat; parare se coepit, tanquam casum prælii primo quoque tempore subiturus. Copias ita digesserat, ut in fronte quadrigæ falcatae essent: post has locata phalanx erat, Macedonici instituti acies. Tertii auxiliares stabant, cum Romanis armis, mixtis Italicae gentis fugitivis. post omnes levis armatura confiterat. Equitatus utrumque latus claudēbat, commisso prælio ad circumveniendum hostem evolaturus.

XXIX. Adversum hæc omnia Romanus, loci numerique incommoda labore emendanda ratus, fossas in utroque latere complures instituit ducere, decem in latitudine pedibus patentes, & in capitibus earum castella communiavit. Triplicem deinde peditum aciem fecit, intervallis relictis, per quæ equitem, quem novissimo loco tenebat, ubi visum esset, emitteret. deinde antesignanis secundæ aciei imperavit, ut robustos densosque palos firmiter in terram defigerent.

XXX. Quod ubi factum est, & ab regionum acie concitati currus provolarunt, intra palorum septa recepit suos; statimque sublato clamore, velites & levem armaturam ingerere tela jussit. Erant ad terrorem comparata omnia; nihil usitatum notumve, sed in mediis campis velut subito enatum vallum, conversa in aliam formam acies, insolita & inopinata monstra occurrebant. Pars quadrigarum implicita palis hæsit: aliæ conversis habenis in suos recurrentes phalangem dissiparunt. Interea cum, equitibus Archelai incumbētib; qui ad opera erant milites turbarentur, metusque ad aciem etiam Sullæ pervenisset; ille ex equo desiluit, correptoque signo in primos ordines procurrens, *cum deinde, inquit, interrogabimini, ubi imperatorem vestrum deserueritis, mementote dicere, pugnātem ad Orghomenum.*

§ XXVIII. Front. Strat. 2, 3. § XXIX. Plut. Appian. Front. § XXX. Plut. Appian. Front. 2, 3 & 12. Orof. 6, 2.

XXXI. Hæc illo clamante, tribuni centurionesque accurrerunt, milites quoque multi secuti sunt, & a dextro cornu integræ cohortes duæ affuerunt. Ita repulsi hostibus, collaudatos milites reduxit; cibumque capere, & relictis prandio viribus, ad opus reverti jussit. Tum vero iterum inveci sunt hostium equites, non incompósito, ut antea, impetu, sed servatis ordinibus. His Romanum equitatum Sulla opposuit, ipse præfens hortator, & tota acie, ubi maxime opus erat, se offerens: donec egregia iterum victoria potitus, ad quindecim hostium millia, majorem partem equites, & in his Diogenem Archelai privignum, cecidit.

XXXII. Pedites cum diu restitissent, tanta sagittariorum pervicacia, ut, quoniam prementibus Romanis spatium utendi arcubus non habebant, densis sagittis tanquam gladiis cominus ferirent hostem; intra vallum compulsi sunt. At L. Sulla, ne iterum Chalcidem elaberetur Archelaus, quo prosequi eum inopia navium nequiret; toto campo stationes nocturnas disposuit. deinde, luce reddita, vix ad centum a castris hostium passus, fossam fodit: & magnam manum, quæ ad prohibendum opus procurrerat, ita rejecit, ut reliquis nulla deinceps ad erumpendum audacia superesset.

XXXIII. Cohortatus igitur exercitum Sulla, *ut adversum trepidos & imbelles armis potius, quam operibus, pugnarent, & convulsis, in quas se condidissent, latebris, belli reliquias uno impetu profligarent*; protinus ad oppugnandum Archelai vallum duxit. Neque regii præfecti stimulare suos omittebant: modo *dedecoris magnitudinem, si plures a paucioribus ne in munimentis quidem se defenderent, modo nullam, nisi in armis, spem salutis ostendentes*. Magno igitur clamore & impetu res utrinque gerebatur. & licet Romani, testudine facta, partem valli subruerant; densa tamen barbarorum acies strictis gladiis deterrebat irrupturos: donec Basilus

tribunus legionis primus omnium transcendit: & hoste cæso, exemplum reliquis viamque ad irrumpendum dedit.

XXXIV. Sic expugnata sunt Archelai ad Orchomenum castra: tanta iterum cæde, ut sanguine paludes infectæ, stagnumque in proximo cadaveribus oppletum referantur. Viginti millia hominum, in paludes compulsa, cum preces victoribus non intellectas funderent, inexorabilis Sullæ crudelitas delevit. Totidem alia in flumine periisse dicuntur: præter eos, qui in castris & circa passim sunt trucidati. Archelaus tamen evasit discrimen, paludum latebris per biduum occultatus: tertio demum die naviculam nactus, qua Chalcidem trajiceret. Ibi quidquid usquam regiarum copiarum propinquis regionibus agebat, summo studio contrahere conatus est, ut saltem Eubœam teneret, donec meliorem aliquam spem repetendæ Græciæ casus aliquis attulisset.

XXXV. Sulla postero die, quam prælio victor exstiterat, tribunum vallari corona, multos deinde alios militaribus donis cohonestavit, virtutis causa, & alioquin retinendæ exercitus voluntati pecuniæ profusus. Direptis deinde Bœotiæ oppidis, quotquot iterum ad regiones defecerant, & Anthedone, Larymna, Alæisque everfis, in Thessaliam hie-matum transiit: simul intentus in Flacci consilia, simul quæstorem expectans, quem ad classem adducendam emis-serat. Interim ipse fabricare ex præsentī copia naves instituit: quando neque Lucullus, neque certus aut constans de eo rumor adventabat.

XXXVI. Sed ille, postquam ad belli societatem adduci nequibat, navibus, quibus Cyprum deduceretur, acceptis, ex maritimarum civitatum, quas præter vela faciebat, auxiliis modicam classem collegerat: & vitatis piratarum infidiis, Rhodum appulsus, assumtis Rhodiorum navibus, Coos etiam & Cnidios, ut ejectis barbarorum præsidiis arma secum in Samios ferrent, impulerat. Eadem æstate,

§ XXXIII. Plut. Oros. Appian. Eutrop. § XXXIV. Appian.  
§ XXXV. Plut. in Lucull. c. 5. Appian.

qua bellatum in Bœotia erat, Mithridates, post primam Archelai cladem sævitia ingenita, & levitatem Asiaticorum, ne cum fortuna mutarent animum, veritus, occupare perfidiam alia perfidia, &, priusquam occasionem nocendi adipiscerentur, auferre potestatem statuit: suspectosque passim ut in manu haberet, operam dedit.

XXXVII. Ante omnia Gallogræcos, quotquot Tetrarchici generis erant, amicitiae specie Pergamum evocatos, fustulit: cum ipsorum insidias vix evitasset. Ad sexaginta numero convenerant, &, cum serviliter se haberi cernerent, conspiraverant in necem regis. Præcipuo robore Toreдорix quidam erat, Tosioporum tetrarcha. is Mithridatem in gymnasio jus dicentem, cum ipso tribunali in præceps daturus, cum forte eo die Mithridates in gymnasium non ascendisset, in suam domum convocatos, *bono animo esse iussit, & quamprimum data occasio foret, undique strictis mucronibus impetum in regem facere.*

XXXVIII. Sed, re detecta, Mithridates omnes cum uxoribus & liberis interfecit, sepultura quoque negata. Tres tantummodo fuga servati. Pecuniam omnem Mithridates diripuit: missoque, qui genti præesset, Eumacho, Gallogræciam in provinciae formam redegit. Sed qui effugerant reguli, quorum clarissimus Dejotarus diu post hæc tempora vitam regnumque produxit, collecta popularium manu, Mithridatis præsidia cum ipso præfecto expulerunt. Chios adhuc gravior calamitas oppressit. publicatis omnium bonis, qui profecti ad Sullam fuerant, deinde missis, qui in factionem Romanam inquirerent, postremo cum militari manu Zenobius affuit, dissimulato consilio, tanquam in Græciam trajecturus.

XXXIX. Is nocturno tempore muros urbis, &, si quæ alia apta defensionis loca erant, occupavit, &, præsidio ad portas collocato, per præconem *hospites quiescere, oppidanos in concionem procedere* iussit, mandata regis acceptu-



ros. Ubi convenerunt, nihil eos mirari debere, ait, si graviter iratum sibi regem audiant. Quanto quisque sit majoris animi locique, tanto agrius tolerare injurias, & concoquere iram possent. Mithridatem hac potentia, & his gestis rebus, iniquissimo animo laturum, si a parva civitate contemni putet, quem maximæ nationes, potentissimique reges colant.

XL. Plane constare, multos eorum cives Romanæ factionis esse: utrum autem invita, an vero volente civitate sint, non constare. At vero ea facta neque merito regis, neque ipsorum promissis respondere. Negari non posse, ipsius beneficio, quemadmodum & ceteram Asiam, gravissimo Romanæ dominationis jugo liberatam Chion esse. Atque hoc ipsos agnovisse a principio: regemque suis decretis liberatorem atque Deum appellavisse. Atque illum vicissim tribuisse multa: debitorum partem remisisse magnam; ex bonis damnatorum addidisse plurimum. Pro his meritis audire, Chios Romanorum esse studiosiores.

XLI. Id quamvis verum esse de universa civitate non patet: multos tamen eo crimine teneri, haudquaquam ambiguum esse. Veniam tamen daturum, arma & liberos principum obsides tradituris. Id adeo regis multo minus, quam Chiorum, interesse: neque illi, quam civitati, tanto odio esse debere, qui res novas moliantur. Quippe illius res defectione Chiorum non multo deteriores fore: at qui Chii regem inconciliant, certum patriæ suæ excidium meditari. Nam & insulam tantæ regis potentiæ resistere non posse: & quamquam in Bæotia victor Sulla exstiterit, non modo cum aliis exercitibus Mithridatis, quibus rex abundet, sed etiam cum civibus suis dimicaturam.

XLII. Jam in Græciam transcendisse L. Valerium consulem, Marianarum partium virum, neque dubitare posse, quin ibi locorum eadem sint exercituri odia, quæ domi & in Italia ostendissent. Chii, postquam hæc audiverunt, hinc necessitate, inde spe impulsæ, fecerunt imperata. Idcirco Zenobius Erythras misso, quod erat traditum, expectare Chios. literas regias jussit. cæque paulo post affuerunt, in hanc sententiam scriptæ. Nunc quoque Romanorum fautores esse pergitis, quorum

*adhuc non pauci in vestra urbe degunt: prædiorum quoque eorum exercetis, neque vestigal nobis eorum nomine penditis.*

XLIII. *Et navem quidem meam impulsu triremis-vestræ prope modum demersam, culpæ gubernatoris adscribi facile paterer, nisi vestros animos clam missi ad Sullam optimates arguerent: quod si publico consilio non esset gestum, nuntiare vos, &, delatis reorum nominibus, suspicione liberare civitatem oportuit. Vos igitur non imperio tantum meo, sed etiam salutis insidiatos, quamquam de sententia amicorum supplicio afficere debueram, duobus talentorum millibus mulctare malo. Trepidis ad hæc, &, ut ad regem legatos mittere liceat, orantibus, cum negatum a Zenobio esset; arma tradita, obsides datos, muros a barbaris insecutos reputantes, eo descenderunt, ut imperatam pecuniam penderent.*

XLIV. *Sed ubi, detractis funerum ornamentis, mulierumque collato mundo, ægre hanc summam confecerunt; Zenobius aliquid deesse ponderi cavillatus, adesse iterum in theatro universos iussit. inde cum theatrum viasque ad mare ducentes armatis sequebatur, nominatim evocatos præcipuum quemque, deinde ceteros ipsorum servis victos tradidit, ut in Colchos deportarentur. seorsim deinde à viris, ne quid acerbitalis atque ludibrii deesset, infirmiorum sexum ætatemque barbaris custodibus avehendos commisit.*

XLV. *Urbs Chiorum Ponticis colonis est tradita, agerque a Zenobio distributus. Ceterum partem navium, cum præterveheretur Heracliensem oram, exceperunt Heraclæotæ, quibus amicitia cum Chiis intercedebat: Chiosque in urbem suam receptos, donec confectus iis in patriam reditus fuit, hospitaliter secum habuerunt. Id primum in tanta clade solatium miseris fuit: proximum, quod Zenobium haud multo post poenam luisse scelerum compèrunt. Ephesum ille cum militibus appulerat, eadem omnia, quæ Chii, exempla editurus.*

§ XLIV. Memnon. Nic. Damascen. & Posidon. ap. Athenæ. 6, 28. Appian. Mithrid.

XLVI. Illi, nisi positis armis, & parvo comitatu recipere hominem recusarunt. qui ubi accepit conditionem, & apud Philopœmenem, cui rex gener urbis præfecturam commiserat, divertens, per præconem edixit, ut ad concionem populus conveniret. Ephesii, nihil non ingratum opperientes, rem in sequentem diem rejecerunt. Sed nocte, quæ intercessit, capto inter se consilio, arma corripuerunt; trusoque in carcerem Zenobio, & statim interfecto, centuriare multitudinem, & ex agris in urbem comportatis, quæ poterant, omnibus, adversus vim parare se instituerunt.

XLVII. Hæc audita Trallianos, Hypæpenos, Metropolitanasque impulerunt, ut eadem omnia facerent. Smyrnæi quoque Sardonique, & Colophonii, cum aliis quibusdam, exemplum Ephesiorum secuti sunt. At Mithridates, missis contra defectores exercitu, quotquot redigere in potestatem potuit, crudeliter afflicti; ut ceteros benevolentia retineret, *Græcis per Asiam urbibus libertatem edixit se concedere: porro, ne quod genus hominum regiæ munificentia expers foret, debitores æris alieni obligatione solvi, inquilinos cujusque urbis civium numero ac jure agere, manumitti servos, jubere.*

XLVIII. Hæc eo pertinebant, ut contra veterum civium dubios animos, hæc esset semper ad arbitrium regis parata factio: non ob acceptum modo beneficium, sed quia, auctore sublato, ne illud quidem sibi mansurum esse, intelligebant. Plures deinde contra Mithridatem initæ detectæque conjurationes fuerunt. Familiares regis Minionem & Philotimum Smyrnæos, & Lesbium Clysthenem Asclepiodotus, & ipse Lesbo oriundus, cum particeps ejus consilii fuisset, prodidit: abducto velut in secretum Minione, ut ipse rex post lectum abditus, de conjuratione agentem audiret.

XLIX. His ita deprehensis, quamvis omnia crudelitatis ingenia admovisset, ipse tamen sæpius animo discruciabatur, nihil jam, ne inter domesticos quidem, tutum f.

dumque inveniendo. Postquam autem etiam Pergami circiter octoginta viros idem propositum habuisse cognovit; in ceteris civitatibus non desere, qui similia molirentur, existimans, passim exerceri quaestionem prodicionis iussit. At quibus id negotium commissum fuerat, paucos ex merito, ceterum suos quisque inimicos sub ejus criminis invidia damnaverunt. Ad mille sexcentos suorum quique urbium principes ea pestis absumsit. quorum accusatores paulo post partim a Sulla comprehensi poenas luerunt; alii sua manu prævenerunt supplicii foeditatem: reliqui omnibus exosi, cum domi sperarent nihil tolerabile, Mithridatem in Pontum refugientem secuti sunt.

L. His tumultibus, & gemina suorum clade territus Mithridates, scripsit Archelao, *ut, quibus posset conditionibus, bellum desineret.* Ille, missio ad Sullam Deliaco negotiatore, cui & ipsi nomen Archelao erat, colloquium iis de rebus postulavit. Egit fortunæ suæ gratias Sulla, quæ ancipitem animi magno iterum aestu liberaret. Nam urbana modo negotia, modo Mithridaticum bellum respiciens, neque par ambobus erat, & utrum persequeretur, aut omitteret, paribus hinc inde momentis ambigebat. Navibus quoque & pecunia destituebatur: quæ neque domo mittebantur; & ex fanorum spoliis aut aliunde paratas jam absumferat.

LI. Cum igitur uterque paratos ad paciscendum afferres animos, haud ægre pepigerunt, *ut in mari circa Delium congregarentur.* Ibi prior Archelaus ita inquit: *Quæ rex meus, aliorum ducum injuriis avaritiaque compulsus, arma cepit, ea virtutem tuam admiratus cupit ponere, modo tolerabiliores ei conditiones ferantur. Tibi certe, cujus præsentiam urbanæ res tantopere desiderant, in promptu est, acceptâ rege pecunia, & navibus, & copiis, quanta postulaveris, ad ulciscendos inimicos uti.*

LII. Tum Sulla: *Siquidem injusta se passum Mithridates crediderit, legatos missos, & de injuriis quæstum oportuit: non*

vero aliena regna invadere, totque millibus occisis hominum, & quæ illi habuerunt, & excepta insuper mortalium casibus, Deorumque sacris dedicata, diripere. Neque vero amicis mitius, quam hostium acerbissimis usus, & aliorum interfecit plurimos, & quos mensæ suæ adhibere consueverat Tetrarchas, cum liberis & uxoribus, licet hostile nihil ausos, trucidavit. Sed ut aliena mittam, qualem in nos animum fuisse dicam, qui nullum in belli usum, sed altissimo tantum odio, quidquid Italici generis hominum in Asia fuit, cum tota familia, ne libertinis quidem exceptis, omni cruciata ignominiaque delevit?

LIII. Atque is idem repente noster amicus exstitit, non alio scilicet beneficio motus, quam quod plusquam centum sexaginta suorum millia nostris concisa manibus intellexit. Pro quibus in nos meritis haud erat iniquum, inexpiabilia posthac adversus eum bella geri. Sed tamen tibi pro eo deprecanti, hoc dabimus, ut veniam ei a senatu populoque Romano impetremus, si bona fide respiscat. Quod si, ut solet, utque ego magis opinor facturum, hæc ideo tantum agit, ut, dilato interim periculo, consilium ex eventu capiat: jam ego te, Archelæ, hortor atque moneo, ut fortunæ invitanti ad excelsa omnia ne desis.

LIV. Quemadmodum ille suos amicos remuneret, multorum jam malis discere potuisti: quæ nostra sit in socios fides, quæque liberalitas, ut alios taceam, Eumenes atque Masinissa satis & recentia & nota omnibus documenta sunt. Ad extremum eo prolapsus est, ut loco Mithridatis Archelaum regnare posse diceret, siquidem tradita sibi classe dedisset operam, ut benevolis Romanis uteretur. Sed ille adhuc loquentis abrupta oratione, proditorem, inquit, Sulla, Archelaum non habebis: amicum habebis, si æquis legibus pacem cum Mithridate feceris.

LV. Ad hæc Sulla paulo commotior, Tu vero, inquit, Archelæ, cum sis Cappadox, barbarique regis aut servus, aut, si malis, amicus (nec enim ego quidquam interesse putem) tantis propositis præmiis a turpitudine proditionis abhorres: me & Romanum & Sullam ad turpia fœdera sollicitas! quasi vero non

ille sis Archelaus, quem de centum viginti millibus hominum, cum paucis fugientem Charoneus vidit: quem Orchomenus stratum corporibus Bæotiam relinquentem, in paludum suarum latebris biduo texit. Territo ad hæc Archelao, & deprecante; ille, modico interposito silentio, *siquidem*, inquit, *omnem, quam habes, classẽ, duces, legatos, captivos, transfugas, fugitivos Mithridates tradiderit; Chios, & si quorum aliorum par causa est, civitatibus suis reddiderit; præsidia, nisi quibus locis ante bellum habuit, deduxerit; sumtus belli, cujus ipse conciator fuit, præstiterit; & patrio regno contentus, cetera, quibus oportebit, restituerit: spero, me ei delictorum veniam a populo Romano impetraturum esse.*

LVI. Ad extremum ita convenit: *Mithridatem Asia & Paphlagonia abstinere: Bithyniam Nicomedi, Cappadociam Ariobarzani reddere: Romanis duo millia talenta, cum septuaginta rostratis & cæni armamento dare. e diverso Sullam & reliquum ei regnum consummare, & auctorem fieri, ut socius amicusque populi Romani appellẽtur.* His ita pactis, Archelaus præsidia, quibus ipse præesset, continuo deducturum, de ceteris scripturum regi, recepit; atque interim seque & classẽ Sullæ tradere. Dum hæc ultro citroque geruntur, L. Valerius Flaccus cõsul, ut Sullæ succederet, missus, Brundisio solvit, statimque a principio, cum vix portu exisset, infelicis expeditionis quasi prænuntia tempestas pleraque naves solvit: aliasque præmissas præfecti Mithridatis incenderunt.

LVII. Reliquos cum invasisset fames, vix & ægre Byzantium, deinde fortuna jam prosperiore usi, in Bithyniam ad oppidum Nicæam pervenerunt. Eodem cum iis, quos ipse ducebat, C. Fimbria legatus accessit. Erat hic extremæ audaciæ homo consuli ignavo & rei militaris imperito adiutor datus. sed ea res utriusque vitiis cito in commune exitium vertit. Prævum ingenium consuli erat,

§ LVI. Diodor. ap. Fulv. Ursin. Plut. Appian. Liv. Epit. Memnon.

avarum, & ad supplicia præceps: quibus rebus benevolentia militum haud sane retinetur.

LVIII. Ergo præmissa pars eorum in Thessaliam, in Sullæ castra transit: ceteri, ne deficerent, aggre a C. Fimbria retenti sunt. Hunc enim ob simulationem virtutis & æquitatis exercitus diligebat: quod is contemptum pecuniæ præferebat; cum Flaccus inexplibili cupiditate, non contentus cetera in sinum suum condere, etiam annonam militum prædæque illis debitam partem, in lucrum converteret. Ab his initiis averfus a Fimbria consul, cum neque dictis, neque factis contumeliosis in eum abstineret, irritabile hominis ingenium, & ad audaciam semper projectissimum, vecordiæ contumaciæque implevit. Ea contentio, jam ex quo Byzantii convenerant, se exseruit: Flaccumque in urbem ingressum criminatus Fimbria est, *milites hiemante cælo extra mœnia viles contemptosque tendere: Flaccum pecunias per injuriam exercitus partas, luxu & deliciis intra tecta consumere.* tantumque seditionis commotum est, ut milites in urbem vi irrumperent, &, obviis quibusdam obtruncatis, suo arbitrio per domos distribuerentur.

LIX. Sed his utcumque compositis, in alterum annum dilata est seditio, quæ delatum auctoritate senatus imperium Flacco ademît, senatu inconsulto Fimbriæ dedit. Inter hæc censores in urbe L. Marcius Q. F. Q. N. Philippus, M. Perperna, lustrum septimum atque sexagesimum condiderunt, opera publica locaverunt, senatum recensuerunt. quo tempore Ap. Claudius a cenfore Marcio est præteritus (quamquam ei propinqua cognatione junctus esset) quod in partibus optimatum ille fuerat. Idem censor aquæ Marciae ductum bello sociali disturbatum refecit. Civium Romanorum censa tum capita sunt CCCCLXIII millia: princeps senatus L. Valerius Flaccus gentilis consulis Flacci lectus est.

§ LVII. Liv. Epit. Appian. § LVIII. Diodor. ap. Valef. Liv. Epit. Memnon. § LIX. Fasti Capitol. Cic. Verr. 1, 53. & pro domo c. 32. Euseb. Liv. Epit.

LX. Sub hoc tempus cum omnia in urbe incerta, & neque legi quidquam, neque mori relictum esset; qui dominationem obtinebant, eo cogitationes omnes converterant, ut L. Sullæ, quem suæ publicæque rei vindicem metuebant, resisterent. Igitur L. Cinna se tertium, cum Cn. Papirio Carbone consulem ipse fecit. Horum impotens tyrannis adeo multos principum virorum ad Sullam se recipere coegit, ut amplius in castris ejus, quam in ipsa urbe senatus instar esset.

LXI. Hæc dum alibi fiunt, procensulem Asiæ Flaccum Fimbriana tandem audacia imperio vitæque exiit. Forte de hospitio quæstori consulis cum legato C. Fimbria lis inciderat. Flaccus multa cum legati contumelia secundum quæstorem dedit: deinde Fimbriæ discessum minitanti, *discessurum esse, vel invitum* respondit: mox contra convicianti, adempta legatione, successorem dedit. Ille, tempore observato, quo Chalcedonem proficiscendum fuerat, quasi salutaturus in discessu commilitones Byzantium divertit. Multa ibi oblique in avaritiam & crudelitatem Flacci jactasse constat, militibus, ut sibi prospicerent, per speciem benevolentiae monitis. Deinde, postquam hæc ad intimos animos demissa, seque in ea apud omnes opinione esse sensit, ut plerumque opem salutis in ejus præsentia ponerent; consensu suggestu, aperte incusare Flaccum *proditionis* cœpit: *neque aliud immuni avaritia hominem agere, quam ut, accepto a Mithridate auro, milites cadendos vinciendosque præbeat.*

LXII. Iis causis ita exarsit proclivis alioquin in seditionem concio, ut Thermum proprætore a Flacco relictum ademptis fascibus ejiceret. Fimbria, gratis militi actis, tanquam vicem redditurus beneficii, res fociorum agi ferrique, redigi in servitutem obvios, alia contra disciplinam

§ LX. Appian. civil. i. 1. Auctor de Vir. ill. c. 29. Liv. Epit. Diodor. Plut. in Sull. c. 44. § LXI. Appian. Mithrid. Diodor. Auctor de Vir. ill. c. 70.



feri passus, paucis diebus opulentos ex pauperibus effecit. Sed quorum raptæ res hominesque fuerant, obviam profecti Flacco, graviter de injuriis suis querendo, proconsulem jam ante Fimbriæ infestum ita accenderunt, ut *sequi eos juberet, sua statim recepturos*. Ubi ad castra ventum, multis cum minis imperavit Fimbriæ, *ut ablata dominis restitueret*. ille culpam in milites conferens, *se invito, quod esset factum, accidisse* præferebat: nec minus clam instigabat audacissimum quemque, *rem acerbam indignamque* dictitans, *auferri militibus ab imperatore, quod suis laboribus & belli jure quæsiuissent: neque se eis auctorem esse, ut quidquam earum rerum redderent*.

LXIII. Igitur Flacco jam in omnes, & ut quisque loco præstabat, minacius invehente, magnus in castris tumultus excitatus est: donec metu profugus proconsul, ex ædibus, ubi se occultaverat, noctu superatis mœnibus, primo Chalcedonem, deinde Nicomediam se proriperet, clausisque oppidi portis, vim extremam arcere conaretur. Sed Fimbria nihil cunctatus, trajecto freto, proconsulem insequens, obiter prædam agebat ex agris, pecuniam imperabat civitatibus, qua inter milites distributa, benevolentiam sibi manipularium compararet. Quod si quod oppidum jussa detrectaret, diripiendum exercitui præbebat.

LXIV. Itaque Nicomediam perventum est. quam & ipsam militi concessit in prædam: proconsulemque e puteo protractum privatus, & majorem amicum comes occidit. Imperium militari consensu in Fimbriam translatum, licet pessimi exempli res & esset, & videretur, senatus temporibus servire coactus ratum habuit. Talis ferme ea tempestate rerum ubique facies erat: Mithridates multa & faciebat acerba, & patiebatur: ingentes exercitus amiserat: insidiis, etiam amicorum, petebatur. Græciam Romani simul regique; Lydiam, Joniam, & conjunctas his provincias,

§ LXII. Appian. Diodor. ap. Vales. § LXIII. Appian. Orof. 6, 2. Diodor. Liv. Epit. Memnon.

Pontici regis ira vastabat. Macedoniam Thraces populabantur. Piratæ invaserant maria. Romani, & cum aliis, & inter se discordes, suas ipsi victorias, sua arma horrebant. multiplex omnino, & perplexum malum Europam Asiamque communi calamitate involverat.

· § LXIV. Liv. Epit. Flor.



# JOANNIS FREINSHEMII SUPPLEMENTORUM LIVIANORUM

LIBER XLVIII.

IN LOCUM LIB. LXXXIII LIVIANI.

## EPITOME

LIBRI OCTOGESIMI TERTII.

*C. Fimbria in Asia, fufis prælio aliquot præfectis Mithridatis, urbem Pergamum cepit, obfeffumque regem, non multum abfuit, quin caperet. Urbem Ilion, quæ fe potestati Sullæ refervabat, expugnavit ac delevit, & magnam partem Asiæ recepit. Sulla multis præliis Thracas cecidit. Cum L. Cinna & Cn. Papirius Carbo, ab fe ipsis consules per biennium creati, bellum contra Sullam pararent, effectum est per L. Valerium Flaccum principem senatus, qui orationem in senatu habuit, & per eos, qui concordia studebant, ut legati ad Sullam de pace mitterentur. Cinna ab exercitu suo, quem invitum cogebat naves conscendere, & adversus Sullam proficisci, interfectus est. Consulatum Carbo solus gessit. Sulla, cum in Asiam trajecisset, pacem cum Mithridate fecit, ita ut is cederet provinciis Asia, Bithynia, Cappadocia. Fimbria, desertus ab exercitu, qui ad Sullam transferat, ipse se percussit: impetravitque de servo suo, præbens cervicem, ut se occideret.*

I. **C.** FLAVIUS Fimbria imperium copiarum, quo diximus modo, nactus, non sicut ambitiose erga milites, injuste adversus socios, sic etiam timide atque negligenter contra hostem administavit. Filium suum Mithridates patri cognominem cum ingenti exercitu Bithyniam tueri jusserrat, Taxile & Diophanto, & Menandro, claris bello ducebibus adjunctis. Ab his primum repressus, nec sine detrimento, Fimbria, mox aliquot præliis superior, res regis prope desperationem ultimam adduxit, non animo tantum adversus fortuita casuum, sed etiam consilio bonus.

II. Quod enim numero militum longe erat inferior, astutem inclinatam restituit: ductisque ad latera castrorum brachiis, fossa in fronte facta, quietum in vallo militem tenuit: donec regium equitatum temere in angustias munimentorum ingressum improvisa eruptione sic excepit, ut sex hostium millia desiderarentur. Iterum ad Miletopolim, juxta quam Rhyndacus fluvius oritur, tali loco castra metatus, ut inter ipsum & regiones flumen interesset, cum forte circa solis ortum ingens pluvia securiores hostes fecisset, raptim transducto exercitu, sopitos plerosque & inermes adortus, ingentem stragem edidit, plena & illustri victoria potitus. Mithridates cum præcipuis ducum, & mediocri equitum manu, citra non ausus consistere, contenta fuga Pergamum ad patrem pervenit.

III. Post hoc prælium passim deficientibus a rege populis, occasionem adeptus est Fimbria, ut crudelitatem suam avaritiamque satiare. Tantus enim humani sanguinis appetitus inerat, ut passim multos non ex merito, neque in aliquam populi Romani utilitatem, sed animi causa occideret. Semel complures erigi palos jusserat, ubi alligati verberarentur, quos damnaverat. Sed cum adducti illi essent, minorque aliquanto numerus, quam crucium esset, apparuisset; ne frustra fixæ viderentur, *e media tur-*

§ I. Appian. Memnon. Liv. Epit. § II. Front. Strat. 3, 17. Orof. 6, 2. Plin. 5, 32. Memnon.

*ha corripit ad numerum, & ad vecuos palos religari praecepit.*

IV. Cyzicum cum pro amico intrasset, opulentissimos oppidanorum proditoris crimine insimulatos, in maximum terrorem conjecit. Deinde ad hunc augendum, ex omni numero duos damnavit, virgisque caesos securi percussit. hoc metu facile adegit ceteros, ut vel univerforum bonorum jactura salutem ab avarissimo saevissimoque latrone redimerent. Ad hanc formam constitutis ubique provinciarum rebus, adversus ipsum regem Pergami sedentem ducere statuit: occurrentemque fudit fugavitque, & in oppidum se recipere coegit. Deinde ne Pergami quidem resistere ausum, capto oppido, Pitanen, quo ille profugerat, infecutus, circumvallare obsessos orsus, parum ab ipso rege capiendo abfuit: nisi, quod fortuna videbatur obtulisse adjumentum, L. Luculli averfus animus invidisset.

V. Is jam, dimissa Rhodiorum classe, tantum paraverat propriarum virium, ut Chio regios ejiceret: Colophonios, comprehenso tyranno eorum Epigono, assereret in libertatem. Hæc gerentem legati a Fimbria adeunt, omni obtestatione instantes, *ne a se obsessum regem clarissimum eundemque infestissimum Romano nomini elabi pateretur. Esse ipsi classem ad prohibendum mari exitum: a terra jam ita provisum, ut non possit evadere.* Facilis erat labor obsidere portum: periculum nullum, gloria amplissima offerebatur: tamen Lucullus, siue amicitiam Sullæ omnibus anteponendo, siue interfectorem amici & imperatoris sui detestatus, postulata Fimbriæ neglexit.

VI. Mithridates, conscensis navibus, Mitylenen auctus est. Fimbria, jam confessione hostis victor, obibat Asiam, acerbe in vitas, in fortunas hominum consulens, quos Mithridati studuisse cognoverat, aut videri volebat. Si quæ recipere eum civitates nollent, eorum agros inultus populabatur. Sic ventum ad Ilium est. quod cum obsessum a

§ III. Diodor. ap. Valef. § IV. Plut. in Sull. c. 47. & Lucull. c. 6. Appian. Vellej. 2, 24. Auctor de Vir. ill. c. 70. Liv. Epit. § V. Oros. 6, 2. Plut. Appian.

Fimbria confugisset ad Sullæ fidem, venturumque se Sulla promississet, idque significandum Fimbriæ curasset; tanto infestior ille, machinis admotis, undecima die oppidum expugnavit. Sunt, qui dolo illectos Ilienſes aperuisse portas referant, laudanti consilium eorum, *nihilque referre dicenti, postquam in Romani populi fide essent, utri se imperatori traderent. etiam cognationis necessitudine commemorata, indignum dicebat, se Romanum hominem ducemque antiquæ patriæ manibus arceri.*

VII. Quoquo modo ingressus fuerit, sævissimum truculentissimumque hostem in ea urbe gessisse constat. Nam & omnes, qui occurrerant, promiscua cæde stravit, & oppidum incendio delevit funditus: eos autem, qui legati ad Sullam fuerant, exquisitis cruciatibus consumpsit, adeo ne facris quidem parcens, ut multos, qui confugerant in Minervæ, cum ipso templo concremaret. Muris quoque dentis, postridie visum ivisse dicitur, ne qua forte pars urbis integra intactave remansisset. Quo minus fidei habendum putem miracula narrantibus, *inviolatum Minervæ templum stetit, neque dubitatum, quin divina majestate defensum esset.*

VIII. Sane *sedem ejus*, (*Palladium* vocari usus obtinuit) *amotis, quibus obrutum fuerit, ruderibus, integram inviolatamque stetit*, fuerunt, qui dicerent: multum irridentibus, qui arcanum idem ab Ulyssæ & Diomede ablatum credi, & præterea Romæ, & Lavinii, & Luccriæ, & Siritide, & Argis ostendi noverant. Hoc infortunium Ilienſes subierunt, cum inter duos imperatores ad potioſorem magis, quam ad propioſorem, respexissent. Sulla enim bellum eo tempore cum Thracibus gerebat, continuo Macedoniam incurſantibus: quo simul immanium gentium coerceret injurias; simul, dum a Mithridate nuntios expectat, & exerceret militem, & ditaret.

IX. Igitur cum multis præliis Henetos, Dardanos, Sin-

§ VI. Liv. Epit. Appian. Strab. l. 13. Diodor. § VII. Diodor. Liv. Epit. Appian. Auctor de Vir. ill. c. 60 & 75. Jul. Obſeq. c. 116. Strab. l. 6. Pausan. l. 2. § VIII. Liv. Epit. Eutrop. Appian. Tacit. Ann. Vellej. 2, 25.

tos, Scordiscos, finitimosque populos concidisset; agros populatus, prædaque militibus concessa, in Macedoniam est regressus. Sub hæc tempora, Cinnae Carbonisque consulum sæva dominatio, plures subinde claros viros ad Sullam confugere compulit, reipublicæ periculum, & miserandum urbis statum nuntiantes: simul haud levi spe interjecta, fore, ut consiliis adversariorum senatus resisteret, siquidem auctoritate Sullæ juvaretur. Quippe L. Cinna sine ullis comitiis tertium consul, Cn. Papirium Carbonem ducem ejusdem factionis, collegam asciverat.

X. Igitur dedit ad senatum literas, quibus, enumerato, *quantum in Numidia quaestor pro republica, quantum legatus bello Cimbrico, & deinde prætor in Cilicia, belloque sociali consul laboris exhausisset; res adversus Mithridatem gestas, domitarumque gentium numerum & ferociam extollebat: postremo multis & accuratis verbis imputabat, se tot clarissimis viris, inimicorum factione domo pulsus, perfugium solatiumque existisse. At sibi non aliam pro ejusmodi meritis gratiam, quam proscriptionem capitis, eversionem domus, cædes amicorum, fugam uxoris liberorumque referri; qui vix & ægre incolumes ad se pervenire potuissent. Venturum igitur sese propediem ultorem malefactorum, & qui ea perpetrassent. ceterorum vero civium, veteres novive forent, incusaturum neminem.*

XI. Ad has literas, cum nova sollicitudo perturbaret omnium animos, L. Valerius Flaccus senatus princeps luculentam de præsentibus orationem in curia habuit: & assentientibus, quibus concordiae studium erat, auctor mittendi ad Sullam legatos fuit. His mandatum, *ut conciliare cum inimicis studerent: peterentque, ut, si quid caveri sibi fide publica vellet, quamprimum ea de re literas ad senatum mitteret.*

XII. Cum consulibus idem senatus egit, *ut interea, dum de voluntate Sullæ rescitum esset, a delectibus abstinerent: neve spem pacis cum civibus corrumpere.* Nam illi, dimissis per universam Italiam perquisitoribus, pecuniam & co-

pias, & annonam undique contrahebant; opulentissimum quemque sollicitantes, eorum maxime populorum, qui nuper adepti jus civitatis Romanæ fuerant: quod *illorum causa omnia & facere, & pati* dicerent. Classem etiam instruebant, accitis insuper e Sicilia navibus; oramque omnem maritimam custodiebant: metu & cupiditate, duobus validissimis stimulis, nihil ad exactissimam diligentiam reliqui facere cogentibus.

XIII. Igitur, quantumvis *in arbitrio senatus se fore* Cinna promiserat, id modo expectans temporis, dum legati proficiscerentur, ad ingenium rediit; & quia non unius anni laborem se suscipere intelligebat, seque & Carbonem consules in biennium creavit, ne comitiorum causa reverti in urbem necessum haberent. Quidquid deinde cogere militum undelibet poterant, in Liburnos præmittebant, quod inde maxime advenienti Sullæ constituerant occurrere. Et primum quidem præmissorum agmen prospero cursu trajectum est: sequens tempestate ad litora rejectum: militesque, exscensione facta, bellum civile detestati, suas quisque domos repeterunt.

XIV. Hujus rei fama cum late sparsa esset, jam nemo erat, qui conscendere navem vellet. Idcirco Cinna, jam quartum consul, Anconam, ubi magnæ congregatæ copiæ erant, accurrit, ut minaci oratione territos, vel invitos in naves imponeret. Nesciebat ille, sua sui que similium opera tantam esse factam morum depravationem, ut occidi a militibus imperatorem, quia novum non erat, ne magnum quidem crimen haberetur. Erant præter alias causas exacerbati militum animi, quod Pompejus adolescens, cum in castra Cinnæ fuisset profectus, calumniam, & ex calumnia periculum fugiens, ignoratus se subduxerat: militesque clam sublatum suspicabantur.

XV. Sic exacerbatae multitudini cum se Cinna objecisset, forte accidit, ut licitor, dum in concionem eunte con-



fule turbam submovet, militem contemtim resistantem pulsaret, vicissimque ab alio milite percuteretur. Ibi, cum accensus ira consul percussorem corripere juberet, hoc initium tumultus fuit: sublatoque clamore omnium, lapides conjici cœperunt. Tum vero fugientem Cinna quidam centurio affecutus, ad genua sibi accidentem, annulumque magni pretii offerentem, stricto gladio confodit: *non ad signandam sponfionem, sed fœdissimi tyranni puniendi causa se adesse*, præfatus.

XVI. Occiso Cinna, Cn. Carbo præsentibus haud fane lætus, revocatis e Dalmatia militibus, dominationem retinere nihilo modestior Cinna conabatur: neque tribunis plebis ad comitia habenda redire jubentibus obtemperabat, donec se magistratum ei abrogaturos sunt minati. Sed comitia, licet repetita, sine successu fuerunt: semel avibus non addicentibus, in aliam diem; iterum, quia Lunæ Cererisque tacta de cœlo fana erant, ex haruspicum responso, post solstitium dilata. Ne tum quidem suffectus quisquam est, totoque anno consulatum Carbo solus gessit.

XVII. Interea Sulla ordinandis Græciæ rebus per Thessaliam incedens, propter Archelai morbum, Larissæ per aliquot dies substitit: ejusque non secus egit curam, ac si legatus, aut collega foret. unde rumores orti, *non optima fide pugnatum in Bœotia esse; præmiumque proditiōis hoc Archelao dari: quemadmodum non alia de causa necatus unus omnium Mithridatis amicorum Aristio foret*, (ceteros enim accepta classe Sulla dimiserat) *Archelao discors*. Etiam appellatus ab Sulla socius & amicus populi Romani Cappadox, acceptis insuper decem millibus jugerum agri Euboici, in eandem suspicionem trahebatur. quæ Sulla ipse in commentariis suis relata diluit.

XVIII. Per Thessaliam deinde & Macedoniam ad Hellespontum ducenti occurrerunt legati Mithridatis, *ceteras*

§ XV. Plut. Appian. § XVI. Vellej. 2, 24. Liv. Epit. Plut. in Sull. c. 46. Diodor. ap. Fulv. Ursin. § XVII. Strab. l. 9 & 12. Plut. Appian. Mithrid. Diodor.

*conditiones probare regem nuntiantes, sed Paphlagoniam excipere: de navibus etiam promissum nihil arbitrari. addiderunt deinde, æquiores se conditiones impetrare ab altero imperatore C. Fimbria potuissē. Hoc præcipue dicto exacerbatus Sulla, & Fimbriam pœnas daturum respondit; &, simul in Asiam trajecisset, apparituum, bello an pace Mithridates opus habeat. cui ego, inquit, si dextram reliquissē, qua tot civium Romanorum interfecit millia, præcubitum ad genua mea arbitrabar: nedum ut de Paphlagonia, de navibus neget.*

XIX. Legatis ad hæc obmutescētibz, deprecari Sullam Archelaus cœpit, dextramque amplexus petere, *ut se ad regem proficisci sineret, quibus dedisset legibus relaturum pacem; aut si hoc impetrare nequivisset, sua semetipsum manu intererenturum.* Ita dimisso Archelao, expeditionem in Medicam (Thraciæ regio est) Sulla fecit: eaque late vastata, in Macedoniam est regressus. Apud Philippos agentem Archelaus convenit, omnia ex animi sententia esse dictitans, *ceterum colloquium ejus enise expetere Mithridatem.* Nam ille Fimbriam bello ferocem, pactis infidum metuens, Sullæ amicitiam optabat.

XX. Igitur Sulla, per Thraciam ad Cypsela terrestri itinere pergens, L. Lucullum cum navibus præstolari ad Abydum jussit. Quippe Lucullus, circa Lecton Troadis regiis classibus subito occurſu profligatis, deinde Neoptolemo ad Tenedum fugato, feliciter ad Sullam penetraverat. Postquam in Chersonesum exercitus pervenit, Lucullo tutum transitum, & naves præstante, ad Dardanum Troadis Romanus processit. Eodem & Mithridates cum navibus ducentis advenit, & gravis armaturæ viginti millibus, sex millibus equitum, magnoque currum falcatorum numero.

XXI. Sulla legiones quatuor, equites ducentos adduxerat. Paucis utrinque comitibus, in conspectu tamen exercituum, in campum colloquio destinatum prodierunt. Prior Mithridates, cum venienti Sullæ occurrens dextram por-

rigeret, interrogatus ab illo est, *positurusne arma esset, quibus conditionibus Archelaus pepigisset?* deinde, silente rege, atqui deprecantium est, inquit, *priore loco dicere: victoribus vel tacere satis est.* Ibi Mithridates, *repetita patris suaque cum Romanis amicitia, quam Deorum quædam invidia sibi propriam perpetuamque esse noluiisset, ad accusationem legatorum ducumque vertit, qui multa cum injuria sua Cappadociam Ariobarzani reddidissent, sibi ademissent Phrygiam, Nicomedis iniquis conatibus favissent.*

XXII. *Quæ omnia, inquit, sola pecuniæ cupiditate sunt ab ipsis facta, quam semper aut a me, aut ab inimicis meis accipiebant. quæ quidem res, si qua alia, jure meritoque in vobis arguitur, Romani, quod tales plerumque imperatores emittitis, qui nihil melius aut antiquius esse lucro putent. Ab his constas arma indui: quæ si qua parte vobis infestiora, quam voluissetis, fuerunt; id omne non animo meo, qui, dum licuit, Romani nominis amans reverensque fuit, sed necessitati, imputari æquum est.*

XXIII. Ad hæc Sulla: *Quod ab aliis accepi, te esse disertissimum, id nunc coram experior, cum in factis atrocissimis speciosa tibi non deest oratio. Sed quamquam non in hoc convenimus, ut disceptaremus controversias, verum ut leges petitæ pacis impleres: non gravabor paucis respondere. De Cappadocia non erat, ut absentibus inclementer diceres: nam Ariobarzanem, si nescis, & ego reduxi. Tum igitur causari qualibet oportuit, si jussui senatus populi que Romani obtemperare nolles: non tanto post tempore, cum decretis acquiesces, convellere, quæ semel approbaras. Phrygiam Manius Aquillius, donis emtus, patri tuo concesserat: quod commune vobis delictum, frustra in illum transferre nifus es: sed & ista, & quæ præterea pecunia corruptus multa Manius egerat, senatus irrita esse jussit omnia.*

XXIV. *Neque tamen, injusto possessore depulso, nobis recipimus Phrygiam, ne, quod in aliis damnamus, ipsi facere videremur; sed immunum liberamque pronuntiavimus. Quæ igitur nos, licet justo pioque bello quæsitæ, relinquimus, ea tibi quo*

*tandem jure vindicabis? De Nicomedis injuria quereris. Sed ille percussorem sibi Alexandrum, deinde amulum regni Chrestum immisos esse, atque his causis adscribendum, quod in fines tuos irruerit, testatur. Quamquam etiam missis Romam legatis, expectare senatus responsum poteras, siquidem a Nicomede laesum te esse putavisses. Sed de Nicomede esto: vim inferentem vi repuleris! quæ fuit Ariobarzanis injuria, quem haud minus, atque Nicomedem, sui regni finibus exegisti?*

XXV. *Atque hoc cum faceres, non te latebat, fore, ut qui in Asia tum legati ducesque Romani erant, pulsus reducerent. Sed hoc agebas, ut bellum oriretur, quod spe obtinendi terrarum orbis imperium, siquidem Romanos superasses, jam olim eras meditatus. Nisi forte tam parum videre ceteros arbitraris, ut, cum nullo adhuc cæpto bello, Scythas, Thraces, Sarmatas societate jungeres, circum regna finitima legatos mitteres, naves edificares, prætoras gubernatoresque ex longe dissitis gentibus arcesseres; nemo intellexerit, quorsum ista pertinerent?*

XXVI. *Quasi vero consilium tuum ipse temporum status non prodiderit, quod nobis defectione sociorum occupatis, ab ultimo Ponti sinu, tanquam captatis ad hoc latebris, astutus insidiator erupisti. Neque Cappadoces tantum & Bithynos, sed Galatiam, sed Paphlagoniam, Asiam denique, non ignarus nostræ ditionis esse, invasisti. Quibus in terris quid tandem a te feceris, aut crudelitatis prætermisissimum est? Taceo civitates mancipiis aut obæatis traditas, ut, quibus obnoxii esse debebant, his imperarent. de Græcis Asiaticis nihil dico, quorum principes mille sexcentos uno prodicionis obventu trucidasti. Gallogræcorum sepulta sit memoria: quamquam corpora sepultura prohibuisti, cum socios tuos & hospites, communi mensæ adhibitos, miserabiliter occidisses.*

XXVII. *Cujus animi fuit, quod Italos omnes cum liberis & uxoribus uno die ferro aut aqua sustulisti? quo quidem tempore ne sacra quidem & veneranda loca præsidio pereuntibus esse potuerunt: tantum te populi Romani tenebat odium, ut, dum nobis nosceres, nec humani, nec divini juris ullius meminisses.*

*Et horum quidem etiam bonis raptis, contra edictum nostrum, quod Asiaticos reges Europa prohibet, trajecisti, Macedoniam incurcasti, Græcis abstulisti libertatem. neque ante ad mentem reversus es, quam Macedonia Græciaque receptis, centum sexaginta tuorum millia occidi, castra omni apparatu belli instructissima semel iterumque cepi.*

XXVIII. Quæ omnia cum animo meo obversantur, rationem consilii tui non expedio, quod eorum nunc purgationem instituisti, quorum antea per Archelaum veniam petiveras. An igitur, quem procul agentem timebas, cum huc venisse reris, ut tecum iudicio contenderet? sed ejus rei quidem tempus olim præterit, ex quo tibi bellum inferenti restitimus, & donec opus erit, resistemus. Idcirco his omissis, quod unum scire interest, responde, pacem cum Archelao factum accipis, an recusas? Mithridates iracunda Sullæ oratione territus, accipere se respondit. Tum demum salutavit eum Sulla, amplexusque & osculatus est.

XXIX. Ariobarzanem deinde & Nicomedem accitos Mithridati conciliavit, reditumque iis in sua regna confecit. *Asium Romanorum esse, ita ne cui civitati descivisse ad regem fraudi esset.* convenerat. id non integre servatum, multasque postea urbes tributarias esse factas, Memnon ex Heraclea Pontica scriptor tradit, in partes regias ob communem patriam proclivior. Idem tria talentorum millia Sullam a Mithridate accepisse memorat, ut domum reverteretur. Naves regem septuaginta cum quingentis sagittariis, itemque captivos tradidisse (in quibus & Q. Oppius, & L. Cassius; nescio quo casu, redactus in potestatem hostis, fuerunt) & si quæ alia ex fœdere debebantur, fecisse satis constat: deinde in paternum regnum, cujus ipsi confirmatum eadem pace jus erat, redisse.

XXX. At Romanus exercitus indignabatur, quod dimissus e manibus rex omnium sævissimus, rominique Romano infestissimus, coactam ex opulentissimis Asiæ regionibus toto quæ-

§ XXVII Plut. in Sulla c. 49. Appian. Memnon. Flor. 3, 5; Liv. Epit. § XXIX. Plut. Vellej. 2, 23. Appian.

*driennio prædam, in patrium regnum sospes incolumisque reportaret: donec, advocata concione, reddidit consilii rationem Sulla, docuitque, si Mithridatem, pace denegata, ad Fimbriæ petendam amicitiam compulisset, veritum fuisse, ut ambobus satis posset resistere. nunc amoto hoste externo, pænæ de seditioso cive tuto sumendæ otium esse. Movit deinde versus Thyatira, ubi, castris positis, Fimbria confederat: & cum ad pedes ducentos quinquaginta castra castris contulisset, jussit eum imperio cedere, quod contra leges obtineret.*

XXXI. Ille vicissim irridens, *Sullam potius cedere jussit, qui hostis esset patriæ judicatus.* Sed ubi Sulla circumvallare castra Fimbriana cœpit, crebri ad eum milites transierunt, Sullanosque in opere faciundo adjuverunt. Igitur Fimbria in concione militum sortem suam prolixè miseratus, orat, *ne deserant, neve, quem ipsi imperatorem fecissent, optime de se meritum hominem, rebus præclare gestis, milite ditato, injuria affici paterentur.* Nullum infirmius ad fidem vinculum est, quam quod societate scelerum adstringitur; nec aliud citius aut pœnitentia tolerabilem, aut levitate perditorum mutabile.

XXXII. Et non deerant, qui spe præmiorum a Sulla corrupti, ceteros etiam ab obsequio Fimbriæ avellerent. Igitur passim tota concione clamores audiuntur, contra cives arma sumere negantium. Tum ille de tribunali desiliens, scissa tunica, singulorum pedibus advolvitur. Id quoque frustra factum: tantoque plures palam transfugerunt. Ergo Fimbria tribunorum præfectorumque circumitis tentoriis, multaque pecunia distributa, cum iterum vocari concionem jussisset, jusjurandum a militibus exigere cœpit. Occlamatum a quibusdam est, *nominatim singulos ad jurandum citari oportere.*

XXXIII. Tum ille Nonium citari primum omnium jussit, in quem plurima beneficia contulerat, omnium consiliorum facinorumque participem. Sed iste quoque jurare

abnucebat: & cum Fimbria stricto gladio necem intentaret homini, fremitu concionis est deterritus. Igitur in tantis rerum angustiis, cum incolumi Sulla se incolumem esse animadverteret non posse; fervorum aliquem, nummis datis, promissaque libertate, induxit, ut ad Sullam interficiendum specie perfugæ proficisceretur. Sed insidiæ cum minimum a patratione abfuissent, trepidatione primum infidiatoris, deinde correpti ob hanc tormentis patefactæ sunt.

XXXIV. Tum vero accensus ira Sullanus exercitus circumstetit Fimbriæ vallum, *Athenionem* appellando, quo nomine nuper in Sicilia fugitivus quidam paucorum dierum regnum obtinuerat. Idcirco Fimbria, spe abjecta resistendi, progressus in vallum, colloquium Sullæ cœpit exposcere. Sed Rutilius affuit, sævum Fimbriæ omen, qui nihil jam ex eo læti augurabatur, quod ne in colloquium quidem Sullæ admitteretur, rem nec hostibus denegari solitam. Orsus tamen excusationem & preces, *si quid peccavisset, id adolescentiæ suæ condonari* petiit. Responsum est, *Asiæ proconsulem Sullam esse: si vellet aliena provincia decedere, tutam ei profectiorem ad mare beneficio Sullæ fore.*

XXXV. Ille *viam sibi meliorem patere* interfatus, abrupto colloquio Pergamum ivit, ingressusque templum Æsculapii, gladio se transfixit. deinde, quia vulnus letale non erat, a servo petiit, ut se occideret: servus & dominum, & super domini corpus semetipsum interemit. Sulla, cognito Fimbriæ exitu, petentibus libertis cadaver ad sepulturam reddidit; *nolle se Cinnam atque Marium æmulari* dictitans, *qui plerisque Romæ interfectos humari vetuissent.* Comiter deinde receptis Fimbrianis copiis, quæ consensu ad eum transibant, suoque exercitui junctis, Curionem misit, qui Nicomedem atque Ariobarzanem reges in regna reduceret.

XXXVI. Deinde senatui de rebus omnibus scripsit, ho-

stem se judicatum esse dissimulans. His ita ex animi sui sententia compositis, veluti per otium ordinavit Asiam: & Ilientium urbem instauratam multis beneficiis consolatus, libertati & suis legibus reddidit, populique Romani socios & amicos appellavit. Pari liberalitate Chios, Rhodios, Lycios, Magnetas, & si qui alii contra regem auxilia tulerant, aut ob studium Romanarum partium acerbè fuerant ab eo tractati, recreavit. Reliquas urbes omnes, distributo ubique exercitu, oneravit praesidiis, non ad veterem disciplinam; sed omnis generis licentia militi permissa. praeterea edixit, *ut unicuique gregario quotidie denarios sedecim hospes penderet: cenamque daret & ipsi, & sodalibus, quotquot vocare militi placuisset. centurionibus quinquagenas in diem drachmas praebere iussit, vestemque duplicem, ut haberet, quae domi, quaque in publico uteretur.*

XXXVII. Ab his initiis urbium vitia in exercitum & horridos antea milites fluxerunt. ibi per amœna loca in otio habiti, amare, potare, signa tabulasque pictas & vasa cœlata mirari didicerunt, eaque mox publice privatimque rapere, spoliare delubra, sacra ac profana omnia polluerè. Multum deinde sanguinis passim in Asia fusum, urbiumque nonnullarum mœnia diruta, ager subhastatus est, quia contra edictum Sullæ praestitam a Mithridate libertatem servis defenderant. Quotquot autem privatorum civitatumve, regiarum partium paulo cupidores fuisset dicebantur, praeter ceteris graves multas pendebant: Ephesi ante omnes, quorum praecipua vesania eo proruperat, ut etiam donaria Romanorum cum ludibrio templis detraherent.

XXXVIII. Postremo missis circum populos Asiæ praconibus, Ephesum convenire iussi sunt principes. ad quos e tribunali Sulla talem orationem habuit: *Prima Romani signa in Asiam ea tempestate intulimus, qua vos Antiochus Syriae rex acerbis hostis aut gravis dominus urgebat. Hoc*

§ XXXVI. Orof. 6, 2. Strab. l. 11. Appian. Plut. Sallust. Catilin. c. 11.



*ultra Halyn & Taurum exacto, non ut bello quæsitos imperio nostro subjecimus, sed libertatem dedimus omnibus: nisi quos Eumeni Rhodiisque belli ac victoriæ sociis, clientes magis, quam tributarios concessimus. quod quidem manifesto statim apparuit, cum Lycios, præter nostra decreta premi quæstos, imperio Rhodiensium exemimus.*

XXXIX. *Tali erga vos animo fuimus Romani: cui quam gratiam retuleritis, quærerem a vobis, nisi jam ante nota hæc omnibus essent. Cum enim Attalus testamento nos heredes reliquisset, Aristonico vindicanti regnum per quadriennium adhæsistis: donec & ille caperetur, & vos ad extremum discrimen atque metum adduceremini. Nostra tamen indulgentia recuperata pace, opibusque multorum annorum tranquilla possessione auctis, denuo sustulistis animos, & observato iniquissimo nostro tempore, inter Italicos tumultus, alii quidem vocastis Mithridatem, alii accessistis venienti. Quod autem omne immanitatis exemplum supergreditur, Italos omnes, non sexus, non ætatis miserati, una die trucidare sustinuisistis: ne vestrorum quidem numinum reverentia deterriti, quin ipsis in templorum adyis supplices eorum occideretis.*

XL. *Et hæc fecistis in gratiam ejus Mithridatis, qui vos deinde continuo cædibus & rapinis exhaust, agros vestros divisit, debitoribus vestris æs alienum remisit, servitia liberavit, multis tyrannos imposuit, omnes objecit prædonum atque piratarum incurfionibus; ut jam inde discere possetis, quales amici qualibus essent vestro judicio antepositi. Licet autem horum malorum auctores etiam nobis quodammodo dederunt pœnas: non ideo vos impunitos abire fas est, qui scelestæ consulentibus tam prompte esitis obsecuti. Et oportuerat quidem æqualem meritis pœnam statui: ceterum quia promiscuæ cædes, & servitiorum concitationes, & hoc genus exempla barbari moris, a mansuetudine Romana prorsus aliena sunt; absit, ut tale aliquid iræ mentem nobis veniat.*

XLI. *Habeatur Græci nominis, & celebritatis Asiæ, & cognationis nostræ ratio: multæque modum potius misericordia, quam ira finiat. quod faustum felixque sit, quinquenniū tribu-*

*tum repræsentari jubeo: & præterea sumtus, quique impensi sunt in hoc bellum, quique porro ad constituendam provinciam erunt necessarii. Eam collationem ego per civitates dividam, tempusque conferendi præfiniam: & qui non obtemperaverint, eos habebo pro hostibus. Ex quatuor & quadraginta regionibus Asiæ, tot enim ex distributione Sullæ esse cœperant, viginti milia talentorum his nominibus exacta sunt: Lucullusque recipiendis, quæ afferebantur, & signandæ pecuniæ præpositus, licet homo mitis ingenii non nihil civitates mansuetudine sua refocillaret, efficere non potuit, ne maximam in calamitatem inciderent.*

XLII. Nam & pecuniæ conficiendæ causa, quia milites ferociter & contumeliose exigebant, passim fœneratoribus theatra, aut mœnia, aut portus, aliave publica ædificia pignori opposita sunt: & eodem tempore magna a piratis incommoda inferebantur. Illi Mithridatis concessione, Asiam tanquam mox amittendam negligentis, mare infestum habere cœperant: & jam successu numeroque aucti, tantum non justis classibus, tum navigantibus, tum etiam portubus, castellis, urbibusque metuendi, vagabantur. Jafus certe, Samusque & Clazomenæ, & Samothrace, dum adhuc in Asia Sulla erat, captæ sunt; Samothraciæque celebre fama delubrum spoliatum, &, ut creditum fuit, mille talentorum egesta ornamenta sunt.

XLIII. Id Sulla nec prohibere, nec ulcisci curavit: si ve meritos hæc pati putabat; si ve urbanis motibus intentas cogitationes habentem, aliis negotiis pigebat tempus atque curam impendere. Igitur L. Muræna cum duabus legionibus, quæ sub Fimbria fuerant, in Asia relicto, cum ceteris copiis conscendit naves, tertioque die, quam ab Epheso solverat, Piræum applicavit. Mysteriis deinde Atheniensium initiatus, Apellicontis Teji bibliothecam requiri jussit, Romam deportaturus. Is inter familiares Aristionis fuerat, missuque tyranni Delum, spoliandi fani causa,

§ XLI. Cassiodor. Chron. Plut. in Sull. c. 49. & Lucull. c. 8. Apptan. Mithrid.

navigarat. ob hæc & talia bonis ejus publicatis, Sulla, ut erat doctissimus & studiorum amans, libros excepit: quos Apellicon magno pretio passim coemerat, illustrium auctorum opera, quædam etiam ipsorum scripta manu.

XLIV. Inter hos & Aristotelici libri fuerunt, quorum fata ob celebritatem nominis, & quia res ad cautionem studiosorum pertinet, non tædebit exponere. Aristoteles primus inter Græcos, quantum scimus, bibliothecarum colligendarum auctor, Theophrasto scholam simul suam librosque decedens tradidit. Theophrasto Neleus Scepsius fuit heres: a quo Scepsin translati postea ad homines indoctos studiorumque rudes pervenerunt, apud hos tam indignos hospites diu sub clavibus satis incuriose asservati; deinde, cum Attallicorum regum studiis opera celebrium scriptorum undique conquirerentur, ab ineptis possessoribus in fossam quandam subterraneam sunt abditi: donec eos longis post temporibus illorum successores Apelliconti Tejo magna pecunia vendiderunt.

XLV. Erat librorum magis, quam eruditionis, studiosus Apellicon: tamen, quod solemne est talibus ingeniis, doctrinæ opinionem affectabat. Igitur scripta Aristotelis edidit, tam ambiguo beneficio, ut vix dijudicari possit, satiusne fuerit, omnino perisse acutissimi viri labores, an interpolatos talis hominis audacia, sub præscriptione tanti nominis legi. Nam ille situ corrupta, aut a tineis erosa temerarius emendator quoquomodo suppleverat: deinde in alios codices tam sua, quam Aristotelis verba, inexplicabili errore transcribenda curaverat. Plus etiam postea vitii ab exscriptoribus libri sunt, cum Romam delatos Tyrannio suis commentis replevit. hanc deinde editionem nacti, qui libris vendendis quæstum faciebant, dum in conducendis librariis, comparandisque cum exemplari voluminibus, ad lucrum magis, quam ad fidem respiciunt, ita repleverunt

§ XLIII. Plut. in Sull. Posidon. ap. Athenæ. 9, 5. § XLIV. Strab. l. 13.

mendis, ut jam ante mille sexcentos annos, quid plerisque locis ab Aristotele esset scriptum, disceptari consueverit.

XLVI. Sed L. Sulla cum Athenis dolore pedum tentari cœpisset, Ædepsum profectus est, Eubœæ oppidum, ubi calidarum aquarum scaturigo erat, quod *Herculis lavacrum* appellabant; valetudinique & oblectationi suæ operam dedit, Bacchicis artificibus addictus. Interea Lucullus post profectionem Sullæ ex Asia, pro sua mansuetudine, tum alias, quantum poterat, civitates allevabat: tum præcipue Mitylenæis auctor erat, *ut, agnita culpa, mediocrem, quæ imposita erat, multum persolverent.* Hi ab initio palam ad Mithridatem desciverant, Manio Aquillio turpiter prodito; diutissimeque manserant in partibus, ne digresso quidem rege resipiscebant, quin se Romanis armis opponerent. tantus stolidissimorum hominum animos furor occupaverat.

XLVII. Igitur Lucullus, classè admota, cum prohibentes exscensionem oppidanos intra mœnia compulisset, castra ante urbem posuit. Deinde quodam die, quasi desperata expugnatione, propalam de die conscensis navibus Eleam trajecit: sed mox sub noctem reflexit cursum, & in insidiis haud procul urbe confedit. Mitylenæorum vulgus vix a prudentioribus cohibitum, ne statim in castra prorumperet, postquam iterum lux affuit, neque hostium conspectus quisquam est, retineri amplius non potuerunt, quin promiscua turba liberorum fervorumque excurreret. Ibi coortæ ex insidiis Romanorum copiæ, adversus homines nec instructos militariter, nec ordinatos (non enim ad prælium, sed tanquam direpturi castra exiverant) non dubio Marte pugnarunt.

XLVIII. Comprehenfus fugientium ingens numerus; ad quingentos, qui repugnare ausi fuerant, occisi: servitiorum quoque sex millia, præter multiplicem aliam prædam, capta sunt. Lucullus, sive hoc detrimento castigatis

§ XLV. Plut. in Sulla c. 42. Strab. § XLVI. Strab. l. 9. Plut. in Lucull. c. 8.

spatium daturus ad pœnitentiam, sive ut ad magis necessaria præverteret, cum captivis & præda discessit: ne munificentissimæ urbis, & omnibus copiis abundantis, obsidione implicitus, maritimam Asiæ oram insulasque a piratis impune vastari pateretur, qui, prospere decedentibus rebus, majora in dies virium & audaciæ incrementa sumebant.

---

# JOANNIS FREINSHEMII SUPPLEMENTORUM LIVIANORUM

LIBER XLIX.

IN LOCUM LIB. LXXXIV LIVIANI.

## E P I T O M E

LIBRI OCTOGESIMI QUARTI.

*Sulla legatis, qui a senatu missi erant, futurum se in potestate senatus, respondit, si cives, qui pulsi a Cirna ad se confugerant, retinerentur. quæ conditio cum jura senatui videretur, per Carbonem factionemque ejus, cui bellum videbatur nullius, ne conveniret, effectum est. Idem Carbo, cum ab omnibus oppidis Italiae colonisque obsides exigere vellet, ut fidem eorum contra Sullam colligeret, consensu senatus prohibitus est. Novis civibus senatusconsilio suffragium datum est. Q. Metellus Pius, qui partes optimatum secutus erat, cum in Africa bellum moliretur, a C. Fabio pratore pulsus est: senatusque consultum per factionem Carbonis & Marianarum partium factum est, ut omnes abique exercitus dimitterentur. Libertini in quinque & viginti turris distributi sunt. Præterea belli apparatus, quod contra Sullam excitabatur, continet.*

**I** NTER hæc legati, quos ad Sullam ab senatu missos fuisse diximus, cum aliis, quos adjunxerat Sulla, in

Italiam appulerunt. Sed Sulliani, quamprimum Brundisii de morte Cinnae, novisque reipublicae turbis cognoverunt, omisso negotio, ad Sullam sunt reducti, & mandata Sullae ceteris perferenda reliquerunt. Negaverat autem, cum rectorum scelerum auctoribus unquam sibi privatim amicitiam fore: sed pacis publicae causa, voluntati senatus populiue Romani, siquidem salvos cupiat, non intercedere. Sibi tamen cura fore, ut & ceteri boni, & qui ad se confugissent, perpetuo tuto degant: idque se sperare adepturum, quod haberet studia exercitus.

II. De cetero futurum in potestate senatus. si cives, qui a Cinna pulsi ad se fugissent, restituerentur; sibiue pristina dignitas, facultatesque & sacerdotium, & quicquid ante Cinnae primum consulatum habuisset, redderetur. Non ita se de republica meritum, ut ad arbitrium inimicorum domo, fortunis, honoribusque carere debeat. Eadem omnia pari vi, atque ablata ab adversariis essent, retineri, aut recuperari a se posuisse. verum enimvero nolle imitari exempla, quorum non approbationem modo, sed omnino memoriam, deleri ex animis hominum malit. Idcirco nihil his rebus advocatum aut deteritum. non aliter hostes populi Romani gravi continuoque bello persecutum esse, quam si omnia domi tranquilla, sibiue prospera & faventia fuissent.

III. Non supplementum sibi. non commotum, non pecuniam aut arma submissa: nec eo secius pro eadem illa Italia, atque illa urbe, suum corpus inferissimis hostibus objecisse, quam plenam quidem etiam honorum honestorumque vitam, sed tamen a diversa factione oppressam atque coactam sibi adhiberi sciret. Non injusta senatui conditio videbatur: sed per Carbonem, ejusque satellites, quibus bellum cordi erat, effectum est, ne conveniret. Quin & violentius in Sullanas partes ira malorum civium recruduit, tribunusque plebis P. Popillius Lænas, Sex. Lucilium, qui superiore anno tribunatum gesserat, quod Carbonis actionibus restitisset, de saxo Tarpejo deiecit: & cum collegæ Lucilii, quibus

diem P. Lænas dixerat, metu ad Sullam profugissent, aqua ignique iis interdixit.

IV. Nam ab illo collegio coactus Carbo, contra animi sui sententiam comitia consularia habere coactus fuerat, quibus L. Scipio, C. Norbanus designati sunt. Igitur tantis animis resurgente factione Carbonis, senatus etiam sententiam eorum sequi adactus est, qui *bello contendendum cum Sulla* censuerant. *Neque enim dimissurum eum milites, sed horum opera abusurum ad dominationem. Non obscure ab eo iactatum esse favorem exercitus, haud dubium animi ejus argumentum. Jam a tot annis nihil illum aliud, quam civile bellum, meditari. Nec iniquissimæ cum Mario æmulationi tam propositum ejus, quam opportunitatem & tempus defuisse: Cimbricis primum, deinde socialibus intervenientibus bellis.*

V. Postmodum, cum esset auctus consulari dignitate, pauloque factus robustior, non distulisse, quin suum olim imperatorem insidiis armisque peteret. Mox etiam reipublicæ pulam intulisse bellum: & urbem, quod ante eum fecisset nemo, vi ac armis occupasse. Ne in Græcia quidem & Asia, quamquam fervente Mithridatico bello, temperare potuisse, quo minus L. Valerium, ab senatu in Asiam missum, & postquam ille sit interfectus, C. Fimbriam armis psteret: legionesque Valerianas, citra senatus aut populi auctoritatem, suum sub imperium acciperet.

VI. Et illum inauditam Romanis moribus licentiam, quo sibi legiones fidas exitio Asiæ facere studeat, non alterius profecto, quam civilis belli sacramentum esse. Præterea inflatum victoriæ Mithridatica, & adjutum copiis paulo ante hostilibus, aurum Ponticum navesque & auxilia barbarorum, in patriæ perniciem adducere. Igitur neque sibi committendum rati, ut impares deprehenderentur, non solita tantum præsidia, sed quædam etiam inusitata ac nova, sunt moliti. Carbo consul ab omnibus oppidis Italiæ coloniisque obsides exigebat, ut fidem illorum contra Sullam obligaret: donec



perniciosa moris exemplum consensu senatus adversantis cohibitum est.

VII. Nec omittenda M. Castricii Placentini constantia, qui forte magistratum in patria gerebat, cum eo consul obsides accepturus ipse venit. Sed petenti, *decretum ea de re fieri*, Castricius neque nomen consulis, neque mores Carbonis, ne legiones quidem, quas adduxerat, veritus, pernegavit. cumque iratus Carbo dixisset, *multos ego gladios habeo*: nihil contatus subjecit, & *ego annos*. Sic & inceptum Carbonis irritum fuit: & ira, magni doloris tenuem e senili sanguine vindictam aspernata, detumuit. Depulsus hac spe consul, ne nihil obtinuisse videretur, ad novos cives libertinofque recenti beneficio arctius adiungendos convertit animum; effecitque, ut illis suffragium, qua de re certatum toties fuerat, senatusconsulto daretur.

VIII. Sub id tempus Africam quoque inquietam civilis belli quaedam initia habuerunt. Q. Metellus Pius, qui partes optimatum secutus erat, haud contemnendas ibi copias habebat, a suis & patris Numidici clientibus haud segniter adjutus. Accesserat M. Crassus adolescens, qui inter Cinnanam Marianamque rabiem, qua pater ejus fraterque sunt absumti, in Hispaniam elapsus, multis mensibus in spelunca quadam latuerat. Is, cognito Cinnæ interitu, progressus in lucem, concurrentibus ad eum multis, hominum duo millia quingentos armaverat; & civitates obiens, quod cum patre prætore multos ante annos in Hispania fuerat, hospitem amicorumque voluntates experiebatur.

IX. Inter hæc cum de Metello audisset, naves adeptus, ad eum in Africam trajecit. Sed illæ bellorum minæ, tanquam nubeculæ sine tempestate transierunt. Nec diuturna inter Metellum Crassumque concordia fuit: relictoque illo, ad Sullam adolescens profectus est; Metellum C. Fabius prætor expulit Africa, rursusque ad pristinas in Liguri-

bus latebras reverti, adventumque Sullæ operiri coegit. At in urbe, L. Cornelio Scipione C. Norbano consulibus, Carbonis factio Marianæque partes senatusconsultum fecerunt, *ut omnes ubique exercitus dimitterentur.* quod si esset factum, dubitari non poterat, quin quorum in manu ad id temporis respublica fuisset, penes eosdem in posterum quoque permanfura summa rerum esset.

X. Præterea libertinis, qui tum, eadem annitente factione, in quinque & triginta tribus distributi erant, novisque civibus omnibus ad quælibet usuri videbantur. Nec tamen eo fecius, quia non erat ambiguum, ne sexcentis quidem senatusconsultis compelli Sullam ad dimittendas copias posse, ad imminens bellum summa contentione omnia parabantur. Tantæ profecto rerum omnium, & præcipue militum, contractæ copię sunt, ut in commentariis suis Sulla scripserit, *se adversus quindecim partium adversarum duces, quadringentis & quadraginta cohortibus instructos, in Italiam transmississe.* alii, *cohortes ipsis quingenarias fuisse ducenas statim ab initio,* tradunt: *posteaque auctum eum numerum esse, quod Sulla ab externis oris veniens hostis Italiæ videbatur; consules & Carbo privatis studiis reipublicæ amabile nomen obtenderant.*

XI. Vulgus igitur certatim sacramento dicebat, tot illustrium virorum auctoritate commotum, qui partibus se duces offerebant. Nam præter eos, qui modo sunt memorati, Ap. Claudius, Q. Sertorius, C. Marius adolescens, M. Marius, clara nomina aderant: præterea Marci, Bruti, Albin, quibus insuper Albinovanus, Flavius Fimbria Caji frater, Damasippus, & ab Italia M. Lamponius, Pontius Telesinus, Gutta Capuanus accesserunt. Interim Sulla, certus in Italiam transire, per Thessalos & Macedoniam Dyrrhachium profectus est, ubi classem ad copias transponendas occurrere jussit.

XII. Hic loci Satyrum, quales a pictoribus & poetis fin-

§ IX. Liv. Epit. Appian. civil. l. 1. § X. Plut. in Sull. c. 13. Appian.

guntur, adductum ad Sullam ferunt, in Nymphæo captum, cum forte somno operam daret. Juxta Apolloniam vicinam Dyrrhachio Nymphæum est, sacer tum locus: ubi in virenti & læta valle, campisque florentibus, subterranei ignis venæ perpetuis velut fluctibus evolvuntur. Eum igitur Satyrum, multis adhibitis variarum gentium interpretibus, unde aut quisnam esset interrogatum, cum humanam vocem nullam, sed velut ex balatu hinnituque confusum sonum edidisset, Sulla pro monstro averfatus esse traditur. Nec ultra reperio, dimitti jusserit, an vero occidi, aut quod omnino sit eo factum. Sed postquam in Satyrorum mentionem incidimus, neminem reprehensurum puto, si quæ de his mihi lecta, aut credita sunt, paucis aperuero.

XIII. Jamprimum ut alia passim occurrunt in naturæ parum convenientia legibus, quas humanæ opiniones imaginantur; ita mixtas hominum ac belluarum formas existere posse, rationi minime repugnat. Sed ex eadem ratione manifestum est, non ideo statim existere, quidquid potest; & de omni re extraordinaria, nisi bonis testibus, inepte credi: nec illis tamen ultra credendum, quam quoad idonei testes esse possunt. Igitur in præsentī negotio, conspectas ejusmodi formas femicaprorum, cum lascivis fœdisque gestibus non negaverim; (id enim a multis est proditum;) animaliumne fuerint ea corpora, an vero dæmonum fraudes, id illi quidem distinguere haudquaquam potuerunt.

XIV. *Montem Atlantem, qua spectet Africam, latum amœnumque spontaneis fructibus, interdiu vacuum cerni; eundem noctibus micare crebris ignibus, Ægipanum Satyrorumque lascivia impleri, tiliarum ac fistulæ cantu, tympanorumque & cymbalorum sonitu plusquam humano strepere, celebrati auctores prodiderunt. Etiam in Æthiopia juxta silvas hebeni, montemque æternis ignibus flagrantem, modicos colles amœnæ opacitatis, cum Ægipanibus & Satyris quidam posuerunt. De his ita sentio: cum Africa monstris abundet,*

solitudinibus horreat; fieri potuisse, ut eminus conspecta animalia fidem præternavigantibus fecerint, superstitione jam occupatis; deinde solita longis peregrinationibus vanitas accesserit, nova & mira narrandi.

XV. Certe simiorum gregibus, mira varietate generum, Africam refertam esse non ambigitur: e quibus etiam fuerunt, quos antiqui *Satyros* appellarunt. Et nota est animalis lascivia, cavenda mulieribus, quarum concubitum appetunt, velut a natura decepti, quæ similia ipsorum feminis membra dedit. Sed ista quemadmodum fabulis veterum fatiis conveniunt: ita, quod de cantu tibiisque & cymbalis additur, longissime abhorret. Nullum enim animal, præter hominem, musicæ numerorumque scientiam habere potest. Igitur si quid tale revera auditum est, quod mihi valde sit probabile, ob causas, quæ subjungentur, id omnino aut hominibus adscribendum, aut geniis putem.

XVI. Sane Paracelsus, & qui ejus deliramenta sequuntur, de Faunis, Nymphisque & Pygmæis nefaria multa tradiderunt; quomodo non solum conversari cum hominibus, sed etiam misceri connubiis, atque hinc adipisci animam humanam possint: quæ nec vera sunt, & si essent, nulla cognosci aut ratione humana, aut experientia queant. Sunt hæc deceptorum spirituum strophæ, modis omnibus curiosam & incautam hominum naturam in præcipitium illicere satagentium: cujus etiam farinae fuisse censeo pleraque omnia, quæ de Faunis atque Ægipanibus exempla referuntur.

XVII. Ne hoc quidem exceperim, quod *Antonio solitaria vitæ principem Paullum querenti homunculum aduncis naribus, fronte cornibus asperata, cum caprinis pedibus occurrisset* narrant: interrogatumque (nam verba ipsa ponam) respondisse: *Mo talis ego sum, & unus ex accolis eremi, quos vano delusa errore gentilitas Faunos, Satyrosque, & Incubos vocans colit. legatione fungor gregis mei: precamur, ut pro no-*

§ XIV. Plin. 5, 1. 6, 30. & 8, 33. Solin. c. 35. Pomp. Melz 3, 10. § XI. Aristot. hist. animal. 2, 8.

*his communem Deum deprecetur, quem pro salute mundi venisse cognovimus, & in universam terram exiit sonus ejus. Hæc dicentem volucris celeritate aufugisse. Quis hæc ludibria, sive astuti dæmonis, sive nugatorum hominum, non deprehendat?*

XVIII. Illum scilicet mortalem, quisquis tandem aut eujatis fuerit, præscisse, quâ transiturus esset Antonius, cognovisse non antea visum, eo sermone, quò intelligi posset, allocutum esse? Deinde negotium ipsum quam ineptum! legatio unius pro omnibus, qui fortasse, ne simul, aut plures venirent, cura domesticarum rerum attinebantur! deinde petitio, nescio stultior, an scelestior, Christum pro se deprecandi. quasi aut hic Satyrorum causa naturam humanam assumsisset: aut illis, si ad se pertinere hoc beneficium credidissent, Antonius fuisset expectandus; nec intra trecentos annos Deum aut per se potuissent, aut per alios exorare.

XIX. Sed ne cetera examinemus, ipse quoque tam velox discessus, non expectato responso, arguit, aut senatui populoque Satyrorum rem istam haud sane cordi fuisse: aut stultissimum virum omnium oratorem delectum, qui tantam rem tam negligenter egerit. Ejusdem generis ille Silenus fuit (si Theopompo Chio egregio fabulatore non omnino deneganda fides est) qui Midæ regi multa exposuit, falsa quidem omnia, sed mirabilem habentia similitudinem veri: non eam dico, quæ veritatem doceat; sed quæ aliunde cognitam possit ad fabulæ opinionem adducere. Nam duæ certe civitates sunt in mundo, de quibus multa doctè pieque Augustinus scripsit: quarum altera non immerito *pugnax*, altera *pia* nominetur.

XX. Et quod ille de *fructibus tristitiæ lætitiæque* Midæ tradidit, videntur duarum Paradisi arborum, prohibitæ nimirum & vitalis historiam, malitiosis fabularum involucri operire: ut mihi non fiat incredibile, homini curioso & mago, qualem fuisse Midam annulus, quem ei tribuit

§ XVII. Hieron. in vit. Paulli. § XIX. Ælian. var. hist. 2, 184

*T. Liv. Vol. IX,*

Q

Plinius, & alia quædam arguunt, sub illa figura dæmonem talia respondisse. Nam & ipse fingebat, *mediæ se naturæ inter divinam humanamque compotem*; quod genus antiquis *dæmonum* appellatione veniebat, quamquam conditionem eorum ignorantibus. Illud vero responsum, quod Midæ dedit, *non nasci homini longe optimum esse; proximum autem, quamprimum mori*; quam est plenum diabolici mendacii, & ad desperationem adigendi efficax?

XXI. Sed & ipsa Sileni captura, quam narrant, magicis cærimoniis, & sacrificiorum imitationi proxima est. *Fontem enim medio loco situm inter Pæonas atque Medos vino diluissè tradunt: ut sic aquis ei uti solitus Silenus, non animadversæ vini fraude, caperetur.* Nam & hæc inter artes est inimici spiritus, ut iis rebus teneri se posse fingat, quarum nulli hæc a Deo per naturam insita facultas est: quo magis temerarii homines erroribus & superstitione irretiti capiantur. Neque hæc aliena erunt Midæ institutis, cum esset Orphei præstigiatoris discipulus, divitiarum & regni nihil ad se pertinentis cupitor.

XXII. Igitur nec illos sequendos arbitror, qui *Silenum, ut illis temporibus, naturæ & omnis antiquitatis intelligentissimum hominem fuisse* interpretantur. Nam hanc quidem expositionem omnia dicta dicendaque refutant. Quod si forte verum est (nam penes auctorem sit fides) quod, *regnante Constantino, visum Alexandria Satyrum Hieronymus scripsit, cujus etiam defuncti pellem Antiochiæ spectavit imperator*; eum quidem monstruosum fuisse partum arbitror, qui potuit ex tabella picti Satyri non aliter movissè imaginatricem facultatem gravidæ, quam fuit in illis mulieribus factum, quæ secundum tabulas pictas, quæ in cubili erant locatæ, foetus aut venustate præcipuos, aut deformitate insignes ediderunt.

XXIII. Sed ille nimirum Satyrus, neque lingua hu-

§ XX. Plin. 33, 1. Ælian. Augustin. de civ. D. 8, 14. Aristoz. ap. Plut. § XXI. Max. Tyrius diss. 30. § XXII. Conon ap. Photium. Voilius Idolol. 1, 21. Hieron. in vita Paulli.

mana usus, neque tale quidquam, quod suis antiqui tribuerunt, fecisse traditur. Quemadmodum *intra hos ducentos annos superiore seculo vir ferus in silva S. Germani prope Villingam oppidum fuisse* memoratur, *consortium hominum fugiens, nudoque corpore per æstatem ac hiemem, radicibus herbisque visitans, & aquam bibens ex fœtidis paludibus.* Ideoque fraudes malignorum spirituum & incredibile in nostrum genus odium reputanti, vix aliud persuaderi queat, quam antiquorum illas de Satyris opiniones non temere natas, sed ex diaboli præstigiis initium habuisse.

XXIV. Vox ipsa atque nomen ab Hebræis desumptum, si Faunum aut Panem voces, nihil aliud, quam faciem, aut apparitionem spectri; si Satyrum, occultum & in abdito latentem signat. Nam Panem Græci, Latini Faunum, Germanicæ gentes Fanum, solemnibus literarum istarum commutatione dixerunt: Deum esse putantes, quem sic nominarent. Unde Germanis signa militaria sunt hoc nomine appellata, quod hodie quoque manet; quia, sicut aliæ gentes Herculem, aliove Deos, ita horum majores Fanum pro vexillo prætulerunt copiis suis, quod ita facile superiores se hostibus fore ratiocinabantur, si tanquam duces belli Deos sequerentur. Eundem & *Tanfanam* vocaverunt, quasi silvestrem Fanum dicerent.

XXV. Hic igitur Fanus sæpe in silvis apparebat ea forma, qua pingitur, humanam speciem imitans, sed corruptam; quemadmodum corrumpi & naturam cupit; hircinam assumens, propter petulantiam animalis, qua nulum in Venerem noscitur esse proclivius: quod & matrem, cujus adhuc uberibus alitur, stupro supervenit; & tum alias, tum præcipue tempore coitus, omnium est fœtidissimum. Quapropter immundissimo spiritui, non aliud in natura animalium visum est genus, exprimendæ suæ similitudini accommodatius.

§ XXIV. Curtius 8, 14. Tacit. Germ. c. 7. § XXV. Hereft. de re rust. l. 3. Taubmann. in Plaut. Merc. 5, 2, 85. Herodot. 2, 46.

XXVI. Ergo & Ægyptiis in forma femicapri apparuit, *Mendes* ab ipsis dictus, quo nomine & animal ipsum appellabant: idemque ab his pariter, atque Pan a Græcis, pictus est. & Herodotus quidem monstrosæ formæ causas exponere verecundatur, quod nempe arguit, parum honestas, aut Deo dignas, audivisse. faciem autem rubram propter ætheris similitudinem ei tribui quidam existimaverunt: ego factum reor ideo, quod tali figura, & ignito vultu fuit conspectus. Et ad hunc ferme modum apparere in nocturnis sagarum orgiis dæmonem, concordi propemodum confessione omnium firmatur.

XXVII. Nec mirandum fuerit, si, quæ memorantur ab antiquis de Satyrorum nocturnis lulis, tripudiis, cantibus. ad simile quoddam diabolici ludi commentum referamus. Nam talia multis locis audiri feruntur: & in Lopenſi eremo, quæ in ditione erat Tatarorum, cum iis locis Marcus Paulus Venetus degeret. In ſumma, ſi quod ea figura repertum ſit animal, monſtroſum fuiſſe, idemque rationis ac ſermonis humani expers crediderim; ubi vero loquelæ intervenit uſus, ſpectra larvaſque mali dæmonis.

XXVIII. Ut iſta ſint ex eodem genere prodigiorum, quo apud Sambulon Parthicæ ditionis montem Hercules venari, Achillem Helenæ matrimonio junctum, Leucen incolere Tauricæ Cherſoneſi inſulam, eundemque oppugnatas ab Alaricho Athenas defendiſſe, creditum eſt. Quos vero ludos ſpectrum edidit, quod ſub forma magni Alexandri cum bacchabundo agmine per Aſiam inceſſit, longoque poſt tempore diſparuit, Heliogabalo imperante? Nec ab his abludunt, quæ de Græcis heroibus Philoſtratus, de Arturo Britanni, de Valdemaro Dani, multique alii de ſuis quiſque populi jaçant.

XXIX. Sed, omiſſis hoc genus præſtigiis, ad Sullam, unde diſceſſimus, revertamur. Is ergo contra ſuos adver-

§ XXVI. Serv. ad Virg. Ecl. 9, 27. § XXVIII. Tacit. 12, 13. Pausan. 1. 3. Plin. 4, 12. Zofim. Xiphilin. Plut. in Sull. c. 51.



farios transmissurus, ceteris ferme satis fidebat; hoc uno angebatur, quod trajectos in Italiam milites, ubi patrium solum aspexissent, ne desertis signis dilaberentur, metuebat; aut, quod solemne civilibus bellis est, hostiliter vexarent Italiam. Ceterum hic etiam ferente fortuna usus, ultro offerentes jurejurando adstrinxit, *mansuros apud signa, neque molestos cuiquam sponte sua fore*. Quin & pecunia cum indigere rati, pro sua quisque copia conferebant. Ille, mirifice delectatus tanta militum benevolentia, vocatos in concionem sic affatus est:

XXX. *Si mihi prima hæc dies experiundi animos vestros esset, milites: mihi quidem plurimum gratularer, qui tales haberem copias; sed subtimerem tamen, ne forte subitus ardor benevolentiae, postquam aliquid præter opinionem offendisse is, exstingeretur, aut teperceret. Nunc autem post tot omnium temporum documenta, quæ per complures annos, & ego vobis, & vos mihi dedistis, adeo fundatus atque radicans est mutuus amor, ut mihi nihil aliud cogitandum reliqueritis, quam quemadmodum vos, sicut optimi omnium estis, ita beatissimos omnium efficiam.*

XXXI. *Erant mea, (nec enim vana hæc est gloriatio) erant, inquam, erga vos multa & magna merita mea: sed vicissim ea virtus vestra est, eaque fides, benevolentia, caritas, ut militibus meis ultro gratias agam imperator. Quod enim certius offerre Dii immortales bene gerendæ rei pignus potuerunt, quam tantam inter adversas partes nostrasque animorum dissimilitudinem, ut inde odiis, convitiis, cædibus, hic officiis & amore inter milites imperatoremque certetur.*

XXXII. *Enimvero virtute vestra satis sum in præsentia dives. liberalitate vestra non utar, animos accipio proboque, quos donec mihi præstiteritis, præstabitis autem semper, nihil mihi defuturum est. Operam autem dabo, ut non modo hæc, quæ adsunt, laborum præmia retineatis, sed etiam longe pluribus majoribusque cumulemini. In hanc deinde sententiam multa ad-*

didit, occasionem tam commodam tenens, animosque omnium suavi oratione permulfit. Ita fidos duci ad reliqua, & robori suo fortunæque fidentes ad quadraginta virorum millia (quinque legiones erant, & Achajæ Macedoniæque auxilia, & cujusque generis equitum sex millia) in naves imposuit.

---

JOANNIS FREINSHEMII  
SUPPLEMENTORUM  
LIVIANORUM  
LIBER L.

IN LOCUM LIB. LXXXV LIVIANI.

---

E P I T O M E

LIBRI OCTOGESIMI QUINTI.

*Sulla in Italiam cum exercitu trajecit, missisque legatis, qui de pace agerent, a consule C. Norbano violatis, eundem Norbanum prælio vicit. Et cum L. Scipionis alterius consulis, cum quo per omnia id egerat, ut pacem jungeret, nec potuerat, castra oppugnaturus esset, universus exercitus consulis, sollicitatus per emissos a Sulla milites, signa ad Sullam transtulit. Scipio, cum occidi posset, dimissus est. Cn. Pompejus, Cn. F. ejus, qui Asculum ceperat, conscripto voluntariorum exercitu, cum tribus legionibus ad Sullam venerat; ad quem se nobilitas omnis conferebat, ita ut deserta urbe ad castra veniretur. Præterea expeditiones per totam Italiam utriusque partis ducum referuntur.*

I. **S**ULLANA classis apud Brundisiumne, an Tarentum, copias exposuerit, ambiguum diversi auctores faciunt. credi tamen potest, neutros falsa dicere, quod tanta navium

multitudine (mille ducentas alii fuisse, alii quadringentis auctiorem numerum produnt) uterque portus repleti potuerit. *Brundisinis* certe, *quod promte exceperunt venientes, concessam ab Sulla immunitatem, ad sua tempora durasse*, Appianus testis est. Vicissim Plutarchus *Sullæ Tarentum appulso, statimque sacrificanti jecur apparuisse dicit coronæ figura, lemniscorumque inde dependentium*. Cum deinde per Calabriam Apuliamque, cum singulari modestia exercitus, ut non hominibus tantum oppidisque, sed etiam agris & frugibus parcetur, in Campaniam contenderet; Q. Metellus cum suis copiis in itinere ad eum venit: duoque hi imperatores proconsulibus, honore potius, quam potestate pari, res administrare cœperunt.

II. Legatis deinde mittendis iterum tentata spes pacis, jussæque conditiones propositæ; sed violatis a consule Norbano legatis, tantus ardor Sullanorum fuit, ut, priusquam ordinari acies posset, lymphatis similes in hostem impetu incurrerent. C. Norbanus consul cum C. Mario adolescente magnas copias inter Capuam & Casilinum Vulturino assitam coloniam habebat; quo loco paulo antequam in Italiam Sulla transcenderet, duæ acies, cum horrendo fragore armorum, signorumque strepitu, per plures dies visæ concurrere, sensim e conspectu hominum in aerem elatæ evanuerant, relictis equorum hominumque vestigiis, herbisque ac virgultis velut recens protritæ.

III. Prælio commisso, neque pugna anceps, neque caesorum utrinque numerus alius fuit, quam si hinc mulieres, inde viri constitissent. septem millia de Norbani exercitu ceciderunt, sex millia capta sunt: Sulla milites haud amplius centum viginti quatuor amisit. Victis Capua receptus fuit: victores hoc velut omine belli læti, quamquam multis partibus ampliorem esse hostium numerum sciebant, se tamen superiores futuros rebantur. idque causæ fuisse

§ I. Vellej. 2, 24. Plut. in Sull. c. 52. Appian. § II. Liv. Epit. Vellej. Plut. Jul. Obseq. c. 113.

Sulla tradidit, cur non in oppida dispergerentur, quod ille facturos timuerat.

IV. Ergo faciles duci, quo imperatoribus videretur, Teanum Sidicinum processerunt. Inter eundem Pontii cuiusdam servus fanaticus adiit Sullam, *victoriamque se ei nuntiare dixit Bellonæ jussu: ceterum ni maturaret, Capitolium arsurum.* idque factum est a. d. pridie Nonas Quinctiles, quem ille diem prædixerat. Ea res prodigii loco habita, quod summæ religionis templum, supra annos quadringentos accuratissima custodia servari solitum, ne origine quidem incendii cognita, unam intra noctem deflagrasset. Libros quoque Sibyllinos, quos in ea æde Tarquinius locaverat, ille ignis hausit. Æditui negligentiam alii, quidam insidias fuisse, (id quoque varie, Carbonem aliis aut consules, aliis Sullam incusantibus) magna pars flammam divinitus innissam, uti cuique mens dictaverat, cogitata pro compertis afferebant.

V. *Vestæ templum sub idem tempus ignibus correptum minime certis incendii auctoribus traditur, & motu terræ multa in urbe templa corruisse*, inter istius belli prodigia relatum est. additur & *mula partus: & mulieris niji serpens in Hetruria apud Clusinos editus; qui jussu haruspicum in profluentem dejectus, adversa aqua nataverit.* Sed omnia hæc pro Sulla faciebant: dum, adversariis aspera & fœda quælibet timentibus, hujus partes utiliore stultitia suæ victoriæ causâ Deos ista omnia moliri interpretantur.

VI. Ergo multis bonisque ad eandem spem confluentibus, quotidie egregia incrementa fumebant. Metellus præcipuo fuscitamento erat, quem sanctæ integræque constantiæ virum, nunquam adhæsurum illi causæ putabant, nisi iustiorē esse patriæque utiliorē cognovisset. Etiam contrariæ factionis multi ad Sullam accedebant: quorum

§ III. Plut. Oros. Eutrop. Appian. § IV. Euseb. l. 4. Plut. Appian. Jul. Obseq. Cassiodor. Cic. Verr. 1, 18 & 4, 31. Velletj. Diodor. ap. Vales.

vel præcipuus P. Cethegus, qui cum Mario pulsus in exilium fuerat, eodem se contulit; ad omnia, quæ animo Sullæ collibuisse, ministerium suum offerens. Mox etiam deserto Carbone, quæstor ejus Verres, interversa pecunia publica, mutavit fidem. Lucii quoque Scipionis quæstor M. Piso, cum sequius de partibus ille judicaret, neque pecuniam attigit, nec ad exercitum profectus est.

VII. Cajum deinde Carbonem Cnæi fratrem, milites paulo severius exigentem priorum temporum disciplinam, facta seditione trucidarunt. Ita & adversariorum deficiebant vires, & Sullanæ copiæ in dies augebantur: dimissique passim duces haud pœnitendo successu agebant. Nobiles enim juvenes, qui frequentes ad Sullam concurrerant, ubi cujusque utilissima videbatur futura opera, ad eam destinabatur. Horum M. Crassus in Marfos ire jussus, cum ob hostes propinquos præsidium postularet; vehementi oratione Sulla, *do tibi patrem tuum*, inquit, *fratremque & amicos, quorum indigne interemtorum persequor a sceleratis pœnas*. sic incitatus adolescens impigre perrupit, magnisque celeriter conscriptis copiis, utilem eo bello operam præstitit.

VIII. At ipse imperator, qui L. Scipionem cum magno exercitu in propinquo, multos alios duces validis copiis subnifos passim tendere sciret, imparem se viribus ratus, denuo ad pacis negotium adjecit animum. Quidam dolo id factum arbitrantur, non improbabili conjectura, quod sociali Mithridaticoque bello iisdem artibus hostes circumvenerat. Sed Romani scriptores, quibus plus ceteris tribuas in patriis rebus, bona fide certoque proposito quæsitam ab eo concordiam testantur.

IX. Neque recusavit Scipio, quin, acceptis obsidibus, extra castra in colloquium prodiret. Terni tantum collocuti sunt: quo magis, quid utrinque dictum fuerit, latet, nec in vulgus emanavit. *De auctoritate tamen senatus, de*

§ VII. Val. Max. 9, 7. Plut. in Crass. c. 9. § VIII. Appian. Plut. in Sull. c. 54. Liv. Epit. Vellej. 1, 2. Cic. Philip. 12, 11.

*suffragiis populi, & de jure civitatis*, collatas esse conditiones, ipso rerum indicante statu, credebatur. Hoc unum constat, pactis induciis, Q. Sertorium ad Norbanum consulem missum esse, quod Scipio, collega ignorante, de tantis rebus quidquam pacisci gravabatur. Sed Sertorius in eo itinere Sueffam, quæ Sullæ partibus se applicaverat, occupavit. Ea de re cum Sulla quereretur, consul, incertum conscientiane violatarum induciarum, an ut in re subita consilii inops, obfides reddidit.

X. His rebus cum abrupta spes pacis esset, exercitus consulis vehementer offensus, quia, si convenisset, tolerabilis status civitatis sperabatur, aures corruptoribus præbuit, cum, permissio colloquio, dux callidus milites ad eandem fraudem compositos subinde ad castra Scipionis mitteret. Ii percontando, *quam grati ducibus suis, quantis familiaribus copiis augerentur*, postquam volentia acceperunt; *Sullæ benignum imperium, infinitam liberalitatem, nec imperatorem sibi, sed patrem divina quadam sorte obtigisse*, prædicabant. Rebus utrinque constitutis, ut propius suggredienti Sullæ se conjungerent: Sulla per speciem hostilia castra oppugnandi cohortes viginti admovit: sed, præparatis omnium animis, castra sine vulnere introitum. tum vero universus Scipionis exercitus, quadraginta cohortes signa ad eum transfulerunt. Solus cum filio Lucio consul in tabernaculo deprehensus est: non utique magno boni imperatoris argumento, quem vulgata totis castris militum inclinatio fessellisset, cum præsertim esset a Q. Sertorio præmonitus.

XI. Sulla Scipiones dimisit inviolatos, additis equitibus, qui eum, quocunque vellet, tuto deducerent. Atque ille, ubi primum urbem amicam attigit, resumtis magistratus insignibus, iterum copias haud contemnendas comparavit. Idem Sulla beneficium multis aliis, & nominatim Q. Sertorio præstitit, qui desperatis rebus in Hispaniam, jam olim provinciam eam fortitus, se contulit, maximum pau-

lo post incendium belli excitaturus. Fertur, his auditis, Carbo dixisse præsentibus, *bellum sibi cum vulpe & leone animum Sullæ inhabitantibus esse, sed cum vulpe periculosius*. At Sulla post victoriam aquas ad montem Tifata, ubi cum Norbano pugnaverat, salubritate nobiles, agrumque circa, Dianæ dedicavit, cujus numini sacrata illa regio erat.

XII. Inter hæc novum se in Italia sidus ostendere cœpit, Cn. Pompejus, Cnæi filius, ejus, qui Asculum cepit, trium & viginti annorum adolescens; sed mox clarissima fama cuilibet senum imperatorum conferendus. Hic in Piceno forte agebat, cum ad Sullam undique concurrere probatissimum quemque cognovit. hoc stimulo adjecit & ipse has ad partes animum, non tamen ut contentus, & tanquam opis egens; sed firmamentum, quibus accederet partium, & cum beneficio veniret. Igitur sollicitatis paterni exercitus reliquis, cum Vindius quidam, *Pompejum ex ludo subito concionatorem factum*, exclamasset; tantus adolescentis favor fuit, ut, a multis simul impetu facto, Vindius e vestigio opprimeretur.

XIII. In foro igitur Auximatum erecto tribunali, duces partium professus, Vinditiis fratribus, qui principes civitatis, & Carbonianæ factionis erant, excedere jussis, delectum habuit. Ab hoc initio cum vicina quæque sibi adjungeret, Carbonianos ubique proturbaret, brevi in tantum auctus est, ut tres integras legiones sub signis duceret. Neque huic exercitui commeatum, ceterarumque rerum idoneus apparatus deerat. Ipse permagnus apud militem amor, magna apud omnes admiratio erat, qui in illa ætate nihil remissum aut juvenile, sed omnia magnis ducibus solita agitabat. nullus illi labor tædio, nulla defatigatio molestiæ erat. cibi vinique temperans, somni parcus, curæ corporis negligens, majorem dierum noctium-

§ XI. Plut. in Sertor. c. 8. Idem in Sull. Vellej. Appian. Diodor. ap. Vales. § XII. Liv. Epit. Plut. in Pomp. c. 9. Diodor. ap. Vales. Val. Max. 5, 2. Hirtius de B. Afric. c. 22.



que partem bellicis aut operibus, aut certe cogitationibus conterebat. frequenter inter milites exercens corpus, cum alacribus saltu, cum velocibus cursu, cum validis lucta certabat.

XIV. Belli quoque incerta ante experimentum ingenio & meditatione præcipiens, tantus statim dux exstitit, ut, quanto tempore vix paratum exercitum alius accepisset, ipse privato consilio delectum confecerit, militesque armatos eduxerit ad pugnam. Neque latebras, aut avia, quibus ignoratus tutusque ad Sullam perveniret, sectabatur. palam incedens, quasunque inter eundem regiones attingebat, ad communem causam adducere nitebatur. Hæc ubi Romam perlata sunt, quia supra fidem erant, ætatem potius Pompeji, quam indolem, æstimantium, tanquam ineptis nuntiis in majus aucta spernebantur. sed posteaquam certiore fama innotuerunt, senatus Junium Brutum proficisci adversus illum iussit.

XV. Jam & Carinas, & Cælius cum suis quisque copiis eidem se diversis ex partibus objecerant. Igitur tribus hostilibus exercitibus cinctus, in Brutum summa vi convertit. Primi utrinque equites concurrerunt: nam Gallicum equitatum Brutus adduxerat. ibi proventus ante signa adulescens, insigni robore Gallum, qui & ipse ex diversa acie procurrerat, lancea dejectum interfecit. unde timor incessit hostibus, & mox fuga; suorumque in aciem impacti, peditem quoque turbatum averterunt. Sic fuso Bruti exercitu, cum inter reliquos duces orta discordia esset, alius alio castra moverunt. Pompejus oppida, discessu eorum præfidiis nudata, voluntate incolarum recepit.

XVI. Mox Scipio consul cum exercitu occurrit, non meliore, quam antea, contra Sullam eventu. nam milites ejus, simulatque Pompejanos conspicati sunt, salutatione facta, ad illos transierunt. Postrema cum Carbone lucta fuit,

§ XIII. Liv. Epit. Appian. Plut. Diodor. ap. Vales. § XIV. Sallust. Diodor. Vellej. Plut.

ad Æsin flumen multas equitum alas obiciente. Sed ille in loca iniqua detrusos, cum evadendi via non esset, cum armis equisque in deditionem accepit. Ignarus horum Sulla, qui nihil dum aliud, nisi de primis Pompeji conatibus audierat, & de adolescente sollicitus, ne per tot hostium exercitus percurrere posset, in occursum ejus expeditam manum duxit. Hoc ubi Pompejo compertum, neque longe abesse Sullam, ornari signa, armari ordinarique exercitum jussit, ut imperatoris oculis quam pulcherrimam speciem objicerent. magnos enim ab eo honores, nec inmerito sperabat: spe tamen majores assecutus est.

XVII. Nam ut eum accedere ad se Sulla, simulque tres aquilas, & egregiam sub signis juventutem, rerumque gestarum conscientia alacrem aspexit, desiliit ex equo, appellatusque, ut par erat, a Pompejo *Imperator*, vicissim *Imperatorem* illum salutavit: multum mirantibus, qui nominis hujus honorem adolescenti tributum in minime expectassent ab eo Sulla, qui de isto cum Scipionibus & Mariis dimicaret. Cetera quoque ad eandem formam comitatus fuere. Pompejo venienti assurgere de sella, caput aperire: quæ postmodum etiam dictator privato servavit; unum omnium Pompejum hoc honore dignatus.

XVIII. Sed & consilia cum eo communicabat omnia, & plurimum in ejus virtute reponebat spei. Aliquando etiam egit cum eo, ut in *Cisalpinam Galliam cum imperio profisceretur*. Est enim ibi, ait, Q. Metellus, vir optimus, & bello non sperrendus. Sed nescio quomodo segnius ibi res gerit, quam hæc tempora desiderant. Nobis maxima in celeritate spes est: nisi quamprimum vincimus, vincimur. Et hic quidem omnia prosperrime cesserunt: pacati, quotquot a tergo reliquimus, populi; tua virtute alii adjuncti: duo hostium exercitus fusi segatique, totidem ad nos sponte concedentes, & initium victoriæ magnificum, & partem haud exiguam fecerunt.

§ XVI. Cluver. Ital. antiq. Oros. 5, 20. Plut. § XVII. Sallust. Plut. Appian. civil. l. 1. § XVIII. Appian. Val. Max. 3, 2. Plut.

XIX. *Est tamen adhuc adversariis permultum virium: neque temere debilitentur, quamdiu Cisalpinam tenere Galliam possunt, unde illis novæ semper copiae submittantur; etiam trans Alpes colentium affluentibus haud paucis. Et hunc in usum digressus a me Metellus erat. sed video senescentem ejus virtutem juvenili fervore excitandam esse. Tibi viget ætas, viget gerendarum rerum cupido. nec ideo cautionis eges. animum prudentiamque tuam paucis mensibus majore documento approbasti, quam edere multi veteres imperatores potuerunt. Abi ergo bonis avibus, & illas nobis provincias recipe. non magis illi pares tibi hostium duces erunt, quam fuerunt, quibuscum hætenus es congressus. Ego hinc facile sustinuero bellum: si & ab illa parte superiores simus, haud dubitanter e tyrannorum manibus recuperabimus rempublicam.*

XX. *Hæc ubi Sulla dixerat, Pompejus, quamvis in illa ætate & fortuna, modestiæ fatis tenax, negavit, rectum sibi videri, si natu & dignitate majori provinciam extorqueret. Neque vero, te mandante, quidquam negotii defugiam. non cepissem hæc arma, certe non ita cepissem, si laboribus & periculis potuissem absterri. Sed Q. Metellus is fane vir est, quem a me affectum injuria videri nolim. Fortassis etiam per se res ita geret, ut fortunæ tuæ desiderioque respondeat. quod si forte in tantum impar hosti futurus est, ut sustinere eum posse diffidat: haud dubie mittet ad te literas, & consilium rebus suis auxiliumque postulabit. Ipso porro arcessente, promptus & lubens ibo.*

XXI. *Et hanc sententiam tibi quoque probari non dubito, imperator: cui & ipsi fuisse viderer justo cupidior, si provinciam oblatam statim acciperem. Sed & nobis, qui pro legibus & re publica gerimus bellum, honestius fuerit, nihil commisisse, quod illis parum congruere videatur. Neque fortassis utile sit, Q. Metellum tanta nobilitate & gratia virum offendi. nam propter illum, & si qui præterea sunt ejus similes, optimatum partes vocamur: & quemadmodum illius favor multorum tibi adjunxit animos; ita multi se lasso in uno putabunt. Præterea mortaliū omnium fata dispensat Deus. qui si forte de me aliquid*

*in illa provincia fecius decerneret : jam omnium conviciis non mea solum temeritas, sed tuum quoque consilium vapularct.*

XXII. Ita res dilata est, donec eam in sententiam paulo post ab ipso Metello literæ venerunt. Inter hæc prope modum tota nobilitas, urbe relicta, in castra Sullana venerat: robur simul partibus, simul speciem ac decus afferens. Neque tamen ex diverso leve momentum in consensu confulum erat; & ad summi imperii nomen ex omni Italia, & circumpadana Gallia ingentes copię confluebant: quibus ferme apparatibus utrinque, quod reliquum æstatis erat, consumtum est: ita tamen, ut nec ab expeditionibus cessaretur, partium ducibus hinc inde, ut cuique occasio adesse videbatur, omnia tentantibus.

§ XXII. Plut. in Sull. c. c. 13. Liv. Epit. Appian. civil. 1. 1.



# JOANNIS FREINSHEMII SUPPLEMENTORUM LIVIANORUM

LIBER LI.

IN LOCUM LIB. LXXXVI LIVIANI.

---

## E P I T O M E

LIBRI OCTOGESIMI SEXTI.

*Cum C. Marius, C. Marii filius, consul ante annos viginti per vim creatus esset, C. Fabius in Africa propter crudelitatem & avaritiam in prætorio suo vivus exustus est. L. Philippus legatus Sullæ Sardiniam, Q. Antonio prætor pulso & occiso, occupavit. Sulla cum Italicis populis, ne timeretur ab iis, velut erepturus civitatem & suffragii jus nuper datum, sædus percussit. Idemque, ex fiducia jam certæ victoriæ, litigatores, a quibus adibatur, vadimonia Romam differre jussit, cum a parte diversa urbs adhuc teneretur. L. Damasippus prætor, ex voluntate C. Marii consulis cum senatum contraxisset, omnem, quæ in urbe erat, nobilitatem trucidavit, ex cujus numero Q. Mucius Scævola pontifex maximus fugiens in vestibulo ædis Vestæ occisus est. Præterea bellum a L. Murena adversus Mithridatem in Asia renovatum continet.*

I. **A**NNO sequente C. Marius C. F. C. N. ante ætatem per vim creatus consul, collega Cn. Carbone, honorem  
T. Liv. Vol. LX, R

iniit: quem ut immaturum periculoque plenum Marii mater acerbe flevisse dicitur. Is adolescens C. Marii fratre genitus, a patruo adoptatus, quo ætatis anno consulatum ceperit, scriptores dissentiunt: quinque, aut sex, aut septem annis vicesimum egressus apud diversos reperitur; sed ut Livianis reliquiis adhæream, quæ minorem annis viginti faciunt, ea quoque ratione adducor, quod nihil ab eo ante hæc tempora gestum traditur; cum ejus rei, si affuisset ætas, occasiones multas fuisset habiturus: quodque C. Marius senex, *ideo se bellum Mithridaticum appetere, quo se potissimum magistro filius militia rudimenta poneret*, jactaverat.

II. Acris eo anno hiems, cum impedimento rebus gerendis esset; eo intentius cogendis ad bellum pecuniis consules incumbabant. Et ne militibus stipendia deessent, festinantibus in summa inopia Patribus, senatusconsultum, quale tum potuit, factum est, *ut aurea atque argentea templorum ornamenta conflarentur*. Principio veris ad Æsin fluvium, Galliæ tum Italiæque terminum, Q. Pius cum legato Carbonis Carinate signis collatis dimicavit. Ab orta luce ad meridiem summa utrinque contentione pugnatum cum esset, Carboniana acies loco cessit, multis ex suo numero desideratis.

III. Idcirco vicinis ad Nictellum deficientibus, consul Carbo ingentibus copiis affuit, tam prope collatis castris, ut viribus superior obseſſum tenere hostem videretur. In Africa deinde res turbatæ, prætorque C. Fabius Hadrianus propter avaritiam ac crudelitatem in cives Romanos, qui Uticæ commorabantur, in prætorio suo vivus exutus est. Quippe *homo nequissimus regnum Africæ affectare, contraque servorum manu de principum nece conspirasse dicebatur*. Nulla postmodum de hac re quæstio fuit: non solum

§ I. Fasti Capitol. Liv. Epit. Auctor de Vir. ill. c. 63. Vellej. 2, 26. Appian. § II. Appian. Val. Max. 6, 7. Sallust. Strab. l. 5. Oros. 3, 20.

ob tempora reipublicæ; sed quia justam fuisse ultionem consensu senatus & omnium credebatur.

IV. In Sardinia quoque civilia arma se commoverant, vincentibus & ibi Sullanis: & a legato Sullæ L. Philippo provincia, Q. Antonio prætor pulso & occiso, occupata est. His partium successibus cum nihil magis obflittere, quam metus Italicorum populorum videretur, ne Sulla rerum potito, jus civitatis & suffragiorum recens acceptum amitterent: Sulla, missis, quos apud unamquamque civitatem valere gratia & auctoritate noverat, fœdus cum iis percussit: tanta jam fortunæ suæ fiducia, ut, a quibus aditus fuerat, litigatores, Romam differre vadimonium juberet, quamquam urbs adhuc adversæ factionis armis tenebatur.

V. Quibus rebus cum exulceratus C. Marii consulis animus esset, adolescens paternæ sævitæ, scripsit ad L. Brutum Damasippum, ut *Sullanæ factionis principes trucidaret*: velut imminente jam fato in antecessum ultionem rapiens. Ille convocatos in senatum, quasi de republica consulturus, (præturam enim urbanam gerebat) C. Carbonem cognomento Arvinam, virum prætorium, consulis fratrem patruelem, & P. Antifium socerum Cn. Pompeji in curiâ Hostilia trucidavit. L. Domitius fugiens circa fores interemptus est. Q. Mucius Scævola pontifex maximus, vir laudatissimæ vitæ, ad vestibulum Vestæ confugerat: sed ad aras occisus, sanguine suo simulacrum resperlit; ut inane numen, & in tanta infamia pudoris expers, cruore saltem indefensi clientis erubesceret.

VI. A suis quidem cultoribus ita contemptum est, ut per eos minime steterit, quo minus in ipsis penetralibus mactatus, sempiternum illum horrendæ religionis ignem sanguine suo restingeret. Neque satiatus cædibus prætor, ni ludibrium etiam crudelitati adjecisset, truncum Car-

§ III. Liv. Epit. Cic. Verr. 5, 36. Val. Max. 9, 10. Oros. Per-  
dian. in Verr. 3. Appian. § V. Plut. in Mar. c. 80. & Pomp. c.  
25. Liv. Epit. Flor. 3, 21. Oros. Val. Max. 9, 2. Appian. Vellej.  
2, 26. Cic. famil. 9, 21, & de Or. 3, 3. Diodor. ap. Vales.

bonis corpus patibulo affixum, circumgestari jussit. ceterorum quoque corpora per carnificem unco tracta, atque in annem abjecta sunt. Uxor Antistii Calpurnia Bestiæ filia, cum de casu mariti cognovisset, gladio semetipsam interemit. Dum ad hunc modum Italia, ceteraque Europæ, bellorum violentia inhorrescunt, Asiam, denuo Mithridate irritato, L. Muræna concussit.

VII. Is relictus a Sulla cum Fimbrianis legionibus, ut Asiam ordinaret, triumphæ cupiditate, belli novandi causas circumspiciebat. Mithridates, in patrium regnum reversus, bellum Colchis atque Bosporanis faciebat, qui Romani belli tempore ab imperio ejus defecerant. Colchæ Mithridatem filium regis, eum, cujus adversus Fimbrianæ præclara, tametsi infelix, opera fuerat, regem deposcebant: vorique compotes facti, statim arma deposuerant. Ergo Mithridates, ingenio & peritia rerum suspicax, filii profecto astutia rebellionem eam cœptam arbitratus, quo sibi regnum Colchorum extorqueret, ad se comiter vocatum compedibus aureis vinxit, & paulo post interfecit: minime recenti humanarum mentium fluctuatione, ut nunc liberorum causa quærant regna, nunc regnorum causa occidant liberos.

VIII. In Bosporanos deinde adeo magnam copiarum naviumque collegit multitudinem, ut plerique contra Romanos magis hæc omnia parata interpretarentur, quam quos ille volebat invasurus videri. Suspiciones horum haud parum movere credebatur, quod Mithridates Ariobarzani Cappadociam ita restituerat, ut tamen loca aliquot opportuna tum quoque retineret. In hac ægritudine animorum, cum ad Murænam Archelaus cum uxore & liberis perfugisset; adeo magnum ad omnia momentum attulit, ut jam nemo, quin suscipiendum esset bellum, dubitaret. In magna illum invidia, jam a tempore Charonenfis pugnae fuisse, supra ostendimus: neque eximi regi poterat, æquie-



ribus conditionibus transigi potuisse, si magis ad suam gratiam, quam ad Romanam, Archelaus respexisset.

IX. Igitur ille non ignarus, suspicacem regis animum ne liberis quidem parcere, fuga salutem adeptus, etiam vindicari volebat. Quoque magis moveret Murænam, sponte sua satis in hanc sententiam proclivem nactus: *Hæc*, inquit, *regum fides est, Muræna! quanto quisque pluribus modis gratiam eorum meruit, tanto plerumque est suspectior. Amicos uti non caritate, sed ex usibus suis, deligunt; ita, simul eorum ruinam rebus suis utilem esse crediderunt (vere, an falso in eam inciderint opinionem, nil refert) quo minus crudelissimis exemplis eos pessumdent, nullo affectu retinentur.*

X. Sed præ ceteris eorum anceps & lubrica est statio, quæ magnis exercitiis præficiuntur. Quippe sive feliciter ipsis res decedit, invidia; sive improspere, suspicionibus onerantur: neque dicere queas, utrum sit apud hæc ingenia periculosus, quæ vincere duces suos volunt, vicisse indignantur. Ego fortunam utramque ductor copiarum Mithridatis expertus, non aliud pro meis meorumque factis, vulneribus, quorundam & mortibus, præmium expectare debui, quam ut imperio tyranni occiderer, pro magno habiturus beneficio, si solus hoc paterer, neque liberi mei uxorque una morentur. *Hæc & alia, quæ non ignoras, vel me tacente, satis indicant, quo animo & erga illum esse debeam, cujus haud sane meritam crudelitatem fugio; & adversus vos, qui paulo ante hostem, nunc supplicem vestrum, benignissime suscepistis.*

XI. Ut igitur utrisque gratiam, quam debeo, referam; confirmo tibi, haudquaquam vanus auctor, Mithridatem certo certius rebellaturum. Sed ut potius vestro, quam illius tempore incipiatur bellum, interest: nondum ita paratus est, quin occupari possit. in eo maximum ad victoriam momentum esse nosse. Neque ego tam parum amicitii ac clientelis valeo, ut non insignem in consiliis hostium indagandis, tum in recipiendis populis, operam navare possim. Hæc non postrema festinandi belli ratio, cum ad priorem cupiditatem accessisset; haud dif-

ficulter motus est Muræna, ut, exercitu contracto, Cappadociam ingrederetur.

XII. Ante omnia reddita sunt Ariobarzani, quæ ad regnum ejus pertinentia Mithridates retinebat. Comana deinde irrupit, maximam iis regionibus Pontici juris urbem, ubi magnæ religionis opulentiaque templum visebatur. In ejus urbis prælidio rex Mithridates aliquot equitum alas collocaverat. quas ubi concisas a Romanis esse cognovit, legatis ad Murænam missis, pacta cum L. Sulla inita servari postulabat. Forte Græcos quosdam sapientiæ studium professos magis, quam præstantes, Mithridates legaverat. hi, siue gentis odio, siue mores regis perosi, contra mandatum & utilitatem ejus, a quo veniebant, bellum potius Murænae, quam pacem, suadebant.

XIII. Igitur quia Sulla, contentus fidem factis repræsentare, tabulas fœderis conscribere neglexerat; negabat, *pacta se videre, ad quæ Mithridates provocaret.* Hoc responso legatis reddito, statim prædatum dimisit suos, neque profanis, neque sacris abstinens manus: deinde, quia jam tempus anni rebus gerendis ineptum erat, hibernandi causa in Cappadocia substitit. De his Mithridates, tum ad Sullam missis, tum ad senatum legatis, querèbatur: *Omnia se fecisse, dedisse, quæ ex formula fœderis & fide bona fieri, dari oportuisset. Romanis Asiam, regibus Cappadociam, Bithyniam, Paphlagoniam restituisse: recessisse intra patrii regni limites, longissimeque remotum a consilio simul & occasione Romani bellî diversissimis locis adversus Colchos atque Bosporanos dimicasse: cum nulla provocatus injuria L. Muræna, quem L. Sulla cum imperio in Asia reliq. isset, irruptionem in fines suos fecerit, urbes expugnarit, præsidia regia ejecerit aut occiderit, &, quamlibet occurrente nemine, divinæ simul ac humanæ luto cinio ac rapinis vexaverit.*

XIV. *Nec hunc injuriarum finem facere constituisse, in Cappadocia hibernis exercitum tenentem, ut, quamprimum tempus anni pateretur, redintegrare bellum posset. Magnopere igitur po-*

*stulare, senatus datam sibi pacem præset; Murænam revocet; res reddere, bellum omittere, injuriis abstinere jubeat. Se nec antea lubenter arma contra Romanos induisset, & nunc passurum omnia potius, quam ut hos iterum hostes habeat. Providendum tamen Patribus, ne talibus factis ea invaleseat apud reges & nationes opinio, parum interesse, socii an vero hostes populi Romani habeantur. Nam cupiditate ducum, licentia militum, sublato, quod interesse debuisset, discrimine, pari violentia & acerbitate omnes tractari.*

XV. Similia quoque mandata ad Sullam dederat, adjunctis, quæ singulariter illum attingebant, *qui pacis ejus auctor, magna a rege ad bellum accepisset auxilia, majora expectare posset.* Hæc erant superiore anno facta. Cajo vero Mario, Cn. Carbone consulibus, cum nondum reversi Roma legati essent, Muræna, transito Haly fluvio, qui & alias copiosus aquis, tum continuis imbribus supra solitum intumuerat, fines Mithridatis libera populatione persultavit; rege nusquam occurrente, ne bello causam dedisse argueretur. Sic Romanus in Phrygiam Gallogræciamque onustus præda recessit. Ibi convenit eum missus ab senatu Callidius, qui literas quidem nullas afferebat, palam autem Murænae nuntiavit senatus verbis, *regem socium amicumque ne laceraret.*

XVI. Deinde quia cum solo colloqui conspectus erat, neque Muræna ideo minus hostilia faciebat, *dolum Romanorum* incusans Mithridates, *Gordium occurrere, & prædatores coercere* jussit. Ille, cum & milites multos & jumenta comprehendisset, abductis illis, castra castris Murænae sic opposuit, ut interfluente amne dirimerentur. Neuter tamen pugnae tentare fortunam voluit: donec ipse Mithridates cum majoribus copiis supervenit. Tum cœpto circum annum proelio, cum rebus omnibus impar Muræna esset, transcenderunt annum regii, Romanosque, multis cæsis, in collem quendam munitum se recipere coegerunt.

XVII. Mox rege ad oppugnandum collem profecto,

§ XV. Appian.

cum locus ad resistendum parum aptus videretur, desertus a Muræna est; magnoque labore, regiis subinde carpentibus agmen, per montes avii itineribus in Phrygiam penetratum. Celeriter vulgata tam insperatæ victoriæ fama multos adjunxit Mithridati: brevique omnia, quæ per Cappadociam dux Romanus disposuerat, præsidia dejecta sunt. Mithridates, ut bonis suis rebus honorem Diis haberet, in alto monte sacrificium Jovi bellorum præsidii patrio more fecit.

XVIII. Ejus hæc fuisse ratio traditur. Primus ipse rex in summo montis cacumine more Persico, ligna suis manibus allata deponit. tum certatim ab aliis aggesta, postquam in quam maximum fastigium excreverunt, alia circum humiliori strue firmantur. In summo rogo cum melle & lacte vinum oleumque, & generis omnis odores largiter affunduntur: altera pyra, quam humiliorem strui diximus, cœnam præsentibus paratam sustinet, qua peracta, ignis subditur. Inde propter copiam materiæ, locique altitudinem tantum flammarum emicat, ut ad centum & triginta millia passuum incendium conspiciatur, neque propter ardoris violentiam quisquam eo accedere per dies aliquot proximos possit.

XIX. Id sacrum Persarum olim reges faciebant Pafargadis. inde transit ad Ponticos velut hereditario jure, quod ii genere Persarum regum erant editi. Nec alienum est, quo Mithridatis nobilitas & pars majorum cognoscatur, brevem gentis ejus recensitionem subnectere. Mithridatis, qui tam diu bellavit cum Romanis, eodem nomine pater fuit, Evergetes cognomento; de quo suis locis quædam memoravimus. Ante hunc regnavit Pharnaces, Sinopensium domitor, quos contra patrem ejus Mithridatem Rhodii defenderant.

XX. At Ariobarzanes Amastrin adjunxit regno, nobilem urbem, patris Mithridatis opibus validus, qui Cap-

§ XVIII. Strab. l. 15. Herodot. 1, 31. Appian. Mithrid. § XIX. Strab. l. 12. Polyb. 4, 56. Memnon. Diodor. l. 10. Appian.

padociam & Paphlagoniam annis sex & triginta obtinuerat, valde auctis paterni regni viribus. Pater enim ejus Mithridates angustius imperavit, prævalente Macedonum potentia. Nam Antigonum sectari necessum habuit, ex Alexandri magni duce potentissimum Asiæ regem : a quo etiam fuisset occisus, nisi fuga servasset salutem. Somniaverat Antigonus (res enim est non indigna relatu) se agrum auro conferere : Mithridatem vero demessum aurum asportare in Pontum.

XXI. Laborat hoc etiam infantiæ genere humanum ingenium, ut & prædictionum harum ratam esse fidem putet, & nihilo fecius pugnare cum fato conetur. Igitur Antigonus tollendum de medio Mithridatem ratus, rem totam Demetrio aperuit, filio suo. Atque ille misertus fœdalis & amici, non equidem voce monuit, ne jusjurandum patri datum falleret, sed, illo inspiciente, in arena depinxit hastili duo verba, fugere jubens Mithridatem. Atque ille cum sex equitibus profugit, occupatoque castello, cui nomen erat Ciniata, fundamentum jecit ejus regni, quod in octava demum successione Romanis armis subjugatum est.

XXII. Igitur & conditoris cognomento celebratur; quod ipse primum sui juris regnum iis locis orsus est, quibus ante Ariobarzanes Phrygiæ satrapa, & Rhodobatæ filius Mithridates, qui Platonis imaginem dedicavit Musis, precario pro regum Persicorum purpuratis præfectisque præfuerant. Nam a septem Persis oriundi, datam a Dario rege majoribus suis ad Euxinum Pontum satrapiam, perpetua successione tradiderant posteris. Quorum omnium potentissimus Mithridates, cum & majorum antiquissimam gloriam, & tum amissas nuper, tum superstites adhuc opes animo reputaret, non satis fractus uno bello, Romani populi vastum imperium iterato sumtis armis oppugnare audebat.

§ XXI. Plut. Appian. Strab. Diodor. l. 15. Laert. in Platon. Flor. 3, 5.

# JOANNIS FREINSHEMII SUPPLEMENTORUM LIVIANORUM

LIBER LII.

IN LOCUM LIB. LXXXVII LIVIANI.

---

## EPI T O M E

LIBRI OCTOGESIMI SEPTIMI.

*Sulla C. Marium, exercitu ejus fuso delectoque ad Sacriportum, in oppido Præneſte obſedit. urbem Romam ex inimicorum manibus recepit. Marium erumpere tentantem repulit. Præterea res a legatis ejus, eadem ubique fortuna partium, geſtas continet.*

I. **S**UB idem tempus L. Sulla, ducto in Volſcos exercitu, Setiam oppidum cepit; non procul inde caſtra habente C. Mario. qui, audita deditione oppidi, cum prope Signiam ad Sacriportum (id loco nomen) cum quinque & octoginta cohortibus veniſſet, inſecutum Sullam ad pugnam provocavit. Proxima nocte viſus Sullæ per quietem C. Marius ſenior fuerat, præcipiens filio, monenſque, vitaret illum diem, minacem & conſiliis ſuis adverſum. Id ſonnum valde confirmavit Sullam, ut eo potiſſimum die dimicare optaret. Idcirco miſſis, qui Dolabellam arceſſe-

rent (is cum parte copiarum procul castra erat metatus) quadrata acie iter verius hostem facere instituit.

II. Nec omittebant Mariani locis opportunis offerre sese, & alibi saxa aut cæspitem obmoliendo vias claudere, nonnunquam variis locis ex occasione conferere manus: donec ita defatigati pugnando simul eundoque Sullani sunt, præsertim quia molestus imber accesserat, ut præ lassitudine vix consistere possent. Id imperatori nuntiatum a tribunis est, simulque milites ostensi, scutis humi defixis sese sustinentes. Fremens ille frendensque, tempus, quod sibi felicissimum ad pugnam futurum existimaverat, ita perire, signum consistendi castrisque ponendis dedit.

III. Ceterum quemadmodum paulo ante certam ejus spem lassitudo militum destituerat, ita tum depositam hostium ferocia reddidit. Marius cum equitibus ferociter in-  
vectus (fessos enim atque operi intentos fundi posse speraverat) hac ignominie specie sic accendit veteranum exercitum vincique insolentem, ut omisso opere, pilisque in margine fossæ defixis, gladios stringerent. Hoc initium acerrimi prælii fuit: collatisque signis, aliquamdiu pari contentione animorum dimicatum, donec inclinante sinistro Marii cornu, priusquam aperta fuga fieret, quinque cohortes cum duabus alis signa projecerunt, & simul transierunt ad hostem.

IV. Ea res ceteros in confessam fugam egit, & insequentibus alacriter, qui paulo recentiores erant, Sullanis, magna fugientium strages est edita. Fenestella cum quibusdam aliis scriptoribus, *interfuisse prælio C. Marium*, negant: *sed vigiliis laboribusque confectum, signo pugnae dato, sub dio quievisse, & fugiente jam exercitu, vix potuisse excitari*. Fuga reliquias exercitus Præneste abstulit, quod natura munitum oppidum, Marius etiam præfidiis firmaverat. Sed tanta fuit trepidatio, ut intromissis, qui primi accurrerant, deinde metu, ne una hostes irrumperent, Præ-

nestini clauderent portas: factumque est, ut Marius tum demum superveniens, fune demisso, in murum subduceretur.

V. Ceteri plerique omnes in conspectu suorum cæli captive sunt. Sulla, *viginti millia hostium eo prælio cecidisse, capti fuisse octo*, scripsit: *suorum tres tantum & viginti desideratos*. Samnites, quotquot in manus venerant, occidi omnes, tanquam perpetuos hostes nominis Romani, Sulla imperavit. Hujus pugnae fama Carbonem, a quo Metellus graviter premebatur, sic exterruit, ut protinus ex locis, quæ ceperat, prælidia deduceret, & cum exercitu Ariminum properaret. Sed forte fortuna accidit, ut per idem tempus Metello opem ferens Pompejus adventaret: qui, discessu hostis cognito, castra ejus occupavit; tergisque abeuntium inhaerens, multis occisis, multis ad deditionem pellectis, magna illum exercitus parte spoliavit.

VI. Et Metellus alium Carbonis exercitum signis collatis cecidit, facili victoria, quia tum quoque inter pugnandum quinque cohortes hostium ad illum defecerant. Neque multo post Pompejus circa Senas devicit Marcium, & ut præmium laboris strenue navati haberent, urbem captam a militibus diripi passus est. Sed non sicut indulgens in bene meritos, sic etiam insolentibus lenis aut propitius fuit. Mediolani trucidatus injussu suo senatus fuerat: eaque culpa ad multos pertinebat. Pompejus igitur, ne tumultum moverent, si soli evocarentur, veritus, universum exercitum adesse in concionem jussit.

VII. Sic nocentes, quia cum omnibus acciti erant, aliud quid velle imperatorem rati, affuerunt; & cetera pars exercitus, quæ pura ab illo crimine erat, postquam intellecta res est, tanto diligentior in custodiendis reis præstiterunt operam, ne illorum fuga sibi tanquam conscii ejusdem noxæ imputaretur. Interim L. Sulla compulsus, intra Prænestinorum mœnia Marium circumvallare coepit, quia propter loci naturam expugnari armis nequibat.

§ IV. Plut. Auctor de Vir. ill. c. 68. Vellej. 2, 2. Appian. § V. Plut. Appian. Orôf. § VI. Front. 1, 9.



Nam supra urbem mons excelsus in altitudinem amplius passuum ducentorum quinquaginta confurgebat: hæc arx erat civitatis, & ab diversa parte continentibus jugis angusta cervice jungebatur.

VIII. Igitur fossam vallumque e longinquo duci iussit: operique Lucretium Ofellam præfecit, equitem Romanum, qui nuper e Carbonianis partibus ad se transfugerat. Id consilium a quibusdam reprehensum est, non improbabili-  
liter querentibus, *cur e tot egregiis, quos circa se habebat, vi-  
ris neminem, sed obscurum & ignobilem hominem ad tantæ rei  
ministerium delegisset. certe sædissimi propositi conscium humiles  
potius, & servituti paratos extollere voluisse: a bonis viris  
haud æque promptum ad turpia obsequium expectantem.*

IX. Illa quoque causa subesse putabatur, ne præstantes vir-  
tute ac nobilitate homines consiliorum gestorumque laudem ad  
se retraherent; republicaque restituta, pari cum illo jure cense-  
ri æquum putarent. Viles ergo malebat, qui, modicis præmiis  
contenti, famam potentiamque solidam ad imperatorem  
transmitterent. Sed paulo ante, cum adversariorum appa-  
ratibus omnis Italia streperet, & ingentes passim exerci-  
tus contra se ducibus minime contemnendis concitarentur;  
optimum quemque honestissimumque maximo studio ambi-  
verat, eorumque opera gratanter erat usus.

X. O gravem vitæ pestiferamque luem, quæ vinculum  
humanæ societatis solvit, maximumque rerum gerendarum  
instrumentum obtundit ac hebetat! Quem enim omnium  
fidum nobis, nostræque utilitatis causa omnia facturum  
sperare possumus, si hæc pessima consuetudo inolevit, ut,  
quos ob spem præstandæ operæ caros habuimus, post præ-  
stitam spernamus? Ceterum Sulla, rebus ad Præneste con-  
stitutis, Romam petens, omnibus viis globos militum præ-  
mittebat, præcipiens, ut exclusi mœnibus Ostiam con-  
cederent: recepti ad portas præsidii causa remanerent. Sed  
illis non quæ in via modo erant urbes, sed ipsa Roma sta-

tim patuit; fame urgente populum, & jam inter tot civilium bellorum vicissitudinem affuetis hominibus potentiori accedere.

XI. Sulla, cum ex sententia rem procedere comperisset, nihil cunctatus ad urbem venit, & copiis in Campo jussis tendere, ingressus, bona inimicorum, qui sub adventum ejus omnes profugerant, sub hasta vendidit. Advocato deinde in concionem populo, *necessitatem præsentem miseratus, quod iterum armatus adire urbem cogeretur, quam contra omnem vim atque omne periculum, armis suis semper studisset defendere; improbitatem atque pervicaciam adversariorum inculcavit, qui neque secunda fortuna quiescere, neque adversa pœnitere didicissent.*

XII. Sibi semper certum fixumque fuisse, in honorem communis patriæ, acerbissimis adversariis parcere. Hujus animi se non suos tantum duces legatosque, sed ipsum populum Romanum habere testem, cui lenitatem suam semper approbavit, quemdiu suo se ingenio uti perversitas inimicorum siverisset. Sed ubi viderit, eosdem illos, quorum injurias patriæ condonasset, suam mansuetudinem pro ignavia accipere, atque velut impune quidlibet ausuros, ipsi patriæque eandem perniciem meditari; vim atque temeritatem improborum virtute ac constantia repulsurum, scelestis atque nefariis armis justa ac pia opposuisse.

XIII. Affuisse etiam causæ meliori Deos, affuturosque. Considerent igitur Quirites, & quemadmodum temperando a bonis innocentium, quæ diripienda ipsis pravi homines objecissent, in præsentia benevolentia suæ in has partes documentum, ita nihil esse aliud, quam quæ ipsis essent optatissima, expectarent, paulo post sublatis discordiis, pacem, & qualem desiderarent reipublicæ statum, visuri. Hæc ita, uti dicta erant, a plerisque accipiebantur: at quibus reputatio temporum, & quæ paulo ante viderant, acrius exercebant ingenia, rem esse periculi plenissimam autumabant.

XIV. Etiam maioribus seculis, cum nondum quotidianis rebus accenderi bella civilia, & in urbe, in foro, in curiâ pu-

gnæ cædesque possent, sæpe discordiam partium ad sanguinem necemque imbecilliorum pervenisse. Sullam, tametsi mirifice adhuc lenitatem præferat, ita tamen irritatum ab adversariis esse, ut ab ipsa Modestia vix possit postulari, in tanta vindictæ & causa & occasione, incruenta reipublicæ conversio. neque illum ingenio abhorreere a sævitia, sed tempori dedisse, ne præmature effervesceret: ne sic quidem temperare potuisse, quin evidentiæ nonnulla crudelis animi argumenta erumperent.

XV. Priore sane bello, cum servatus a Mario ad legiones jam alii decretas redisset, vi ac armis omnium rerum arbitrium arripuisse: urbem occupasse: multisque, ipso connivente, interdum & jubente, occisis, coegisse senatum, ut complures egregios viros facultatibus suis exutos, patriæ aspectu privatos, hostes judicaret. Sed nec ambitionem ejus minus, quam iracundiam metuendam esse. Cupiditate honorum & dominationis multos ingenio mites eo se præcipitare, unde sine suo, aut aliorum exitio eniti nequeant. Jam vero ita comparatum in rebus humanis, ut sine ulla cunctatione alios quisque pro se, quam se pro aliis perire malit.

XVI. Non posse existere clementem animum in civili victoria: iras, odia, offensas, quamquam mitissimos mores exacerbare. accedere licentiam summæ potentiæ: & interdum vel a nolentibus aliquid durius fieri, ut admoneantur homines, quantum victoribus liceat, si velint. multa quoque contra voluntatem facere cogi, ut satisfaciant adjutoribus victoriæ. horum inexplebilem avaritiam nullis unquam opibus exsatiari posse: sed ad has parandas opus esse crudelitate, nam & adimi bona innocentibus invidiosissimum esse; & injustissimos etiam, cum facere scelesti nihil pensi habeant, probos tamen videri malle. nihil ergo reliquum, quam ut quibus eripere facultates constituerint, eis prius adimant vitam, quo tanquam sortes punivisse credantur.

XVII. Ceterum Sulla, non diutius Romæ moratus, quam ut curatis instantibus, amicorum quosdam urbanis rebus præficeret, inde contento cursu Hetruriam petiit: quod apud Clusium Carbo consul florentes copias, ipsum partium robur, contraxerat. Accesserant Cæliberorum alæ,

quas nuper Hispaniarum prætores consulibus auxilio misserant. cum his præcursores Sullæ contracto ad Clanum fluvium equestri prælio, circiter quinquaginta occiderunt: ducentos septuaginta non captos, sed sponte transgressos, deduxerunt ad imperatorem. Carbo, re cognita, insensus Celtiberis, & parem reliquorum perfidiam metuens, circumdatos valida manu omnes trucidavit. Eodem tempore Sulla cum alia parte copiarum in agro Caletrano circa Saturniam coloniam oppositos sibi hostes vicit: & Metellus, Ravennam navigans, Uritanum agrum planum & frumenti feracem in potestatem redegit.

XVIII. Aliæ quoque Sullanæ copię in Neapolitanorum oppidum noctu proditorum opera recepti, promiscua cæde compleverunt omnia, triremesque civitatis abduxerunt. Etiam, ut ubique eadem partium fortuna esset, in Spoletinis campis Pompejus Crassusque Carbonianorum tria milia conciderunt, Carinatisque castra circumfederunt. Inter hæc Sulla Carboque, capita factionum, apud Clusium, ab oriente die ad occidentem commissio prælio, neutro inclinante victoria, tenebrarum superventu dirempti sunt. Carbo deinde copias magnas ad eximendum obsidione Carinatem misit: quibus insidiæ a Sulla positæ, & ad duo milia interempti sunt. Carinas, sædam tenebris & pluvia noctem nactus, ex locis iniquis exercitum ad tutiora deduxit: magis dissimulantibus, quam ignavis hostibus, quod inter cæca tenebrarum & tempestatis ad prælii laborem aleamque prodire pigebat.

XIX. Post hæc Carbo ad liberandum Præneste, ubi collegam fame premi compererat, Marciuni cum octo legionibus misit. Eas angustis locis insidiæ Pompeji cum excipissent, fuga fragesque facta est, & in tumulum quendam, quod evaserat, rejectum. Marcius, non extinctis ignibus, ne consilium proderetur, ad Carbonem, ut re desperata, refugiebat: sed prodita re, seditiosis militum vocibus agitur, auctorque insidiarum, quas essent passi,

appellatus est. Eoque tandem irarum ventum, ut, convulsis signis, pars Ariminum peteret; alii passim domos dilaberentur: neque ad summam plus septem cohortibus apud ducem permanerent. Irrita Marcii expeditio M. Lamponium, Pontium Telesinum, Guttam Capuanum Italicos duces accendit, ut eo promptius ad auxilium Marii concurrerent.

XX. Neque spernendæ his vires, septuaginta millia armatorum, erant. Sed ubi hos adventare Sulla cognovit, quibus locis maxime arcta sunt itinera, & necessario transeundum hostibus erat, castrametatus, frustra quærentes aditum, exclulit. Proinde Marius, nullam, nisi in se ipso, spem reliquam videns, inter oppidum & opera Sullæ (spatium enim satis magnum intererat) castellum exstruxit, machinisque & copiis ibi collocatis, eruptionem tentavit. Sed cum per complures dies nequidquam se fatigasset, accurrente Sulla, intra Præneste repulsus est.

XX. Plut. in Sull. c. 57. Appian. Liv. Epit.

# JOANNIS FREINSHEMII SUPPLEMENTORUM LIVIANORUM

LIBER LIII.

IN LOCUM LIB. LXXXVIII LIVIANI.

---

## E P I T O M E

LIBRI OCTOGESIMI OCTAVI.

*Sulla Carbonem, exercitū ejus fuso ad Clusium, ad Faventiam Fidentiamque cæso, Italia expulit: cum Samnitibus, qui soli ex Italicis populis nondum arma posuerant, juxta urbem Romanam ante portam Collinam debellavit: recuperataque republica, pulcherrimam victoriam crudelitate, quanta in nullo hominum fuit, inquinavit. Octo millia deditorum in villa publica trucidavit: tabulam proscriptionis posuit: urbem ac totam Italiani cædibus replevit: inter quas omnes Prænestinos inermes concidi jussit: Marium, senatorii ordinis virum, cruribus brachiisque fractis, auribus præsecis, & effossis oculis, necavit. C. Marius, Præneste obsessus a Lucretio Ofella, Sullanarum partium viro, cum per cuniculum captaret evadere, sepius ab exercitu, mortem sibi conscivit: id est, in ipso cuniculo, cum sentiret se evadere non posse, cum Pontio Telesino, fugæ comite, stricto utrinque gladio, concurrir: quem cum occidisset, ipse saucius impetravit a servo, ut se occideret.*

**P**AULO ante, quam Sulla ad Sacriportum dimicaret, a ducibus ejus, duobus Serviliis ad Clusium, Metello Pio ad Faventiam, M. Lucullo circa Fidentiam, Carbonianos magnificis præliis victos esse, Vellejus Paterculus retulit. Sed ego Livianam historiam vestigiis persecutus, seriem rerum, Appiani quoque testimonio fultus, aliter contexui. Igitur, quibus temporibus repulsus intra Prænestina mœnia Marius fuit, iisdem ad Faventiam Carbo Norbanusque per absentiam Sullæ Metello imminentes, conjunctis exercitibus prope castra ejus vix una hora diei reliqua venerunt. Et quamquam statim affutura nox erat, præterea locum pugnandi densa circum vineta arctabant; ira magis, quam consilio, impetum fecerunt, tanquam inopinata audacia plus formidinis illaturi.

II. Sed iniquo loco, cum impediti vitibus milites prociderent, neque armis uti possent, magna cæde victi sunt; exercitusque omnis ita dissipatus, ut morte decem millium, sex millium transfugio, ceterorum, quo cuique visum fuerat, abeuntium desertione, non ultra mille hominum servatis ordinibus Arretium sit reductum. Alia quoque legio Lucanorum, quam P. Albinovanus, qui cum Mario fene hostis judicatus fuerat, ducebat, frustra indignante Albinovano, signa ad Metellum transtulit. ille cum, omnibus tentatis, retinere deficientes nequivisset, ad Norbanum se recepit. Deinde fata partium, & quam frustra obniteretur, reputans, animo commutato, neque simplici scelere prodicionis contentus, Norbanum, & qui una erant duces, invitavit.

III. Norbanus ipse non accessit: Flavius Fimbria ceterique cum venissent, omnes inter ipsas epulas trucidati sunt. Albinovanus ad Sullam profugit. Harum cladum fama cum Ariminum, Albinovani prodicione oppressum direptumque, deinde alia multa iis locis præsidia alienasset;

§ I. Vellej. 2, 28. Liv. Epit. Appian. § II. Oros. 5, 20. Appian.

Norbanus nemini suorum, rebus suis adversis, fidem mansuram ratus, privato navigio Rhodum avectus est. Carbo, nihil non in eo situm videns, si Prænestina solvi obsidio posset, L. Damasippum cum duabus legionibus eo proficisci jubet: sed nec ab hoc quidem, occupatis per Sullam angustiis, penetrari quitum. Metellus interea, quidquid a Ravenna ad Alpes Gallicorum populorum colit, adjunxit partibus: & ad Fidentiam in agro Placentino M. Lucullus, cum a Quinctio obsideretur, cum sexdecim cohortibus adversus quinquaginta eruptione pugnavit: caesisque millibus octodecim, castra quoque vi cepit.

IV. Alacritatem militum ante id praelium ea re mirifice auctam ferunt, quod, cunctante Lucullo, clemens ventus e vicino prato florum magnam copiam in vallum ejus compulit; qui scutis galeisque haerentes, coronati ab hoste exercitus speciem referre visi, velut certo victoriae omine ad conandum omnes impulerunt. Inter haec etiam a M. Crasso res in Umbria gestae, & insigne iis locis municipium Tuder receptum est. Haec aliae super alias clades ita perculerunt Carbonis animum, ut de retinenda Italia desperaret. Igitur quamvis ad Clusium adhuc triginta militum millia haberet, praeterea duas sub Damasippo legiones, alias itidem sub Carinate & Marcio, Samnitum quoque ingentes copiae partibusque fidae superessent; turpi formidine Italiam, atque exercitum consul deferuit, cum amicis in Africam proventus.

V. Relictus ad Clusium exercitus cum Sullanis acie commissa, post viginti ferme millium interitum, dissolutus est, reliquis in suam quoque patriam sparsis. Decus hujus victoriae a quibusdam duobus Serviliis, ab aliis Cn. Pompejo vindicatur. Quid veri sit, haud facile queas discernere: omnes istos duces simul affuisse praelio, non sit absurdum existimare. Servilii certe magnam eo bello & praecalam

§ III. Pedian. in Verr. 4. Cic. Verr. 1, 14. Appian. Liv. Epit. Crot. Plut. in Sull. c. 53. § IV. Plut. in Crass. c. 10. Appian. Plin. 8, 57.



operam fuisse, boni auctores prodiderunt. Sed Carinas & reliqui Carboniani duces junctis copiis ad angustias accesserunt, extremo conatu simul cum Samnitibus perrupturi. quippe Samnites inde repulsi, Campaniam Hetruriamque vastabant, sub invidia partium se vindicantes.

VI. Id quoque frustra fuit. ergo cum neque tenere propositum possent, & instante hinc Sulla, inde Pompejo, neque progredi facile, neque regredi tutum videretur; nocturno itinere Romam petierunt, virorum & commeatumum inopia haud difficilem captu arbitrati: & ad duodecimum neque amplius ab urbe lapidem castra in Albano monte posuerunt. Ibi nocte exacta, haud exigua cum spe, quod tantis totque ducibus imposuissent, simul cum luce profectos ex urbe nobiles juvenes, una cum Ap. Claudio insigni viro ceciderunt. Octoginta millia bellatorum erant: dimidium ejus numeri Samnites implebant, quos solos omnium Italicorum arma retinentes Pontius Telesinus civis eorum ducebat, vir domi bellique fortissimus, & magnis certaminibus inveteratus.

VII. Igitur cum res ad summum timorem spectaret, urbsque tota tumultu & clamoribus sequioris præcipue sexus personaret; primus ab imperatore Sulla cum septingentis equitibus citato cursu Balbus affuit: qui tantum moratus, donec fudor equorum confisteret, statim iterum frenari eos jussit, & ad distinendum hostem procucurrit. Interim Sulla, raptim exercitu ducto, ad portam Collinam circa meridiem pervenit, castrisque ad Veneris fanum positis, ut quique primum advenerant, *prandere milites, deinde in aciem assilere*, jussit. Jam enim & hostes ad urbem castra metabantur. Ibi Dolabella & Torquatus magnopere Sullam obtestati sunt, *ne lassatis itinere militibus patriæ salutem in unius pugnae discrimen committeret.*

VIII. *Non Marium ex adverso & Carbonem, inimicissimos homines, Romanos tamen, sed Lamponium cum Lucanis, sed cum Samnitibus Telesinum consistere, infestissimos Romano no-*

§ V. Sallust. Liv. Epit. Appian. Vellej. 2, 28. Plut. § VI. Flor. 3, 21. Plut. Appian. § VII. Appian. Plut.

mini, bellicosissimosque & populos, & duces. Atque illos multarum horarum quietem curandis corporibus consumpsisse: sibi suisque simul faciunda omnia, eundum, prandendum, pugnandum esse. non equis, non viris, solidum adesse robur, ut cibo ac quiete refectis hostibus objici debeant. Esse quidem sibi militum fidem eximiam, esse virtutem, haftenus etiam Fortunæ singulare obsequium affuisse: sed neque ab illis plus, quam possint, neque ab hac plus, quam soleat, expectari oportere.

IX. Nunquam non timendam casuum humanorum vicissitudinem: & quamlibet fortes viros a deterioribus opprimi posse, si cum validis & refectis ipsi labore ac inopia debiles committantur. Non esse causam festinandi, ubi meliorem tuam, quam hostium conditionem, factura mora videatur. Si paululum quiescat, non modo redituras militi vires; sed hostium ex desperatione natam audaciam, tempore & spatio rectius omnia æstimandi defecturam. Nunc adhuc, dum animi caleant, acre prælium facturos: ubi reflexerit impetus, & modo validissimum juxta se exercitum, nec procul inde caput rerum Romam recogitaverint, modo suarum adversarumque partium reputaverint fortunam, aut posituros arma, aut minus constanter opposituros.

X. Nihil motus horum precibus ac monitis Sulla, Jam in eo res est, inquit, ut, quod restat negotii, celeritate confici debeat. Mori præstat, quam hanc ferre ignominiam, ut, me incolumi & inspectante, Samnites Lucanique obsedisse Romam gloriantur. Testa urbis, & Capitolinam arcem, & quidquid ibi Decorum hominumque est, quoties respicerem; exprobrare mihi vel timiditatem, vel negligentiam crederem, si unum diem amicos nostros in metu, adversarios, si qui etiamnum Romæ sunt, in spe versari, passus essem. Neque militum lassitudinem, nec Fortunæ inconstantiam objeceritis. Viverent adhuc immensa hostium agmina, neque Prænestinis mœnibus Marium inclusisset necessitas, si ad Sacriportum his argumentis a pugna fuisset absterritus.

XI. Milites mei, etiam fessi, bene pugnare possunt: & de Fortuna quantum mihi polliceor, quibusque inductus rationibus, haud semel audivisti. Illa, illa, sicuti perpetuo consuevit,

nunc quoque reperiet aut faciet nostræ victoriæ viam. Nec adeo remere cœptum mihi consilium existimaveritis. animos exercitus magis, quam corpora respicio. quamdiu illi vigent, non deerunt etiam fessis lacertis vires: & tamen spatium erit cibo ac modica quiete reficiendi membra. Vos ergo alacres, bonaque spe pleni, ad curandum vestras partes discedite: militemque, ut solitam nobis virtutem præstet, excitate. nam ego, quod mihi, reipublicæ, & exercitui bene vertat, signum pugnæ confestim dabo.

XII. Ita Kalendis Novembribus post nonam diei horam summis viribus concursum: neque unquam propior victo Sulla, aut in majore periculo Roma fuit. Dextrum Sullæ cornu, cui M. Crassus præerat, egregie vicit; persecutusque fugientes Crassus certos homines misit, qui rem bene gestam nuntiarent Sullæ, & cibaria militi poscerent. nam delatus Antemnam usque, castra ibi posuerat. Sed nocte jam adulta, qui fuerant missi, ad Sullam pervenerunt, defunctum discrimine, cui tum gravissimo ac formidolosissimo subiverat. Nam interim, dum oppositos sibi hostes Crassus fundit fugatque, lævum Sullæ cornu valde laborarat: quamquam eo ad sistendam suorum fugam Sulla ipse se contulisset.

XIII. Ferunt, albo & pernici equo insidentem, & a duobus hostium equitibus inde agnitum, hastis emissis peti- tum fuisse; nec animadverso periculo, sed agasone equum impellente, hætenus esse prætervectum, ut pone caudam equi hastæ in terra defigerentur. Erat hoc morum Sullæ, ut modicum sigillum Apollinis, quod ex templo Delphico sustulerat, in conspectu exercitus adoraret, *promissamque victoriam maturari* peteret: id tum etiam eduxit sinu, ex- sculatufque, fufis, quas præsens trepidatio suggererat, precibus, cedentibus cœpit obistere; quosdam minis, alios precibus, nonnullos injecta quoque manu retinens. Neque tamen efficere potuit, ne, multis amicorum familiariumque

§ XII. Vellej. 2, 28. Oros. Plut. in Sull. c. 59. & Crass. c. 10. Appian. civil. l. 1.

cadentibus, permixtus agmini fugientium in castra sua repelleretur.

XIV. Et instabat fortunæ Telesinus, totaque volitans acie, *adesse Romanis ultimum diem, eruendam delendamque urbem; nunquam defuturos raptores Italicæ libertatis lupos, ni silva, in quam refugere solerent, esset excisa*, & alia incendiando militi acclamabat. Igitur multis, qui spectatum prodierant, ad urbem refugientibus, senes ad custodiam portarum relictæ, claustra demiserunt: quibus & alii mortales, & quidam senatorum elisi sunt. tantaque formido fuit, ut propemodum solutus obsidione Marius fuerit, quia multæ fuga ad Lucretium delati, perditas res, oppressum Sullam, occupatam urbem nuntiabant. Ceterum annitente imperatore, & quia clausis portis aliud præsidium nullum supererat, restituta acies est: demumque post primam noctis horam superior esse res Romana cœpit. reliquum noctis cædibus datum, castraque hostium capta sunt.

XV. Magna ibi strages fuit, quod imperator edixerat, *ne quis Samnis vivus caperetur. Ad quinquaginta hominum millia utrinque desiderata* dicuntur. In his & Albinus interiit. Postridie Telesinus semianimis repertus est, victoris magis, quam morientis vultu. caput abscissum cum Damasippi, Marcii, Carinatisque capitibus, qui capti in fuga fuerant, ad Lucretium missa sunt, ut obsessis Præneste ostenderentur. Hactenus omnia Sullæ præclara, aut saltem excusanda videbantur. Recuperata respublica, parta pulcherrima victoria, patriæ impendens periculum summa vi depulsum, immortalia ad gloriam facinora erant: Damasippum etiam, & alios ejusmodi miseria publica faginosos, jugulari jussos, homines lætabantur.

XVI. Sed statim hæc decora omnia crudelitate, quanta in nullo alio unquam fuit, fœdata sunt: eaque facta edita, & tam a superioribus viri institutis discrepantia, ut vix ab eodem homine profecta viderentur. Modestissimus ante

§ XIII. Front. Strat. 7, 11. Plut. § XIV. Vellej. Plut. Appian.  
§ XV. Vellej. Appian. Strab. l. 5. Diodor. ap. Valer. Liv. Epit.

victriciam, ſimul placere ſibi victis Samnitibus cœpit. ( nec enim reliquias belli ullo in numero ducebat ) Cinnas & Marios, quorum antea ſolitus erat incuſare ſævitiã, longo poſt ſe intervallo reliquit: ſive recens talem animum indiderat fortuna; ſive diſſimulatum ad id temporis, detexerat. Poſtero, quam pugnatum eſt, die cum Antemnam veniſſet, tria hominum millia, qui ſe ab hoſtium acie abruperant, veniam petitiim miſere: & ille annuit, *ſiquidem aliqua prioribus ſociis illata clade pœnitentiam partium approbaſſent.*

XVII. Illi cum aliis conferta manu, amiſſis occiſiſque multis, quot ſupererant (cognita enim cauſa cædium, ceteri quoque *eadem auſpicia ſecuturos* dixerant) ad octo millia Sullæ ſe dediderunt. Eos in villam publicam ingredi juſſos, quaſi inter ſuos milites deſcripturus, eodem tempore, quo ſenatum in ædem Bellonæ convocari juſſerat, crudeliſſime trucidavit: multique ſimul pagani, qui forte eodem venerant. etiam Sullanarum partium homines, perierunt. Corpora in Tiberim projecta ſunt.

XVIII. Dum tanta multitudo cæditur, ipſe verba in ſenatu faciebat: Patribuſque ad horribilem tumultum ac clamorem, quem tot millia indigne moritura edebant, exteritis; eodem, quo dicere cœperat, vultu, vociſque tenore, *Hoc agite, inquit, Patres conſcripti. pauci ſeditioſi juſſu meo puniuntur.* qua tantæ acerbittatis voce, vix quidquam ab ullo homine dictum puto truculentius. Proximis deinde multis diebus paſſim per urbem cædeſ factæ, tantum gladiorum licentia, ut, quem quis vellet, occideret. inimicos ſuos maxime tollebant: deinde, quorum aut dignitas invidiam, aut res familiaris prædam luculentam oſtentabat.

XIX. Eadem iſta, velut ſigno ab urbe dato, per omnem Italianam fiebant; & ubique per colonias ac municipia, quos

§ XVI. Salluſt. Catilin. c. 51. Liv. Epit. Diodor. Vellej. Jo. Antiochen. ap. Valeſ. Plut. § XVII. Liv. Epit. Dionyſ. 5, 87. Plut. Strab. l. c. Oroſ. 5, 21. § XVIII. Val. Max. 9, 2. Diodor. Plut. Oroſ. Flor. 3, 21.

adversatos Sullæ, aut satellitum ejus alicui constabat, trucidabantur. Plurimi sanguinis, alii spoliis cupiditate, cædes perpetrabant: erant & qui periculum sibi metuebant, ni aliorum exitio studium partium significassent. Tandem C. Metellus juvenis ausus est in senatu interrogare Sullam, *ecquem ergo suppliciorum finem statuisset? Non enim*, inquit, *hoc deprecamur, ut, quos decrevisi tollere, vivant: sed ne, quos conservatos cupis, moriantur.*

XX. Ajunt & Q. Catulum palam dixisse, *cum quibus tandem victuri sumus, si in bello armatos, in pace inermes occidimus?* Tum negante Sulla, *constitutum adhuc sibi esse, quibus velit parcere*, subjecit Furfidius primipilaris Sullæ, turpissimus assentator, qui mox in petitione magistratuum egregiis hominibus prælatus est, *quin igitur edis, quos tibi punire certum est.*

XXI. Id se facturum recepit. neque multo post, re neque cum senatu, neque ullo magistratuum communicata, proscriptionis proposuit tabulam, qua nomina octoginta continuebantur: inter quæ consularia quatuor, Carbo, Marius, Norbanus & Scipio; deinde Sertorius, & alii, quos Sulla præ ceteris oderat. omnium ad inauditæ antea sævitie tyrannicique imperii exemplum indignatione commota, tantum uno die interpolito, ducentos viginti, dein postredie iterum haud pauciores adscripsit.

XXII. Adjecit pro concione, *eos, quorum meminisset, proscriptisse: de ceteris decreturum, ubi in mentem venisset.* Receptoribus etiam proscriptorum pœna mortis est proposita, non excepto, sanguine junctos, an externos fervere voluissent. Et sicut humanitati supplicium, ita crudelitati & perfidiæ merces dicta est, in singula capita talenta duo. hæc servo, si dominum occidisset, hæc, si parentem, filio repræsentabantur. Proditoribus etiam latentium præmia constituta sunt. Denique quatuor millia septingenti, quos ea pestis sustulit, jubente Sulla, tanquam ad præclari facinoris servandam memoriam, in tabulas publicas relati sunt.

§ XX. Plut. Oros. Flor. 3, 21. Sallust. Diodor. Liv. Epit.

In his senatorum equitumque Romanorum duo millia fuisse traditum.

XXIII. Neque Romæ tantum, sed per universam Italiam, furialis illa tempestas defæviit. Severæ passim quæstiones habebantur, si quis sub Mario, aut Carbone, legatiffve eorum stipendia civili bello meruisset: si partes ope, consilio juvisset: si omnino studiosus illarum fuisset. Quibusdam etiam crimini datum referunt, quod cum aliquo eorum commune iter inivissent. Ibi omnia divina humanaque violata & polluta sunt. mariti in gremiis uxorum, in sinu matrum liberi confossi. sacra hospitalia, cærimoniæ & religiones Deorum, ipsaque eorum penetralia, nemini securum adversus percussores perfugium dabant.

XXIV. Eratque numerus exiguus per iram aut odium victoris pereuntium, præ multitudine eorum, qui facultatum causa necabantur. quorum etiam per nomenclatorem conquesta nomina tabulæ proscriptionis tyrannus adjecit. Q. Aurelius, vir quieti animi, & conscientia securus, cum tantum aliorum sibi dolendam vicem putaret, lectis proscriptorum nominibus, cum se quoque videret adscriptum, *Væ misero mihi*, inquit, *fundus Albanus me persequitur*. neque longe progressus, a quodam, qui eum agnoverat, percussus est. idemque sive Lollii, sive cujusdam alterius factum, sed ex merito fuit.

XXV. Is singulari pravitate ingenii inter turbam in forum ad legendam tabulam gestiens procurrerat, & quorum proposita nomina cognosset, in eos multa contumeliose dicebat, calamitate miserorum gaudens. igitur hunc statim divina corripuit ultio: namque dum legendo carpendoque singulos pergit, suum in ima tabula adscriptum nomen videt. quare metu obmutescens, cum se capite adoperto subduceret, agnitus, & e vestigio, lærantibus, qui adstiterant, omnibus, confossus est. Inde latior in omnes

§ XXII. Appian. civil. l. 1. Plut. Vellej. 2, 28. Val. Max. Flor. Augustin. de civ. D. Liv. Epit. § XXIV. Oros. Diodor. ap. Vales.

pavor; nec quid aut facerent, aut omitterent, quo tuti forent, fatis sciebant.

XXVI. Accederes ad tabulam; pro curioso periclitare-  
ris: non accederes; pro indignante: quæreres, quid scri-  
ptum esset, pro te aut tuis conscientia sollicitus videreris:  
adstares tacitus; odiis latronum objicerere, tanquam tristi  
silentio præsentia damnans. Nam & multi, quod vel subri-  
ferant ad talia, vel frontem contraxerant, cædebantur. ne-  
que aut amici casu ingemiscere, aut adversarii exitio læ-  
tari impune erat. Præterea multis perniciosus cognominum  
error erat, quæ percussores, ubi proscriptos non nossent,  
aliis affingebant: oriebaturque sæpe imponentium cogno-  
mina & rejicientium vehemens contentio.

XXVII. Ne mulieres quidem exemptæ penitus periculo  
erant, quin etiam illarum nonnullæ gladiis homicidarum  
objicerentur. Inter has miseras minus videbantur misera-  
biles, quos ignaros fortis suæ, aut dum illam discunt,  
perceptor occupabat: eorum, qui præviso periculo se abscon-  
diderant, sollicita & morte tristior vita erat, quia neque  
profugere, ne deprehenderentur, audebant, neque in tanto  
omnium metu, cum multi ab amicissimis proderentur,  
confidere latebris poterant.

XXVIII. Neque securiores erant, quorum nominibus  
crudelis stilus pepercit. Nec enim modo proscriptos ju-  
gulari, sed etiam jugulatos proscribi, obtinuerat. L. Cati-  
lina, magnam postea famam sceleribus nactus, cum fra-  
trem nondum proscriptum sustulisset, oravit Sullam, ut  
tanquam superstitis nomen in tabulam referretur, & im-  
petravit. Ergo ut pro tam pulchro merito dignam refer-  
ret gratiam, excarnificando M. Mario prætorio, fratre con-  
sulis, operam præbuit: cujus cruciatibus nihil vidit illa ætas  
crudelius.

XXIX. Hunc enim de caprili casa extractum, prius  
occidi Sulla vetuit, quam exquisitissimis tormentis, ad Lu-

§ XXV. Oros. Diodor. § XXVII. Val. Max. 9, 2. Diodor.  
§ XXVIII. Oros. Diodor. Plut. in Sull. Senec. de Ira. Flor. 3, 21.



ratorum sepulcrum, ubi conditus Q. Catulus pater erat, laceraretur: quia L. Cæsar ad Varii bustum occisus a Marianis fuerat. Raptus ergo per ora vulgi Marius trans Tiberim, & virgis inter eundem cæsus, oculis erutis, perfractis cruribus, amputatis manibus, exsecta lingua, membris omnibus contusis, infelicem spiritum per summos cruciatus reddidit. Ad hoc tam immane spectaculum cum forte adstans M. Platorius senator linquente animo concidisset, illico mactatus est.

XXX. Ibidem etiam Venulejus triumvir periit. Caput sua manu defectum, Catilina per urbem eadem manu retulit ad Sullam. Erat enim spectaculis ejusmodi nihil Sullæ suavius: & omnium, qui ubique erant occisi, capita ad illum relata, pro Rostris proponebantur, eademque omnia pericula creabant intuentibus, quæ de proscriptionis tabula memorata sunt. Sed Catilinam tam gnavam suæ severitatis & industrium satellitem, Gallis, quorum potissimum ministerio in occidendis hominibus utebatur, præfecit. a quibus M. Volumnius, L. Tantalus, alique illustres equites Romani sunt trucidati. inter quos Q. Cæcilius fororis suæ virum, qui ætate & ingenio quietus, neutrarum partium fuerat, Catilina suis manibus occidit.

XXXI. Interim M. Marii caput Præneste missum, Cajum consulem ad ultimam desperationem adegit. Nam qui cum eo obsidebantur, postquam aliorum ducum audivissent interitum, aliorum ipsi vidissent præfixa hastis capita, perisse Carbonis copias, fugisse Norbanum, urbem in potestate Sullæ esse cognovissent; oppidum Lucretio dederunt. Marius per cuniculum, quales Præneste fuisse aliquot antiquitus, ex Strabone discimus, conatus evadere, postquam septum hostili exercitu exitum intellexit, cum minore Telefino, ejus, qui ad portam Collinam occubuit, fratre, belli fugæque socio, strictis pugionibus concurrir: eoque interfecto, ipse leviter vulneratus, servo suo cer-

§ XXIX. Val. Max. Cic. de petit. Conf. c. 3, Liv. Epit. Oros. Senec. Sallust. Plut.

vicem præbuit. Sunt, qui sua manu, sunt, qui a Sullanis militibus, in id ipsum dispositis, interemtum putent.

XXXII. Caput ad Sullam relatum, & ab eo pro Rostris positum est, cum cavillo in ætatem consulis, quem *antea remum, quam gubernaculum, tractare debuisse* dicebat. Neque tamen ille indignus tanto nomine credebatur; animoque parenti non dissimilis, fortunam iniquiorem habuisse. neque dubitari posse, quid de eo Sulla judicaverit, qui tum demum, postquam sublatus ille fuerat, cognomentum *Felicitis*, homo omnium miserrimus, assumpsit: statuantque equestrem auratam cum hoc cognomine poni sibi pro Rostris passus est; & cum Metella geminos eodem partu edidisset, puerum *Faustum*, puellam *Faustam* appellari voluit.

XXXIII. Lucretius, Præneste recepto, senatores Romanos, quos ibi repperat, partim interfecit, alios coniecit in vincula, donec Sulla advenisset. Ille non diu cunctatus, & illos, & quotquot legati, quæstores, præfecti, tribuni-que partium illarum fuerant, occidit. Ceteros, spe salutis per P. Cethegum data, in campos progredi iussit. progressis exemit admodum paucos, quorum aliquando usus opera fuerat; reliquam multitudinem tribus agminibus discerni imperavit: ut seorsim Romani, seorsim Samnites, atque Prænestini consisterent.

XXXIV. Tum denuntiavit per præconem Romanis, & ipsos mortem esse commeritos, ceterum suo beneficio fore salvos. Samnites & alios ubique omnes interficere solitus, quod compertum habere dictitabat, *neminem Romanum incolumi Samnio tutum, aut quietum fore*, non dubitavit ad unum omnes cædere. Prænestinorum primo singulos, causa cognita, duci imperaverat: deinde cognitioni se vacare posse negans, universos, quamquam plerique infantes erant, ar-

§ XXXI. Front. Strat. 2, 9. Appian. civil. l. 1. Liv. Epit. Strab. l. 5. Vellej. 2, 27. Auctor de Vir. ill. c. 69. Val. Max. 6, 8. Oros. Diodor. l. 37. Plut. § XXXII. Vellej. Plut. in Mar. c. 30. & Sull. c. 67. Val. Max. Plin. 7, 43. Appian. § XXXIII. Oros. Val. Max. Appian.

mato milite cinctos, sagittis jaculisque configi, aut concidi gladiis præcepit. Ad duodecim hominum millia sic interierunt, quorum quinque millia Prænestinos fuisse reperio (cetera multitudo Samnitium, opinor, fuit) uni tantum, quocum illi jus hospitii fuerat, incolumitate concessa: quam ille fortiter aspernatus, *neque se salutem patriæ suæ publico carnifici debiturum* dicens, immiscuit se civibus suis, & inter eos occisus est. Mulieribus tantum & impuberi ætati pepercit Sulla, crudeli misericordia, cum, quibus concesserat vitam, vitæ usus ademisset.

XXXV. Nam oppidum longe ditissimum ea tempestate diripuit, agrum publicavit. Jam enim desitis fere singulorum hominum pœnis, municipia, coloniasque, & civitates integras mulcabat, aliarum arcibus mœnibusque dirutis; aliis gravi exactione oppressis: quædam etiam sub hasta venierunt, Florentia, Spoletium, Interamna, & de quo multa jam diximus, Præneste. Sulmo quoque, Latii vetus & clarum oppidum, priusquam expugnatum esset, damnatum diruique iussum, cum aliis ejusdem regionis oppidis, ab illis temporibus esse desit.

XXXVI. Hæc omnia Romani fociique, nec immerito; patiebantur, pristinae virtutis simplicitatisque desertores; quos, etiamsi indigna paterentur, meritos dices vel ideo, quia pati potuerunt. Neque enim usquam ea tempestate generosus ille populi Romani spiritus, & rebus omnibus antiquior libertatis amor, præterquam in puerili Catonis animo resedit. is annum agens quartumdecimum, a pædagogo frequenter salutandi Sullæ causa domum ejus deducebatur: quem ille honorem admissionis exhibere paucis consueverat. Ibi cum subinde recens resecta capita videret, quæ viris illustribus demta dicebantur, magistrum interrogavit Cato, *quid ita nemo talem tyrannum occideret?* atque illo respondente, *metus enim odio potentior affectus*

§ XXXIV. Strab. 1. 5. Appian. Liv. Epit. Plut. Val. Max.  
§ XXXV. Appian. Tacit. Flor. 3, 21. Strab. Dionys. 5, 87. Plin.  
3, 5.

*est*; *sibi pugionem dari* postulavit. Exterritus inde Sarpedo (id nomen erat præceptori) nunquam postea, nisi excussum, ausus est ad Sullam ducere. tanta constantia puero, tantumque animi robur inerat, ut solus & securus tyrannidem ferre nequiret, quam tot insignes viri, gentes denique ac nationes, & caput scilicet orbis terrarum Roma, pecudum ritu taciti inultique patiebantur.

§ XXXVI. Plut. in Caton. c. 5.

# JOANNIS FREINSHEMII SUPPLEMENTORUM LIVIANORUM

LIBER LIV.

IN LOCUM LIB. LXXXIX LIVIANI.

---

## E P I T O M E

LIBRI OCTOGESIMI NONI.

*M. Brutus a Cn. Papirio Carbone, qui Cossuram appulerat, missus nave piscatoria Lilybaeum, ut exploraret, an ibi Pompejus esset, & circumventus a navibus, quas Pompejus miserat, in se mucrone verso, ad transtrum navis obniscus corporis pondere, incubuit. Cn. Pompejus, in Siciliam cum imperio a senatu missus, Cn. Carbonem, qui flens muliebriter mortem tulit, captum occidit. Sulla, dictator factus, quod nemo unquam fecerat, cum fascibus viginti quatuor precessit. Rebus novis reipublicae statum confirmavit, tribunorum plebis potestatem minuit, & omne jus legum ferendarum ademit. Pontificum augurumque collegium ampliavit, ut essent quindecim; senatum ex equestri ordine supplevit: proscriptorum liberis jus petendorum honorum eripuit, & bona eorum vendidit: ex quibus plurima primo rapuit. redactum est sestertium ter millies quingenties. Q. Lucretium Ofellum, consulatum adversus voluntatem suam petere ausum, iussit occidi in foro: &, cum*

*T. Liv. Vol. IX.* T

*hoc indigne ferret populus Romanus, concione advocata, se jussisse dixit. Cn. Pompejus in Africa Cn. Domitium proscriptum & Hiabam, regem Numidiæ, bellum molientes, victos occidit; &, quatuor & viginti annos natus, adhuc eques Romanus, quod nulli contigerat, ex Africa triumphavit. Cn. Norbanus consularis proscriptus, in urbe Rhodo cum comprehenderetur, ipse se occidit. Mutilus, unus ex proscriptis, clam capite adoperto ad posticas ædes Bastiæ uxoris cum accessisset, admissus non est, quia illum proscriptum diceret. itaque se transfodit, & sanguine suo fores uxoris resperfit. Sulla Nolam in Samnio recepit. quadraginta septem legiones in agros captos deduxit, & eos iis divisit. Volaterras, quod oppidum adhuc in armis erat, obseßum, in ditionem accepit. Mitylenæ quoque in Asia, quæ sola urbs post victum Mithridatem arma retinebat, expugnata dirutaque sunt.*

**I.** **I**NTER hæc circum Italiæ regiones missi post victoriam ab Sulla duces obibant municipia, suspectis præsidia imponebant, alia, quæ postulabat usus, aut parendi necessitas, exsequebantur. Sed Cn. Pompejo, quem, dimissa Antistia, privignam suam Æmiliam, M. Scauro genitam, viro suo M. Glabroni ademtam, ducere compulerat, negotium Carbonis persequendi imposuit; eadem opera Siciliam purgaturus, in quam Carbonis amici quidam & præcipuus Perperna, qui prius in Liguria bellum cum Sullanis gesserat, vir prætorius, confugerant, cum Carbo & Cn. Domitius in Africam navigassent.

**II.** Adventu Pompeji Perperna statim Sicilia cessit, civitatesque auctoritate adolescentis, & partim consilio receptæ sunt. Inter quas Catana, cum suspecta Pompejo esset, & præsidium recusatura videretur, a fortissimis omnium militibus occupata est, quos Pompejus, impetrato, ut ægri sui reciperentur, sub eo habitu in oppidum miserat. Dum

§ I. Plut. in Sull. c. 66. & Pomp. c. 14. Vellej. 2, 30. Oros. 5, 24. Front. Strat. 2, 12. Liv. Épit.

hæc geruntur, ex Africa cum multis nobilibus viris redierat Carbo, & in Cossura insula rumores de rebus Italicis captabat, in Ægyptum fugam meditans, & interim M. Bruto in nave piscatoria Lilybæum misso, ut exploraret, an in Sicilia Pompejus esset.

III. Sed ille circumventus a Pompejanis, cum se capi animadverteret, in se mucrone verso, ad transtrum navis obnifus corporis pondere, occubuit. Pompejus, cognito Cossuræ Carbonem esse, ad comprehendendum eum milit. Cum ita retractus in Siciliam esset, ceteros, qui judicati hostes erant, non admissos in conspectum Pompejus duci iussit: in Carbone visus est se gessisse insolentius, cum ad pedes suos sisti vinctum juberet ter consulem, & ipse pro tribunali acerbe in eum invecus (multum indignante corona, quæ hunc acerrimum pueritiæ Pompeji, ne paternis bonis spoliaretur, defensorem fuisse meminerat) post tam grave ludibrium abduci ad supplicium imperaret.

IV. Illic exitus Carbonis fuit, qui tot in urbe & per Italiam fœda & cruenta facinora fecerat; non merita magis, quam formidata morte deformis. Ubi enim distringi gladium vidit, simulans, sibi alvum purgari, locum & spatium demissa & flebili voce muliebriter petiit, miserrimæque vitæ brevem usuram rapuit, donec caput in sordido loco sedentis impatiens moræ miles demeteret. Id Pompejus misit Romam, ut oculos Sullæ hoc spectaculo pasceret. Per eosdem dies Q. Valerii Sorani fata reprehensionem Pompeji, & indignationem hominum habuerunt. quem adductum, quia peritissimum humanitatis & priscarum literarum noverat, comiter una deambulans, de multis rebus interrogavit: mox, ubi, quæ voluerat, etiam arcum Romæ nomen, acceperit, abripi e conspectu virum, trucidarique iussit.

V. Ceterum hoc postremum de Pompejo Q. Oppius tradidit, C. Cæsaris amicus, ut aliquid odio dedisse videat

§ III. Appian. Val. Max. 5, 3 & 9, 17. Oros. Plut. Flor. 3;  
21. § IV. Sallust. Plut. Val. Max. Liv. Epit. Appian. Flor.

tur. Nam Pompejus, uti præcipuos inimicorum Sullæ, & palam oblatos castigare necessum habuit, ita nec cupide requisivit latentēs, & quibusdam effugiendi fecit potestatem. Deinde, quia bellum jam nullum in Sicilia supererat, versus ad res insule componendas, jusque dicendum, valde recreavit provinciam, sollers idem & incorruptus publicorum privatorumque negotiorum cognitor. Quæ res eo gratior Siculis fuit, quod multis jam annis jus dictum in ea insula non meminerant.

VI. Mamertinis tamen, tribunal ejus præscriptione juris vetusti declinantibus, paulo acerbiorē se exhibuit, gravi etiam voce edita, *quousque leges accincto recitabitis?* Longe moderatior fuit in Thermitanorum causa, qui Himerani colebant. Hos ob studium adversarum partium cum punire decrevisset, Sthenius civitatis princeps, *inique facturum* exclamavit, *si ob culpam unius condemnaret omnes.* & quærente Pompejo, *ecquem igitur unum illum esse diceret?* se ipsum esse respondit, qui propter C. Marii familiaritatem & hospitium, cives suos, amicis persuadendo, cogendo inimicos, ad eandem causam adduxisset.

VII. Delectatus animi generosi adolescens tam forti & pia confessione, primo illum, deinde civitatem absolvit: & in eo ipso judicio dignissimum statuit, quocum hospitii contraheret necessitudinem. Cum deinde militaris insolentia multas passim injurias Siculis inferre diceretur; excogitavit, ut, quoties aliquo mittendi milites essent, gladii, ne possent educi, obsignarentur, aniniadvertereturque in eos, quorum a gladiis revulsa cera esset. Hoc rerum ubique statu, cum pacata omnia præter Hispaniam viderentur, ubi Q. Sertorius bellum conflabat, Pio Metello illa expeditione commissa, ad rempublicam ordinandam Sulla se transtulit, potestate plane tyrannica, sed honestius ali-quod nomen circumspiciens.

§ V. Plin. 3, 5. Macrob. Saturnal. 3, 9. Plut. quæst. Rom. c. 60. Diodor. ap. Valef. § VI. Cic. Verr. 2, 46. Plut. Appian. Oros. 5, 21.



VIII. Igitur licet acta ejus omnia senatus populusque Romanus rata habuisset, habiturusque etiam agenda videretur; paulisper ex urbe secedens, monuit senatum, *ut, quoniam sine consulibus esset respublica, comitiis habendis interrex proderetur*. Proditus est L. Valerius Flaccus senatus princeps. Ad hunc scripsit Sulla, *referret ad populum, videri sibi dictatorem creandum esse, nec ad certum tempus, sed donec constituta respublica foret*. & in infima epistola subjecit, *si populus Romanus sibi id onus imponere velit, se populi Romani causa non recusaturum*. Libertas comitiorum sperari nulla poterat. igitur quod proximum erat, libertatis umbram amplexi, Sullam dictatorem perpetuum creant: cum jam propter potestatis ejus magnitudinem, per annos centum viginti dictator nemo factus esset.

IX. Lex etiam ab interrege lata est, qua *rerum omnium plena & libera potestas Sullæ dabatur, ut deducere colonias, urbes condere, aut evertere, regna eripere, aut dare, etiam quæ vellet civium, indicta causa impune posset occidere*. Dictator, accepto imperio, L. Valerium L. F. L. N. Flaccum, quo rogante lex lata fuerat, magistrum equitum dixit. Formidabilis inde & nova species procedentis in publicum fuit, cum, ut solitum dictatoribus, quatuor & viginti fasces præcederent: quod nemo præsentium unquam viderat. Mox consulta & acta longe terribiliora prodibant: cum leges alias antiquaret, alias novas ferret. *Ne quis præturam ante quæsturam peteret; neve consulatum ante præturam: qui ædilis fuisset, continuo prætorem fieri, & ex prætura consulem licere: prætores octo quotannis creari*.

X. Consulem eundem iterum, nisi decennio interposito, creari, superiores quoque leges vetuerant. id sequentibus temporibus abolitum, Sulla dictator ex antiquo retulit. itemque *de majestate: ne cui eorum, qui cum imperio essent, exire de provincia sua, exercitum educere, bellum injussu populi gerere, aut in regnum externum ingredi liceret*. Eadem lege quæ-

§ VIII. Plut. in Sull. c. 66. & Fab. c. 5. Appian. Vellej. 2, 28. Cic. contra Rull. & de legg. 1, 15. Fragm. Capitol. Pighi. Annal.

*stiones haberi de quolibet, nullo discrimine fortunæ, jubebat. Nominantur & de falso hodieque leges Corneliæ, & de sicariis veneficisque, item de injuriis. quæ omnes cum pluribus aliis, quas memorare nihil attinet, in dictatura latæ sunt.*

XI. Sed ante omnia tribunorum plebis potestatem ita minuit, ut tantum non abolevisse videretur. Nam & *omne jus legum ferendarum* ademit; tantum *auxilii ferendi* quadam imagine relicta. &, *ne quis, nisi senator, tribunus fieret, & ne quis tribunitius alium magistratum peteret*, tulit. quorum altero provisum erat, ne plebis, quam patrum, majorem rationem tribuni ducerent: altero, ne quis insigni genere, aut favore populi, aut qui rerum magnarum esset appetens, tribunatum affectaret. Pontificum augurumque collegium ampliavit, ut essent quindecim. Senatum per seditionum bellorumque clades infrequentem tributis comitiis ex equestri ordine supplevit: allectis circiter trecentis. Quæstores etiam quotannis viginti creari jussit ad supplementum senatus, cui judicia tradiderat.

XII. Proscriptorum liberis jus petendorum honorum eripuit: ut, quod indignissimum profecto erat, senatorum filii & onera ordinis sustinerent, & jura perderent: præsertim cum etiam bona eorum venderet, aut dilargiretur. quod quidem in tanta calamitate multo acerbissimum videbatur: cum ipse in tribunali sedens, mulieribus formæ, quam famæ, melioris, histrionibusque & scurris, quibus impense delectabatur, & libertinorum pessimis, agros popularis suffecturos, & vectigalia civitatum concederet. *Chrysogonum certe bona Sex. Roscii, quæ erant sexagies, duobus milibus nummum emisse*, Ciceronis oratio testatur, quam proximis deinde consulibus sex & viginti annorum adolescens habuit. A. d. Kalendas Junias hæc audicio cœpit. cum plurima ex his antea rapuisset Sulla, ceterorum pleraque do-

§ X. Ammian. Marcellin. 19, 18. § XI. Liv. Epit. Appian. Salust. Cic. de legg. Pedian. Verr. 1. Plut. in Sull. c. 63. & Cic. 2, 15. Vellej. 2, 8. Dionys. 8, 92.

asset, aut vilissimo pretio addidisset; redactum est ter milles, quingenties.

XIII. His ita pro arbitrio decretis factisque, ut tamen aliqua pristinae reipublicae species esset, consules creare populo permisit. Inter candidatos Q. Lucretius Ofella erat, qui Præneste ceperat; meritis suis & Sullae gratia confusus. At hunc, quia contra legem recens latam petebat, nondum inferiores magistratus adeptus, primo monuit Sulla, desisteret: deinde, postquam, sprete dictatoris voluntate, magno faventium agmine comitatus in forum venit, a L. Bellieno in medio foro est interfectus. Indigne rem ferente populo, comprehensus percussor ad Sullae tribunal adducitur, qui sedens pro Castoris ex edito loco eadem spectaverat. Ille, vocata ad concionem multitudine, *ne nesciatis*, inquit, *Quirites, ego jussi. dimittite hominem dictatoris imperio obsecutum.*

XIV. Addidit deinde atrocissimae interpretationis fabulam: *Rusticum a pediculis morsum, cum semel iterumque interulam purgasset, tandem, ne saepius intermittere opus cogeretur, exutam, cum ipsis vermiculis injecisse in ignem. Et ego, inquit, monitos volo victos, ne tertium insanientes opus incendio habeant.* Ita depulso, quem certissimum consulem fore omnes crediderant, M. Tullius M. F. A. N. Decula, Cn. Cornelius Dolabella creati, nomen verius, quam dignitatem consulatus acceperunt. Nam eos dictator viginti quatuor lictoribus, & magna satellitum turba stipatus, potestate plane regia praeinebat. Initio ejus anni L. Cornelius Sulla dictator de Mithridate rege triumphum duxit. In quo illud laudabiliter ab eo factum, quod neque triumphare de civibus voluit, quamquam ingentibus eorum copiis prostratis: & cum Asiae Graeciaeque multas urbes transveheret, nullum civium Romanorum oppidum in ea pompa spectari passus est.

§ XII. Cic. pro Sext. Rosc. Sallust. § XIII. Nic. Damascen. ap. Athenæ. l. 6. Liv. Epit. Appian. Plut. in Sull. § XIV. Pædian. Liv. Epit. Plut. Appian. Val. Max. 2, 6.

XV. Ceterum magnificus apparatu ferculisque triumphus fuit, cum inter opulentissimi regis spolia res pretiosæ visuque raræ longo ordine portarentur: sed nullo majore ornameto illustrata pompa est, quam quod tantus nobilissimorum virorum numerus, quos a Mariana factione pullos reduxerat, in equis currum ejus sequebantur, *servatorem & patrem* appellantes: cui acceptum referebant, *quod aspectu patriæ, quod complexu carissimorum pignorum, quod denique communi illa luce fruerentur*. biduo triumphavit a. d. IV & III Kalendas Februarias. prima die transtulit auri pondo quindecim millia, & argenti pondo centum & quindecim millia: postridie tredecim millia pondo auri, quæ junior Marius ex Capitolinæ ædis incendio, ceterisque delubris omnibus Præneste detulerat; quæ & sub eo titulo translata sunt, & argenti septem millia pondo.

XVI. Exacto triumpho, de rebus suis pro concione disseruit, non minus diligenter enarrans, quæ feliciter, quam quæ fortiter fecisset: *eaque de causa æquum videri*, dixit, *ut, quod cognomentum recens asciverat, ab omnibus Felix vocaretur*. Sed ad Græcos scribens, *Epaphroditum* se appellabat: positæque sunt illi cum hac inscriptione statuae. Eodem anno & L. Muræna de Mithridate rege triumphavit, de cujus rebus gestis pauca, neque magnopere laudanda, solus, quod sciam, Appianus refert: quæ suis temporibus reddidimus. Post ista missu Sullæ, A. Gabinus ad Murænam venit, denuntiaturum, *non placere senatui bellum eum cum rege socio & amico gerere*. Eidem Gabinio mandatum, *ut Mithridatem Ariobarzanemque reges reconciliaret*. Mithridates filium quadrimulum amicitiae & pacis obsidem Ariobarzani cum dedisset, sub ejus pignoris fiducia non modo, quæ habebat, per Cappadociam præsidia retinuit, sed insuper aliorum locorum concessione auctus est.

XVII. Epulum deinde celebratæ luxuriæ omnibus de-

§ XV. Fragm. Capitol. Plin. 33, 1. § XVI. Plut. Appian. Fragm. Capitol.

dit: nam & *præmia* proposuit, certum auri pondus, *ei*, qui plurimum bibisset, edissetve, quive dicacissimus fuisset iudicatus, aut cantus aliorumve ludicrorum peritia ceteros excelluisset. eorum præmiorum omnium solum expertem fuisse Gabinium scribunt. Hæc omnia nihil habent triumpho dignum: cum tamen honorem illum Sulla haud temere, nisi merito, tribuisse videatur: & *Murænam fortissimum virum, summumque imperatorem*, audiente populo Romano, M. Tullius prædicaverit. Non dubito, multa eum præclara in Cappadocia Pontoque gessisse, donec a L. Sulla revocatus, tradita M. Minucio provincia, Romam ad triumphum decederet. Sane quæ supersunt Pontici Memnonis reliquiae, confirmato illum *Arriobarzani regno, urbem adversus irruptionem Mithridatis condidisse*, tradunt: deinde multis suadentibus, Sinopen versus movisse, capite regni occupato, ceteram in promptu victoriam fore ratum. Sed Mithridatem, firmo imposito præsidio, ipsum cum exercitu occurrisse *Murænæ*: principia prosperiora regi fuisse; deinde æquo Marte gestum bellum, detrimento utrarumque partium ardore consensuisse. Mithridatem ad Phasin fluvium, *Murænam in Asiam revertisse*.

XVIII. Dum inter has triumphorum pompas, toties capta suorum armis Roma, gentibus externis exprobrat victoriam, in Africa ductu imperioque Cn. Pompeji præclarissime gesta respublica est, quo ille, Sullæ literis & senatusconsulto acceptis, ex Sicilia transfugerat. Cnæus enim Domitius Ahenobarbus proscriptus (erat enim Cinnæ gener) magna ibi manu coacta, priusquam magis confirmaretur, debellandus erat, ne pacem Italiæ turbaret, quod ex eadem regione C. Marius non ita pridem longe minoribus copiis instructus fecerat.

XIX. Pompejus, relicto, qui Siciliæ præesset, Memmio, fororis suæ viro, cum navibus longis centum viginti trajecit copias, sequentibus onerariis octingentis, quibus com-

§ XVII. Cic. pro leg. Manil. c. 3. & Acad. 4, 1. Auctor de Vir. ill. c. 78. § XVIII. Liv. Epit. Plut. in Pomp. c. 17. Val. Max. 2, 8. Oros. 5, 24.

meatus, arma, pecuniæque & machinæ portabantur. Parte classis Uticæ portum tenente, parte Carthaginem appulsa, simul adesse Pompejum percrebuit, septem ad eum millia ab hostibus desciverunt. ipse sub signis sex legiones plenas habebat. Sed inutilis ei per aliquot dies exercitus a ridicula causa fuit. Forte militum quidam defossam olim in agro pecuniam repererant. ea fama per tota castra pervagante, *omnem eam regionem plenam esse thesauris, cum Punica res floureret, absconditis*, dictum simul vulgo creditumque est. Inde nihil videres aliud, nisi sparsa per campos agmina effodientium eruentiumque humum; neque abduci ab hac infania ulla vi aut arte poterant. complures ita dies absumti, circumeunte Pompejo, nec tenente risum, quod tot millia hominum invertendis agris, tanquam rei feriæ, incumbere cernebat.

XX. Tandem inani labore defatigati, dixerunt Pompejo, *uti se, quo vellet, duceret: satis magnas se stultitiæ suæ poenas dedisse*. Circa Uticam uterque exercitus in acie adstitit, valle tantum interposita aspera, & ad transeundum difficili. Ob eam rem, & quia ventus imbrem ferens a primo mane ortus, ne profecto quidem die cessabat, Domitius, tum temporis minime pugnatum iri ratus, signum receptui dedit. Hanc suam occasionem Pompejus prudenti consilio ratus, continuo transduxit suos, hostibusque incompositis & disiectis incubuit. at illi vento quoque turbabantur, qui, compulsa in ora oculosque pluvia, conspectum auditumque adimebat. Nec expers hujus incommodi Pompejanus exercitus erat: adeoque dux ipse parum absuit, quin occideretur a milite, cui tesseram poscenti tardius reddiderat.

XXI. Victi tamen magna pugna Domitiani sunt, ut de viginti millibus hominum tria tantum superessent. Pompejus cum ob hanc victoriam *Imperator* ab exercitu appellaretur, negavit, *hoc se nomen agnoscere, donec hostium*

*castra flarent.* Ad hunc quoque laborem promptis militum manibus usus est: & ne iterum in simile periculum incideret, deposita galea, nudo capite pugnavit. Castra capta sunt: Domitius, dum inter primos repugnat, occubuit. Civitates, quæ secutæ Carbonianas partes fuerant, sponte ad obsequium victoris occurrerunt: nonnullæ vi receptæ sunt. Ut deinde Hiempsaalem in Numidiæ regnum restitueret, Hiertam bello persecutus, quia Domitio auxilium tulerat, in fugam præcipitem egit: deinde immisso Bogude, Bocchi Maurorum regis filio, copiis omnibus spoliavit: postremo Bullæ obsessum, dedito sibi oppido, interfecit.

XXII. Ita regnum Numidiæ ab Hierta ad Hiempsaalem Pompeji beneficio rediit; quam universam finitimasque aliquot regiones cum victore exercitu mira celeritate peragravit, quadraginta non amplius diebus Africa recepta, regnorumque statu composito, annorum admodum quatuor & viginti adolescens. Postquam e Numidia reversus Uticam est, redditæ sunt ei dictatoris literæ, *dimittere iubentis exercitum, & cum una legione expectare successorem.* id cum ipsum occulte morderet, exercitus palam indignantissime tulit: & petente Pompejo, ut proficiscerentur, multis in dictatorem conviciis, *tyrannum & Cinnam* appellantes, negarunt, *se passuros, ut sine legionibus se credat homini crudeli & perfido.*

XXIII. Adversus hæc Pompejus orando monendoque mitigare iratos conabatur: sed illis in sententia persistentibus, in tabernaculum, relicto tribunali, lacrimabundus se recepit. Tum illi reprehensum iterum collocarunt in fugæ gestu, magnæque diei pars hac contentione exempta est, donec, instantibus illis, & clamorem tollentibus, iuravit *sibi manus allaturum esse, ni quiescant.* Ægre destiterunt. Inter hæc Ægyptii legati venerunt Romam, Cleopatrar, quæ post mortem viri Alexandri ac patris Lathuri, duorum Ptolemæorum, regnum obtinebat, maritum ex regia stirpe pe-

§ XXI. Oros. Liv. Epit. Plut. Sallust. Eutrop. Auctor de Vir.  
III. § XXII. Hirtius de B. Afr. c. 22. Plut. Liv. Epit. Sallust.

tituri. Nam Alexandri filius ex alia uxore, cognominis patri, cum a Cois, apud quos educabatur, Mithridati deditus, ab hoc ad Sullam profugisset, inter familiares ejus Romæ agebat.

XXIV. Idcirco Sulla, tum alias honestum sibi fore ratus, Ægypto regem imposuisse, tum ex opulentissimo regno prædam forte sperans, Alexandrum ad Cleopatram mittit. Sed illi nuptiis novercæ potito haud satis fuit confortem regni factum esse, quin Sullæ fiducia, quidlibet pro sua unius libidine faceret; eo progressus vesaniæ, ut undevicesimo imperii die, Cleopatram, audaciæ suæ succensentem, de medio tolleret. Sed mors mulieris, ipsius quoque vitæ properum attulit finem: Alexandrinique correptis armis e regia protractum, in Gymnasio interemerunt. Regnum ad Ptolemæum cognomento *juvenem Bacchum*, qui Ptolemæo editus, mox cognomen *Auleta* ex tiliarum studio nactus est, tanquam proximum Cleopatras fororis heredem, pervenit. Anno sequente, L. Sulla, quamquam dictaturam gereret, iterum creari consul voluit, assumpto in societatem honoris Q. Cæcilio Q. F. L. N. Metello Pio.

XXV. Quod deinde Cæsaribus exemplum placuit, ut cum summa & regîa potestate, consulatus titulum conjungere, pulchrum & civile arbitrarentur. Hic annus jucundum, nec ante visum urbi spectaculum attulit, cum eques Romanus, idque nondum expleto quinto & vicesimo ætatis anno, triumpharet. Pompejus is fuit, non minoris paulo ante terroris hominibus, quam nunc lætitiæ, causa, quia *dedignantem jussu Sullæ, cum infesto exercitu venturum in Italiam* putaverant. Unde Sullam quoque dixisse rumor erat, *fatale sibi esse cum pueris in senectute colluctari*, quod & C. Marius adolescens negotium ei exhibuerat. Igitur, quemadmodum præsentibus uteretur, incertus, & ferebat de reditu ejus legem, & ex composito per C. Herennium tribunum plebis se sinebat prohiberi.

§ XXIII. Porphy. ap. Euseb. Appian. civil. l. 1. Trög. Prol. 39. § XXV. Plin. 7, 26. Liv. Epit. Plut. Sallust. Diodor. ap. Vales.



XXVI. Nam alio ferme omni jure tribunis erepto, intercessionem liberam reliquerat. Ceterum fama Pompeji, Romam pacato agmine contententis, metu ac sollicitudine civitatem absolvit. Incredibilis hominum multitudo, cum summa propensissimæ voluntatis demonstratione, obviam fuere. Sulla quoque, quasi cum studiis civium certaturus, occurrit ei, pronoque favore acceptum, elata voce *Magnus* consalutavit, adstantesque monuit, ut hoc eum deinceps nomine compellarent. Triumphum tamen petenti restitit: nec quasi invideret.

XXVII. *Nec enim ignoras, inquit, Cn. Pompei, quanti te faciam, quantisque dignum honoribus judicem. quid enim est, quod non virtus illa tua, reique publicæ & mihi præstita fidelissima atque fortissima opera mereatur? Et ego, si verum amas, non parcior in honoranda virtute tua fui, quam tu in explicanda exstitisti. sed neque in posterum quidquam tibi negaturus sum, quod fieri possit, & instituta civitatis nostræ patiantur. Verum enimvero ita comparatum esse nosti, ut more majorum hic honor concedatur nemini, nisi qui consulari aut prætorio imperio præditus res gesserit. Ita P. Cornelius aliquanto amplioribus in Hispania gestis rebus, ita M. Claudius captis Syracusis, triumpho caruerunt.*

XXXVIII. *Non debes indignanter pati, si Scipionibus & Marcellis æqueris adolescens nondum ætate senatoria. Plus est meruisse triumphum, quam duxisse: & si quid in hac pompa felicitatis inesse arbitraris; non adempta tibi, sed ad maturos honores, quorum certiora pignora nemo unquam habuit, sepositæ est. Quid te delectat occupare cum invidia, quod paulo post ultro venturum est cum gloriâ? Quamquam, si te tantummodo sermonibus hominum oblectares, fortassis ego paterer; & tibi eadem ætas, quæ ad commovenda judicia facit animum, etiam ad ferenda daret. Sed quia mihi nemo ignoscet, cujus ab annis & potestate publici decoris scientia simul atque custodia postulat, ut vel mea causa desistas, peto. Quod si tu mei rationem habere renuis, & rem utrique invidiosam poscere perseve-*

*rans, salva amicitia nostra hoc facere posse exstimas; mihi quoque tantundem juris assumam, & quod ambitione ac cupiditate inductus captas, auctoritate & jure prohibebo.*

XXIX. Vera erant, quæ allegabantur: sed intelligebat adolescens, frustra hæc ab eo afferri, qui jura civitatis omnia prior conculcasset. ideo ne Lucretii quidem casu perterritus institit tanta fiducia, ut etiam *plures adorare Solem orientem, quam occidentem*, diceret. Eam vocem cum non satis Sulla percepisset, ex vultu autem gestuque mirantium, aliquid inusitati esse conjiceret; *quid enim dixisset Pompejus*, interrogavit: acceptoque, confidentia adolescentis percussus, voce velociter repetita, *triumphet! triumphet!* exclamavit. Erat plane res livori multorum obnoxia, sed Pompejus, ut malignitatem eorum ulcisceretur, augeretque dolorem, quadrigis elephantorum invehi constituit: multas enim belluas, victo Numidiæ rege, ceperat. Sed quia porta erat angustior, quam ut juncti intrare elephantis possent, ad pristinum morem reversus est.

XXX. Dum id agitur, exercitus, donativo non contentus, tumultuabatur: & *pecuniam, quæ erat ferenda in triumpho, direpturum* dicebant. Neque deerant ex illustribus, qui *dividendam* dicerent, *ne seditio orriretur*. sed ille negabat, *se clamoribus militum commoveri. Non ideo cepisse arma, & cum principibus civitatis multa prælia fecisse, ut iis serviret, quibus imperare debeat. Mirari se hominum amentiam, si putent, constantiam, quam in mediis bellorum tumultibus semper præstiterit, nunc parta pace, victis hostibus, ad urbem omis- surum.*

XXXI. Non ita se per Italiam hoc bello, Siciliamque & Africam esse cognitum, ut illi ipsi, quos animi sui testes toto eo tempore habuisset, sperent seditiosis vocibus ab instituto dimoveri posse. Facilem se & liberalem exercitibus suis imperatorem exhibuisse, quoad rectum honestumque putaverit: nunc etiam pronuntiasse, quod satis esse existimet, præsertim tam brevi expeditione defunctis. Olim milites Romanos parvo contentos ma-

*fuiffe sudoribus & periculis ſuis ærarium publicum locupletari: nunc ſibi ſtudere quemque, ut, defraudata republica, in tot particulas diſtractæ pecuniæ, neque privatorum cupiditatem expleant, & uſibus civitatis, nimium quantum his temporibus exauſtæ, ſubtrahantur.*

XXXII. *Audire ſe, jaſtari a quibuſdam, multum etiam juris penes exercitum eſſe: id quidem facilius dici, quam demonſtrari poſſe. ceterum ut maxime ita res haberet, miſſum ſe prius triumphum facere, quam ut militibus ſuis aduletur. faſces deinde laureatos objecit acriter increpitis, ab illorum direptione jubens incipere. Hac verecundia cum ad modeltiam eos redegiſſet, in majori omnium admiratione, quam ob tot res bello geſtas, fuit: Serviliuſque præcipuus antea negandi triumphi auctor, pulcherrimum ei teſtimonium reddidit, nunc vero ſe Pompejum vere Magnum, triumphoque digniſſimum agnoſcere. Sub idem tempus Cn. Norbanus conſularis proſcriptus, cum Rhodum trajeciſſet, atque repetitus a Sulla comprehenderetur, Rhodiis adhuc deliberantibus, in medio foro ſe interemit.*

XXXIII. Neque enim adhuc proſcriptionum acerbitas plane conquieverat: & Mutilus, unus ex proſcriptis, clam capite adopto ad ædes Baſtiæ uxoris cum acceſſiſſet, admiſſus minime eſt, quod illum mulier *proſcriptum* diceret: itaque ſe transfodit, & ſanguine ſuo fores uxoris reſperſit. Tum etiam Nola, quæ poſtrema urbium Samnitibus infeſſarum pertinaciſſime arma retinebat, proditione capta eſt, M. Æmilio Lepido intromiſſo. reque cognita, obſeſſi, quia Samnitibus nulla ſpes ſalutis apud Sullam relictæ erat, ſuis aut ſuorum gladiis occuparunt necem: quidam laqueis præfocati ſunt: alii foribus occluſis domos ſeque concremarunt. eodemque tempore ventus exortus vehemens, ita diſtulit incendium, ut oppido conflagrante, omnis ſimul præda amitteretur.

XXXIV. At L. Sulla, quo urbem & Italiam ſuæ factionis

§ XXXII. Plut. Front. § XXXIII. Liv. Epit. Appian. civil. 2, 1. Vellej. 2, 18.

nis hominibus quasi compedibus vinctas teneret, decem millia fervorum, ætate ac viribus florentissimum quemque manumisit, qui inter cives adscripti, de nomine patroni, uti mos erat, *Cornelii* sunt appellati. Lege deinde comitiis centuriatis lata, municipiis plerisque civitatem & agros ademit. adscripsit tamen in eandem legem: *si quid jus non esset rogari, ejus ea lege nihilum rogatum*. Ita caput de civitatis jure adempto, ne vivo quidem Sulla valuit: de agris ratum fuit; & coloniæ militares legiones quatuor & viginti deductæ, iisque divisi agri sunt. Namque non modo qui arma contra tulerant, sed quorum neutro inclinata studia, aut etiam pro Sulla fuerant, res suas fortunasque omnes perdididerunt. nec enim tam in pœnam inimicorum, quam ut firmamenta dominationi quærerentur, talia fiebant.

XXXV. Ex eadem disciplina, externæ nationes regesque non stipendiarii solum, sed & æquo fœdere juncti, nonnulli etiam ob virtutem & merita immunitatem adepti, exactionibus & tributis atterebantur: ut etiam agri quibusdam & portus, qui ex formula fœderis debebantur, adimerentur. His maxime rebus & ille annus præteriit, & proximus, quo P. Servilius C. F. M. N. Vatia, qui postmodum Isauricus appellatus est, & Ap. Claudius consules fuerunt. Nam oblatum sibi adulatione populi consulum Sulla recusaverat. Inter hæc Volaterræ, quod oppidum adhuc in armis erat, publica interposita fide, sunt deditæ.

XXXVI. In Hetruria Volaterræ sunt juxta litus maris, eximio ad tutelam loci situ. Nam e profunda valle tumulus undique præceps in altitudinem prope duorum millium passuum erectus, urbem sustinebat, uti ascensu aspero & difficili, ita plano commodoque vertice. Huc se proscriptorum quidam contulerant, coactaque Hetruscorum manu, cum legiones quatuor effecissent, per bien-

§ XXXIV. Appian. Cic. pro dom. c. 30, & pro Cæcin. c. 7. Liv. Epit. Memnon. § XXXV. Appian. Liv. Epit. Cic. pro dom. c. 30.

nium restiterunt; quamquam nonnunquam ipse dictator in castris obsidentium fuisset. Sic extinctis per Italiam bellorum reliquiis, etiam in Asia, quæ sola urbs post victum Mithridatem in rebellionem persisterat, Mitylenæ a M. Thermo expugnatae dirutæque sunt. Eo bello C. Julius Cæsar admodum adolescens in contubernio prætoris egit, & ab eo, captis Mitylenis, corona civica donatus est.

XXXVII. Idem annus L. Sullam ex perpetuo dictatore privatum vidit, rem inopinatam, & non una de causa prorsus admirabilem. Qui enim tanquam rabie quadam actus, nihil usquam sibi & aliis quietum, nulla jura inviolata, nihil ad summam contentionem laborum, periculorum, denique scelerum & inhumanitatis reliquum fecerat, ut unus omnia posset; is ut, interpellante nemine, summi imperii pacatam, & patientia civium propemodum justam possessionem sponte deponeret, expectari profecto non debuit; præsertim cum neque ætate etiamnum, neque corporis viribus destitueretur. An ipsum jam pigebat raptæ potestatis, & cum recordatio delictorum feræ pœnitentiæ moribus consciam mentem cruentaret, quantas misérias quam vile ob præmium perferret, experientia monstrante persenserat?

XXXVIII. Nam priusquam cupitis potiretur, in his omnem inesse & solidam animi felicitatem crediderat: adeptus deinde, cum se pejus etiam excruciaci deprehenderet, odisse atque fastidire cœpit, quod antea per tot bella civilia flagrantissime appetiverat. Hæc exempla docere mortalitatem poterant, ut priusquam sese præcipitent, unde regredi non liceat, consilio regant affectus, iisque rebus quærendis adhibeant, quas ubi consecuti fuerint, nullo deinceps pudore pœnitentiæ torqueantur. Nam Sulla quidem, quam acerbis suppliciis domitus pristini iudicii errorem emendaverit, in præpatulo est, cum rem antea prælatam omnibus, ita festinaret abjicere, ut nō

S XXXVI. Cic. pro Sex. Rosc. c. 37, Liv. Epit. Sueton. in Cæs. c. 11. Oros. 5, 22.

mortis quidem metu, tot millium in se irritatis animis, re-tentus, hoc diferte dicere videretur, perire se malle, quam diutius dictatorem agere.

XXXIX. Non dubito, quin plerique pravo consilio ufum fuiffe Sullam judicaturi fint; quemadmodum & statim C. Cæfar in depositam ab eo dictaturam ludens, *Sullam nesciffe literas* dixit: sed eventus utriusque fatis ostendit, doctiorem in his negotiis Cæsare Sullam fuiffe. Proximum deinde miraculum fuit, quod privato non solum falus, sed etiam dignitas constitit: cum plusquam centum millia civium Romanorum, & inter hos senatores nonaginta, consulares quindecim, equitum circiter duo millia sexcentos (computatis una exfulibus) occidisset, bona eorum vendidisset, multos projecisset inhumatos, civitates quoque plurimas arcibus, muris, agris, pecunia varie spoliasset. ceterum illum, ne hominum manibus cita & communi plurimis morte defungeretur, ad memorabile exemplum ultio divina fervaverat.

XL. Ideo cum pro concione dixisset, *rationem se actorum omnium, si quis reposcat, redditurum esse*: dimissis licetoribus atque custodia, cum amicis diu in publico deambulavit, attonito populo, & hæc miracula non sine horrore quodam aspiciente. Unus tantum adolescens fuit, qui auderet queri: & quia nemo prohibebat, animo sumto, recedentem usque ad fores domus conviciis incesset. Atque ille, cujus iram potentissimi viri maximæque civitates, nec effugere, nec placare potuerant, unius adolescentuli contumelias patienti animo tulit; id tantum in limine jam domus effatus: *hic adolescens efficiet, ne quis posthac tale imperium deponat.* quam præfagi animi vocem non longo post tempore dictator Cæsar explevit.

XLI. Sulla profectus in Cumanum, rusticari, piscandoque & venando tempus ducere cœpit: cum prius Herculi consecratis decimis, epulum populo sumtuosissimum præ-

§ XXXVIII. Plut. in Sull. c. 68. Sueton. in Cæs. Appian. civil. 1, 1. Oros. 5, 22. § XL. Plut. Appian.

buisset, ea affluentia, ut quotidie (per multos enim dies ducebatur) ingens vis ciborum in amnē projiceretur: vinum quoque dedit annis quadraginta vetustius, quod a nomine consulis, sub quo natum fuit, *Opimianum* vocabatur. nam contra suas ipse leges leniendæ ægritudinis causa, luxum intenderat, iisdem diebus uxore amissa Metella ei, cum jam desperatæ salutis esset, de sententia sacerdotum libellum repudii Sulla misit, spirantemque adhuc transferri in alias ædes iussit, quod scilicet religiosissimus pontifex, qui tot hominum agmina contrucidaverat, salvis religionibus aspicere morientem, aut funere pollui domum suam ferre non posset.

XLII. Non tamen sic abstinuit a republica, ut nullo eorum, quæ fierent, sensu afficeretur. Igitur comitiis consularibus, cum præter suam sententiam designato M. Æmilio Lepido, Pompejus, cujus studiis perfecta res fuerat, lætus abiret; vocavit eum ad se Sulla, dixitque, *Te vero providum consilii, adolescens, & sapientem, qui pessimum omnium Lepidum, optimo omnium Catulo priorem renuntiandum curaveris! At tu, fac, vigiles, qui adversarium effecisti valentorem.* Neque fefellit eum præfagus futuri animus, & spirante adhuc Sulla, seditiosam ad Quirites orationem Lepidus consul habuit, quæ adhuc inter reliquias hystoriæ Sallustianæ servatur.

XLIII. Paulo ante hoc tempus, quam a Mithridate ad scribendum fœdus legati venissent, infecta re dimissi sunt: quod Ariobarzanes, sponte sua, an aliorum instinctu, incertum, *non esse sibi cum fide restitutam Cappadociam* detulerat. Eam Sulla, tum adhuc dictator, iussit restitui. & Mithridates paruit, quamquam ad Phasin & Caucasum rebus interea præclare gestis, imperii fines protulerat, Bosphoranis subactis, quibus filiorum unum Macharem regem dedit. Sed idem cum in Achæos fecisset expeditionem, insidiis & vi frigoris exercitum carpentibus, vix tertiam copiarum partem reduxerat.

§ XLI. Plut. Plin. 14, 14. Senec. cons. ad Marc. § XLII. Plut. in Pomp. c. 24. § XLIII. Appian, Mithrid., Memnon. Plut. in Sull. c. 79.

JOANNIS FREINSHEMII  
SUPPLEMENTORUM  
LIVIANORUM  
LIBER LV.

IN LOCUM LIB. XC LIVIANI.

---

E P I T O M E  
LIBRI NONAGESIMI.

*Sulla decessit, honosque ei a senatu habitus est, ut in campo Martio sepeliretur. M. Æmilius Lepidus, cum acta Sullæ tentaret rescindere, bellum excitavit: & a Q. Catulo collega Italia pulsus est: & in Sardinia, frustra bellum molitus, periit. M. Brutus, qui Cisalpinam Galliam obtinebat, a Cn. Pompejo occisus est. Q. Sertorius proscriptus in ulteriore Hispania ingens bellum excitavit. L. Manlius proconsul, & M. Domitius legatus ab Herculejo quæstore prælio victi sunt. Præterea res a P. Servilio proconsule adversus Cilicas gestas continet.*

I. **R**ES populi Romani M. Lepido, Q. Catulo confu-  
libus, ac deinde militiæ & domi gestas, amisso Livio, fa-  
tis ex Sallustianis historiis licebat cognoscere, nisi & illas  
idem omnino fatum abstulisset. Idcirco fontibus obtura-  
tis, ex rivulis, aut etiam lacunis, ista nobis haurienda



sunt, sic interim fordida cœnoque permixta, ut vix magno studio & attentione percolata liquecant. Sed nos, quæ poterimus industria, cœpto insistentes, a morte L. Sullæ velut novum initium ordiemur. Nam ibi iterum conversio quædam reipublicæ facta est, & auctoris voluntate deposita brevis ævi dominatio, morte ipsius plane extincta. Morbus igitur, quo Sulla periit, minime communis fati, sed singularis cujusdam fœditatis atque supplicii fuit, exuberantibus pediculis, ut, qui tot millia civium cognatique sanguinis hominum, inauditis cruciatibus peremisset, ejusdem artus, velut intestino bello, ab illo, quem genuerant, animalculorum exercitu diriperentur.

II. Est enim profecto Deus, qui nunquam inapune spernitur, & licet acerbiores pœnas in aliud ævum justissimus judex seposuerit, quod includi præsentis angustiis nequeant; sæpe tamen viventibus proponit spectanda noxiorum tanta supplicia, ut, si nihil deinceps timendum foret, vel his deberent a peccando deterreri. Dissimulavit tamen utcunque mali sensum jam non felix Sulla, & quod avocaret a tam tristi cogitatione animum, in quaslibet occupationes incubuit.

III. Quippe decimo ante excessum die, Puteolanorum dissensionibus compositis, leges scripsit, quibus deinceps uterentur. Rerum suarum componendis commentariis bi-duo, priusquam decederet, operam postremo dedit, alteri & vicelimo libro immortalis. in eo *Chaldaeos sibi prædixisse* narrabat, *ubi gloria invidiam vicisset, in summo flore felicitatis esse obiturum.* itemque, *somnium præterita nocte sibi oblatum, per quod filiolum suum, ante Metellam mortuum, videre visus esset, appellansem se, jubentemque, curis omissis, ire secum ad matrem, ubi cum ea in quiete & otio degeret.*

IV. Postridie, cum id somnium amicis enarrasset, testamenti tabulas confecit obsignavitque. mox sub vesperam nuntiato, *Granium quendam, Puteolanæ reipublicæ debitorem,*

§ I. Sallust. Liv. Epit. Appian. civil. l. i. Tacit. Plut. in Sulla. c. 71. Plin. 7, 43. § II. Plut. § III. Plin. Plut. Appian.

*mortem ejus exspectare, ne solveret; accito homini in cubiculum a famulis, intorqueri fauces, non sine vehementi clamore & corporis jactatione jussit. Ab hac contentione rupta vomica, magnam vim effudit sanguinis: ne, qui tam sanguinarius in vita fuisset, incruenta ad inferos morte descenderet. Ita viribus defectis, noctem eam inter summos cruciatus cum exegisset, infelicem spiritum reddidit.*

V. Mors Sullæ confestim consumum jam ante non satis concordium contentiones excitavit. Senatus, referente Cautulo, honorem ei haberi volebat, ut in campo Martio sepeliretur: Lepidus multique cum eo alii præfractæ repugnabant. Ibi generose animo suo Pompejus imperavit, & quamquam Sullæ testamento, cum ille legata relinqueret, liberisque tutores daret, esset præteritus; partim gratia, partim precibus, interim & minis submovit obstantes, funusque Romam profectus, exsequiis securitatem decusque præstitit. Ordo pompæ hic fuit. Aureo lecto corpus defuncti per Italiam in urbem regio prorsus fastu ferebatur. tibicinum caterva, equitesque & gravis armatura frequentibus ordinibus sequebatur. pariterque in itinere qui legati ejus ad exercitum fuerant, cum armis accurrentes, ut quisque advenerat, locum suum capiebat. alia quoque multitudo, quanta vix unquam ulla de causa, undique confluebat.

VI. Insignia magistratus & secures, ut nuper dictatori, præferebantur. Hoc ordine in urbem perlatum cadaver est. Sed cum ad rogum efferretur, longe major longeque splendior apparatus fuit: coronæque aureæ, dona civitatum, legionumve, aut amicorum, plusquam duo millia spectabantur. Corpus, quo sacrorum honor concurrentium militum licentiam frenaret, omnia sacerdotum collegia Vestalesque comitatæ sunt: tum senatus universus, & cum insignibus suis magistratus. Mox equitum Romanorum agmen, & omnis, qui sub eo meruerat, exercitus (singuli enim, ut præsto forent, properaverant) cum auratis signis, & armis

argentatis, quo ornatu esse deinceps etiam in pompis consueverunt.

VII. Inter hos variis locis magnus tubicinum infertus numerus, lugubre quiddam concinebat. Voces deinde honorificæ per ordines acolamatæ sunt: incipientem senatus eques, equitem plebs excipiebat. Sed non idem omnibus in pari tesificatione voluntatis animus erat: pars vere deflebat amissum: ceteri Sullanorum præsentis copias, & ipsum adhuc, quamquam vita orbum, metuebant. Pro Rostris cadavere posito, laudatus est ab aliquo disertorum, quia Faustus filius nondum maturæ ætatis erat. L. Philippum huic officio delectum crediderim, qui tum ætate & facundia ceteros anteibat. deinde sublatu fenatorum humeris lectus in campum Martium deportatus est, ubi tantummodo regum erant monumenta.

VIII. Sub nonam diei horam in campum est ventum: quia nebula matutina, ne celerius exirent, pluriæ metu curatores funeris tardaverat. Tum impositus rogo est, cum ingenti vi odorum, quos adeo liberali manu matronæ contulerant, ut præter ducenta decem fercula, Sullæ ipsius simulacrum iusta magnitudine, simulque lictoris imago fictæ fuerint ex optimo ture & cinnamomo. Hæc omnia flammis consumpta. Nam cremari primus e patriciis Corneliis voluerat; cum ejus gentis mortui semper, intactis igne corporibus, terra tegerentur. Id eo factum putant, quia C. Marii reliquias ad Anienem sitas, mortuo quoque implacabilis hostis, spargi in flumen jussit; &, ne sibi accideret, quod in alterum statuisset, metuebat.

IX. Mortuus jam Marius, mortuus Sulla, civilium bellorum sævissimi duces, erant: sed vivebant adhuc in animis superstitum discordiæ, & velut ab ipso hujus rogo accensæ, inter redeuntes ab exsequiis consules statim accerbis sermonibus exarserunt. Seditiosum Lepidi ingenium motus judiciorum stimulabat, ut res turbari, valde sua in-

§ VII. Plut. Sallust. Appian. § VIII. Cic. de legg. 2, 2. Plut. 7, 54.

teresse judicaret. Nam ob exspoliata[m] Siciliam, a duobus Metellis, Celere & Nepote, legibus interrogatus, quamvis illi ob gratiam ejus apud populum victi destiterant, absolutus tamen non erat, &, ne aliquando revocaretur in judicium, metuebat. Itaque turbidis concionibus, veluti classico, concitata inopi plebe, Italicos etiam populos spe restituendorum agrorum conciliabat.

X. Sanior pars populi facile providebat, si acta Sullæ rescinderentur, rempublicam utcunque compositam, novis tumultibus bellisque arsuram. Movebantur & prodigiorum obscuritate: quæ inter novum illud & inauditum antea, *in Ariminensi agro in villa Gallerii locutum gallum gallinaceum esse*. Idcirco senatus utrumque consulem jurejurando adegit, *se hujus controversiæ causa arma non sumpturos*. Lepido, ne quid in urbe turbarum daret, exercitus & provincia Gallia trans Alpes decreta. Ille tempus in Hetruria ducendo, nolebat ad comitia reverti; ne bellum, quod in animo habebat, impediretur. putabat enim, jurejurandi non ultra consulatus tempora valitura fide, postmodum nulla religione obstrictum ad servandam pacem fore.

XI. Non erat obscurum senatui, quid animi consiliique Lepido esset: præsertim cum *Hetruriam conjurare, proscriptos acciri, largitionem tentari*, pernotuisset. Igitur *occurrere eum ad tempus comitiorum* jubet. & affuit ille ex Hetruria, sed cum universo exercitu, quem ad urbem adducere secum constituerat. Sed jam Milvium pontem, collemque Janiculum Q. Catulus consul, cum Cn. Pompejo præceperant. Relata enim lex Plautia, capitibus aliquot adjectis, contra vim malorum; & adjungens se optimatibus Pompejus, Catulo pacis, quam belli, artibus præstantiori, datus adjutor fuerat. Igitur Lepidus arma suos capere imperat: fit idem & a senatus partibus: præliumque non procul campo Martio confertur.

§ IX. Flor. 3, 23. Appian. L. Ampel. Pedian. in Verr. 4. Liv. Epit. § X. Plin. 10, 12. Sallust. Appian. § XI. Sallust. Flor. Appian. Cic. pro Cœl. c. 29. Plat. in Pomp. c. 25. Euseb. Rutil. itiner. Liv. Epit.

XII. Primo statim impetu pulsus Lepidus, in Hetruriam perfugit: Pompejus adversum Brutum est profectus, qui legatus Lepidi Galliam Cisalpinam non invalida manu obtinebat. Satis diu bellum id tractum ad Mutinam est: cum castra castris opposita essent, nec ad summa rei profectura certamina confererentur. Ea res Lepido, qui circumacto interim anno proconsule se gerebat, otium præbuit, ut, collectis ex qualibet hominum facie copiis magnis, ad urbem tenderet, assidensque consulatum alterum postulare.

XIII. Ad famam venientis haud parva in urbe trepidatio fuit: & in senatu Q. Philippus in hæc verba censuit: *Quoniam Lepidus exercitum privato consilio paratum, cum pessimis, & hostibus reipublicæ, contra hujus ordinis auctoritatem ad urbem ducit, uti Ap. Claudius interrex cum Q. Catulo proconsule, & ceteris, quibus imperium est, urbi præsidio sint, operamque dent, ne quid respublica detrimenti capiat.* Sed metum cito ademerunt allatæ a Pompejo literæ, quibus *confectum bellum, traditus cum exercitu Brutus*, nuntiabantur.

XIV. Eum Pompejus, cum datis, qui prosequerentur, equitibus, Rhegium deduci jussisset: statim insequenti die poenitentia ductus, Geminium misit, a quo non sine infamia perfidiæ crudelitatisque Pompejanæ est interfectus. Alba quoque, quam deinde *Pompeji* nomen tulisse arbitrator, quod ab eo tum conservata esset, postquam obsidionem famemque ferre amplius non potuit, dedita est; ibique Scipio cum Lepidi filio captus & occisus. Inter hæc, comitiis per interregem habitis, consulatum D. Junius D. F. M. N. Brutus, Mamercus Æmilius Mam. F. M. N. Lepidus Livianus inierunt.

XV. Mamercus, homini ditissimo, ne suo anno consul fieret, prætermisio ædilitatis nocuit, quod sumtuosum muneribus magistratum amore pecuniæ vitatum ab eo populus crediderat. tum quoque tulisset repulsam, ni C. Curius, ut adolescentior, & populi suffragiis integer, ætati

§ XIV. Plut. Oros. 5, 12, Val. Max. 6, 2. Cic. ad Attic. 9, 17.

Mamerci concessisset. His auditis, Lepidus, cum hostis ab senatu judicatus, iterumque victus esset, recessit Cosas, Hetruriæ maritimum oppidum, ubi insequente Catulo nova commissa pugna est. cui superveniens ex Gallia Pompejus magnam edidit cædem, & reliquos fugere in Sardiniam coegit.

XVI. M. Lepido cum omnibus copiis Italia pulso, fegnior, ut amoto nonnihil periculo, ceterum haud minus gravis & multiplex cura Patres exercebat, quia præter externa bella, quæ sub idem tempus pluribus locis eruperrant, duce partium vivo, dilatum potius, quam extinctum civile incendium habebatur: metusque erat, ne impedienda annonæ transvectione urbem inopia urgeret. Sed ille bellum, per quod homo delicatus luxu sibi carendum videbat, fegniter moliebatur, donec pœnitentia consilii, & a C. Valerio Triario, qui provinciam pro prætore obtinebat, undique depulsus, & oppidorum expugnatione prohibitus, contrarios cogitatis eventus habuit: lentaque tahe correptum, cognitum uxoris Apulejæ adulterium tædio & dolore confecit.

XVII. Epistolam enim criminis indicem forte nactus, divortii libellum misit: deinde simul caritate desiderioque repudiata, simul injuriæ suæ acerbitate ac dolore extabuit. Extrema quoque hujus memorabili eventu adverterunt curiosos: quia corpus flammæ vi e rogo ejectum, cum reponi propter ardorem nequiret, juxta sarmentis aliis nudum crematum est. Sic atrocibus belli minis inter ipsa initia compressis, victores, rara iis temporibus modestia, pace contenti fuerunt. quam ob moderationem non minus, quam ob bellum feliciter confectum, C. Catuli magnopere celebratum nomen est.

XVIII. Exercitus Lepidi, carpentibus insulani, quibus

§ XV. Fasti Capitol. Cic. de Off. 2. 17. Sallust. Euseb. Oros. Jul. Exsuperant. c. 6. § XVI. Flor. 3, 23. Sallust. Oros. Jul. Exsuperant. Ascon. in Scaur. Plut. Plin. 7, 36 & 53. Val. Max. 2. S. Appian. civil. l. 1. § XVII. Jul. Exsuperant. Sueton. in Cæs. c. 2. Liv. Epit. Sallust. Agell. 13, 8.

molestus esse cœperat, dissipatus est: quod roboris fuerat, Perperna ad Sertorium adduxit; qui profectus in Hispaniam, cum se relatum in proscriptos didicisset, bellum ingens excitaverat. Igitur ut vires ei subtraherentur, senatusconsulto, & rogatione Plautia belli Lepidani gratia pœnitentibus facta, reditusque decretus: maxime annitente C. Cæsare, qui concionem super ea re habuit, quod in eadem causa L. Cinna, uxoris suæ frater, esset. Igitur *civilium armorum furias*, quibus ipse haud leviores excitatus erat, multum execratus, orare Patres cœpit, *ut aliquando his malis terminus poneretur.*

XIX. *Ira Deorum multis ab annis ita conquassatam internis seditionibus rempublicam, ut, siquidem diutius ea durare pestis debeat, necessum sit omnia ruere. Desiderare urbem ornamenta pacis bellique; desiderare consiliorum auctoritatisque principes curiam: multa præstantissimorum virorum capita per Damasippum, multo deinde plura per Sullam decisa, quæ velut in opprobrium publicæ servitutis pro Rostris spectanda proponerentur. Nunc autem remittente numinum indignatione, sublati horum scelerum auctoribus, necessum haud esse, ut deterrimorum virorum instituta, per probos & patriæ amantes exerceantur.*

XX. *Donec recens adhuc dominatio, & dictatoris terror primum, deinde memoria valuerit, facta quædam a gementibus esse, quæ recordatione temporum utcunque defendantur: si quid eorum præterea fieret, jam nullum colorem superesse, quin consulto facta credantur, & multi pro uno Sullæ exstitisse. Ita nullum alium civilis belli finem, nisi eundem & imperiû, sperari posse. Igitur magnopere se consulere Patribus, ut recipiendis in civitatem, abolendaque eorum noxa, qui Lepidum secuti nuper essent, minuerent hostes patriæ, darentque exemplum omnibus, nemini errorem suum fraudi, sed tantum pervicaciam fore: neque senatum alios habiturum pro hostibus, quam qui conciliari patriæ nolint.*

XXI. *Nullum validius ad stabiliendam pacem adjumentum fore: nam eadem opera Sertorio, & qui alii arma retineant, magnam virium partem decessuram; & eandem ad rempublicam accessuram esse. Ceterum postquam ad Sertoriani belli mentio-*

nem accessimus, quod illa tempestate longe gravissimum fuit, rem paulo supra repeti, ad multa, quæ scire lecturos refert, profuerit. Postquam primum Scipionis deficiente exercitu, Sertorius in Hispaniam abiiverat, tum admiratione virtutis & industriæ, tum ambizioso ac leni imperio, provincialium simul, civiumque Romanorum, qui locis illis confederant, ita conciliavit animos, ut paulo post magno exercitu coacto, C. Annio missu Sullæ in Hispaniam eunti, sex millia armatorum duce Livio Salinatore opponere potuerit, qui, occupatis Pyrenæi angustiis, Sullanos aditu arcerent.

XXII. Sed obtruncatus a Calpurnio Lanario Salinator, quem fidissimum amicorum crediderat, C. Annium subito immisit necopinantibus: unde Sertorius cum tribus hominum millibus Carthaginem novam, & inde navibus in Mauritaniæ litus perfugit. Sed multis militibus inter aquandum subita barbarorum irruptione amissis, retro vela fecit: iterumque repulsus, ascitis piratarum Cilicum paronibus, præsidium Annii in Pityusa insula improvisus oppressit. Sed Annio magnam classem, cum una legione adducente, prælio navali parum prospero usus, quod naves illius leves parumque firmas, ortus forte ventus disiecerat, post longum & acrem naufragii metum, paulo supra Bætis amnis ostia applicuit.

XXIII. Sub idem tempus nautæ recens ex insulis Atlanticis revecti miracula narrabant: *duas ibi insulas propinquas inter se, & decem millibus studiis procul a Gadibus sitas, suoapte ingenio alimenta mortalibus gignere*. Igitur *Fortunatæ* vocabantur: & has intellexisse Homerum etiam apud barbaros obtinebat, cum *Elysios campos, sedesque beatorum* describeret. Earum esse, quæ hodie *Canariæ* vocantur, ex modo navigationis, & descriptione locorum, & quæ de his apud Plinium, auctore Juba rege, narrantur, propemodum constat. His igitur intellectis, traditur tædio præsentium Ser-

§ XXI. Plut. in Sertor. c. 9. L. Ampel. § XXII. Hieron. adv. Rufin.



torius, & ne aut facere aut pati tam tristitia necessum esset, fugam in longinqua Oceani agitavisse, apud Fortunatas illas insulas, quod reliquum esset ævi, in quiete exacturus.

XXIV. Igitur aliquando, cum famam illam apud suos late sparsam cum admiratione vidisset excipi, ejusmodi jacere sermones cœpit: *Fabulam hanc esse credidissẽm, nisi non spernendi auctores verum subesse persuaderent. Multi sunt, qui se vidisse confirmant: & ne dolum putem, singuli seorsim interrogatĩ de rebus, de quibus inter se comparare, si maxime voluissent, nullo pacto potuerunt, eadem omnia miro consensu referunt. Unum subit mirari, quod tantæ felicitatis loca ex cetero orbe non petuntur avidius. An non enim satius foret, contentum iis, quæ in pace & otio viventibus omniparens tellus sponte sua ministraret, dimittere inanes aut atroces curas, & sibi aliisque parcentem sine metu, sine injuria, munere Deorum oblata accipere cibaria?*

XXV. *At nos improvidi & immites, quo scilicet aliquando beatiorẽ ducamus vitam, tumultu turbisque miscemus omnia: annosque nostros prodigimus, tanquam alio tempore victuri. & ut paremus supervacua, necessariis invicem spoliamur spoliamusque. Ita multis calamitatibus malisque cogentes coactique, & interdum scelesti magis, quam miseri dstringimur. Sed alii sine insaniant! quid nos facere decet commilitones? Quin arripimus vacuam tantorum bonorum possessionem: ut aliquando incipiamus vivere, ceterorum mortalium errores tempestateque de tutis litoribus despecturi.*

XXVI. *Si cuiquam nostrũ sperare multum ex his rebus licet, quæ vulgo præcipuæ habentur, ego is esse debeo. Genere Romanus, ordine senator, dignitate prætorius, qui exercitibus magnis, provinciisque præfui, qui res gessi nemini hujus ævi dũcum pœnitendas. Me tamen eo propemodum natura ducit, quam sequi optimam vitæ magistrã æquum est, ut spes meas omnes hoc pretio commutare nihil abnuam. Non erat ea mens Cili-  
cibus, ut pacis amore, pecuniæ studium abjicerent, cujus causa pacem otiumque reliquissent. ita Sertorio relicto, in*

Africam se contulerunt, ubi de regno Mauritaniæ bellabatur. At Sertorius, ne, quod supererat militum, inopia deficeret, alteri se partium applicuit; rebusque bene gestis, cum ab incolis locorum amaretur, quid postea facto opus esset, deliberabat.

XXVII. Ancipitem & impeditam consultationem legati Lusitanorum abruperunt, *ad imperium gentis* eum vocantes: quæ contra Romanos terrores ducis egens, laudatum ab omnibus, qui cum illo fuerant, Sertorium, velut divino munere oblatum, rebatur. Erat enim ille animo consilioque maximus, virtutis liberalissimus æstimator, in puniendo moderatus, facundus idem & comis, & tam in confirmandis suis, quam terrendis hostibus, singularis artifex. Igitur, accepta conditione, cum duobus millibus, sexcentis, quos vocabat *Romanos*, & septingentis, qui ex omni Africa se ad eum contulerant, levi præsidio relicto in Mauritania, nactus obscuram noctem, æstu secundo, furtivaque celeritate, vitare prælium in transgressu conatus est.

XXVIII. Sed occurrente cum navibus Cotta, juxta Melariam in freto dimicare coactus, vi perripit, & ad montem Balleram, quem Lusitani præceperant, contendit. Horum copiis assumentis, (erant autem cetratorum millia quatuor, equites septingenti) Furtivum cum legionibus adventanti se objecit. Is enim Beticam cum imperio obtinebat. cum hoc, difficultatibus locorum adjutus, ita certavit, ut ille, duobus millibus Romanorum amissis, cedere cogeretur. His igitur aliisque multis ducibus interfectis, pulsisve, C. Metellus a Sulla missus est, claræ veterisque famæ imperator. Qui postquam in ulteriorem provinciam venit, artibusque Sertorii fatigatus, neque cogere potuit ad pugnandum, neque insequi fugientem, nisi ut omnia fugientium incommoda ipse pateretur; L. Domitium, proconsulem citerioris Hispaniæ, cum omnibus copiis, quas paraverat, arcessivit.

§ XXVI. Plut. in Sertor. c. 13. § XXVIII. Sallust. Oros. 5, 23. Plut. in Pomp. c. 27.

XXIX. Sed ille ad Anam fluvium, qui Bæticam a Lusitania separat, ab Hirtulejo, quæstore Sertorii, cum exercitu oppressus est. idemque fatum eodem loci legatum Metelli Thoriumprehendit. Deinde, quia tanto hosti resistere res Romana uno imperatore non poterat, L. Manilio Galliam Narbonensem obtinenti præcipitur, ut suppetias Metello in Hispaniam transgrediatur. Hunc quoque cum quinque legionibus, & mille quingentis equitibus advenientem, idem Hirtulejus sic excepit, ut L. Valerius Præconinus legatus, exercitu pulso, interficeretur; L. Manilius proconsul, impedimentis amissis, in oppidum Ilerdam pæne solus confugeret.

XXX. Unde viribus & fama in dies augefcens Sertorius, ut consilium & decus partibus adderet, senatores ex proscriptis eodem nomine locoque apud se habebat; allectisque ex amicorum cohorte primoribus, ut trecentorum numerus fieret, hunc *senatum* appellabat: ad eum ordinem de rebus omnibus referebat, hinc quæstores legatique, quam proxime patrium morem creabantur. Nam Sertorius ea modestia & animi magnitudine agebat, ut, quamquam Hispanorum armis, pecuniisque & urbibus, ac corporibus uteretur, nulla tamen re lædi obliterarive Romani nominis dignitatem sineret.

XXXI. Cum hæc agebantur, P. Servilius cum Cilicibus prospere ad summum, sed non sine magno labore ac periculo dimicabat. Mithridatici belli occasione piratæ, quod inter Cretam Cyrenasque & Achajam sinumque Maleum est mare, (ipsi a prædarum ubertate *aureum* vocabant) latrocinii infestum habere cœperant, Isidoro duce. Deinde, quia Mithridates Asiam pro aliena negligebat, Sullam urbanæ res revocabant in Italiam, impunitate plures invitante, numero viribusque aucti, magnis jam classibus oberabant. adeoque placebat ipsis hoc vitæ genus, ut hoc

§ XXIX. Appian. civil. l. 1. Sallust. Plut. in Sertor. c. 19. Liv. Epit. Flor. Pomp. Mela. Oros. Eutrop. § XXX. Flor. 3, 6. Plut. Liv. Epit. Oros. Cæs. de B. G. 3, 20. Appian.

perpetuo exercere certi, in quandam velut reipublicæ formam coirent. igitur, licet passim haberent castella, arces, insulas desertas; sedem tamen fortunarum omnium Ciliciam, quæ vocatur aspera, consensu legerunt, importuofam, & altissimis rupibus horrentem.

XXXII. Unde communiter ab omnibus *Cilices* vocari cœperunt: quamvis esset mixta variarum gentium colluvies, Syri, Cyprii, Pamphylii, & quidam ex Ponto, ad propemodum omnibus Orientis regnis: multi enim bellorum diuturnitate patrimoniis exuti, cum facere indigna & gravia, quam pati, mallent, naves pro natali solo ad ducendam vitam delegerant. His omnes fere Ciliciæ Pamphyliæque urbes patebant, dulcedine lucri forum prædæ vendendæ, navibusque eorum stationem præbentes. Sidetæ quidem naves etiam iis fabricabant, & captos ab illis palam vendebant, quamvis liberos esse scirent & faterentur.

XXXIII. Diversum Lyciorum institutum, eoque dispar etiam fortuna fuit: qui neque terrore, neque lucro victi, omnem cum Cilicibus societatem constanter recusarunt; quorum deinde excidium salvi fospitesque viderunt: nisi quod e finitimis bellis, velut ex vicino incendio, partem aliquam vapor afflavit. Ceterum piratas L. Muræna nuper, imperato civitatibus Asiæ, ut ex pecunia vectigali populi Romani naves facerent, paulisper represserat; sed quia neque receptacula illorum expugnata erant, neque prohiberi poterat, quo minus plures quotidie ad illorum institutum affluerent, postquam Muræna decessit ex Asia, plus terroris ac damni, quam unquam antea, passim dederunt.

XXXIV. Jam enim & Siciliam infestabant, ut circa eam insulam nemini tuta navigatio esset: occurrentemque sibi prætorem navali prælio vicerant. nec meliore eventu ab aliis in eos pugnatum. Igitur missus in eos P. Servilius proconsul, primum in ipso thari congressus, quamquam adversus leves & fugaces myoparonas justæ magni-

§ XXXII. Strab. l. 4. § XXXIII. Appian. Cic. Verr. 1, 33. Sex. Ruf. c. 11.

tudinis naves opposuerat, non incruentam victoriam retulit. Sed nec mari submovisse contentus, ad urbes illorum & prædarum receptacula eruenda convertit. Non minimi laboris id bellum fuit. fere triennio pugnatum: multæque per Ciliciam Pamphyliamque & Lyciam urbes everse.

XXXV. Phaselis in Lyciæ Pamphyliæque confinio sita, juxta quam Alexander olim per angustias fluctibus coopertas transduxit exercitum, crebro commeantibus eo piratis, quod ita projecta in altum horum accessibus erat opportuna, primo commerciis, deinde & societate se conjunxerat. Sed non ante destitit Servilius, quam expugnatam dirueret. Eadem fors Olympi fuit, urbis antiquæ & opulentæ, quæ inter sex Lycias maximas numerari solet. Hujus, cum vi capta esset, magna præda fuit: multaque inde signa & ornamenta ab imperatore belli jure sublata sunt. Corycum quoque urbem, inclitam nemore, in quo crocum gignitur, eorundem armorum tempeestas evertit.

§ XXXIV. Oros. 5, 23. Strab. Cic. § XXXV. Flor. Cic. Verr. 2, 21. Strab. Sallust. Eutrop.

JOANNIS FREINSHEMII  
SUPPLEMENTORUM  
LIVIANORUM

LIBER LVI.

IN LOCUM LIB. XCI LIVIANI.

E P I T O M E

LIBRI NONAGESIMI PRIMI.

*Cn. Pompejus, cum adhuc eques esset, cum imperio consulari adversus Sertorium missus est. Sertorius aliquot urbes expugnavit, plurimasque civitates in potestatem suam redegit. Ap. Claudius proconsul Thracas pluribus præliis vicit. Q. Metellus proconsul L. Herculejum, quæstorem Sertorii, cum exercitu cecidit.*

**T**RANSGRESSUS in Hispaniam Perperna, quemadmodum superiore libro ostendimus, curam senatus duplicaverat, nihil æque metuentis, quam, ne auctus novo exercitu Sertorius in Italiam reverteretur. Metellus enim, fessa jam ætate, & statariis pugnis affuetus velocissimæ virtutis hosti parum resistebat. Idcirco Cn. Pompejus, qui nuper, recepta Gallia Cisalpina, quamquam jubente Catullo, copias non dimiserat, cupidus Hispaniensis belli, ut ad opem ferendam Metello mitteretur, ad urbem hærebat, semper aliqua reperta causa, cur exercitum sub signis re-

tineret. Neque aliud in promptu præsidium erat, neque ducum quisquam, qui Sertoriano vigori rectius opponeretur. Ergo ex sententia L. Philippi, decreta illi provincia est, ut pari cum Q. Metello imperio esset. quo tempore ajunt, mirantibus querentibusque, *anne igitur equitem Romanum pro consule mittendum censeret?* respondisse Philippum, *non se illum sua sententia pro consule, sed pro consulibus mittere.*

II. Tanta erat de virtute Pompeji opinio, ut, cum duo consules clarissimi fortissimique essent, duorum consulum munus unius adolescentis virtuti committeretur. Igitur Pompejus, accepto imperio, diebus quadraginta suppleto exercitu, paratisque necessariis, ad Alpes movit, quarum aditus Sertoriana præsidia obtinebant. Igitur Pompejus aliud, quam Hannibal patefecerat, sibi opportunius iter juxta Rhodani Padique fontes aperuit: hostibusque in Hispaniam submotis, Galliam, adjuvante non segniter, qui provinciae præerat, M. Fontejo, recepit. deinde perrexit ad Pyrenæum, ut ad auxilium Metello ferendum quam maturime occurreret. Nam is in dies molestioribus rebus utebatur: cum super alia mala, fatiscens laboribus miles, segnior, & adversus imperatorem contumacior fieret: consueque, ut, Sertorio Metellum ad singulare certamen provocante, impudens clamor oriretur, *ire jubentium, ducemque cum duce, Romanum cum Romano congrédi*, non sine conviciis, ubi Metellum imperatorii loci memorem, neque hostis insultatione, neque suorum stultitia moveri viderunt.

III. Igitur Metellus, ut aliquo negotio militem occuperet, celeriter ad Laccobrigas movit, urbem hosti opportunissimam, non magno negotio in potestatem reducturus, quod unus tantum intra mœnia puteus erat, & suburbanis aquis obsessi prohibebantur. Sed hic quoque neque solita cautio Sertorio, neque celeritas efficiendi cogitata defuit. Ex omni Hispanorum Maurorumque numero robustissimum quemque, eundemque perniciosissimum, pronun-

§ I. Appian. Hisp. § II. Val. Max. 8, 15. Cic. pro Fontejo. Plut. in Sertor.

tiato in singulos utres præmio excitans, magnam aquarum copiam inferendam in oppidum curat. per eosdem inutilis turba educitur. ita in multos dies adversum sitim providetur. Enimvero Metellus, cui omnis spes in eo erat posita, ut imparatos opprimeret, *tantum quinque dierum cibaria portare* militem jussit.

IV. Idcirco, deficiente commeatu, Aquinum cum sex millibus militum frumentatum misit. At Sertorius, occultatis tribus hominum millibus, cum ceteris, quos secum habebat, Aquinum ad pugnam cogit. ea dum conferitur, signo dato procurrunt insidiæ: sic Aquinus dimidia copiarum parte, & equo armisque amissis, vix a Metello receptus, & obsidio cum magna Romanorum ignominia soluta est. His successibus ab Hispanis Sertorius in cælum tolli: *hoc imperatore sibi decus, divitias, victoriam quisque spondere.* neque ille omittebat, omni arte parare novorum amicorum, retinere veterum benevolentiam, comiter appellando singulos, donando ob virtutem, armis auro atque argento ornatis, sagulisque pictis, & Romana disciplina exercitum ad speciem & robur instruendo.

V. Sed & nobilissimos ex amicis populis pueros, ludo Oscæ instituto, Græcis Latinisque literis curabat erudientes, *civitatem Romanam* promittens, *ubi adolevisset*: & hi quidem Sertorio usum obsidum præbebant; sed quia nominis invidia aberat, securi vacuæque suspitione parentes, ulro liberali & honesta suorum educatione lætabantur. Mos vetus Germanorum Gallorumque per Celtiberos in Hispaniam introductus fuerat, ut principibus virtute præstantes viri comites se adjungerent, indiscreta familiaritate lætorum adverforumque, atque etiam mortis focii. nam ne quis, amisso duce, vivus ex acie reverteretur, devotione terribili adstringebant fidem.

VI. Horum major, quam cuiquam alias, Sertorio nu-

§ V. Tacit. Germ. c. 15. Nic. Damascen. l. 16. Plut. in Sertor. c. 25. Sallust.



merus apparebat. multa enim in has leges millia sequebantur: feruntque, *aliquando fuga ad urbem quandam facta, portisque turbam morantibus, devotos illos, abjecta suæ salutis cura, Sertorium per sua corpora ad medium quasi murum extulisse, ut deinde superadstantium manibus in summum attraheretur.* Nec dissimili fama, atque caritate apud Italicos milites celebrabatur. Nam Perpernae milites, quod ille nobilitate & opibus potior, cedere Sertorio recusabat, indignabantur: nec ultra passi, quam donec per Pyrenæum saltum Pompejus adventare auditus est, *ut ad Sertorium duceret*, postularunt; *ni duxisset, sua sponte ituros.*

VII. Idcirco Perperna, quod summum tenere locum nequibat, proximum utique non abjiciendum ratus, cum ingenti pecunia, tribusque & quinquaginta cohortibus ad Sertorium venit. Hac tanta accessione ferociores Hispani, quorum undique magna vis ad castra Sertorii concurrerat, insolentioribus quotidie vocibus pugnam flagitabant. At Sertorius, non minus cautus, quam acer imperator, neququam conducere rebus suis existimabat, ut præter rationem belli seque & exercitum non necessariis casibus objiceret. Postremo, quia nulla jam ratione cohiberi hominum impetus poterat, turmae equitum, ut lacefferet hostem, permisit: deinde laboranti submisit alias, atque ita citra magnæ noxæ experimentum docuit, quis exitus flagitatam pugnam mansisset.

VIII. Igitur ut quoque in posterum obsequentioribus uteretur, *jussis in concionem assistere militibus, duos equos produci imperavit, prævalidum alterum, alterum mire exilem.* valido deinde parvum hominem & cotentibilem aspectu, exili magnum robustumque admovit, præcepto, *ut robustior ille gracilis equi caudam universam abrumperet, valentis singulos pilos infirmus velleret.* Atque illo inter plurimum omnium risum, magna vi nequidquam adhibita, defatigato, cum gracilis, quod imperatum erat, confecisset, versus ad suos Sertorius, *Jam, inquit, quod mihi sæpe monenti noluisistis, oculis,*

*copiarum, vestris credetis, milites. quanto plus perseverantia, quam impetus, valeat, sub claro exemplo didicistis. Romani exercitus hac imagine vobis ostensa natura est: quem universum qui aggreditur, nihil aget; per partes carpenti minime erit insuperabilis.*

IX. *Per hæc converſis animis fuorum, & ad accipienda quælibet apertis; rem se facere, non nisi rarissimam, & magnam de causa probabilem, ait, qui gerendi belli rationem exercitui reddat imperator. Sed facere semel, ut ostenso cognitoque, a quali duce, & qualibus consiliis regantur, post hæc etiam celanti animum suum læti atque securi obediant. Neque enim sibi deesse ferociam, siquidem robore & impetu posse obtineri victoriam putaret: idque tot præliis compertum, quibus miles, tribunus, legatus, imperator suæ alienæque vitæ juxta peperciſſet. Ceterum ita se videre comparata esse præsentia, ut nulla sit, nisi qua instituerit ducere, ad salutem viam.*

X. *Laudare se quidem animos cuilibet discrimini promptos, & timori impenetrabiles: sed eo ipso dignos arbitrari, qui nullum aut modicum ad usum temere non prodigantur. Sed neque ignavia cuiquam auctorem esse: quin ultro indicere expeditiones, prægnas, itinerum operumque multiplicatum laborem. His enim rebus se confidere, quibus adhuc contra tot duces & magnos exercitus, cum modicis copiis invictus steteret. Olim se scire, plerosque omnes præ nimio ardore ad summæ rei dimicationem animis votisque properare: sed suis artibus effectum, ut & bellum sustineretur egregie, & Perpernae daretur spatium tantas adducendi copias, quæ profecto, si ante tempus in unius certaminis aleam descensum foret, non fuissent habitura, quocum se conjungerent.*

XI. *Nunc vero aucti tanto exercitu, neque ipsi nos trademus inertiae, neque hosti quidquam temporis tutum, aut quietum esse patiemur. Sed nec temere a priori ratione belli gerendi recedemus. Romanam aciem, si viribus ac locis æquis congregiare, sine summo tuo periculo damnoque haud sustinueris: at ego vobis ita conscribam locis, turbatam improvise metu, vigiliis laboribusque enectam dabo, ut citra noxam meorum militum concidatur.*

XII. *Omnia, quæ ad hunc obtinendum finem faciunt, pro no-*

*bis sunt. Locorum ingenium, quibus a pueritia assuevistis, & perinde scientia: velocitas ingenita Hispanis, famis, sitis, aestus, laboris patientia. quibus rebus ita fatigavimus statarias hostium copias, ut quandoque se victas ante sentiant, quam, a quibus oppugnentur, cognoverint. Scio, nobiscum esse, qui Viriathini belli meminerint: iis consilium meum haud difficulter approbabo. juniores satis habeant, animos promptos, arma expedita habere, ut feliciter expertum ducem, ad gloriam & opus recto itinere praeeuntem sequantur. Ita condoceratis barbaris, cum illorum viribus, ingenio suo uteretur, multa prospere gessit, aliquot urbes expugnavit, plurimasque civitates in potestatem suam redegit. Unde non minori admirationi, quam terrori hostibus erat.*

XIII. Sed praecipuam ei calliditatis famam peperit Characitana expeditio, qua gentem feram, non urbes, aut viros, sed magnum & arduum collem plurimis speluncis in Aquilonem versis supra Tagum incolentem subegit. Ibi dum circa inaccessum collem obequitans, adversus tutos loco barbaros inanes minas jactat, & pudore recedendi multa volvit animo, Cæciam animadvertit in adversas speluncas flare: edoctusque ab accolis, id eo tempore anni solitum illis regionibus esse, milites excidere glebas ex circumjecto agro, & contra speluncas comportare in aggerem, jubet: multum irradientibus montanis insanæ molitionis vanitatem, quod putabant, ad oppugnandum altissimum collem id institutum pertinere. Inter hæc Sertorius sub noctem suos reduxit in castra.

XIV. Postridie, cum flare ventus cœpisset, & ex congesta humo pulverem in altum efferre, militibus immixtis, subruere ex imo cumulum illum iussit, terramque levem admodum & friabilem comminuere. atque illa labore hominum, equorumque ultro citroque super eam discurrentium ungulis trita, cum a vento rapta in aerem tolleretur; statim densa quædam nebula speluncarum ostia fenestrasque obturavit. neque jam aut lucis usus supererat.

§ XII. Liv. Epit. § XIII. Plut. in Sertor. c. 26.

aut reciprocandæ animæ purus suppetebat aer. nec enim aliam in partem apertæ illorum habitationes, aut ulla du-cendi spiritus copia dabatur. Biduo tamen sustinuerunt hoc malum obfessi: tertio die, quia perseverante vento suffocabantur, sunt dediti.

XV. Dum hæc geruntur, in Hispaniam Pompejus venit; arrectique omnium animi erant, ut solet, ad novi imperatoris famam: multique populi, qui minus constanter adhærebant Sertorio, jamjam mutaturi socios videbantur. Sed insperatus ad Lauronem casus & dubios in officio retinuit, & fidos confirmavit. Sertorius eam urbem obsidebat, cum universum exercitum suum, apud Pallantiam convenire jussum, succursurus obsessis Pompejus adduxit. Tumulus haud procul urbe visebatur, quem qui prior occupasset, magna erat ex loco commoda habiturus. Utrouque duce properante, Sertorius cum prævenisset; exclusus ea spe Pompejus haud eo minus læto animo agebat, quod inter suum exercitum & Lauronem interclusas Sertorii copias tenere rebatur.

XVI. Igitur missis ad Lauronenses nuntiis, *bono animo esse jubet, atque confidentes in mœnibus obfessi obfessoris spectaculo frui*. Sertorius, jactantia Pompeji comperta, ridens ait, *se discipulum Sullæ* (sic appellabat eum ludibrii causa) *docturum, debere plus respicere imperatorem, quam prospicere*. Simul ostendit obsessis sex millia peditum prioribus in castris relicta, ut Pompejum, si in se movisset signa, a tergo aggredierentur. Ita Pompeji gaudium irritum cito in gravem verecundiam vertit. Nam serius errore cognito, cum neque invadere Sertorium, ne circumveniretur, auderet, neque præ pudore Lauronem sustineret relinquere; pereuntium sociorum spectator otiosus sedebat.

XVII. Dum ira vicina castris castra duo imperatores habent; Sertorius talem dolum machinatur. Duæ tantummodo regiones erant, ex quibus peti pabulum posset, una in propinquo, altera longius sita. Sertorius ulterio-

rem ab armatis adiri vetuit: citimam subinde per levem armaturam iussit infestari. Sic ad extremum fides adversis partibus facta, tutiorem esse, quæ erat remotior: magnusque eo Pompejanorum numerus pabulatum profectus est. His a Sertorio triplices insidiæ per idoneos saltus ponuntur, missis Octavio Græcino cum decem cohortibus, in morem Romanorum armatis, & totidem levis armaturæ Hispanis, Tarquitioque Prisco cum duobus millibus equitum.

XVIII. Illi strenue imperata faciunt. explorataque locorum natura, in vicina silva prædictas copias noctu abscondunt, ita ut in prima parte leves Hispanos, gentem ad furta belli peridoneam ponerent; paulo interius scutatos; in remotissimo equites, ne fremitu equorum destinata proderentur. quievire omnes, silentio servato, in horam tertiam diei. cum deinde Pompejani securi gravatique pabulo de reditu cogitarent, & hi quoque, qui in statione fuerant, quiete invitati ad pabulum colligendum dilaberentur; emissi primum Hispani, velocitate gentili in palantes effunduntur, & convulnerant confunduntque nihil tale expectantes. prius deinde, quam resisti his inciperet, scutati erumpunt e saltu, & redeuntes in ordinem consternant, vertuntque. fugientibus equites immissi, toto eo spatio, quo redibatur in castra, persecuti cedunt. curatum quoque, ne quis effugeret. nam præmissi per compendia itinerum ducenti quinquaginta equites, quos in hunc usum opperiri duces jusserant, antequam ad castra Pompeji perveniretur, conversi, occurrerunt eis, qui primi fugerant.

XIX. Ad cujus rei sensum Pompejo immittente legionem cum Lælio in præsidium suorum, subducti in dextrum latus specie cedentium equites, mox circumitu legionem abs tergo infestaverunt: cum jam etiam a fronte Sertoriani, qui pabulatores persecuti erant, incursarent. Sic legio quoque inter duas acies hostium cum legato elisa est. ad cujus auxilium Pompejo universas educente co-

pias, Sertorius quoque e collibus instructum ostendit exercitum, effecitque, ne Pompejus progrediretur. Ita præter duplex damnum, eadem follertia illatum, spectatorem quoque eum cladis suorum constituit. Hoc primum prælium inter Sertorium & Pompejum fuit. decem millia hominum de Pompeji exercitu, cum jumentis & calonibus amissa sunt. Pompejus vix reliquias incolumes reduxit.

XX. Hic eventus etiam Lauronensium fregit animos, neque diu cunctati, concesserunt in Sertorii fidem. Is prædam militi concessit, edicto, *liberis corporibus uti parceretur*: direptam deinde urbem incendit, non crudelitate, a qua vix ullus unquam dux alienior fuit; sed ut ex tanta extinctione Pompejo contentus apud barbaros oriretur: quo inspectante, & tantum non flammis incensæ calefacto, urbs socia & amica deflagrasset. Lauronenses, qui obsidioni superfuerant, in Lusitaniam Sertorius deduxit. In ea direptione miles quidam muliere Lauronensi præter naturam abusus, oculis mulctatus est, quos directis in eos digitis mulier effoderat. Re ad imperatorem delata, cum facta & causam didicisset, infensus tanto militiæ dedecori, integram cohortem, hoc genus flagitiis famosam, licet Romana esset, delevit. Pompejus tamen impetum Sertorii victoris, quamquam novis militibus, & multo paucioribus, sustinuit: nam adversus sexaginta millia peditum, novem equitum, non ultra triginta peditum millia, & mille equites adduxerat.

XXI. Hæc ea æstate in Hispania gesta. cum deinde tempus anni adversum expeditionibus esse cœpisset, diversi imperatores in hiberna discesserunt. Cn. Pompejus & Q. Metellus circa Pyrenæum, inter sævissimos hostes, in castris hiemarunt: Sertorius cum Perpenna in Lusitaniam profectus est. Per hæc tempora continuum fere cum Thracibus bellum erat, perpetuo incurfantibus Macedoniam.

§ XIX. Appian. Jul. Obseq. Front. Plut. in Sertor. c. 29.  
§ XX. Appian. Plut. Orat. 5, 23.

Et quamquam acriter a Dolabella repressi, iustissimusque de iis ductus triumphus erat; cum Ap. Claudio successore Dolabellæ multis, sed levibus præliis concurrerunt.

XXII. Quibus victis, Appius, per Rhodopæas gentes, magno cum labore in Sarmatas usque pervenit. Sed inter asperrimas gentes, ubi cum Medis varie dimicavit, curis & ægritudine fatigatus in morbum incidit, ex quo est in provincia mortuus. Jam Romæ Cn. Octavius M. F. Cn. N. C. Scribonius Curio consulatum occeperant. Tum Reatinorum improvisa clades in prodigium versa. quippe terræ motu ædes sacræ in oppido agrisque commotæ, saxa, quibus forum stratum erat, discussa, pontes interrupti, ripæ labentis fluminis in aquam provolutæ, fremitus inferni exauditi fuerant. paucis abinde diebus, quæ concussa erant, corruerunt. saxum vivum cum provolveretur, non sine stupore visentium in præcipiti rupe immobile stetit. Aliud deinde nuntiatum prodigium est, quod *scintillam e stella cadere, & augeri terræ appropinquantem, ac postquam lunæ magnitudine facta esset, illuxisse ceu nubilo dici, de'n cum in cælum se reciperet, lampadem factam L. Junius Silanus proconsul cum comitatu suo viderat.*

XXIII. Hoc forte nunquam antea visum annotatumve movit Patres, ut *de Sibyllinis carminibus colligendis referri* juberent, quoniam, quod eorum asservatum in Capitolio fuerat, incendio ædis illius consumtum erat. In eam legationem P. Gabinus, M. Otacilius, L. Valerius lecti. His negotium datum, *ut Erythras præcipue adirent*, quæ patria Sibyllæ dicebatur, *ad describenda, quæ ibi pro Sibyllinis celebrarentur.* Per hos aliosque (nam & Samo quædam allata sunt, & Ilio, per Africam etiam & Siciliam, & Italicæ colonias, etiam privatis conquesta) magnus librorum numerus in urbem comportatus est. & quia multa

§ XXI. Sallust. Oros. Appian. Cic. pro Fonte. & in Pison. Liv. Epit. Eutrop. Sex. Ruf. Jul. Obsequ. Flor. 3, 4. § XXII. Plin. 2, 35. Pigh. Annal.

vana inerant, sacerdotibus mandatum, ut, quantum humanæ ope posset, vera a falsis discernere.

XXIV. Nec in tam cæco negotio certius aliud, quam per acrostichidum, ut vocant, indicia repertum discrimen, Terentius Varro doctissimis, sed iisdem ineptissimis rerum divinarum libris prodidit. Eodem anno, postquam primum ver apparuit, resumtum acriter in Hispania bellum est, multaque & cruenta prælia facta. Tandem apud Italicam Bæticæ urbem Q. Metellus, & Sertorii quæstor L. Hirtulejus, totis viribus congressi sunt. Metellus adversus hostium celeritatem ac ferociam, haud paulo minus viribus, quam consilio, tribuebat: tam diligens celandi, quæ cogitaret, ut interroganti, *quid postera die facturus esset*, responderit: *tunicam meam, si eloqui posset, comburerem*.

XXV. Igitur insignem, quam tunc adeptus est, victoriam, non tam militum lacertis, quam ingenio suo, debuit. Oriente protinus die, Hirtulejus instructam aciem vallo ejus admoverat: neque mora esset, si suos audiret, quin statim contra exiretur. Sed prudens imperator, intra castra retento exercitu, geminam utilitatem percepit: spatium nactus, quo consideraret hostium aciem, eandemque (fervidissimum enim anni tempus erat) caloribus conficiendam relinqueret. Idcirco cum, quod roboris in hostili exercitu erat, in media acie stare comperisset: sic instruxit edocuitque suos, ut cornua longius protenta prius cum oppositis congredierentur, quam mediæ acies conflingerent. His ita ordinatis, sub sextam diei horam exercitum eduxit. Recens Metello miles, curatis corporibus, viribus integris pugnam capeſſebat: Sertoriani stando fessi, magis etiam æstu fatigabantur: & quia Metellus mediam aciem reduxerat, fortissimæ quæque cohortes, si starent, otiosæ manebant; sin procurrerent in hostem, hic quoque novus labor prioribus molestiis accedebat.

§ XXIII. Feneſt. ap. Lactant. de Ira & de Inst. 1. Dionys. 4, 70. Strab. 1. 13. Tacit. § XXIV. Appian. civil. 1. 1. Oros. Front. Strat. 1, 1. § XXV. Front. 2, 1 & 3.



XXVI. Inter hanc dubitationem pulsus utrinque cornibus, ita circumveniuntur, ut neque repugnando feruari, neque erumpere ad fugam possent. Ibi vehementissime dimicatum est, ita promptis avidisque ducibus, ut Metello in sagum, Hirtulejo in brachium tela venirent. neque tam virtute, quam quibus diximus rebus, inferiores Sertoriani exstiterunt. Ita viginti millibus militum amissis, pauci in Lusitaniam cum duce refugerunt. Neque tamen ille cladi suorum diu superstes fuit, dum reparatis viribus fortunam denuo tentat, cum fratre ad Segoviam interfectus. Quo tempore *barbarum, qui forte evaserat, nuntium cladis Sertorius, cum maxime pugnam adversus hostemiciens, e vestigio pugione trajecisse dicitur; veritus, ne, inter milites vulgata rei fama, animos eorum alienissimo tempore infringeret.*

XXVII. Magnum enim omnino incommodum acceperat, insigni duce, multisque fortissimorum virorum millibus deperditis. Sed nemo temere tum ad alios belli casus, tum in reparandis cladibus, Sertorio dux melior erat: cum invictus ipse, legatorum culpa fortunave vulneratam causam mirabili semper celeritate consilioque restitueret. Unde ingens viri nomen, quotidieque majus, ne quidem Europæ finibus continebatur, quin Asiam quoque & Pontum implerent ejus laudibus, qui ex Occidente adventabant. Quod non ultimum incitamentum Mithridati fuit, cur tertii belli, sibi que ad postremum exitiosi, aleam subiret: elatum regis animum aliis etiam stimulantibus causis. Quippe post remissam a Sulla legationem, Cappadociam Ariobarzani, uti jussus erat, restituerat: cum alios oratores scribendi fœderis causa Romam ablegasset, iterum spe sua frustratus est, quia, mortuo jam Sulla, magistratus civilibus turbis impediti de eo negotio non retulerunt.

XXVIII. Igitur Mithridates ultionis cupidus, & sibi adhuc diffusus, Tigranem subornat: facilius conjicientibus

§ XXVI. Sallust. Oros. 5, 23. Flor. 3, 22. Liv. Epit. Front. 2, 7. § XXVII. Plut. in Sertor. c. 30. Appian. Mithrid.

rem Romanis, quam ad prohibendum paratis. Ille Capadociam, velut indagine cinctam, evacuavit, abactis hominum ferme trecentis millibus, & urbibus Græcanicis duodecim evastatis. Hos in Mesopotamiam, agris juxta Trigranocertam ad incolendum attributis, transtulit; majoremque partem urbis ex eo genere frequentavit. Curæ enim habebat rex longe superbissimus, ut urbs, ubi sibi diadema Armeniæ imposuerat, quamque de suo nomine voluerat appellari, magnificentissimo murorum ambitu, maximaque hominum & ædificiorum multitudine ornaretur.

XXIX. Hæc dissimulare, Romanos non externa tantum bella, sed etiam urbani motus coegerunt. De tribunatu, cujus omnem fere potestatem Sulla exstinxerat, certabatur. Nam illo mortuo, plerorumque erecti animi fuerant, restitutum iri jus populi sperantium, nisi C. Catulus acta Sullæ constanter defendisset. Proximis deinde consulibus, agente L. Sicinio tribuno plebis, tumultuatum: isque statim, cum D. Bruto & Æmilio Mamercio impar fuisset, cum acriore viro, Curione, malo suo fato, commissus est. Vehementer eum accusabat Curio, ut erat ei sermo splendidus & copiosus, quod *reipublicæ, vix e tantis cladibus respiranti, ænno civilium bellorum meum intestinæ seditionis fax & auditor admoveret.*

XXX. *Quasi enim parum molesti Perperna ac Sertorius forent; quasi nesciretur, quæ Mithridatis, quæ Tigranis essent consilia; quasi Macedoniam & Achajam a Thracibus lacerari, nihil ad rempublicam pertineret: ita novos subinde in ipsa urbe exoriri Cinnae atque Marios, qui saevius, quam ulli hostes, civitatem vexent premantque. Scilicet hunc Sicinium apud levem & seditionis turbam ipso nomine favorabilem, haud minus turbarum daturum credi, quam antiquis temporibuseducta in Sacrum Montem plebe, nescio quis Sicinius dederit. Nisi tamen hic tanto est deterior, quod non contentus jure tribunicio, quatenus tolerabile civitati, & populo salutare est, quale majores vestri unice desidera-*

runt, licentiam sibi miscendi omnia, & rempublicam arbitrato suo agendi, ferendi postulat.

XXXI. *An non satis modo pœnarum dedimus, quod hominibus turbulentis, ambitiosis, audacibus, stultis adolescentibus, populum, quo vellent, agitando concessa potestas est? Unde enim Gracchanæ Apulejanæque seditiones? unde mox Marianus Cinnausque furor: nisi ex tribunitiis rogationibus? Hoc igitur audes dicere, Sicini, talem mihi potestatem deponco, qualem Sempronii Saturninique habuerunt: ego rempublicam constituam scilicet; ego leges, quibus obediatis, feram. Infelix scurra, tu isto tuo impudenti ore flagitium tale proferre ausis. Tua ista insignis & prodigiosa stultitia, tua improbitas, tuæ illæ sordes in hac se republica jactabunt?*

XXXII. *At nos merito nostro miseros, si nunc Sicinium feremus regem, qui nuper Æmilium non tulimus. Scilicet apparebat, quam efficax ad subruendam rempublicam cuniculus effoderetur, si, quod ille sub honesta specie petebat, leges Sullæ, quibus tanquam firmissimo vinculo concordia statusque civitatis hujus continetur, abrogarentur. Hæc atque talia dictitantem non tam oratione Sicinius, quam clamoribus & improba dicacitate refellebat. Erat enim homo perquam ridiculus; & scurriliter facetus, omnes civitatis principes ac magistratus exagitare consueverat. memoraturque, a solo M. Crasso petulantiam abstinuisse; interrogantibus, cur soli omnium huic parceret? respondere solitus, scenum in cornu habere. Sed a Curione minime temperabat, quin & de republica cum eo contenderet acriter, & inconcinnum consulis in dicendo motum dictis procacibus irrideret: & corpore ac lingua percitum, & inquietum, nomine histronis vix sani *Burbulejum* appellaret. Igitur cum in magistratu esset occisus, penes Curionem invidia necati fuit: tribunatusque desiderium, paulisper repressum eo facinore apud plebem Romanam, non multo post vehementiore nisu erupit.*

§ XXX. Cic. in Brut. c. 59. Liv. 2, 32. § XXXII. Cic. in Brut. c. 9. Plut. in Crass. c. 13. Sallust. Plin. 7, 12. Val. Max. 9, 14.

JOANNIS FREINSHEMII  
SUPPLEMENTORUM  
LIVIANORUM  
LIBER LVII.

IN LOCUM LIB. XCH LIVIANI.

---

E P I T O M E

LIBRI NONAGESIMI SECUNDI.

*Cn. Pompejus dubio eventu cum Sertorio pugnavit, ita ut singula ex utraque parte cornua vicerint. Q. Metellus Sertorium & Perpernam cum duobus exercitibus prælio fudit: cujus victoriæ partem cupiens ferre Pompejus, parum prospere pugnavit. Obsessus deinde Cluniæ Sertorius, assiduæ eruptionibus non leviora damna obsidentibus intulit. Præterea à Curione proconsule in Thracia res gestas adversus Dardanos, & Q. Sertorii multa crudelia in suos facta continet, qui plurimos ex amicis & secum proscriptis, crimine proditiōis insimulatos, occidit.*

**I** **E**ADEM æstate, qua victus & occisus a Metello L. Hirtillejus erat, Sertorius & Pompejus, collatis apud Surcronem oppidum signis, ambiguo Marte dimicarunt. Ab ambobus erat properatum, ut adventum Metelli occuparent: dum Sertorius auxillatorem hostis prævenire studet,

Pompejus consortem gloriæ. Animosus enim rebus prospere gestis, quod Segidam, nobilem Celtiberiæ urbem, ceperat, & secundo ad flumen Duriam prælio ducem hostium C. Herennium cum decem amplius hominum milibus, & urbe Valentia deleverat; solus cum Sertorio decertare cupiebat: ne sœva quidem tempestate territus, cum sereno repente cœlo crebra cum ingenti fragore fulmina micarent. Dilata tamen in vesperam pugna est, Sertorii astu, qui hostibus locorum ignorantia neque ad fugiendum, neque ad persequendum, qualiscunque fors prælii fuisset, utilem fore, prævidebat.

II. Forte sic evenerat, ut Sertorius contra Afranium in acie consisteret, Pompejusque cum Perperna congressus, impelleret illum, caderetque. Quare Sertorius, prope commissio aliis ducibus dextro cornu, succurrit laborantibus, & alios circumspectantes fugam, alios jam palantes colligit, Pompejique victoriam, graviter urgentis impetum, sistit. Ibi vir vasta corporis magnitudine in Pompejum equitem pedes se intulit: consertisque ensibus dextram alterius alter petiit: sed æquior Pompejo fors fuit, &, accepto vulnere, manum hostis amputavit. At multis in eum se incitantibus, cum etiam hasta in femore graviter læsus, a suis fugientibus defereretur, præter spem evasit. Equus auro phalerisque eximiis adornatus, dum captus ab Afris, divitis prædæ objectu altercantes inter se barbaros a persequendo retinet, effugium domino dedit.

III. Dum hoc cornu, in quo Pompejus curaverat, vincitur; vicissim hi, a quibus Sertorius discesserat, ab Afranio vertuntur in fugam, adeo percussis hostibus, ut ne castra quidem defenderent, quo minus ab Afranianis, eodem impetu victoriæ perrumpentibus, diriperentur: frustra volante legato, quia Pompeji fortuna qualis fuisset ignorabatur, quia tenebræ jam oborientes obtentui delinquenti-

§ I. Flor. 3, 22. Liv. Epit. Plut. in Sertor. c. 30 & Pomp. c. 29. Oros. 5, 26. Sallust. Appian. civil. l. 1. § II. Plut. in Sertor. & Pomp. Appian.

*T. Liv. Vol. IX.*

Y

bus erant. Sed acerbam eis prædam Sertorius effecit, qui reversus a persequendo, statim adortus est Afranii turbas incompositasque cohortes, & magna cum cæde ex castris suis eiecit. Cum ita discessum esset, ut, fuis utrinque singulis cornibus, damno quoque non valde inæquali, (decem millia Pompejus, haud multo pauciores Sertorius, desideraverant) de victoria neutri concederent; postridie, simul illuxit, iterum educti sunt exercitus, præliumque sperabatur.

IV. Sed propinquantem Metello, Sertorius dixisse fertur: *nisi anus ista supervenisset, ego hunc puerum verberibus castigatum Romam dimissem.* Idcirco cum duobus congredi nolens, dimisit suos, admonitos, quem in locum convenire vellet. Eos enim ita dudum assuefecerat, ut ad ducis imperium diffluerent, aut colligerentur: & ipse nunc solus per loca, quæ vagando venandoque de industria pererrare consueverat, palaretur; nunc centum quinquaginta millibus armatorum stipatus incederet. At Pompejus Metello venienti honoris causa obviam pergens, ubi in conspectu fuit, *submitti fasces a lictoribus suis*, ut dignitate superiori, iussit. Metellus neque id passus est fieri, neque ulla in re quidquam usurpavit præcipui, nisi quod, quoties una tendebant, universo exercitui signum ab uno Metello dabatur.

V. Consilio tamen senis plerumque Pompejus acquiescebat, digno inter cetera, quod narretur, documento. Junctis uterque copiis sæpe diuque Sertorium provocaverant, contra duos pugnare recusantem: donec animadverso, milites Sertorianos incredibili ardore instinctos, humeris exsertis, lanceisque vibratis, pugnam deposcere, Metellus recepit exercitum, & Pompejo idem faciundi auctor fuit. Sed inter superioris pugnae trepidationem amissa cerva candida macerabat Sertorium, ita ut compluribus diebus, non sine irrisu hostium, a rebus gerendis abstineret. Nam ad inclinandos, quo vellet, barbarorum animos, illo animali,

quasi machina quadam utebatur. Erat enim insigni forma, colore candido, & sic assueta Sertorio, ut audiret vocantem, euntemque sequeretur.

VI. *Hanc ille Dianæ donum esse fingebat, & superstitione genti quidlibet persuadebat ab hac per quietem edoceri.* siue hostes aliqua irrupturos compererat, *ab hac se dicebat admonitum:* siue res a suis bene gestæ erant, occultatis, qui retulerant, cervam producebat ob faustum nuntium coronatam; jubebatque *honorem habere Diis, cito latum aliquid gratumque audituros.* Sertorius igitur non cervam, sed, quam illa conciliabat, utilitatem perisse, moleste ferebat. Idcirco cum nocte quidam errantes ex colore agnitam comprehendissent, scirentque, magnam se ab imperatore gratiam hoc facto inituros, diligenter nuntiarunt. Ille grandi promissa pecunia, si rem tegerent, & si vulgassent, supplicium interminatus, præcepit, *ut eam postero die repente in eum locum, ubi jus reddere erat solitus, inmitterent.*

VII. Ipse vultu hilariore in publicum progressus, principibus Hispanorum, qui tum aderant, dixit, *in quiete sibi visum esse, cervam, quæ perierat, ad se reverti; & prisino more, quid facto esset opus, prædicere.* Inter hæc dimissa ex composito cerva, ubi Sertorium conspexit, lætis saltibus ad tribunal fertur, & genibus ejus capite imposito, dextram sedentis (nam frequenter ei gratum aliquem cibum claus obtulerat) ore contingit. Clamor inde factus, & orta admiratio est, tantumque ea persuasio, Diis carum hunc ducem esse, in animis mobilissimorum alias hominum valuit, ut, *ex iis nationibus neminem unquam ab eo defecisse, cum esset multis præliis superatus, memoriæ proditum sit.* Sed tum maximo hominum concursu, lætus successu fabulæ Sertorius, & animos sponte in superstitionem præcipientes magis impulsurus, vultu ac voce in speciem religione incensi composita,

VIII. *Sunt, inquit, Dii: nec sunt modo, sed etiam nobis*

§ V. Front. 1, 11 & 2, 1. Plut. in Sertor. Appian. civil. l. 13  
§ VI. Agell. 15, 22. Front. Plut. § VII. Plut. Agell.

*favent. Mittat sane Roma Pompejos suos, mittat Metellos ! utinam & regum ille domitor, terror omnium gentium, Romanæ libertatis oppressor Sulla revivisceret, ut majora nomina vinceremus ! Nam ut hæc quidem res eunt, favorem Deorum in tam manifestis indiciis non agnoscere insanum, non æstimare impium foret. Quid minus dare, quam victoriam, possunt ; quibus tanta victoriæ non præfagia tantum, sed adjumenta miserunt ? Quantum enim in eo esse putemus, quod toties monitu Dianæ clandestina hostium consilia sacrum hoc animal indicavit ; loca, tempora, agenda omittendaque docuit ; rerum bene gestarum nuntium, bene gerendarum prænuntium fuit ?*

IX. *Neque hæc a me fingi, sicut existimari hostes vellent, ipsi præclare intelligitis, bonorum istorum sæpe socii, participes, testes. Cur autem, o milites, sociique, ad vetera provocamus ? en vobis præsens & grande documentum ! Quid enim, o quid mihi nuntias, amica ? Simul cum his verbis permulcens cervæ caput, quod iterum dextræ ejus admoverat, nominansque locum, ubi partem hostium castra nuper posuisse per exploratores didicerat, imus, exclamat, imus, quo tua nos monita vocant, nemorum arcusque potens virgo. Tu nobis tela întorquentibus aderis ; tu venationem efficies uberem & secundam. Sed neque parum grati aut memores meritorum erimus. Tibi non jam urforum cervorumque arma, sed victis hostibus detracta spolia suspendemus : tibi pro feris silvestribus cohortes legionesque præcumbent.*

X. Hoc velut furoris æstro percussas militum mentes Sertorius videns, optimæque spei plenas, continuo duxit in hostem, levibusque præliis tempore ducto, donec sui convenirent, eum inter Segontiam & Tuttiam urbes, in ultimas angustias redegit. Tandem Romani, magnis copiis pabulatum profecti, necessitatem imposuerunt Sertorio, ni reverti illos cum præda vellet, prælio dimicandi. Igitur equo adduci jussu, commisit pugnam : certatumque est summis utrinque viribus, a sexta diei hora, donec stellæ cœlo fulserunt. In eo certamine C. Meminius quæstor Pompeji, vir militiæ peritissimus, occubuit : & sex millia Pom-



pejanorum sunt interfecta; de Sertorianis ad millia tria ceciderunt. Interim Metellus de Perpernae exercitu ad millia quinque concidit.

XI. Igitur illatis in eam partem signis, Sertorius ad ipsum usque imperatorem, pulsus obstantibus, penetravit. Ille quamquam senio gravaretur, fortiter restitit, animosque suorum, prope deploratis rebus, voce, manu, exemplo denique confirmavit. Sed immane quantum animi exarfere, postquam vulneratum ictu tragulae viderunt. tum enim pudore, ne deseruisse imperatorem dicerentur, & ea ætate virum, peri ulorum præ ira oblitus, repulerunt hostes, & Metellum, scutis objectis protegentes, extulerunt ex acie.

XII. Sertorius amissam e manibus prope certam victoriam dolens, vespera sequentis diei, cum magna ad eum auxilia Hispanorum venissent, castra Metelli subito oppugnare adortus est: sed superveniente Pompejo, Cluniæ, montano & munito oppido, quod paucis inde millibus aberat, se inclusit, ut in se avocatis Romanis ducibus, tutum suis abitum præstaret. Romani cum neque persequi palantes, nec expugnare resistentes possent, gravibus ab eo damnis per continuas eruptiones affecti, jam tempore anni invitante, relictis ad obsidionem Cluniensem idoneis copiis in hiberna discesserunt.

XIII. Hæc ita apud alios auctores reperio. Livius, a Metello Sertorium & Perpernam cum duobus exercitibus fusos fugatosque, scripserat; Pompejum, partem victoriae ferre cupientem, parum prospere pugnasse. Certe Metellus imperatorem se ob fusum acie Sertorium appellari, adeoque omnibus humanis honoribus coli passus est, ut ne quidem a divinis temperaret. In ulteriorem Hispaniam regressus, magna gloria concurrentium undique virorum feminarumque, vias ac tecta visendi causa replentium, spectabatur.

XIV. Sed præcipuæ infamiae cœna fuit, qua eum quaestor C. Urbinius, & postquam hoc ille gratum habebat,

§ X. Appian. civil. l. i. Plut. Oros. 5, 23. § XI. Sallust. Plut. Appian. § XII. Liv. Epit. Plut. Ptolem. § XIII. Plut. Sallust.

alii deinceps exceperunt. Ædes aulæis signisque exornatæ, scenæ ad histriionum ostentationem, sparsa croco humus, & alia in modum celeberrimi templi viscebantur. præterea sedenti transfenna demissum Victoriæ simulacrum cum machinato strepitu tonitruorum coronam capiti imponebat, triumphalis plerumque habitus erat accumbenti: epulæ quæsitissimæ, non per omnem modo provinciam, sed trans maria ex Mauritania petita volucrum, & ferarum incognita ante genera, inter puerorum virginumque choros apponebantur, hyninos accinentium, quibus ejus victoriæ celebrarentur.

XV. Nam adeo laudibus suis delectabatur, ut etiam Cordubensibus poetis, pingue quiddam atque peregrinum sonantibus, aures suas dederet. Et hæc faciebat, quia Sertorium propemodum voluntate cedentem, repulerat: cum eum sermonibus contemneret, *Sullæ fugitivum, & Carbonianorum exfulum reliquias* appellando. Sed idem *in caput ejus quater & vicies* pronuntiari jusserat, *si a cive Romano interficeretur; si ab exfulè, reditum in patriam.*

XVI. Inter hæc L. Octavius Cn. F. C. Aurelius Cotta consulatum inierant. Quo anno C. Scribonius Curio Macedoniae proconsul, qui Appio successerat, omiſſis, quas ille irritaverat, gentibus, in Dardania asperum bellum felici eventu gessit; & aliquot subactis populis, multaue imperata, quam certo tempore penderent, in hiberna regressus est. Ea tam formidolosa militibus expeditio fuit, ut de quinque legionibus una circa Dyrrhachium obsequium detrectaret, *secuturam se temerarium ducem in asperam & insidiosam militiam* negans. Sed dux acerrimus, cum *reliquis legiones in armis* assistere jussisset, *seditiosam legionem inermem procedere*, & in conspectu armati exercitus discinctam, stramenta fecare, postero etiam die similiter fossam discinctos milites facere coegit.

§ XIV. Sallust. Plut. § XV. Plut. Cic. pro Arch. c. 10. § XVI. Eutrop. Oros. 5, 23. Liv. Epit. Sallust. Front. Strat. 4, 1. Marcellin. 29, 26. Appian. civil. l. 1. Plut.

XVII. Atque ita domiti cum infimis precibus obtestantur, ne signa legionis submitteret, nomenque aboleret; nequitum est impetrari: signis ademptis soluta legio, militesque in ceterarum supplementum distributi sunt. In Hispania Q. Metellus & Cn. Pompejus imperatores iterum a Pyrenæis montibus ad flumen Iberum castra moverunt.

XVIII. Hoc tempore cum multi subinde ad Metellum transfugerent, mutare priorem mansuetudinem Sertorius præcipiti ad pœnas iracundia cœpit: plurimis amicorum & secum proscriptorum crimine prodicionis interemtis. Unde paulatim odio esse exercitui; & vicissim illum suspectare: neque animi priores militibus, neque duci consilium esse, maxime molestum Romanis erat, quod plus barbaris Sertorius crederet; hos haberet custodes corporis, populæ fide damnata: quamquam illius gratia contra patriam arma ferrent, nec transfugarum, si qui essent, crimen, in sacramento manentibus aliis, recte imputaretur.

XIX. Sed nihil erat acerbius, quam quod Hispani, favore ducis elati, tanquam in perjuros infidosque petulantia dicta jaciebant. In hac ægritudine animorum, tamen non omnino Sertorium deserebant, necessarium sibi ductum ejus judicantes, etiam cum amare amarique desissent. Erat enim vir bellicarum artium peritissimus, & ad struendas insidias artifex. eoque ab Hispanis Hannibal vocabatur, quo nullum iis locis versatiorem acrioremque imperatorem fuisse meminerant. Et ipse sic appellari gaudebat, cominus faciem ostentans, aliquot adversis cicatricibus, & effosso oculo deformem; quo ille dehonestamento corporis maxime lætabatur, quod is quoque casus & Pœno duci, & Philippo Antigonoque regibus se assimilaret: quos ille omnes, cum alium aliis virtutibus vinceret, animi magnitudine, prudentiaque & velocitate consiliorum æquabat.

XX. Tum quoque, præter alias causas, erat exercitus solito segnior, quod scuta equitum parte exteriori, jaculæque & pectora equorum cruenta subito prodigio appa-

ruerant. Sed ille formidinem fuorum in audaciam vertit, *sibi portendi victoriam interpretatus, quoniam illæ partes solum hostili sanguine maculari.* Confirmatis igitur copiis, continua ei prælia cum successu fuerunt. Inter quæ Pompejum a Pallantia submovit, adeo rebus obsessorum extremis, ut suffossa mœnia trabibusque suffulta, incensis illis, Pompejani subruerent.

XXI. Sertorius instaurato, quod ceciderat, rebusque necessariis urbe munita, Calagurim profectus, subito in castra obsidentium impetu, ad tria hominum millia delevit. Pompejus ad Metellum se receperat, qui frequentibus incursionibus focias Sertorii civitates vexando, excisis castellis atque oppidis, incolas in Romanæ ditionis loca deportabat. Dum ita inter Romanos duces, illis ad populationem agrorum, his ad urbium excidia conversis, alienæ discordiæ poenas misera dat Hispania, ne urbanæ quidem res dissensione ac tumultibus caruerunt: annonæ præsertim inopia furorem plebis usque ad summi imperii contentum, consulisque periculum exstimulante.

XXII. Quod quia non aliunde, quam ex oratione C. Cottæ cognosci potest, operæ pretium putavimus, quibus eam verbis Sallustius tertio Historiarum libro posuerat, huc transcribi. *Multa mihi pericula domi, militiæ multa adversa fuere, Quirites. quorum alia toleravi, partim repuli Deorum auxiliis, & virtute mea: in quibus omnibus neque animus negotio defuit, neque decretis labos. malæ, secundæque res, opes non ingenium mihi mutabunt. At contra in his miseriis cuncta me cum fortuna deseruere. præterea senectus, per se gravis, curam duplicat; cui misero, acta jam ætate, ne mortem quidem honestam sperare licet.*

XXIII. *Nam si parricida vestri sum, & bis genitus hic Deos Penates meos, patriamque, & summum imperium vilis habeo; quis mihi vivo cruciatus satis est? aut quæ pœna mortuo? cum omnia memorata apud inferos supplicia scelere meo*

§ XX. Jul. Obseq. Front. 1, 1. Appian. § XXI. Flor. 3, 21.  
§ XXII. Sallust.

vici. *A prima adolescentia in ore vestro, privatus, & in magistratibus egi: qui lingua, qui consilio meo, qui pecunia voluere, usi sunt: neque ego callidam facundiam, neque ingenium ad malefaciendum exercui: avidissimus privatae gratiae, maximas inimicitias pro republica suscepi. quæis victus cum illa simul, cum egens alienæ opis, plura mala exspectarem, vos, Quirites, rursus mihi patriam, Deos Penates, cum ingenti dignitate dedistis.*

XXIV. *Pro quibus beneficiis, vix satis gratus videar, si singulis animam, quam nequeo, concesserim. nam vita & mors jura naturæ sunt: uti sine dedecore cum civibus, fama & fortunis integer agas, id dono datur, atque accipitur. Consules nos fecistes, Quirites, domi bellicque impeditissima republica. namque imperatores Hispaniæ stipendium, milites, arma, frumentum poscunt. & id res cogit. quoniam post defectionem sociorum, & Sertorii per montes fugam, neque manu certare possunt, neque utilia parare.*

XXV. *Exercitus in Asia Ciliciaque ob nimias opes Mithridatis aluitur: Macedonia plena hostium est; nec minus Italiae maritima, & provinciarum: cum interim vestigalia parva, & bellis incerta, vix partem sumptuum suslinent. ita classe, qua commeatus vehatur, minore, quam antea, navigamus. Hæc si dolo aut socordia nostra contracta sunt, agite, & uti lubet, ita supplicium sumite: sin communis fortuna asperior est, quare indigna vobis, nobisque, & republica incipitis? Atque ego, cujus atati mors proprior est, non deprecor, si quid ea vobis incommodi demitur. neque mors ingenuo corpori honestius, quam pro vestra salute, finem vitæ fecerit.*

XXVI. *Adsum en C. Cotta consul, facio, quod sæpe majores asperis bellis fecere; voveo dedoque me pro republica: quam deinde cui mandetis, circumspicite. Nam talem honorem bonus nemo volet, cum fortunæ, & pacis, & belli ab aliis alicui ratio reddenda, aut turpiter moriendum sit. tantummodo in animis habetote, non me ob scelus aut avaritiam cæsum; sed volentem pro maximis beneficiis animam dono dedisse.*

XXVII. *Per vos igitur, Quirites, & gloriam majorum, to-*

*lerate adversa, & consulite reipublicæ. Multa cura summo imperio inest, multi ingentes labores: quos nequidquam abnuittis, & pacis opulentiam quæritis; cum omnes provinciæ, regna, maria terræque, aspera aut fessæ bellis sint. Hæc tum pro concione dicta memorantur. Quo deinde magis hominum animi lenirentur, ejusdem consulis lege jura quædam tribunis plebis restituta sunt; ita tamen, ut non tam potestas eorum, quam dignitas augeretur: legis Corneliæ, ceteris manentibus, abrogato capite, quod tribunitiis additum ad majores honores præcluserat.*

XXVIII. Ea quoque res contentione non caruit: sed, repugnante nobilitate, summo populi studio perfecta est. Igitur & Q. Opimius, qui tum tribunus legem Aureliam suavit, quod contra Q. Hortensii voluntatem dixerat, anno sequente ad C. Verrem prætorem in judicium adductus, multa que ab eo petita est, *quod, cum esset tribunus plebis, contra legem Corneliam intercessisset.* Sub hoc obtentu potentes & iniqui homines, scelestissimi prætoris abusi ministerio, hominem innocentem bonis atque fortunis omnibus exuerunt.

§ XXVII. Sallust. Afcon. in Cornel. § XXVIII. Afcon. in Verr. Cic. Verr. 1, 60.

---

JOANNIS FREINSHEMII  
 SUPPLEMENTORUM  
 LIVIANORUM

LIBER LVIII.

IN LOCUM LIB. XCIII LIVIANI.

---

E P I T O M E

LIBRI NONAGESIMI TERTII.

*P. Servilius proconsul in Cilicia Isauros domuit, & aliquæ urbes piratarum expugnavit. Nicomedes, Bithyniæ rex, moriens populum Romanum fecit heredem, regnumque ejus in provinciæ formam redactum est. Mithridates, sædere cum Sertorio iſto, bellum populo Romano intulit. Apparatus deinde regiarum copiarum pedestrium navaliumque: &, occupata Bithynia, M. Aurelius Cotta consul ad Chalcedonem prælio a rege victus est. resque a Pompejo & Metello adversus Sertorium gestas continet; qui omnibus belli militiæque artibus par fuit. quos etiam, ab obsidione Calagurris oppidi depulſos, coegit diversas regiones petere, Metellum ulteriorem Hispaniam, Pompejum Galliam.*

**I** ISDEM consulibus, P. Servilius proconsul in Cilicia Isauros domuit, & aliquot urbes piratarum expugnavit. Per Tauri quoque montis in Ciliciam vergentia latera, quo

nullus adhuc Romanus exercitus penetraverat, in Isaurorum, Lycaoniae partem: & Isaura, unde genti nomen, obsidione circumdata sunt. His expugnatis, P. Servilius *Isaurici* cognomen accepit; non ex nobilitate locorum, sed magnitudine laboris, victoriam aestimans. Nam omnia circum piratae tenebant: durumque armis genus, situs asperitate propemodum erat inexpugnabile, donec imperator, averso flumine, ex quo hostes aquabantur, oppidum ad deditionem siti coegit.

II. Hic ei limes itinerum eo bello & expeditionum fuit. P. Servilius Isaura demolitus, Ciliciae Isauriaeque vectigal imposuit, confectaue provincia, multis ubique piratarum, quas ad mare habuerunt, excisis munitionibus, magna gloria decessit. Praecipuum, quacunque incedebat, hominibus gaudium fuerunt, spectati in vinculis praedonum duces, quorum unus ille plures, quam omnes antea cum Romani ceperant: fruebaturque vulgus tam avide miseria eorum, quos timuerat, ut non modo ex his oppidis, per quae ducebantur, sed etiam ex finitimis, visendi causa concurreret.

III. Exercitum tamen in Cilicia retineri placuit, ob suspectam Mithridatis potentiam, & haud dubii jam belli apparatus. eum P. Servilius L. Octavio proconsuli cum tradidisset, Romam ad triumphum decessit. Isque haud dubitanter decretus, & magno spectantium studio celebratus est; quod eum P. Servilius captorum oppidorum spoliis, & divite piratarum praeda fatis magnifice instruxerat. Inter haec Bithyniae rex Nicomedes moriens, quamquam ex Nufa sorore Mithridatis prolem susceperat, siue gratiae referendae causa, siue ut graviolem inimico regi adversarium relinqueret, populum Romanum fecit heredem.

IV. Idcirco praetori Asiae M. Junio Silano (quod is provincias obtinentium Bithyniae proximus erat) negotium

§ I. Liv. Epit. Orof. 5, 23. Eutrop. Strab. l. 12 & 14. Val. Max. 8, 5. Flor. 2, 6. Front. 3, 7. Marcellin. 14, 5. Cic. Verr. 5, 26.  
 § III. Sallust. Plut. in Lucull. c. 11. Eutrop. Cic. Verr. 1, 10. Val. Max. Arrian. Bithyn. Appian. civil. l. 1.



datum, ut regnum Nicomedis in provinciam redigeret. Sub idem tempus Libyci quoque regni pars, quæ sub Appione Ptolemæo fuerat, ejusdem testamento Romanis provinciis accessit. Cyrenaicam alterius Appionis judicium dudum ad Romanum populum transtulerat: tum altera pars Libyæ, quam vocabant aridam, Parætonio, Chæreclaque & Neapoli urbibus Romanam ditionem auxit.

V. Id Ægyptii, quorum ad regnum haud dubie illa pertinebant, dissimulare coacti sunt ob intestinas discordias, metumque, ne Syriacis regibus ab senatu Romano Ægyptus adjudicaretur. Erant enim Romæ adolescentuli duo, quos ex Selene Ptolemæi filia Grypus Antiochus sustulerat, qui ad se & matrem suam regnum Ægypti pertinere dicerent. Atque illi quidem, obtentu temporum populi Romani, per senatum agere nihil potuerunt. Libya inter Romanas provincias mansit. Sed Mithridates hoc maxime ad nudanda consilia tempus opportunum judicans, quo transiens ad aliud imperium Bithynia, destituta priore domino, nondum fida aut firma novis nutaret, bellum aperte sumxit.

VI. Et quia Sertorii celebres fama opes erant, ad societatem cum eo jungendam hortantibus aures præbuit. Duo enim Lucii, Magius & Fannius, Fimbriæ seditionis reliquiæ, qui, sedibus Myndi fixis, apud regem per obsequelam orationis, & maxime odium Sullæ, auctoritate & gratia valebant, *Asiam vicinosque populos, haud dubium auxilii Sertorio ferendi præmium fore* dicentes, impulerunt, ut de fœdere ineundo legatos in Hispaniam mitteret. Eos Fannius & Magius, emta dudum a C. Verre navi Milesia, per Italiam ad Sertorium deduxerunt.

VII. Senatus, re audita, hostes illos judicavit, inquirendosque mandavit. Sed illi jam in Hispaniam pervenerant. Sertorius, introductis in senatum suum legatis, magnifice

§ IV. Plut. Liv. Epit. Appian. Eutrop. § V. Cic. Verr. 4, 27.  
 § VI. Liv. Epit. Appian. Mithrid. Cic. Verr. 1, 34. Idem pro leg. Manil. c. 4. & pro Muræna. c. 15. Plut. in Sertor. c. 38.  
 Gallust. Afcon. in Verr. 3.

de rebus suis locutus, quod jam ab Oriente simul & ab Occidente facessere negotium adversariis posset, exponere mandata jussit. Illi hanc in sententiam cœperunt: Rex Mithridates, multas gravesque injurias olim & nuper perpeffus a Romanis, qui in urbe sunt, iterum ad arma cogitur. Quæ illum causæ moveant, non modo præclare scitis; nec enim leves aut obscuræ sunt: sed ab iisdem hominibus similia, aut atrociora passi, quam nihil ab his æqui, nihil saltem tolerabile possit impetrari, compertum habetis.

VIII. Sane cum senatu populoque Romano fœdus icit Mithridates: sed multoties id ruptum a Sullanis est, ut & ipsi discedere inde citra perjurii notam liceat; ceterum inviolabile sicut hætenus, ita porro quoque & sanctum servare cupit: sed ~~et~~ *et* Q. Sertori, vosque Patres conscripti, quem ille virentiorem dignioremque antiqua populi Romani fama senatum judicat, quam qui urbi incubat, non externorum modo regum nationumque, sed suæ quoque patriæ tyrannus & hostis. Sed non magno negotio commune periculum ab utrorumque cervicibus depleri potest, si hinc Sertorius, inde Mithridates totis viribus insurgant.

IX. Rex noster, ex quo contra pacem Sullanam est a L. Muræna appetitus, superior armis fuit. Eadem audivit de his Romanis, qui Hispanias obtineant: multaque iis locis fama, tu C. Sertori, vosque reliqui duces estis. Igitur mittendam ad vos legationem censuit, ut, qui similibus causis concitentur, similique virtute & fortuna agant, communi fœdere communem salutem tueantur. Utrisque proniora erunt omnia, si juncti consiliis armisque invicem, ubi utilitas desideret, juvamus & juvamus, quam si diversi divisique sua quisque negotia seorsim curent.

X. Postquam e curia dimissi legati sunt, inter præsentibus diu de tantis rebus consultatum est. Plerique minime dubitandum censebant, quin oblata, quibus cum maxime esset opus, acciperentur; nihil e contra, nisi quod alioquin alienum esset, tradituri. Quippe legati, navium & pecuniarum magnam vim solliciti, Asiam & vicina regna Mithridati con-

cædi postulaverant. At Sertorius insigni documento maximi spiritus, siquidem Bithyniam & Cappadociam parere regibus assuetas Mithridates subegisset, facile passurum, dixit; sed Asiam iustissimo titulo possessam Romanis, postea receptam a C. Fimbria, tum pace Sullana dimissam ab rege, non esse concessurum.

XI. Se enim Romanos esse, nec cum patria, sed, a quibus oppressa sit, tyrannis, bellum gerere. omnia ergo consilia ad augendam magis ornandamque rempublicam, quam ad vexandam, esse referenda. Optandam plane viro forti victoriam, si honestis parari rationibus possit; sed cum turpitudine ne salutem quidem expetendam. Præterea ne utilem quidem eam sententiam fore. Infinitos enim per Italiam & in urbe cives Romanos agere, qui his partibus occulte faveant, ad omnem fortunæ nutum animos & consilia monstraturi.

XII. Sed optimum quemque non aliis causis moveri, quam quod bonos egregiosque viros & reipublicæ studiosos, per vim & injuriam ab adversa factione pulsos arbitrentur. Minime igitur dubitandum, quin, si ne odio quidem inimicorum, & tantis commodis suis, ad passionem populo Romano indignam adduci potuissent intellexerint, major apud omnes existimatio sua sit futura, favorque in partes pronior. Sed nec eo animo aut successu bellum geri, ut desperandum sit, quin sive visis adversariis, sive ad æquas condiciones adactis, patriam cum pristina dignitate sint recepturi. Æquum igitur esse, ut quem locum spe & virtute repetant, eo etiam dignos animos & habeant, & habere demonstrent.

XIII. Hæc renuntiata Mithridatem miraculo rei perculerunt: ajuntque velut attonitum dixisse ad amicos, Quid igitur sedens in Romana curia Sertorius imperaret, qui nunc exsul, & ad angulum Eὐρώπæ submotus, fines regno meo ponit, & Asiam tentantibus arma minatur? Accepit tamen, quod dabatur, & fœdus jurejurando sancitum in has leges: Cappadociam & Bithyniam, quibus finibus Ariobarzanes & Nicomedes habuissent, Mithridates rex haberet: Sertorius regi du-

*cem cum certo militum numero ; Sertorio talentum tria millia, & naves quadraginta rex mitteret.*

XIV. Nam apud Dianium, quæ Massiliensium colonia inter Carthaginem & Sucronem a Dianæ templo nomen traxerat, stationem navium, arcemque maritimarum expeditionum Sertorius habebat, quia locus munitus excelsusque, ad longissima spatia patente prospectu, multo commodissimus ad excursiones, & latrocinii similiores conatus erat. Utrunque fides pactorum intemerata stetit; & quæ convenerat, in tempore missa. His ita perfectis, Mithridates, Romanarum virium haud rudis, nec ullam postea veniam sperans, quamquam, simulatione Bosporani belli, maximas classes copiasque dudum confecerat, totus in apparatibus esse: reliquum ejus ætatis & hiemem omnem cadenda materia, fabricandisque navibus, & armis ad Romanum maxime morem impendere: denique nihil ad instruendum immane bellum consilii, laboris, industriæ prætermittere.

XV. Hac cura bis millena millia medimnorum frumenti per maritima horrea distributa sunt: auxilia, præter veterem exercitum, ex Chalybum, Armeniorum, Scytharum, Taurorumque gentibus, & fortissimis omnium Bastarnis, atque Thracibus, centum quadraginta millia peditum, sedecim equitum coacta. Hos magnus præterea calonum lixarumque numerus, & ad vias muniendas agrestium sequebatur. Triremes quadringentæ aderant, præter minora navigia: omnia non ad vanam speciem, ut prius, sed ad firmitudinem usumque fabrefacta. currus falcati centum & viginti, rerumque ceterarum respondens tantis conatibus apparatus.

XVI. Hæc quia clam esse non poterant, senatus ambos consules (L. Licinius L. F. L. N. Lucullus, M. Aurelius Cotta jam inierant) ad id bellum mittendos censuit: ita, ut alter Mithridatem persequeretur, alteri classis daretur

§ XIII. Cic. pro leg. Manil. Strab. l. 3. Memnon. Appian. Mithrid. Plut. in Lucull. c. 14. § XV. Memnon. Plut.

ad tuendam Bithyniam. Bellum Lucullo evenit; Cottæ Bithynia: quamquam a principio anni aliæ consulibus decretæ provinciæ fuerant. Sed Lucullus, haud magnam in Cisalpina Gallia materiam gloriæ sperans, cupiditate Mithridatici belli flagrabat. Igitur audita morte L. Octavii, qui Ciliciæ præfuerat, cum P. Cethego, cujus tum ob maximas in senatu opes patrocinium a plerisque expetebatur, ex acerrimis simultatibus subito in gratiam rediit, ut provinciam Ciliciam adipisceretur. quam ubi nactus est, nemo dubitabat, quin illi committendum bellum Mithridaticum foret.

XVII. Decretæ sunt illi legiones, quæ jam erant in Asia quatuor; quintam ut in Italia conscriberet, permissum. Contra piratarum audaciam M. Antonio prætori, M. Cotta consule, & patris M. Antonii memoria suffragante, qui bellum in Cilicia feliciter administraverat, P. Cethegi factio totius oræ maritimæ, qua Romani populi jus esset, curationem cum infinito imperio dedit: quale postea piratico bello Cn. Pompejus adeptus est. Jam Mithridates primo vere Jovi Bellipotentis sacrificium patrio more fecerat; deinde, quo tempore primum nova classis in mare deducta est, Neptuno quadrigas albas immolaverat, corporibus profundo merfis.

XVIII. His religionibus cœpto bello, Diophantus purpuratus cum exercitu in Cappadociam erat præmissus, præfidiis firmaturus urbes, & obviam iturus Lucullo, si ad Pontum accederet. Ceteras copias, centum & quinquaginta millia peditum, equitum duodecim, rex ipse per Timonitidem (Paphlagoniæ ea regio est) Galatiamque nono die in Bithyniam duxit. Sub id tempus Heraclea his de causis Mithridatici juris facta est. Classis regia præternavigans, cum urbe non reciperetur, *forum rerum venalium præberi* postulavit.

XIX. Ea re impetrata, cum, ut fit, ubi nullus hostilis

§ XVI. Cic. pro Muræn. c. 15. Plut. in Lucull. c. 9. Sallust, Appian. Ascon. in Verr. 4. § XVIII. Ptolem. Plut. Memnon.

animi metus est, Heracleotæ multi ad naves venissent, præfectus classis Archelaus, Silenum atque Satyrum e primoribus civitatis comprehendit: neque antea dimisit, quam ad redimendos eos naves quinque traderentur. Is eventus cum talis esset, ut potius ex compaeto, quam casu res gesta videretur; Romani, publicanis Heracleam missis, vectigal, ut ex aliis circa urbibus, exigere cœperunt. Id vulgus, & si qui alii propensioribus in regem animis erant, principium servitutis interpretati, cum legatos iis de rebus ad senatum mitti præstitisset, audacissimi cujusdam hominis oratione accensi, publicanos ita privarunt luce, ut ne genus quidem mortis, quo perierunt, sit cognitum.

XX. Sed illud odium Romani nominis, præter licentiam præsidarii militis, & fœneratorum improbitas, & eorum, qui publicum exercebant, injuriæ ita vulgaverant, ut passim venienti Mithridati portæ panderentur. Præsertim quia M. Varius senator ex proscriptis, missus a Q. Sertorio, cum L. Magio & L. Fannio, consilii causa additis, ex Hispania ad regem venerat. Vario, quod proconsulari potestate ab Sertoriano senatu erat ornatus, fasces secureque præferabantur; eique primas concedente Mithridate, a quibus recipiebantur urbibus, aliis libertatem, aliis immunitatem Sertorii nomine concedebat.

XXI. Quo tempore C. Cæsar, tanti mox futuri viri specimen memoria dignum edidit: cujus de adolescentia, quando pleramque hujus historiæ partem paulo post facturus est, quædam cognosci pretium operæ fuerit. Igitur C. Julius C. F. C. N. Cæsar, annos fere duodeviginti natus, cum in matrimonio haberet Cinnæ quater consulis filiam, nullo modo compelli a dictatore Sulla potuit, ut eam dimitteret: cum M. Piso consularis Anniam, quod Cinnæ uxor fuerat, in gratiam victoris repudiaret. Igitur & sacerdotio, & uxoris dote, & gentilitiis hereditatibus multatus, ad necem quærebatur: ut dissimulato habitu, nocte

§ XX. Plut. in Lucull. & Sertor. Appian. Cic. Verr. 1, 34. Vellej. 2, 42.

elapsus urbe, profectusque in Sabinos, singulas prope noctes, quamquam morbo quartanæ aggravante, latebras mutare cogeretur.

XXII. Sic quoque deprehensus a Cornelio Phagita, Sullæ liberto, vix præmio dato evasit. Postremo per virgines Vestales, & Mamercum Æmilium, & Aurelium Cottam, propinquos & affines suos, veniam impetravit: diu quidem repugnante Sulla, & ut erat sagacissimus ingeniorum conector, *multos ei puero inesse Marios* testante. Post merita deinde sub Thermo & Isaurico stipendia, cum Romanus esset reversus, Cornelium Dolabellam consularem, qui ex Macedonia paulo ante triumphaverat, summo favore populi, tertio & vicesimo ætatis anno postulavit, magnamque ingenii & facundiæ laudem adeptus est: quamquam Dolabella reus, Q. Hortensio, C. Cotta defendentibus absolveretur; querente Cæsare, *extorqueri sibi causam optimam C. Cottæ patrocinio*.

XXIII. Nam hærebat criminibus repetundarum Dolabella, frequentesque civitates Græciæ testimonium in eum dixerant. Ergo declinandæ invidiæ causa, simul ut clarissimo dicendi magistro daret operam, Rhodum ad Apollonium Molonis profecturus, apud Pharmacusam insulam (hodie *Parmosam* vocant) a piratis captus est. Inter hos cum uno medico & cubiculariis duobus, per dies ferme quadraginta (reliquos enim comites servosque ad pecunias, quibus redimeretur, expediendas dimiserat) heri magis, quam captivi, animo ac dignatione versatur, ne suspicionem ullam prædonibus daret, si quid ex solito mutasset, calceatus cinctusque noctes ac dies permanfit.

XXIV. Viginti talenta piratæ postulaverant. ille deridens, ut ignaros, quem tenerent, quinquaginta spondendis daturum. Quæ summa postquam ex publica civitatum pec

§ XXI. Fragm. Capitol. Vellej. Sueton. in Cæs. c. 1. Plut.  
§ XXII. Plut. Sueton. Cic. in Pison. Vellej. Pigh. Annal. Val.  
Max. 8, 9. § XXIII. Cic. in Brut. Plut. Sueton. Vellej. Val. Max.  
6, 9.

cunia confecta est, expositus in litore, obsidibus, quos civitatibus piratæ dederant, redditus, Miletum, quæ proxime aberat, properavit; ibique contracta classe tumultuaria, privatus, post paucas horas, quam erat liberatus, stantes adhuc ad eandem insulam prædones noctu adortus, aliquot naves, merfis aliis, & fugata reliqua classe, cepit. Deinde festinans ad proconsulem Asiæ Junium, qui tum erat in Bithynia, rem gestam exposuit, *utque ille auctor supplicii de captivis sumendi feret*, postulavit. Atque illo *venditurum captivos* respondente; Pergamum, ubi piratas in custodiam dederat, incredibili celeritate relictus, priusquam ullæ supervenire proconsulis epistolæ possent, affectit eo supplicio, quod sæpe minatus per jocum fuerat.

XXV. Sed ne a lenitate naturæ suæ descisceret, & tamen impleret dictorum fidem, *jugulari prius, deinde crucibus suffigi*, iussit. Hic igitur Cæsar, cum, Mithridate provincias Romanas vastante, res ad defectionem spectaret, ab Rhodo, quo pertenderat, in Asiam profectus est: contractisque sociorum auxiliis, & præfecto regis provincia expulso, dubios ac deliberantes civitatum animos in fide continuit. Idem pari studio, auctoritate majore Lucullus consul faciebat; qui, rebus urbanis utcunque compositis, interea in provinciam venerat. Nam ob delectum erat moratus & tribunitia jurgia, cum L. Quinctio, quotidie seditiosas conciones habenti, summa vi resisteret, donec insolentia hominis mitibus remediis, docendo mulcendoque cohibita, cum una legione pervenit in Asiam: adjunctisque legionibus quatuor, peditum Romanorum triginta milia, equites bis mille quingentos ducens, jam in Phrygiam usque procefferat: cum, adventu ejus cognito, M. Cotta, ne cum collega debellati regis laudem communicaret, ad Chalcedonem cum Mithridate confingere maturavit.

XXVI. Neque tamen ipse, ut erat bellicorum certaminum rudis, prodire ausus, Nudum præfectum classis

§ XXIV. Vellej. Polyæn. Strat. 8, 3. Plut. § XXV. Plut. in Lucull. c. 13. Cic. pro Clænt. Sallust. Appian. Mithrid.



eum parte exercitus emisit. Qui licet munitissimam campi partem occupasset, a Mithridate pulsus, per multa transcensu difficilia septa Chalcedonem ægre refugit: multis in ipsa porta, dum conferti perrumpunt, telis barbarorum cadentibus. Metu deinde clausis portis, Nudus & alii ducum funibus subducti sunt: reliquum vulgus cum hinc ad suos, inde ad hostem supplices manus tenderet, nec apud illos auxilio, nec apud hunc misericordia inventa, trucidatum est. Millia quinque trecentos, & in his L. Manlium senatorem, ea clades absumsit de victoribus: Bastarnarum, quorum singularis eo prælio virtus fuit, triginta, ceterorum ad septingentos ceciderunt.

XXVII. Mithridates utendum fortuna, donec propitia esset, ratus, eodem die classem ad portum Chalcedonis adduxit: perruptaque catena ferrea, quam consul prætendi iusserat, prælium navale commisit, eo successu, ut, hostium octo fere millibus interentis, quatuor naves injecto igne consumeret; reliquas sexaginta, cum virorum quatuor millibus quingentis captas, remulco traheret ad sua præsidia: neque Nudo ultra, neque Cotta obsistentibus, qui muris oppidi se incluserant. Hæc duplex terra marique victoria, vehementer & opes Mithridatis, & nomen auxit. Eo tempore circa Sangarium amnem castra Lucullus habebat. Is igitur, cognita collegæ calamitate, perculsum exercitum cohortatus, protinus versus Chalcedonem castra movit.

XXVIII. Erat apud eum Archelaus, qui nuper ad Murænam a Mithridate transfugerat, monebatque, ut, *omisso rege, protinus in Pontum irrumperet: ad conspectum ejus omnia defestura.* In hanc sententiam proni milites erant, non auctori tantum perniciosam fuisse Cottæ temeritatem frementes, sed sibi quoque detrimento fore, si omissa, quam fortuna patefecisset, tantarum rerum occasione, ad illum obsidione liberandum eatur. Igitur pro concione præfatus, *unum se servare:*

§ XXVI. Plut. Appian. Memnon. § XXVII. Appian. Memnon. Cic. pro Muræn. c. 15. Plut.

*civem malle, quam omnibus hostium fortunis potiri, negavit se timidiorē venatoribus esse, ut, feris omiſſis, ad earum vacuā lustra pergat. His dictis, pronuntiari iter in posterum diem jussit.*

XXIX. Hoc rerum ad Orientem statu, Q. Metellus & Cn. Pompejus in Hispania, ubi majoris firmamenti roborisque partes erant, civitates aliquot in potestatem redegerunt. Magna tamen pugna nulla pugnata est, Sertorio vivente, & mora miserisque omnibus atterente hostem. nam & commeatum præcidebat ei, litora piraticis navigiis, agros populationibus infestando: & ad omnia quantumlibet distantia promptus ac velox, curis, inopia, periculo adversarios macerabat: donec obsidione Cluniana depulsos, Metellum ulteriorem Hispaniam, Pompejum Galliam, diversos petere coegit, ne conjuncti rerum necessariorum penuria premerentur. Magnum ea res terrorem Romæ concivit: vulgoque jam venturus in Italiam cum exercitu Sertorius putabatur, maxime postquam Cn. Pompeji allatæ literæ sunt, in hanc sententiam scriptæ:

XXX. *Si adversus vos, patriamque, & Deos Penates, toties labores & pericula suscepissem, quoties a prima adolescentia ductu meo scelestissimi hostes fusi, & vobis salus quaesita est: nihil amplius in absentem me statuissetis, quam adhuc agitis, Patres conscripti; quem contra ætatem projectum ad bellum sævissimum, cum exercitu optime merito, quantum est in vobis, fame, miserrima omnium morte, confecistis. Hac enim spe populus Romanus liberos suos ad bellum misit? hæc sunt præmia pro vulneribus, & toties ob rempublicam fuso sanguine? fessus scribundo, mittendoque legatos, omnes opes & spes privatas meas consumpsi: cum interim a vobis per triennium vix annuus sumtus datus est. Per Deos immortales! utrum censetis, me vicem ærarii præstare, an exercitum sine frumento & stipendio habere posse? Equidem fateor, me ad hoc bellum majore studio, quam consilio, profectum: quippe qui nomine modo imperii*

§ XXVIII. Liv. Epit. Cic. pro leg. Manil. c. 5, & pro Fonteij. c. 3. Appian. civil. l. 1. Plut. in Sertor. c. 34, & Pomp. c. 30. Sallust.

a vobis accepto, diebus quadraginta exercitum paravi, hostesque in cervicibus jam Italiæ agentes ab Alpibus in Hispaniam submovi: per eas iter aliud, atque Hannibal, nobis opportunius patefeci.

XXXI. Recepi Galliam, Pyrenæum, Lacetaniam, Iltergetes, & primum impetum Sertorii victoris novis quidem militibus, & multo paucioribus sustinui: hiemenque in castris inter scvissimos hostes, non per oppida, neque ex ambitione mea, egi. Quid dein prælia, aut expeditiones hibernas, oppida excisa, aut recepta enumerem? quando res plus valent, quam verba. Castra hostium apud Sucronem capta, & prælium apud flumen Dariam, & dux hostium C. Herennius cum urbe Valentia, & exercitu deleti, satis clara vobis sunt. Pro quibus, o grati Patres, egestatem & famem redditis. Itaque meo & hostium exercitui par conditio est. namque stipendium neutri datur: victor uterque in Italiam venire potest. Quod ego vos moneo quæsoque, ut animadvertatis; ne cogatis necessitatibus privatim mihi consulere. Hispaniam citeriorem, quæ non ab hostibus tenetur, nos aut Sertorius ad internecionem vastavimus, præter maritimas civitates, quæ ultro nobis sumtui onerique.

XXXII. Gallia superiore anno Metelli exercitum stipendio frumentoque aluit: & nunc malis fructibus ipsa vix agit. Ego non rem familiarem modo, verum etiam fidem, consumpsi. Reliqui vos estis: qui nisi subvenitis, invito & prædicente me, exercitus hic, & cum eo omne bellum Hispaniæ in Italiam transgredietur. Hæc epistola pervenerat Romam, cum adhuc in urbe Lucullus consul ageret. Idcirco negotio propere ad senatum relato, cum & res cogeret, & Lucullus metu, ne Pompejus ad urbem veniens Mithridaticum sibi bellum præriperet, summo studio anniteretur; stipendium ei missum est.

§ XXXI. Plut. in Lucull. c. 10. § XXXII. Sallust. Plut.

JOANNIS FREINSHEMII  
SUPPLEMENTORUM  
LIVIANORUM  
LIBER LIX.

IN LOCUM LIB. XCIV LIVIANI.

---

E P I T O M E

LIBRI NONAGESIMI QUARTI.

*L. Licinius Lucullus consul adversus Mithridatem equestribus præliis feliciter pugnavit, & expeditiones aliquot prosperas fecit, poscentesque pugnam milites a seditione inhibuit. Dejotarus, Gallogræciæ tetrarches, præfectos Mithridatis, bellum in Phrygia moventes, cecidit. Præterea res a Cn. Pompejo in Hispania contra Sertorium prospere gestas continet.*

**I** NTEREA L. Lucullus consul, cum ad hostem pervenisset, eumque succictum tantis copiis videret, prælio congredi minime tutum ratus, intra munimenta se tenebat. Sed laceffente apud Otryas (Phrygiæ locus est) M. Vario, qui missis ab Sertorio copiis præerat, eduxit suos, aciemque ordinavit. Cum in eo essent, ut concurreretur, cælum absque ullo, qui animadverti potuerit, conatu disruptum, inter duas acies ingentem flammæ molem inmisit, colore argenti, forma dolii similem. Sic eo die, ter-

ritis prodigio utrisque, a pugnando temperatum; Lucullusque ad priora consilia ducendi belli rediit. Cum enim tot hominum millia in conspectu hostis alere, non in longum facile fore Mithridati crederet; quo certius exploraret, quantum ei copiarum esset, captivos aliquot, seorsim unumquemque, jussit adduci. Ex quibus percontatus, *quot quisque contubernales in castris, cum quanto cibariorum modo reliquisset*, ita rationem iniit, ut intra triduum aut quatrimum fame laboraturos existimaret.

II. Idcirco abundantem annonæ copiam in sua castra convehens, satis habebat, si hostem annona prohiberet. Per hanc occasionem, cum equestria prœlia frequentia fierent, iisque superior Romanus esset; milites avidi pugnae, *nihilque suæ virtuti invium* jactantes, *in hostem uti ducerentur*, postulabant. Recusante Lucullo, atque *suam occasionem* jubente *spectari*, prope seditionem ventum, *vel injussu imperatoris pugnatos* clamantibus: donec accommodata tempori oratione mitigati quieverunt. Neque multo post imperatorii consilii salubritas apparuit, cum penuria comineatuum movere castra Mithridates cogeretur.

III. Nam ille, quo Lucillum falleret, cœnatos milites statim abduxit, noctem obscuram atque nimbosam nactus, & oriente sole in Adrastiæ monte, qui Cyzico urbi est oppositus, confedit. Lucullus composito agmine ita infecutus, ut ne pugnandi necessitas imponi invito posset, circa Thraciam, quam vocant Comen, castra communivit. Cognito deinde ex captivis, *regi circiter trecenta hominum millia, non ante paratis copiis, sed ex quotidiana subvectione maritima, & frumentationibus ali:* futura animo prospiciens, non continuit lætitiâ, sed opere castrorum perfectò, advocavit concionem, atque apud circumfusus ita orsus est:

IV. *Omnium gentium atque populorum institutis, qui utique consensus a recta ratione nunquam discedit, ita videmus observari, ut in re bellica multis hominum millibus unus plerumque*

*imperator præsit. multas enim manus, sed unum consilium res militaris desiderat: quemadmodum & in animantium corporibus compluria membra capitis unius imperio reguntur. Atque hoc non ideo tantum est utile, ne, si plurium sit arbitrium, pestilentissima rebus gerendis dissensio nascatur; ut, quod deliberatum est, donec agendi tempus advenerit, occultius sit & testius. Atque hæc illa res est, quæ plurimam in imperatore patientiam poscit, ut constanter maneat in recte consultis, neque hostium ludibriis, neque suorum sermonibus inde se patiatur dimoveri.*

V. *Nec enim latere me potuit, quæ nuper ex civilibus bellis prava consuetudo plurimorum etiam ex vobis corruerit mentes, ut, cum milites imperatori operam navare debeant, imperatores ipsi esse velint, & quid de summa rerum judicandum sit, decernere. Sed hos ego, partes meas mihi relinquere, suas curare, jubeo: simul autem omnibus lubens lætusque nuntio, nunc venisse tempus intelligendi, quo consilio pugnare volentium sit a me cohibitus impetus. Meis enim consiliis eo adactus hostis est, ut hunc in locum se demiserit, ubi necessum sit, eum paulo post rerum necessariorum penuria copias omnes amittere.*

VI. *Dispiciite igitur, quanto plus ego, quam vos omnes, providerim: quantoque melius consuluerim communibus rebus. Vobis congregari cum hoste collatis signis placuit. quod si esset factum, aut fusi essemus, aut magno cum sudore æquis pugnassemus viribus: aut si faventissimi Dii fuissent, multo etiam sanguine obtinuissimus victoriam. At nunc prorsus incruentam reportabimus. idque fide mea spondeo: vos estote promissi memores. Cum deinde montem magnum supra regis castra, opportunum ad omnia conspicatus, occupare locum conaretur; neque repellente præsidio, quod hortatu Taxilis aliorumque amicorum Mithridates imposuerat, potiri posset; inopinato fortunæ munere, quod viribus obtinere nequiverat, est consecutus.*

VII. *L. Magius, Sertorianis rebus diffusus, maxime quod occisum ab amicis ducem acceperat, clam missis ad Lucullum nuntiis, reditum orabat: si ejus rei fides data esset, non sibi de fore rationem, qua regi noceret. Annuente Lucullo,*

regi persuadet, *nihil referre, quo loco castra hostis metetur. Fimbrianis legiones, quæ essent apud Lucullum, propedem ad se transituras. ita sine præliis & sanguine victoriam penes regem fore.* Grata erant, quæ dicebantur, nec veri specie carebant: nota Fimbriani militis perfidia, & crebris adversum duces seditionibus. Idcirco negligente custodiam locorum Mithridate, Romani, angustiis sine incommodo superatis, castra in monte posuerunt.

VIII. Magna ea & multiplex utilitas Lucullo fuit. ipsi commeatus sine metu subvehebantur; rex, toto propemodum agro, fluminibusque omnibus, & lacu Dascylite exclusus, perquam angusta frumentatione utebatur. Neque discessuro satis patens exitus erat, fossas multis locis obijciente Lucullo: neque Lucullum ob locorum opportunitatem sic poterat depellere. & jam inclinante tempore anni, reliquam annonæ spem interclusum tempestatibus mare sollicitabat. Idcirco duobus imperatoribus varii animorum habitus erant: Lucullus admonebat amicos, *tempus adesse præstandi, quæ promiserant*; Mithridates errore, postquam corrigi jam nequibat, intellecto, multa & diversa secum agitabat.

IX. Tandem, licet cum tanta militum multitudine vel per medios hostes crumpi posse videretur, oppugnandæ urbis consilium sedit. Fimbrianorum transitionem, cujus facta spes, subito discessu impedire inconsultum putabat. Et quia Chalcedonensi pugna Cyziceni decem naves cum tribus hominum millibus amiserant; tanto facilius erat futura urbis expugnatio. pretium autem operæ, si Cyzicus capta esset, ingens ostendebatur. & hac velut janua Asiæ perfracta, futurum erat, ut victori tota provincia pateret. Accedebat, quod ita omnia ad urbem clausa itinera erant, ut oppidani, licet in conspectu haberent Luculli castra, tamen, ubi esset, ignorarent.

§ VII. Pedian. in Verr. 3. Appian. Plut. in Lucull. c. 13. § VIII. Orof. 6, 1. Appian. § IX. Plut. Cic. pro Muræn. c. 15. Strab. l. 12. Appian.

X. Quippe Cyziceni in cognomine insula ad Propontidem colebant; & Mithridates, milite abundans, decem a terra castris oppidum affidebat: & ad fretum, quo a continenti dirimitur, utroque latere naves quadringentas admoverat: & barbari, Romana castra digito monstrantes, obsessos horribili mendacio terrebant, *Armeniorum Medorumque missas a Tigrahe copias ibi confedissee*, dictitantes. Non tamen desponderunt animum, quamquam summa contentione omnibusque viribus oppugnarentur. Etenim Mithridates, capto suburbio, navalia duplici muro obseperat: & reliqua urbe circumvallata, magnos excitabat aggeres, aliaque opera multa studiose faciebat, turres & testudines, & insignem ante alias machinam, centum cubitorum helepolin, e qua turris alia tollebatur, catapultis instructa, quæ telorum & lapidum quaquaversum velut imbrem spargerent, Niconicæ Thessali opus.

XI. Ad portus porro duæ quinqueremes inter se firmiter devinctæ aliam turrin sustinebant, ita fabricatam, ut, ubi muro admota esset, pons ex ea demitti subito in mœnia posset. His omnibus paratis, antequam vim tentaret, captivos Cyzicenorū omnes in conspectum suorum adduxit, sperans, illorum caritate lacrimisque moveri ad deditionem oppidanos posse. Sed illos multa nequidquam obtestantes, Pisistratus Cyzicenorū prætor *abstinere nihil profuturis precibus* iussit; & *postquam semel in potestatem hostium venissent, fortiter ferre calamitatem.*

XII. Sic exploso commento regis, ad feriam dimicationem ventum, quia progressa in navibus turris, ponte mœnibus injecto, quatuor armatos muris imposuerat. Id spectaculum ita perterrefecit obsessos, ut si continuo secuti plures fuissent, in magno periculo res Cyzicena fuerit. Sed dum etiam in turri trepidatur, propugnatores, resumtis animis, quatuor illos detrudunt: navesque pice perfusas, & igni appetitas, inhibere retro cogunt, & se discrimini subducere. Sic maritima oppugnatio in irritum cessat.



fit. sed a terra triplex eadem die conatus factus, machinæque admotæ, gnauiter ad defensionem concurrentibus oppidanis, uti quoque loco necessitas postulabat. arietes aut libramentis faxorum injectis præfringebantur; aut laqueis eorum avertebantur ictus; aut objectis e vimime cratibus lana repletis eludebantur. contra ignita tela, aceti & aquarum copia præsto erat. cetera missilia vestibibus centonibusque oppantis impetu fracto cadebant irrita: nihil denique, quod humana suggerere aut exsequi industria possit, a Cyzicenis omittebatur.

XIII. Neque tamen prohiberi potuit, ne pars mœnium succensa, sub vesperam concideret. Sed hostis, ne per ruinas irrumperet, ardore incendii vetabatur. idcirco sequenti nocte obsessi alio munimento excitato clauferunt locum. Mithridates, vanæ oppugnationis dolore æger, varie se torquebat, non solum virtute obsessorum, sed etiam casibus territus, quos plerique ad sauentia Cyzicenis numina referebant. Aristagoras enim, qui in summo magistratu populi agebat, *Proserpinam adstitisse sibi in somnis* asseribat, *dicentem, adversus Ponticos tubicines, Africum se tibicinem comparasse.* Mirantibus hanc vocem Cyzicenis, sub primam lucem intumescere mare, ventisque sibilantibus machinæ stridere cœperunt. mox incredibili vehementia coortus Auster turres hostium, inter quas & illam insignem centum cubitorum altitudine, momento disjecit, & machinas reliquas ita laceravit, ut inutiles redderentur.

XIV. Ilensium quoque multis apparuisse per quietem Minervæ speciem ferunt, multo sudore manantis, ostensaque pepli parte disrupta, dicentis, *modo se ab ope Cyzicenis ferenda reverti.* Aliud deinde miraculum captas superstitione mentes, pro diversarum partium studiis, spe aut metu replevit. Cyziceni præcipua religione Proserpinam venerabantur, cui & ab Jove dotis nomine datam insulam asseriebant. Ei quotannis vacca nigra faciebant: & dies solemnis sacrificii aderat, nec destinata Deæ hostia suppete-

bat, sed cum cetero Cyzicenorum armento trans fretum in pascuis, & in potestate hostium erat.

XV. Idcirco, ut humanis ingeniis proclive est, cultus divini magisterium sibi fumere, Messeniorum atque Lacedæmoniorum exemplo, qui centum tripodas statuere iussi, e ligno aut luto fecerant, pastam e farina formarunt in bovis figuram. jamque admovebant aris, cum per mediam urbem cursu fertur vera victima, quæ, relicto armento, sola per hostium classem de montibus adnataverat; ne claustris quidem, quæ ad angustias portus exstructa erant, morantibus, & sub aquis emenso, quod illa obtinebant, spatio. Sacrificio summa Cyzicenorum lætitia, ob præsentem, ut interpretabantur, numinis favorem, peracto, regem amici, *ne cum Diis pugnaret*, hortabantur.

XVI. Ille nihil territus, a cervice, qua Dindymo monti urbs connectitur, aggere ducto, turres imposuit, tutiores a venti impetu futuras. cuniculos quoque egit; alacriter occurrentibus ad omnia obsessis: qui vicissim & ipsi suffodientes humum, aliquando ab ipso rege in cuniculis suis opprimendo haud multum abfuerunt. Inter hæc etiam comperta Luculli præsentia magis erecti sunt animi: postquam missus ab Archelao Demonax primus id nuntium in urbem intulit; dubitantibusque, puer, qui captivitatem hostium fuga evaserat, interrogatus, *ubi castra Romana essent*, digito commonstravit.

XVII. Neque prætereunda est via, qua nuntius Luculli obsessam in urbem penetravit. Namque duos maximos utres levi tabulæ subjecerat: utribus insutæ literæ Luculli erant, quo adversus humorem tegerentur. ab inferiori parte duæ regulæ distantes invicem utres continebant. huic machinæ impositus, per trajectum septem millia passuum habentem, pedibus iter adgubernans, inter molem Mithridatis

§ XIV. Appian. Plut. Pausan. 1. 4. Jul. Obseq. § XV. Strab. 1. 12. Appian. Plut. § XVI. Sallust. Oros. 6, 2. Front. Strat. 3, 13. Flor. 3, 5. Plut.

atque insulam, vitabundus hostium classem, ad urbem pervenit: nam procul visentibus non homo, sed marina pitrix esse creditus, nemine curante evaserat.

XVIII. Tandem & praesidii immittendi Lucullo reperta est ratio. In Dasceylite lacu acatia satis magna commeabant, eorum quod erat capacissimum plaustris, deduxit ad mare, militibusque replevit. hi, noctu transmissio freto, incolumes pervenerunt in urbem: quorum auxilio confirmati Cyziceni, crebris eruptionibus fatigarunt hostem, machinasque ejus incenderunt. Tolerabat tamen obfirmatus animo Mithridates, quamdiu, celantibus rem ducibus, famem exercitus ignorabat. Postquam superveniens hiems maritimos commeatus praclusit, & confecti inedia milites ne cadaveribus quidem humanis abstinebant, & e cibis insalubribus morbos mortesque contagio vulgabat; ut se parte copiarum exoneraret, observato tempore, quo profectus ad arcis cujusdam oppugnationem Lucullus, aberat e castris, peditatus inutilem turbam, & omnem ferme equitatum, cum grege jumentorum, inopia pabuli languido, & detritis ungulis claudicante, averfis ab hoste itineribus in Bithyniam misit.

XIX. Ea res cum propere nuntiata Lucullo esset, noctu rediit ad stativa; & postridie nec dubia adhuc, nec hiberna tempestate deterritus, cum decem cohortibus delectis & equitatu infecutus est. Nivosa dies erat, & incommoda multa properantibus objiciebantur. Itaque parte militum ob frigoris asperitatem deficiente, cum reliquis ad Rhyndacum adeptus est barbaros, dum in transitu fluminis necessariam moram trahunt. Multa ibi regionum caedes facta, vivi quindecim millia capti, cum sex equorum millibus, & jumentorum propemodum incredibili multitudine: tantis copiis ita deletis, ut etiam ex Apollonia feminae procurrent in campos, diriperentque sarcinas, & interfectorum cadavera spoliarent.

XX. Adversa Propontidis & Bithyniae sub idem tem.

pus aggravavit aliarum Mithridatis copiarum clades. Fannius enim & Metrophanes regius prætor, a Mamercio victi, cum duobus millibus equitum in Mœsiam profugerunt: atque inde in Mæoniam digressi, cum hostem evasisse putassent, ipsius soli, cui se crediderant, plusquam hostiles insidias sunt experti, feceruntque vulgatæ fabulæ fidem, animos ibi & fulminati a Jove gigantis cubile possidenti. Delati certe in loca cæco subter terram incendio infamia, saxi quoque & humo quasi fuligine quadam occultum ignem prodentibus, magna cum sollicitudine oberarunt; donec tandem via reperta in castra regia reversi sunt.

XXI. Eodem tempore præfectus regis Eumachus, post egregios successus, necatamque cum uxoribus & liberis civium Romanorum magnam multitudinem, Pisidia, Isauriæque subactis, Cilicia tentata, cum in Phrygia bellum movisset; Dejotarus Gallogræciæ tetrarcha, vagantem assecutus, magna clade affecit. Hoc etiam anno Cn. Pompejus in Hispania prospere bellavit cum Q. Sertorio, qui jam curis & laboribus fessus, & quia se peti videbat eorum insidiis, qui, se remoto, salvi esse non poterant, ad obeunda ducis munia segnior, in luxum & libidines declinabat. Unde cum frequentius succumberet, quotidie ad iram pronior, multis ob suspicionem doli crudeliter interfectis, ceteros ad maturandam conjurationem acrioribus stimulis incitavit.

XXII. Erant illi jam antea, simul ex ingenti metu, per virtutem atque felicitatem Sertorii, animos ad spem transfulerant, livore & æmulatione potentiæ infensi: & crebris Perpernæ sermonibus incendebantur, qui sibi deberi summam imperii propter nobilitatem generis existimabat. Idcirco clandestinis opprobriis Sertorium apud credulos onerando, sortem suam ceterorumque invidiose desolebat. *Quis enim, inquit, malus genius eo calamitatis nos compulit,*

ut Sullæ terrarum omnium marisque dominium obtinenti parcere dedignati, ubi licuisset domi manentibus, salva dignitate, salvis facultatibus in otio degere, Sertorium sequamur; & voluntariam sub inani libertatis specie servitutem amplexi, dicto exsulis geramus morem? egregio scilicet præmio, quod ridicula omnibus appellatione senatus vocatur; sub decoro nomine, non minus laborum contumeliarumque, ac si Celtiberi aut Lusitani essemus, perferentes!

XXIII. At qui Romæ remanserunt, cum amplissimis emolumentis sacerdotia & magistratus capiunt, provincias sortiuntur, triumphos ducunt: &, uno pridem remoto domino, ipsi rerum omnium moderatores sunt & arbitri. At nos contemptum & vile vulgus obscuri hominis imperio premimur: perpetuumque & ipsi dictatorem, sed deteriore conditione nostra, patimur, quam illi Sullam habuerunt. Sulla enim armis sane potentior, ab invitis forsitan, sed tamen jus istud habentibus, dictaturæ novi generis imperium obtinuit; sed paulo post sponte sua positurus: hic neque bello nos vicit, ut vel hoc jure plus pollere debeat; neque nostris suffragiis adeptus potentiam, tenet stringitque, non temporum limites ullos, non rerum aut negotiorum circumdari patiens.

XXIV. Ad hæc Sulla hic crudelior, non inimicos suos tantum, ut ille, proscribit; sed socios omnis fortunæ amicosque trucidat, vitam his eripiens, sine quorum ope vivere ipse non posuisset. Neque licet, aut vacat, de aliorum interitu queri. jam ubi hos sermones aliquo judicio resciverit, hæc libertas nobis ultimo cruciatu luetur. Atqui his querelis occupatæ hominum mentes, imperia Sertorii contemnebant: aut si qui suscepissent, contra utilitatem & consilium ejus bene cogitata in exitium, omittendo præcepta, faciendo vetita, convertebant. destitutufque ministerio Sertorius, cum multa præclare provideret, non alium consiliorum fructum, quam tædium irriti laboris, & duræ indignæque fortis gravem atque inanem conqueffionem capiebat.

XXV. Anno sequenti M. Terentius M. F. Varro Lucul-

§ XXII. Plut. in Sertor. c. 41. § XXIV. Plut. in Sertor. c. 42.

T. Livii Vol. IX.

A a

lus, C. Cassius Varus, consules facti, legem Terentiam & Cassiam frumentariam tulerunt, ut annonæ urbis consuleretur. Piratis enim maria diu infestantibus, sublato generis humani commercio, non modo negotiatores navigare prohibebantur; sed ne classibus quidem Romanis tutus cursus erat. Igitur plebs penuria commeatuum sæpe tumultuabatur, curamque Patrum incendebat, ut omnia expediundæ annonæ remedia tentarent. Igitur L. Octavio, C. Cottæ consulibus permisit senatus, ut vini & olei decumas, & frugum minutarum, quas quæstores in Sicilia vendere consuevissent, Romæ venderent; & mox Q. Hortensius in ædilitate sesquimodiis in capita divisus, magnam a populo Romano gratiam inivit: quia caritas annonæ faciebat, ut, quod re parvum erat, tempore magnum videretur.

XXVI. Deinde M. Tullius Cicero quæstor frumenti maximum numerum ex Sicilia misit. Quæ omnia cum tanta populi multitudo facile absorbuisset, nec ideo difficultas annonæ cessabat; consules ex senatusconsulto tulerunt, ut frumentum a Siciliæ civitatibus emeretur. ad hanc frumenti emtionem ex inopi atque exhausto ærario per triennium prope centies & vicies erogatum est. At hæc modica in præsens auxilia solabantur potius, quam tollebant penuriam: neque antea reddita urbi solita copia commeatuum est, quam Cn. Pompeji virtute piratæ toto mari arcerentur.

§ XXV. Cic. Verr. 3, 7, 21 & 70. Idem pro leg. Manil. c. 12, & pro Planc. c. 26. Flor. 3, 6. Sallust. Plat. § XXVI. Cic. Verr. 3, 70.

---

# JOANNIS FREINSHEMII SUPPLEMENTORUM LIVIANORUM

LIBER LX.

IN LOCUM LIB. XCV LIVIANI.

## E P I T O M E

LIBRI NONAGESIMI QUINTI.

*C. Curio proconsul Dardanos in Thracia domuit. Quatuor & septuaginta gladiatores Capuæ ex ludo Lentuli profugerunt; &, congregata servitiorum ergastulorumque multitudine, Crixo & Spartaco ducibus bello excitato, Claudium Pulchrum legatum & P. Varenum prætorem prælio vicerunt. L. Lucullus proconsul ad Cyzicum urbem exercitum Mithridatis fame ferroque delevit; pulsusque Bithynia regem, variis belli ac naufragiorum casibus fractum, coegit in Pontum profugere.*

**H**oc anno C. Scribonius Curio, Dardanis in Thracia victis, bello finem imposuit: acribus suppliciis domita inquietarum gentium ferocia, cum rebellium primores amputatione manuum, ceterorum plerosque morte multavisset. Eadem expeditione Mæsi quoque subacti: & ad Danubii Daciæque terminos ventum. Ne ulterius procederetur, insidiosa loca densique saltus impedimento fuerunt. Novum inter hæc bellum, contemptis initiis, (adeo nullius imperii tuta vel domi potentia est) in maximas Italiæ calamitates evaluit. Quatuor & septuaginta gladiatores Capuæ

ex ludo Cn. Lentuli profugerunt, Galli plerique, pertæsi pessimæ fortis, ad quam eos non suum aliquod scelus, sed iniquitas domini coegerat. Hi, cum veribus atque coquina-riis cultris e popina correptis oppido erupissent, in plaustra quædam inciderunt, quibus arma gladiatoria portabantur.

II. Atque illi velut munere Deum oblati armis alacres, in munito quodam colle constiterunt: ducibus tribus creatis, inter quos Spartacus eminebat, Thrax gente, & ab ineunte ætate pastor; sed animo & viribus ingens, nonnulla quoque belli peritia, quod inter stipendiarios militaverat, ferociam originis institutique prudentia & moderatione temperabat. Uxor ei oriunda indidem aderat; quæ Bacchici numinis plenam se ferens, quo primum tempore Romam venalis est deductus, conspecto dracone, circa dormientis caput instar coronæ convoluto, magnam viro potentiam prædixerat. Cognito hominum consilio, statim ex oppido venerunt armati, qui eos ex fuga reprehenderent. His fuscis fugatisque, cum multa arma militaria cepissent, abjectis gladiatoriiis, quæ oderant, illa læti gratulabundique sumferunt.

III. Inter hæc Claudius Pulcher legatus, cum tribus millibus armatorum ex urbe occurrit; & ad Vesuvium montem, quo illi se receperant, castris positis, aditum, qui unicus ea parte, atque is difficile tamen & impeditum iter præbebat, obsedit. Illi nullas circa stationes, qua inaccessus videbatur, conspicati, per abrupta cavasque fauces catenis ex vite silvestri confectis se demiserunt, uno relicto, qui dejectis armis postremo ipse quoque descendit. Spartacus, postquam incolumes omnes recepit, sollerti cum audacia statim ad castra Romanorum duxit, & improvise periculi consternatione ita terruit Claudium, ut, turpi fuga castris desertis, aliquot cohortes quatuor & septuaginta gladiatoribus cederent.

§ I. Liv. Epit. Eutrop. Marcellin. 29, 26. Sex. Ruf. c. 8. Flor. 3, 4 & 20. Plut. in Crass. c. 12 & 14. § II. Flor. Plut. § III. Liv. Epit. Plut. Vellej. 2, 30. Flor. 3, 19.



IV. Res prosperæ, ut assolet, statim invenerunt socios; multique pastores, durum & pernix genus, accefferunt ad partes: quorum robustissimum quemque armavit Spartacus; reliquos antecursorum & velitum numero habuit. Servitiis deinde ergastulisque concitatis, cum celeriter ad hominum millia decem coivissent, quod armorum erat inopia, scuta ex vimine dedit, eratque is facilis labor folitis vasa agrestia ex viminibusnectere: & unoquoque se ad eam artem in formam equestris palmæ armante, celeriter confecta res est. mox mactatis pecoribus, parmas cooperiebant, cum coria recens detracta, quasi glutino-adhærescerent. ferro dein ergastulorum recocto, gladios ac tela fabricabant. His rebus festinare coactus P. Varinius prætor, cui senatus negotium extra ordinem dederat, cum iusto exercitu, sed tumultuarie conscripto, advenit.

V. Sed legatum ejus Furium cum duobus millibus militum præmissum a prætore, acie congressi fugitivi fuderunt. Qua victoria usi sævius etiam infestiusque totam Campaniam pervagati sunt. nec villarum atque vicorum vastatione contenti, Coram, Nuceriam, & quæ Romanis exercitibus tot per annos restiterat Nola, crudeliter populabantur. nactique nonnullos, quibus maxime infensierant, eorum morti nefandum in modum illudebant, lacerant corpora, sed adhuc spirantia, ne cito dolore defungerentur, omittentes. Alii in tecta jaciebant ignes, multique ex locis, quæ occupata erant, servi, quos ingenium socios dabit, abdita dominis, aut ipsos trahebant ex occulto: neque sanctum aut nefandum quidquam fuit iræ barbarorum, & servili ingenio; nequiente prohibere Spartaco, quamquam multis precibus oraret.

VI. Igitur, ut alio consilio eos ab hac inhumanitate abduceret, simulque adventus sui celeritate præverteret nuntios, raptim in Lucaniam ductis copiis, Cossinium, qui datus prætori adjutor fuerat, cum magnæ militum man-

§ IV. Front. Strat. 1, 5. Flor. Plut. Liv. Epir. Sallust. § V. Flor. Sallust. Liv. Epir. Appian. civil. l. 1, Plut.

apud Salinas agentem, ita improvise impetu oppressit, ut nihil propius sit factum, quam ut lavantem comprehenderet. Impedimenta certe ejus omnia diripuit, vestigiisque fugientium hærens, multos occidit, & castra eorum cepit, ipso ibi Cossinio interfecto. Hinc Lucaniæ magnam partem, Thurinum maxime Metapontinumque agrum in potestate fugitivi habuerunt, ipsis quoque urbibus eodem bello potiti. At Varinius, dum hæc aguntur a fugitivis, ægra parte militum autumnii gravitate, neque ex postrema fuga, cum severo edicto juberentur, ullis ad signa redeuntibus, & qui reliqui erant, per summa flagitia detrectantibus militiam, quæstorem suum C. Thoranium, ex quo præsentem vera facillime noscerentur, in urbem miserat: & tamen interim cum volentibus in expeditionem prodiit.

VII. Auxiliis deinde contractis, cum quædam non improspere gessisset; contra morem fiducia augeri Romanis, & promi lingua cœpit. quo Varinius contra spectatam rem incaute motus, novos incognitosque & aliorum casibus perculos milites, ducit tamen ad castra fugitivorum presso gradu; silentes jam, neque tam magnifice fumentes prælium, quam postulaverant. At fugitivi certamine consilii inter se juxta seditionem erant, Crixo & gentis ejusdem Gallis atque Germanis obviam ire & ultro offerre pugnam cupientibus. Contra Spartaco dimittere, quæ haberent e loco commoda, & quam integro exercitu sperarent, cum periculo victoriam quærere non placebat. Quo deinde ordine ac loco res unaquæque gesta sit, amissis, quæ de hoc bello erant prodita, non habeo dicere.

VIII. Illud certum utique habetur, multis præliis victum a Spartaco Varinium esse, & adeo ægre elapsum, ut equum illius lictores cum fascibus & insigniis magistratus ad Spartacum fugitivi detulerint, quibus etiam postea usus est. Eodem tempore cum forte præclusus a P. Varinio Spartacus fuisset, insigni astu elapsus est. Cum enim operibus hostium in arctum coacti essent fugitivi, consumtis jam

alimentis, nec suppeditantibus ex propinquo, secunda vigilia cuncti egrediuntur, relicto buccinatore in castris, & ad vigiliarum speciem procul visenti cadaveribus, quæ crexerant fulta palis, per modica intervalla ante portam fixis.

IX. Ea veste atque armis adornata, cum per tenebras, aut dubia adhuc luce satis tegerent fraudem, & per tota castra ignes collucerent, facile deceptus hostis est, ut eodem adhuc loco fugitivos esse crederet. Multa demum lux aperuit, quid actum esset, missique sunt equites, qui vestigia Spartaci scrutarentur, &, quantum possent, damni ac moræ facerent. At ille, visis equitibus, priusquam cum reliquo exercitu adesset Varinius, propere nactus idoneos ex callibus duces, Picentinis, deinde Eburinis jugis occultus, ad Nares Lucanas, atque inde prima luce pervenit ad Popilii Forum ignaris cultoribus.

X. Ac statim fugitivi contra præceptum ducis rapere ad stuprum virgines, matres, & aliis sceleribus operam dare; multum obtestante Spartaco, cui præter humilitatem fortis, nihil ad eximii imperatoris tuendum nomen deerat. Neque sapientiæ egebat, qua futura prospiceret. victoque Varinio, cum majorem esse Romanam potentiam intelligeret, quam ut sperare interitum ejus posset, auctor ad Alpes eundi suis erat, ut, iis superatis, diversi Thraces. Galli que suam quisque patriam repeterent. Sed isti, multitudine confisi, & elati successu, spernebant salubre consilium; & devastanda Italia, suæ libidini avaritiæque indulgebant.

XI. Jam enim circa Consentiam & Metapontum delectibus agendis ita creverant, ut tum quidem Spartacus triginta millia, Crixus decem sub signis habuisse tradatur, nam tertius ducum Cærona superiorem bello perierat. Interea, dum Romana arma domi a servis contemnuntur, in remotis provinciis contra potentissimum regem imperatore

§ VIII. Plut. Appian. civil. l. 1. Flor. 3, 19. Front. Strat. 1, 5. Sallust. § IX. Sallust.

Lucullo magna cum gloria fulgebant. Omnem jam non commeatum modo Mithridates, sed etiam opes, copias, spem denique expugnandæ Cyzici consumserat. Igitur Hermæo Varioque traditis peditibus, quorum numerus adhuc triginta millia superabat, ipse maritimo itinere in regnum cogitabat reverti.

XII. *Noctu*, quo falleret obfessos, *conscendi navigia* iussit. Sed ea majoris trepidationis causa fuit. dum inter tenebras, metu reverentiam imperii vincente, certatim & promiscue ad naves ruitur, quædam ita cum his, qui inscenderant, submersa sunt; aliæ turbatæ atque circumactæ plus adhuc moræ consternationisque fecerunt. Hoc modo ægre solutis ancoris, Parium rex pervenit. Quod ubi postridie a Cyzicenis est cognitum, excurrentes in Pontica castra, reliquam adhuc ægrotam multitudinem conciderunt, ablatis, quæ verti in prædam poterant.

XIII. Sub idem tempus Archelaus classis regis præfectus (*Aristonicum* Plutarchus appellat) in potestatem Luculli pervenit. Miserat eum Mithridates, ut negotium faceretur hosti, ne recedentem a Cyzico sequi posset: dederatque decem millia aureorum, ad Fimbrianas corrumpendas legiones. Sed ille, fidem a perfidis inepte sperare ausus, cum tanquam ad accipiendas copias destinato tempore venisset, occisis, quos secum adduxerat, comprehenditur. Lucullus, audito, pedestres Mithridatis copias Lampsa cum petere, continuo infecutus, ad Æsepum amnemprehendit, qui tum anni tempore pluvioso plurimum creverat. Ibi Granicus & Æsepus amnes cruentarunt undas; regionumque partim aquis hausta, partim hostilibus concisa armis, ad millia viginti perierunt. magnus præterea captus est numerus: plusquam undecim millia in prælio ceciderunt.

XIV. Ceteros, cum se munimentis oppidi clausissent, Lucullus obsedit: donec a Mithridate missa classis, & illis, &

§ XI. Oros. 5, 25. Liv. Epit. § XIII. Plut. in Lucull. Memnon. Appian. Flor. 3, 5.

Lampfacenis omnibus exportatis, vacuam urbem victori reliquit. Hic eventus obsidionis Cyzicenæ fuit, qua periisse de regis militum lixarumque ad trecenta millia putantur. Cyziceni, sua & Luculli virtute incolumes, quo grati erga bene meritum essent, ludos victoriæ solennes instituerunt, *Luculleæ* vocantes: ipsumque, cum ingressus urbem esset, exquisitis honoribus acceperunt. Mithridates interea, cum quinquaginta naves, in quibus decem millia delectorum virorum imposuerat, L. Vario, & Alexandro Paphlagoni, & Dionysio Eunuchō tradidisset; cum aliquanto ampliore numero Perinthum navigavit: frustra que tentata oppidi capiundi spe, Nicomediam Bithyniæ petiit, postquam apud Parium ex utraque classe multas naves tempestate perdidisset.

XV. Neque Lucullo tempus per otium transigebatur, quin, ex omni Asia navibus ad Hellespontum contractis, classem compararet: tanta fiducia, ut senatui tria millia talentorum ad eos usus decernenti rescriberet, *summam eam ærario se parcere: neque ideo minus auxilio socialium navium Asiam ab incurſu regiorum esse liberaturum.* Neque promissa ejus magnificentiora, quam facta, fuerunt. Classē ita distribuit, ut cum parte navium, ad recipiendas Phrygiæ urbes Valerium Triarium, cum aliis Voconium Barbam ad destinandum Nicomediæ Mithridatē mitteret: ipse reliquis ad ea, quæ occurrerent, usurus.

XVI. Ab omnibus feliciter res gesta. Triarius Apameam, quæ *Cibotus* cognominabatur, maximum post Ephesinam urbem Asiæ emporium, obsedit. Erant magna beneficia regis penes Apamēnos, quod terræ motibus quassatam urbem, centum talentis publice dono datis, refecerat: Igitur acris aliquamdiu defensio, & post expugnationem, cædes eorum, etiam qui in templa confugerant, fuit. Dum ad hunc modum Apamea vastatur, Prusa, quæ sub Asiatico Olympo jacet, per Barbam capta ac directa est. Triarius

§ XIV. Plut. Oros. 6, 10. Appian. § XV. Memnon; Sallust. Plut.

etiam Prusiadem, maritimam urbem, quæ olim Cius fuerat, volentibus oppidanis recepit, qui præsidium regis expulerant, eo merito libertatem ab Romanis adepti.

XVII. Ea res etiam Nicæam tradidit Romanis, diffugientibus noctu ad Mithridatem, qui tuendæ fuerant impositi: quod animos Nicæensium ad Romanam amicitiam inclinare sensissent. At vero Lucullus, qui ab Hellesponto Troadem petierat, cum in fano Veneris pernoctasset, vocari se a Dea ad oberrantem in proximo prædam somniavit. statimque jussis convocari amicis, Græcisque comitibus, *non potui differre, inquit, quin protinus exponam vobis, quod mihi visum obvenit in templo. somnio deinde narrato, talis, inquam, per quietem obversata mihi species est, sed ita expressa & velut solidæ comprehensionis, ut ista videre ac audire, totis sensibus, non autem per inanes somni figuras imaginari, crederem.*

XVIII. Sane jam olim sapius, sed maxime, cum proquæstore missus a Sulla ad Ptolemaum Alexandria agerem, de omnibus ejusmodi rebus diligenter audivi differentes doctissimos viros. Erat enim tum etiam hic Antiochus mecum; & antea jam Heraclitus Tyrius agebat Alexandria, qui & Clitomacho multis annis, & Philoni operam dederat. Sed ita mihi hæc intricata, & ab hominis certa cognitione remota videbantur, ut inter disputationes eruditorum, id semper probabile videretur, quod a differente defendebatur. nam etiam qui decreta suæ parum confirmarent, plerumque sententiam adversariorum haud inepte refellebant.

XIX. Igitur eo inclinabam, ut incertam omnium opinionem, neque firmiter comprehendere posse quidquam arbitrarer. Sed unum ubique occurrebat irrefragabilis veritatis argumentum, ut, si dubitandum esse de omnibus putarem, id tamen scire viderer, esse utique de rebus dubitationem, & me esse, qui dubitarem. Ab hoc minime obscuro aut fallaci gradu statim eo ascendebam, ut sine ulla fluctuatione comprehenderem, esse aliquam humanam.

§ XVI. Strab. l. 12. Memnon. Orōf. 6, 2. Appian. § XVII. Plut. § XVIII. Cic. Acad. quæst. 4, 4.

superiorem naturam, quando nec ipse me fecissem, & quoniam essem, ab aliquo certe factus essem. Id autem, cujus potentia & ego, & quidquid est, nec ab se ipso est, exstitissemus, non aliud intelligere poteram, quam quod video Dei appellatione apud omnes censeari.

XX. Nam etiamsi plerasque apud gentes complures Dii contuntur; tamen sapientissimus quisque Deorum omnium unum regem patremque credit, a quo descendat, quidquid inferioris ordinis est, non potestate cum illo, non natura comparandum. Ut igitur haud inepte dubitari queat, quantum, quæ in hoc fano colitur Venus, valeat, quantaque sit hujus loci sanctimonia: sic etiam experientia constat, neque rationi refragatur, esse aliquam majorem humana potestatem, quæ de futuris, aut etiam præsentibus ita moveat hominum mentes, ut illo stimulo admonitæ, non inclinent modo ad credendum, sed etiam, penitus ita se rem habere, pro certo compertoque habeant. Mihi sane ita nunc affectus est animus, ut de veritate rerum, quæ mihi per quietem sunt ostensæ, mihius etiam dubitare possim, quantumcunque inhibere assensum coner, quam de his, quæ nunc videns vigilansque facio.

XXI. Hæc agenti cum amicis, dum adhuc loquebatur, supervenerunt ab Ilio nuntii, tredecim conspectas esse regis quinquereemes, Lemnum, ubi præfelli classis ad ancoras stabant, petituras. Igitur propere evectus, inter Tenedum & Achæorum stationem prælio commisso, Isidorum, qui navibus illis præerat, interfecit, naves omnes cepit. Inde mari Ægeο Lemnum profectus ad ceteram classem expugnandam, in deserta insula, ubi Philoctetæ casum æneus serpens, arcusque & fasciis illigatus thorax indicabat, præfectos regios deprehendit. Nec elici ad pugnam poterant: subductasque ad litora naves, tabulatis superstantes acriter defendebant.

XXII. Multus ibi labor Romanis fuit, multaque vulnera accepta, quia inhærentes litori naves, a fluctuantibus, tanquam firmata in stabili solo castella, levi & irritο conatu petebantur. Postremo circummissi alia parte milites, exscensio-

ne facta, a tergo circumvenerunt hostem: & occisis nonnullis, alios propellere naves, & in aquas se recipere coegerunt. Ibi inter duo maxima discrimina deprehensi, & utrum magis vitarent incerti, dum neque altum petere metu hostilium navium audent, & terra ab expositis prohibentur, ad oram oberrantes, utrinque vulnerabantur.

XXIII. Sic velut indagine deprehensi sunt omnes, nisi quos mors obita ferro eripuerat. Duces, ejecto in terram navigio, speluncam ingressos, male texerunt latebræ. Postera die cum caperentur, Dionysius, epoto, quod secum habebat, veneno, statim exanimatus est. Alexandrum Lucullus ad triumphum servari voluit. L. Varius, quia senatorem Romanum in triumpho duci fas non erat, post contumelias & ludibria supplicio affectus est. Quod ne faciliori forte exitu anteverteret, Lucullus suis, *ne quem lucum occiderent* (captus enim altero oculo erat Varius) præceperat.

XXIV. Multi & alii proscriptorum tunc interemti sunt. Duæ & triginta naves regiæ, cum onerariis compluribus eo tempore demersæ aut captæ fuerunt. Hæc a Lucullo ad senatum perscripta magnam in urbe lætitiâ excitaverunt: maxime postquam est cognitum, *classẽm hostium, quæ duplici prælio deleta aut capta fuerat, sub acerrimis ducebus Italiam petere voluisse*. His confectis, Lucullus ad expellendum Bithynia regem properabat. hunc enim credebatur a Voconio attineri, legato suo, quem ea gratia imperator præmiserat. Sed ille Samothracen profectus, dum superstitionibus dat operam, diesque cærimoniis & initiando terit, Mithridati præbuerat effugiendi copiam: qui si in tempore affuisset, clauso maris exitu capi Mithridates Nicomediæ potuisset.

XXV. Nam a terra binis castris obsidebatur, quia M. Cotta, ut acceptum ad Chalcedonem dedecus aboleret,

§ XXII. Plut. § XXIII. Oros. 6, 2. Cic. pro Arch. c. 9. Appian. Plut. § XXIV. Cic. pro Muræn. c. 15, & pro leg. Manil. c. 5.



fatis impigre Nicomediam perrexerat, castris ad vicesimum fere lapidem ab oppido communitis, ne pugnare contra commodum cogeretur. Eodem & Triarius non invitatus occurrit: & quia rex intra mœnia suos reduxerat, ab utroque Romanorum exercitu cœpit obsideri. Quod interim mediocriter ferens, postquam gemina navali pugna classem amissam didicit, Lucullo superventuro se ratus imparem, Pontum petere classibus decrevit. In hoc itinere de novo tam fœda tempestate conflictatus est, ut navalis prœlii instar esset, duplicique hac clade Mithridates prius ad Parium, & nunc haud procul Heraclea, ad decem hominum millia, & rostratas sexaginta, florem exercitus sui classisque deperderet.

XXVI. Eam calamitatem ad iram Priapenæ Dianæ superstitioni homines retulerunt, cujus a regiis spoliatum templum, abreptumque simulacrum fuerat. Amisâ magna parte classis, cum pierisque reliquis navibus in ostium fluminis Hypii, quod haud procul Heraclea abest, rex se recepit. Is tum status Heracleæ erat, ut magis aliena a Romanis ob sublatos publicanos, quam in potestate regis esset. Igitur, dum necessario stationem in flumine, nondum sedato mari, habet, sollicitè inquisito, Lamachum in summo magistratu agere comperit: quo nuntio erectus, quod veteri amicitia cognitus illi Lamachus erat, missis idoneis hominibus, multa largiendo pollicendoque perfecit, ut operam suam Lamachus addiceret, quo rex in urbem reciperetur.

XXVII. Dicta die, solemne sacrificium Lamachus instituit extra urbem, vocato populo, ne portæ consueto tempore clauderentur. Ad regem interea myoparo Seleuci archipiratæ mittitur, quem conscenderet; quia navis oneraria, qua erat vectus, ob violentiam tempestatum utilis esse desierat. Dehortabantur maximopere amici, *ne corpus suum hominibus incognitæ fidei crederet.* quorum ille metum tali sermone castigavit: *Ego vero fidem vestram, amoremque,*

*multis & magnis documentis experta novi, & æstimo: nihilque dici scio a vobis, quam ab optimo animo, verissimoque affectu profectum. Sed interdum hæc ipsa, quàmlibet omnino sunt præstantissima, bonis consiliis obstrepunt: quoties aliquid in speciem periculosum suscipi res cogit, timor vetat. ideoque in præsentia, cum vestrum animum & probem, & ut eum semper mihi custodiat, enise petam, a sententia tamen vestra dissideo. Videtis, ea nunc esse tempora mea, ut evadere pericula non aliter nisi periculo possim.*

XXVIII. *Nemo, opinor, in hoc toto negotio mihi temeritatem imputabit. paratissimus cum essem ad bellum, tamen iterum iterumque consideravi, restiti, distuli, donec apud omnes constaret, bellum opportunius sumi non potuisse. Tamen magnæ me calamitates & discriminaprehenderunt; iis nempe viis, quas cavere aut occludere nemo mortalium queat. Ipsos mihi Deos adversatos esse, scitis, cum Rhodios Isis, Cyzicenos Proserpina defenderent: cum Neptunus classes meas tempestatibus persequeretur. Sed erit aliquis irarum modus; &, quod a pueritia sæpe mihi contigit, præsens vexatio majore aliquo præmio pensabitur. nec enim frustranea semper erit hæc diligentia colendi Deos, qua nemini concedere soleo, perpetuo mecum habens sapientiæ sacrorumque magistros.*

XIX. *Quod si decretum de me est, hæcque superis sententia sedit, ut oppressum delictumque velint: at opera dabitur, ut impavidum obruant. Sed absit omen! & bona potius spe votisque me prosequamini: nam & mihi præfugit animus, hoc mihi non ad securitatem modo iter, sed etiam ad augendas opes aditum fore. Seleuco satis confido; plus etiam Lamacho: neque dispicio, quomodo sperare majora ab Romanis proditi mei, quam a me servati, præmia possint. Sed & populus Heracleensis ita est alienatus, ut quidlibet potius, quam Romanum imperium, laturus videatur.*

XXX. *Ita metu suorum castigato, confidenter ingressus*

§ XXVII. Liv. Epit. Sallust. Appian. Oros. Plut. § XXVIII. Memnon. Ptolem. 5, 1. § XXIX. Plut. Oros. 6, 5. Appian. Mithrid.

piraticam navem, prius Heracleam introivit, quam obrutū vino homines adventum ejus perſentiſcerent. Poſtremo de- mum die, cum eſſent ad concionem vocati, regem ſe ha- bere didicerunt : qui humaniter eos allocutus, & *ad ſer- vandam ſibi benevolentiam* hortatus, quatuor millia militum præſidio cum præfecto Connacorige impoſuit; quo ab Ro- manis, ſi forte ſigna eo vertiſſent, defenderentur. Diviſa deinde populo, ſed præcipue magiſtratibus, pecunia, Sino- pen, & inde Amiſum navigavit.

§ XXX. Strab. l. 13. Memnon. Appian.

---

JOANNIS FREINSHEMII  
SUPPLEMENTORUM  
LIVIANORUM

LIBER LXI.

IN LOCUM LIB. XCVI LIVIANI.

E P I T O M E

LIBRI NONAGESIMI SEXTI.

*Q. Arrius prætor Crixum, fugitivorum ducem, cum viginti millibus hominum cecidit. Cn. Lentulus consul male adversus Spartacum pugnavit. Ab eodem L. Gellius consul & Q. Arrius prætor acie visi sunt. Sertorius a M. Antonio, & M. Perperna, & aliis conjuratis in convivio interfectus est, octavo ducatus sui anno: magnus dux, & adversus duos imperatores, Pompejum & Metellum, sæpe par, vel frequentius victor: ad ultimum desertus & proditus. Imperium partium ad Marcum translatum est: quem Cn. Pompejus victum captumque interfecit, ac recepit Hispanias decimo fere anno, quam cæptum erat bellum. C. Cassius proconsul & Cn. Manlius prætor male adversus Spartacum pugnaverunt: idque bellum M. Crasso prætori mandatum est.*

**I.** *HÆC eo anno gesta. & quia funestas per Italiam clades senescens Sertorius, & Luculli res florentes relevabant, minore externorum cura, animi ad Spartaci opprimendæ*

bella versi: tam validis jam fugitivorum opibus, ut ad septuaginta armatorum millia essent; bini exercitus, totidemque duces Italiam pervagarentur. Igitur, quamquam ambobus consulibus decretum id bellum cum duabus legionibus esset, C. Arrio prætori etiam datæ copiæ sunt, *imperiumque is seorsim a consulibus habere* iussus. Consules tamen erant L. Gellius Puplicola, Cn. Cornelius Lentulus Clodianus.

II. Forte Germanicæ cohortes, duce Crixo, per ferociam a Spartaco se abruperant; & circa Garganum montem cum triginta millibus armatorum prædas Crixus agebat. Idcirco L. Gellius consul, cum prætore Arrio repente incautos adorti, viginti hominum millia cum ipso duce, acerrime quidem repugnante illo, prostraverunt. nec ideo minor adversus Spartacum moles supererat: qui cavendæ pugnantique egregius artifex, occasiones & eventus omnes prorsus imperatorio consilio ad suum commodum trahebat.

III. Sed illi per Apenninum ad Alpes tendenti, ut in Galliam evaderet, Lentulus consul se objecit: eundem a tergo L. Gellius conclusit. Ille vicissim cum ambobus conferta manu, utrumque magnis & pudendis cladibus affecit, cum duobus consulibus comparatus unus gladiator. & priorem quidem Lentulum abegit, eumque castris & impedimentis omnibus exiit in Apennino: deinde versus in Gellium, quamquam cum eo se C. Arrius conjunxerat, utrumque collatis signis vicit. Post horum fugam, ut Romanis ostenderet, eidem ludibrio & ipsos obnoxios esse posse, per quod aliorum hominum sanguine tam immaniter abuterentur, per causam placandorum Crixii manium, simul cujusdam matronæ nobilis, quæ a fugitivis per violentum stuprata sibi manus intulerat, trecentos aut quadringentos ex captivis delectos circa rogam iussit armis depugnare.

IV. Ceteros ad unum omnes interfecit: impedimenta, præter necessaria pauca, subdito igne cremavit, quo esset ad destinata expeditior. nam ne quid indignitatis abesset, de ipsa urbe Roma invadenda deliberabat. Neque leve dis-

crimen erat, cum agmen centum viginti millium trahe-  
ret : quamquam vulgo repudiare fugitivos solitus, quorum  
ad ipsum, si reciperentur, maximus numerus transibat. Id-  
circo duo consules junctis copiis in agro Piceno ei occur-  
rerunt. Sed ille, licet eas magna clade profligasset, ad ur-  
bem ducere non est ausus, quia nondum ei fati suæ vires  
placebant, nec exercitum adhuc ex sententia sua perarma-  
verat. alii quoque apparatus deerant, cum nullius civitatis  
populive auxilio, sed tantum corporibus fugitivorum at-  
que convenarum uteretur.

V. Ergo, ut arma ceteraque bello opportuna compara-  
ret, Thurinos montes stativis locum cepit. oppidum pro hor-  
reo rerum omnium habuit : vicina late populando, a mer-  
catoribus injuriam omnem prohibuit, præcipue qui æs &  
ferrum vendituri venirent. eas res care mercabatur : *aurum  
argentumque importari, aut importatum emi a suis*, severo  
edicto vetuerat. Dem in Italia hunc ad modum certa-  
tur, Hispaniam a Sertorio magis alienum scelus, quam  
Romanorum vis ac robur, vindicavit. Erat ille jam, ut di-  
ximus, infensus invifusque plerisque, quod deprehensas  
aut creditas in se, conspirationes atrociter puniverat.

VI. Igitur alienatis semel animis, omnia ducis recte con-  
sulta, ministrorum dolo atque contumacia in contrarium  
vertebant. Hispanique, propter tributa ac supplicia, quæ  
velut Sertorii jussu acerbè exigebantur, deficiebant a par-  
tibus. ad hos revocandos qui mittebantur, de industria au-  
gebant iras, majoremque in modum irritatis barbaris, re-  
vertebantur. Is dolor a pristinis moribus adeo deduxit Ser-  
torium, ut faviret in principum liberos, qui Oscæ educa-  
bantur, &, parte interfecta, ceteros in servitutem venderet.

VII. Dum hæc aguntur, Perpenna præter ceteros con-  
juratos in societatem consilii Manlium quendam ex Ser-  
torianis ducibus asciverat. Deperibat adolescentis cujus-  
dam turpi amore Manlius : eumque ut magis sibi adjunge-  
ret, *missos alios facere amatores*, hortatus est, *unique, mox  
interfecto Sertorio, ad maximas opes perventuro, se dare.* Eum

fermonem Aufidio quidam adolescens exposuit, in quem erat benevolentia propensior. Ille non leviter ictus, (nam & ipse erat inter conjuratos; sed & Manlium esse nesciebat) dissimulata tamen conscientia, negat, *verbis hominis ventosi & levis habendam fidem esse*. at postquam adolescens *Perpernam, Gracinum, aliosque participes secreti* nominavit; non distulit pergere ad Perpernam, & admonere periculi, *nisi mature præverterent. eo rem deductam, ut celari diu nequeat. occupandum Sertorium; aut pereundum insidiatoribus esse*.

VIII. Non dubitabat Perperna, quin vera prædicerentur. Et nuper quoque, submissis decem militibus, Sertorium interficere conatus, punitisque partim, partim fuga elapsis insidiatoribus, quamquam nondum erat proditus, ne proderetur metuēbat. Idcirco conjurationis duces, convocatis celeriter præcipuis consciorum, nihil cunctandum rati, componunt e vestigio fraudis ordinem: subornatoque idoneo homine, confictas literas Sertorio tradendas curant, quibus de magna victoria perscriptum erat, quam Sertorii quidam legatus, ingenti hostium numero debellato, reportasset.

IX. Lætum ob hæc & sacrificantem Sertorium, cum amicis (erant autem ex conjuratorum numero) ad convivium invitat Perperna, multisque precibus vincit, *ut ad gaudium ejus diei celebrandum condiceret*. Igitur discubuerunt. Sertorius inferior in medio lecto accubuerat: supra eum L. Fabius Hispaniensis senator ex proscriptis: in summo erat Antonius, & infra eum scriba Sertorii Versius: in imo scriba alter Mæcenas, medius inter Tarquitium, & dominum convivii Perpernam. Erat ea cum Sertorii modestia, tum apud suos auctoritas, ut eo præsentē verecunda & honesta omnia essent: nullæ turpes facetiæ, nulli clamores tumultusque audirentur.

X. Sed eo tempore, ut initium rixarum conjurati facerent, inconditis sermonibus gestibusque, per simulationem ebrietatis strepebant. Cum ad hæc ille, sive of-

sensus hac licentia, sive mentem eorum divinans, velut animum non adverteret, in lecto jaceret supinus; Perperna merum poposcit, & inter bibendum dimisit e manibus phialam, qui sonus perpetrandæ cædis signum conjuratis erat. ac statim Antonius, qui in summo lecto accumbebat, districto pugione Sertorium faucivavit: deinde convertentis se ad ictum, & surgere conantis, manum utranque continuit, dum a reliquis conficeretur.

XI. Custodes corporis ejus, quos semper circa se habebat, eodem momento a præparatis ad facinus occupati sunt. Ita Sertorius exiit vitam, octavum post annum, quam Hispanis se ducem præbere coeperat; magnus dux, & adversus duos imperatores, Pompejum & Metellum, sæpe par, vel frequentius victor: ad ultimum desertus & proditus. Imperium partium ad M. Perpernam translatum est, quod homo vanus & ineptus olim concupiverat, nihil ei præstiturum, nisi, ut quantum ducem, quanto inferior ipse, sustulisset, intelligeretur.

XII. Nec tamen illud tam infelix præmium sine contentione retulerat. Exercitus post indignam Sertorii cædem, ira in commiserationem versa, tumultuabatur, virtutem occisi, & sua pericula reputando. *Mille experimentis constitisse, quantumlibet egregium exercitum, amoto duce, velut pulchrum corpus adempto spiritu, marcere. Unum his temporibus fuisse C. Sertorium, qui sine opibus, sine pecunia, sola virtute subnixus, terribilem populi Romani potentiam per tot annos sustinisset.*

XIII. *Pauperem, exulem, desolatum, ex omni tempore, ex omni regione, tanquam miraculo quodam productas de nihilo copias excitare potuisse. Huic tot duces Romanos, tot legiones procubuisse: coactumque senatum, ut ipsa reipublicæ firmamenta atque columina mitteret. Neque tamen aut veterem militiæ gloriæque Metellum, aut triumphalem adolescentiam, quamquam junctis consiliis ac viribus, uni pares esse potuisse. Hoc defendente, absentiam a penetribus suis, a propinquis atque amicis, non exilium, sed militiam putavisse: bona spe fractos,*



*aliquando fore, ut patriæ domesticisque cum letitia gloriaque restituantur.*

XIV. *Nunc autem adeo spem illam omnem diffluxisse, ut vix corpora sua libertatemque satis in tuto esse credant. quem enim alium se habere, cui salutem suam committant: aut cui satis firmos humeros fore, ut post Sertorium tantam rerum molem sustineant, ferantque? Sane non deesse, qui præcipiti ambitione ad capeſſenda imperia ruant: sed brevi apparituum, quanto majora viribus onera susceperint. Non enim majorum imaginibus, aut patrimonii magnitudine, sed solido robore animi, sapientibusque consiliis sustineri ac geri bella posse.*

XV. *Igitur commutatis ducum artibus, fortunæ quoque similem mutationem haud injuria timeri. Egregiam scilicet spem in successore ostendi, si Sertorium Perperna excipiat, summum virum ducemque vulgaris. Hæc Romanæ copię fremebant, majoribus & pluribus apud exteras querelis. Lusitani ante omnes, quod eorum præcipua semper opera Sertorius uti consueverat, optimum imperatorem, fortissimum commilitonem, virtutis remuneratorem liberalissimum requirebant.*

XVI. *Ut vero, aperto Sertorii testamento, scriptum ab eo Perpernam heredem fuisse, innotuit, & detestatione tam ingrati facinoris magis exarserunt animi; nihil propius factum, quam ut pœnas ab homicida suis manibus sumerent; nisi discurrens per contubernia cum ducibus Perperna, quosdam donis, alios promissis, nonnullos etiam minis pacasset; etiam uno & altero ad terrorem ceterorum ferro interemtis. Deinde socios populos obeundo, quo illorum odia mitigaret, orsus ab Osca, ubi patrata cædes fuerat, conciones ubique blandas habuit; apertis carceribus, qui erant ab Sertorio vincti, dimisit; obsides civitatibus reddidit.*

XVII. *Sed earum multæ cum execratione nefarii hominis, missis ad Metellum Pompejumve legatis, in fidem Romanorum venere: præsertim ubi sumto imperio Perperna statim crudelis apparuit, tribus illustribus viris, qui una ex urbe profugerant, fratrisque filio, interfectis. Igitur*

Metellus, adversus talem hostem duobus exercitibus rem non indigere judicans, diversam Hispaniæ partem interim pacaturus, debellandum Pompejo reliquit. Inter hos per aliquot dies levibus certaminibus cum tentatæ utrinque vires animique essent, decima die collatis signis dimicatum. neutri enim diutius rem differre placebat, quod Perpernam Pompejus sperneret; Perperna, donec in officio milites essent, eorum utendum opera arbitraretur.

XVIII. Sed ea pugna temere a Perperna commissa, dignum auctoris imprudentia exitum habuit. Namque Pompejus, parte copiarum idoneis locis subsidere iussa, cum decem cohortibus processit: eamque velut escam ut objiceret hosti, sparsit per campum suos, & Perpernam spe hujus opprimendæ manus illexit. Ita contracto certamine, quali resistere non posset, hostem deduxit ad locum insidiarum: ubi ab utroque latere prorumpentibus, qui erant occultati, conversus, Sertorianos ad internecionem cecidit.

XIX. Perpernam, cum se non minus fuorum, quam hostium metu in sentibus abdidiisset, quidam equites retraxerunt; probra dirasque cumulantibus, qui eum videbant, Sertorianis, *quod homo nihili præstantissimum virum dolo, ceteros omnes imperitia & stoliditate perdidisset.* At ille nihil aliud, quam *ut salvus ad imperatorem deduceretur*, postulabat. *habere enim se principum Romanorum literas, quibus Sertorius in Italiam acciretur.* Ibi, *prudentissime præsentibus usum esse Pompejum, Roma judicavit, quod, priusquam in conspectum veniret Perperna, iussit hominem occidi: epistolæ neque legit ipse, neque legendas concessit; sed continuo cremavit omnes: eoque facto novarum rerum oppressis seminibus, terrore atque sollicitudine ingenti respublica liberata est.*

XX. Neque tamen defuerunt, qui carperent, *quod hominem, Sicilia sine certamine tradenda bene meritum, indemnatum occidisset.* Sed adversus hanc criminationem istud Pompeji factum, & suæ ætatis, & sequentium judicia frequentibus suffragiis absolverunt. Sic Perperna pœnas occiso per fraudem Sertorio dedit. ceteros conjuratorum partim vi-

etor interemit, partim fuga tulit in Africam, ubi Mauro-  
rum jaculis occisi sunt. neque præter Aufidium quisquam  
evasit; si modo evasisse dicendus est, qui contemptus invi-  
susque omnibus in vico quodam barbarico consenuit.

XXI. Reliquus Pompejo labor recipiendi dedentem se  
Hispaniam fuit. Osca, Termes, Tutia, Valentia, victoris se-  
permiserunt potestati. duas, Uxamam & Calagurim, reli-  
quæ partium validis præsidiis occupatas retinebant: quæ  
deinde expugnatae. Hic finis ejus in Hispania belli fuit,  
quod a fuga Sertorii ortum, decimo ferme anno, cum ipso  
duce defecit: gravius haud dubie diuturniusque futurum,  
si longior ei viro vita suppeditasset. De his rebus cum se-  
natui Pompejus scripisset, *multosque se virtutis causâ civi-  
tate Romana donavisse* diceret; senatus mandavit consulibus,  
*ad populum ferrent, uti cives Romani essent ii, quos Cn. Pom-  
pejus imperator, de sententia consilii, sigillatim civitate do-  
navisset.*

XXII. Consules ad populum tulerunt; eaque lex acce-  
pta est. Ceterum Hispaniensis victoriæ gaudium, ne ni-  
mium fieret, Italica clade temperatum est. C. Cassius pro-  
consul, Cn. Manlius prætor, male adversus Spartacum pu-  
gnarunt. Nec ultra de C. Manlio comperi. Cassius, Circum-  
padanæ Galliæ proconsul, contententi ad Alpes Spartaco  
castra apud Mutinam opposuerat, decem millia militum  
ducens. Horum cum plerique cecidissent in acie, præcon-  
sul vix fuga evasisset, castra deleta sunt: & cum ingenti  
præda fugitivi ad præsidia sua recesserunt.

XXIII. Senatus, ob tot acceptas a contentissimo homi-  
num genere clades, pudore & metu sollicitus, & culpam  
in consules conferens, vetuit *hos quidquam deinceps pro im-  
perio agere*. Nam qui erat inter duos melior Gellius, tamen  
imperite gerebat rem, & exercitum in luxum ignaviamque  
labi patiebatur. Quare infensus ei militiæ Cato, cum pro-  
pter fratrem Cæpionem, qui tribunus militum erat, no-  
men sponte dedisset, honores & præmia, quæ offerebat  
consul, accipere noluit, *nihil iis dignum actum esse* dictitans.

XXIV. Idcirco tantus ea tempestate terror urbem occupavit, non levius jam Spartaci arma, quam olim sub Hannibale Punica, timentem, ut prætoriiis comitiis candidati deessent. Ibi M. Licinius Crassus, nobilitate ac divitiis inter primos, cum ad præturam petendam prodisset, summa hominum voluntate factus est. Sub idem tempus L. Lucullus, post fugam Mithridatis Nicomediam profectus, cum M. Cotta ceterisque ducibus Romanis de ratione belli consilio habito, ita partitus erat vires, ut ipse per Cappadociam & mediterranea provinciarum, cum maxima virium parte imperii Mithridatici arcem peteret: M. Cotta ad recipiendam Heracleam iret: cum reliqua classe Triarius Mithridaticis navibus, ex Hispania & Creta redituris, insidiaretur.

XXV. Neque defuerant, qui interquiescendum arbitrarentur, rescindendosque ex nimio & continuo Labore milites. sed Lucullus, utiliorem regi moram averfatus, per Bithyniam Galatiamque ad præsidia Mithridatis perrexit. Neque regi tempus per ignaviam terebatur, quin ab Amiso legatos ad Scytharum regulos, Parthumque Arsacen, & generum Tigranem mitteret. omnibus eadem mandata erant: *Aliis regibus atque nationibus, compluribus de causis, pacem bellumque sæpe mutari: raro ad cujusquam perniciem extendi odia; sed, ubi satisfactum injuriis suis victor censeat, arma poni solere. Populo Romano cum reliquo terrarum orbe unum idemque perpetuum bellum esse; quod, nisi dominatione, aut interitu illius, poni nequeat.*

XXVI. Illum olim tantum astutia valuisse, ut, donec multis subjugatis gentibus, in formidabilem potentiam exurgeret, semper alios ab aliis disjunxerit, ne invicem ope ferenda, imminens omnibus jugum, unius periculo, communi commodo averterent. Ita desertos destitutosque cepisse singulos, ut horum deinceps armis ac sanguine, etiam longius diffitos aggrederentur. Sic Italiam primo redegit sub suas leges: mox variis coloribus insulas, deinde Africam, postremo magnis ausibus Macedoniam, Achajam, Asiam accessisse. remque eo deductam esse, ut multi reges, tanquam pro ingenti beneficio, quod non ante

*supremam diem exuti fuerint opibus suis, herede populo Romano decesserint.*

XXVII. *Tanta potentia auctos Romanos, non jam curare prætextum armorum, & decora nomina; sed satis habere, si, quamlibet injuste egisse crediti, appetitis potiantur. Quid enim sibi posse imputari, cujus patientia maximas contumelias simul injuriasque pertulerit, quo insignitior hostium iniquitas fieret? Igitur pro se unumquemque, & quanto quis sit potentior, tanto impensius niti oportere, ut hi communes omnium hostes, orbisque prædones opprimantur. Eoque animo esse debere pro se quemque, ut, quod ad hos retundendos auxiliorum suppeditaverit, non Mithridati magis, quam sibi ipsi primum, deinde publicæ generis humani libertati, præsitum putet.*

XXVIII. *Hæc ad alios precibus exponenda mandata dedit: at Macharem Bosporo inaperantem, jure patris dominique excivit. Ceterum Parthus, procul a se periculum esse reputans, neque sapientis præter necessitatem arcessere molestias, auxilia denegavit: Scythica moratus est Diocles, cui ea credita legatio fuerat; namque multo cum auro & præclaris muneribus, quæ ad regulos mittebantur, in castra Luculli transfugit. Tigranem diu tergiversantem filia Mithridatis expugnavit, ut societatem cum eo novam pacisceretur.*

XXIX. *Interea, quo Luculli impetum retardaret, præfectorum quosdam cum equitatu misit, qui negotium ei facerent: sed nihil æque illum, quam fames, fatigabat, corruptis late, jussu regis, quæ in ejus manus perventura fuerant; & multi commeatus insidiis latronum interierant. Igitur triginta millia Gallogræcorum, singulos frumenti modios humeris portantium, sequi exercitum jussit: donec, multis levibus certaminibus regiones submovendo, in regiones belli cladibus intactas penetravit, tantaque morum omnium copia affuit, ut bos denario, mancipium denariis quatuor emeretur, ceteræque prædæ ea vilitas es-*

set, ut, quia distrahi nequibat, a militibus corrumperetur.

XXX. Interea Lucullus Amisum & Eupatoriam obsidere cœperat, simul parte exercitus ad oppugnandam Themiscyram missa, quæ ad Thermodoontem fluvium Amazonis, a qua condita esset, habere nomen dicebatur. Hic operibus cuniculisque tentata omnia sunt, qui tum ampli fodiebantur, ut quandoque in eis velut subterraneæ pugnae fierent. Eos obsessi superne aperiebant, immissisque urlis, & aliis bestiis, interdum & apum examinibus, eos, qui in opere erant, omni genere calamitatis vexabant.

XXXI. Circa Amisum segnior obsidio erat, & Mithridates, audito, eam sine præliis assideri, recepto animo Cabilis substiterat, alium exercitum colligens. Id Lucullus non ægre patiebatur, reprehendentibusque dicebat, consulto se id agere, ne, rebus desperatis, ad Tigranem confugiens hostis, majorem belli molem concitaret. Igitur Mithridates, contractis quadraginta ferme peditum, octo equitum millibus, Diophantum & Taxilem cum novis copiis ad priores præfectos misit, a quibus Amisum destinata subsidia, & frequentia equestria certamina, sed, nullo eximio in alterutram partem momento, facta sunt.

XXXII. Dum hæc a Mithridate & Lucullo geruntur, M. Cotta proconsul Prusiada Bithyniæ venit. inde Pontici maris oram legens ad Heracleam accessit. Ibi quia pacati nihil respondebatur, adducto ad mœnia exercitu, oppugnationem tentare non ausus, per partes Heracleam assultabat, paucos subinde Romanos milites, sed magnum Bithynorum numerum mœnibus admovens. Sed cum inani incepto nihil præter vulnera reportaret, testudine effecta, adhibuit arietem, & turrin, quæ adversus vim non diu duratura videbatur, pulsare instituit.

XXXIII. Sed ubi semel iterumque percussa turris non modo præter opinionem restitit, sed etiam arietis perfractum caput est; Heracleotæ bono animo, proconsul ini-

§ XXIX. Plut. in Lucull. c. 25. Sallust. Appian. § XXX. Appian. Plut. Sallust. § XXXI. Memnon.

quore esse cœperunt. Igitur cum postridie denuo frustra turrim verberasset, machinas cremari, architectorum præcidi capita iussit; præsidiiſque juxta muros constitutis, cum majore parte copiarum, in campo Lycæo confedit, loco fertili, ad alendum militem copioso. unde cum Heracleoticum agrum omnem evaſſaſſet, obſeſſi, penuria fatigati, denuo ad Cherroneſi incolas, & Theodoſianos, & qui Boſporum accolebant regulos, ſocietatem & annonam peti- tum miſerunt: & legatio quidem ſatis fuit felix.

XXXIV. Ceterum oppidanos & hoſtes foris, & intra viſcera crudeliuſ præſidiarii milites angebant. qui eodem, quo vulgus agebat, victu minime contenti, lautiores cibos ab egenis & famelicis hominibus vi ac verberibus extorquebant. neque Connacorix præſectus iſta cohibebat: quin ille deterrimus omnium gaudebat hac violentia, licentiæ- que ſuorum impunitatem addiderat.

XXXV. Hæc ferme his conſulibus bella geſta ſunt. Res urbanas non tam parvitas earum, quam ſcriptorum penuria, tradi vetat. Ceterum inopia Romæ laboratum, piratis maria, pejus omni tempeſtate, præcludentibus: & judi- cia legeſque novæ civitatem inquietam habuerunt. Clodius quidam tribunus plebis, ſacerdotes virgineſque Veſtales, tanquam parum caſte ſacra facerent, ad populum crimina- batur, & ad turbas haud exiguas res ſpectabat.

XXXVI. Catilina quoque reus inceſti, quod cum Fabia commiſſiſſet, accuſabatur. ſed Clodium M. Cato, cum ingenium ejus propoſitumque multis verbis acriter coarguiſ- ſet, deſinere actiones ſuas coegit. Catilina favore Catuli, & quia Terentia Ciceronis, ſoror erat Fabiæ, abſolutus eſt. at conſul Cn. Lentulus, perincertum ſtolidior, an vanior, legem de pecunia, quam Sulla emtoribus remiſerat, exi- genda promulgaviſ. Verbum quoque in ſenatu Cn. Lentu- lus, L. Gellius conſules fecerunt, placere ſtatui, ſi Patribus conſcriptis videretur, ne abſentes homines in provinciis rei fierent. Id Sthenii Thermitani cauſa factum, de quo

supra meminimus. Sed impediēte Verre patre, negotium omisſum eſt.

XXXVII. Eodem anno, cum perpetua magnarum urbium peſtis, ignota & flagitioſa colluvies, Romam inundaret, tribunorum plebis collegium edixit, non licere quemquam Romæ eſſe, qui rei capitalis condemnatus eſſet. De tribunitia quoque reſtituenda poteſtate acriter actum. eamque rem M. Lollius Pedicanus, humili loco Picens, loquax magis, quam facundus, ſed imperitorum auribus aptus, magnis clamoribus, & ad extremum felicibus, urſit, ut ſuo loco memorabimus.

XXXVIII. Sequens annus Cn. Aufidium Oreſtem, P. Cornelium Lentulum conſules vidit. Lentulo cognomen- tum Suræ a cauſa minime honeſta acceſſerat, quia Sulla- nis temporibus quaſtor magnam pecuniæ publicæ ſummam prodegerat: poſtulate deinde rationes Sulla, perfricta fronte dixerat, eas ſe non poſſe reddere, ſed præbere ſu- ram; qua parte corporis pueri, ſi forte, dum pila ſe exer- cent, peccaviſſent, ex lege ludi verbera perſerebant.

XXXIX. Non igitur quaerendum eſt, cur hoc conſule prætori M. Craſſo ſervile demandarit bellum ſenatus: at collegam ejus Cn. Aufidium quæ cauſa removerit, diffici- lius ſit dicere. Credo, prælatum illi Craſſum ob peritiam rei militaris fuiſſe, cujus jam ante haud contemnenda documenta dederat. & erat iis temporibus permagna Craſſi auctoritas, proficiſcentemque multi nobiles in bellum ſponte ſecuti ſunt. Legiones in univerſum habebat octo: quippe priorum conſulum exercitum novi delectus auxerant.

XL. Igitur quia venturus in Picenum Spartacus erat, ut eum præverteret, feſtinanter copiis ductis, legatum ſuum Mummiū cum viginti cohortibus, ad circumven- niendum a tergo hoſtem, diverſo itinere miſit, cum mar-

§ XXXVI. Salluſt. Catilin. c. 15. Oroſ. 6, 3. Plut. Atcon. Cic. Catilin. 3, & Verr. 2, 39. § XXXVII. Salluſt. Cic. in Brut. Atcon. in Verr. 1. § XXXVIII. Plut. in Cic. c. 27. Liv. Epit. § XXXIX. Plut. in Craſſ. c. 8. Appian. civil. l. 1. Oroſ. 5, 24.



datis, ut, cum perventum esset, quo voluisset, Spartacum sequi contentus, a pugnando abstineret. At ille, simul aliqua spes bene gerendæ rei cupienti animo allucere visa, spreto imperio contulit signa, victusque multos amisit milites: plures, abjectis armis, ad Crassum refugerunt. Ille, Mummiō acriter increpito, militibus alia dedit arma, sponsoresque exegit, ea non omisso.

XLI. Deinde quingentos, a quibus initium ortum fugæ fuerat, forte ductos, more majorum fusti percussit. hoc propius fidem est, quam quod alii, totum exercitum, legiones octo decimatas ajunt, militumque ad millia quatuor eo supplicio periisse. Nec alio tempore clarioribus documentis apparuit, quam salutaris sit severitas, ubi leniora remedia contemnuntur. Nam post hanc animadversionem, ducis majore, quam hostis, metu apud suos excitato, decem millia fugitivorum scorsim stativa habentium aggressus, sex millia eorum interfecit, cepitque nongentos. Reliqui cum ad ducem refugissent, Crassus in ipsum quoque intulit signa, prosperumque prælium fecit.

XLII. Tum Spartacus per Lucaniam ad fretum contendit, in Siciliam transiturus; quæ insula ex bellorum servilium incendio, quo sæpe & nuper erat agitata, multas adhuc scintillas velut sub cineribus aiebat, exituras in flammam, si mediocri motu tanquam flabellis excitarentur. Igitur, cum forte prædatoria navigia venissent ad fretum, egit cum Cilicibus, ut certa mercede partem suorum (duo millia erat missurus) in insula exponerent. Sed deceptus a Cilicibus, proposito excidit: quod illi post accepta munera, solutis navigiis, taciti abscefferant. Spartacus, (postquam ad trajiciendum rates ex cratibus fieri jussit, & dolia virgultis connecti: sed in rapidissimo freto fragile machinamentum cito dissolutum est) relicto litore, reduxit copias, & in Reginorum peninsula consedit.

XLIII. Neque Crassus cunctanter insecutus, ubi loco-

rum consideravit ingenium, maximo operi admolitus est manum, fossaque pedes quindecim alta, latitudine pari, a mari ad mare per cervicem ducta, murum insuper excelsum firmissimumque adstruxit. Ingentem laborem (quippe circa Bruttium angulum millibus quinque & triginta Italia patet) brevi tamen tempore severitas & industria ducis perfecit. Eos conatus a principio Spartacus deriserat: sed ubi, consumpta proximorum locorum praeda, ne aliunde petere commeatum posset, interclusum se obsessumque conspexit; bis conatus erumpere, ut Samnium peteret, magna cum clade est repulsus. Sub primam lucem sex amittit millia, totidem fere noctis initio; cum adeo facilis esset Romanis loco adjutis pugna, ut septem tantum gemino eo proelio vulnerati, tres interemti tradantur.

XLIV. Nam virtute par, aut forte superior Spartaci miles fuerat, adeo nullius, quam pugnae, memor, ut e duodecim millibus trecentis caesorum, negent plus quam in duobus averfa reperiri vulnera potuisse. Idcirco non ausus ultra vim universam experiri, diversis partibus eruptionem minitendo, subitis & continuis velitationibus vexabat Romanos, fascibusque in fossam injectis, immittebat ignem, quo difficilior munientibus labor fieret. Deinde ut suorum animos metu supplicii ad pervicaciam firmaret, e captivis Romanis unum medio inter duo castra spatium affixit cruci, *ejusmodi supplicium neminem vitaturum esse* praedicans, *nisi qui e praesenti periculo virtute se explicassent*. Tandem omnibus tentatis, noctem nivofam ventisque streperam nactus, partem fossae caesis captivorum pecorumque corporibus, materiaque injecta, & terra superaggesta complevit: partemque fere tertiam exercitus statim, deinde hujus praesidio reliquas copias transduxit.

§ XLIII. Flor. Sallust. Appian. § XLIV. Plut. in Pomp. c. 3.  
Idem in Crass. Appian.

---

JOANNIS FREINSHEMII  
SUPPLEMENTORUM  
LIVIANORUM  
LIBER LXII.

IN LOCUM LIB. XCVII LIVIANI.

---

E P I T O M E

LIBRI NONAGESIMI SEPTIMI.

*M. Crassus prætor primum cum parte fugitivorum, quæ ex Gallis Germanisque constabat, feliciter pugnavit, cæsis hostium triginta quinque millibus, & duce eorum Granico. Cum Spartaco deinde bellavit, cæsis cum ipso millibus sexaginta. M. Antonius prætor bellum adversus Cretenses, parum prospere susceptum, morte sua finivit. M. Lucullus proconsul Thracas subegit. L. Lucullus in Ponto adversus Mithridatem feliciter pugnavit, cæsis hostium amplius quam sexaginta millibus. M. Crassus & Cn. Pompejus consules facti (sed Pompejus, antequam quæsturam gereret, ex equite Romano) tribunitiam potestatem restituerunt. Judicia quoque per L. Aurelium Cottam prætorem ad equites Romanos translata sunt. Mithridates, desperatione rerum suarum coactus, ad Tigranem Armeniæ regem confugit.*

I. **E**RUPTIONE Spartaci recruduit in urbe consternatio, quam M. Crassi res prosperæ, & præclusi muro fossaque

fugitivi, paulisper confopiverant. Et quoniam ipse quoque Crassus, ne Romam properaret hostis, metuebat, & ad hoc incendium exstinguendum, Cn. Pompejum ex Hispania, M. Lucullum ex Thracia evocari oportere, senatui scripserat: minime dubitatum est, quin utrumque eum imperatorem publicis literis acciri oporteret. Interim M. Crassus, discordia fugitivorum confirmatus, quod Gallicæ Germanicæque copiae, ne Crisi quidem interitu colere Spartacum doctæ, ab ipso discesserant, subito has adortus fuit, fugavitque a lacu quodam, ubi locum castris ceperant. is lacus alternante natura, quandoque salvas, aliis temporibus potabiles habere aquas dicitur.

II. Sed superveniens summa contentione Spartacus, turbatum exercitum, ne magna aliqua strage plecteretur, vincenti Crasso eripuit. In summa tamen potior ad pereundum ferocia dissentientium, quam ad servandum diligentia Spartaci fuit. Ne recenti quidem beneficio moti, castra seorsim habere perseverant, Spartacum contemnunt, Granico & Casto ducibus confidunt. Igitur Crassus, abruptas a duce copias deleri posse facile, ratus, his insidiabatur. Spartacus, quamquam suorum contumacia doleret, tamen ob commune periculum ita agebat, ut, quando eodem vallo eos continere non poterat, haud longius inde, quam locorum commoditas ferret, castra metaretur.

III. Igitur illis in agro Crotoniensi castra habentibus, ipse haud magno inde intervallo confedit. Crassus divisis & ipse copiis, castris hostium bina castra opposuerat, ita partitus, ut majorem numerum contra Spartacum haberet, contra Castum & Granicum multitudine ac virtute inferiores collocaret. Sed ubi tempus opportunum venisse putavit, quo minores illi duces opprimi possent, noctu commutavit copias, relicto tamen in majoribus castris prætorio, ut ibi esse imperatorem cum validiore parte exercitus Spartacus crederet. C. deinde Pomptinum, & C. Marcium Ruffum le-

§ I. Cic. pro leg. Manil. c. 11. Plut. in Cæs. § II. Lix. Epist. Plut.

gatos cum cohortibus quingenariis duodecim, post montem circummittit. L. Quinctium cum parte equitatus ludificare Spartacum jubet: cum alia parte Gallos Germanosque ad pugnam elicere, mox cedendo ad radices montis ducere, ubi ipse cum legionibus instructis erat opperiturus.

IV. Rectum ducis consilium industria legatorum & temeritas hostium propositi compos fecit. Refugientes ex composito equites incomposito agmine sequentem hostem, cum ad dictum locum pertraxissent, in latera discesserunt, sublatoque clamore Romana acies excepit barbaros. neque potuisset opportunius res cadere, magno in periculo futuris, qui cum Pomptino Ruffoque erant, si nuntiari adventus eorum nondum occupatis hostibus potuisset. namque in eo cum summa spei consistere videretur, ut euntes, quo mittebantur, deinde prorumpentes fallerent hostem, eaque de causa galeas frondibus contexissent; forte conspecti a duabus Gallicis mulierculis erant, quæ, lumine etiam tum incerto, conventum vitantes, ad menstrua pro exercitus salute vota solvenda montem ascenderunt.

V. Sed pugna jam cœpta, in tempore decurrentes, tantum fugitivorum exercitui terroris intulerunt, ut cædes inde potius, quam pugna, esset. Triginta quinque millia armatorum, cum iplis ducibus eo prælio interfecta, receptæ quinque aquilæ Romanæ, signa sex & viginti, multa præterea spolia, inter quæ quinque fascēs cum securibus. Cum per se magna victoria esset, viam patefecit ad majorem: neque diu post cum Spartaco debellatum. Crassus enim, pœnitens consilii, quod alios advocari duces jussisset, post tantas hostium copias deletas, plenus alacritatis ac spei, summa vi instabat reliquis, ut, priusquam Pompejus venisset, cetera belli conficerentur.

VI. Res enim Hispaniæ interim in eum statum venerant, ut, omnibus ferme compositis, paucissimæ hostium reliquiæ essent. Duæ præsertim urbes, Uxama & Calaguris resistebant:

§ III. Front. 2, 4. Oros. 5, 24. Plut. § IV. Plut. Sallust. Front. 2, 4. § V. Liv. Epit. Oros. Front. 2, 5. Plut.

*T. Liv. Vol. IX.*

C c

sed Uxamam Pompejus evertit; Calaguritani diu ab Afranio circumfessi, non ante capi potuerunt, quam ad extremam necessariorum inopiam compellerentur. Nam eo feritatis redegit fames, ut, nullo jam alio in urbe animali reliquo, uxoribus liberorumque corporibus vescerentur; & parte consumpta, reliqua cadaverum ad diuturnitatem usus salirent. Hæc scelera nihilominus perituri patrare, quam victoris experiri clementiam, maluerunt. Idcirco, tandem expugnata urbe, interfecti omnes, oppidum ipsum incensum atque deletum.

VII. Interim deducto reliquo exercitu, Pompejus, cum ad montes Pyrenæos pervenisset, oppidum de suo nomine condidit, (Pompelonem obtinuit vocari, hodie Pamplona est, regni Navarræ caput) & tropæa excitavit, quibus *oppida octingenta septuaginta sex, ab Alpibus ad fines ulterioris Hispaniæ, in ditionem redeisse* inscripsit; Sertorii nomine dissimulato, quod de Romano tropæum erigi incivile judicabat, quamquam in eo victo plus gloriæ, quam in tot receptis oppidis, esset. Transgressus in Italiam Pompejus, summa populi lætitia exceptus est: non ob illustrem modo victoriam, bellumque civile, quod omnia externa conciebat, penitus sublatum; sed quia tribunitiæ potestatis, quam restitui flagrantissime cupiebant, futurus auctor existimabatur; eaque res jam olim dilata in adventum ejus fuerat.

VIII. Quo majore studio populus, ut dignitatem ejus augeret, *proficisci eum in expeditionem adversus Spartacum* jussit. Strepebant quotidianis concionibus tribuni plebis, *hunc unum optimum imperatorem, quocunque se vertisset, certam victoriam trahere. simulatque conspectus a fugitivis esset, debellatum fore.* Eo diligentior Crassus instare Spartaco, festinare, ne penes alium confecti belli gloria foret. neque minus apud fugitivos properabatur. Forte Spartacus post sociorum cladem, cum ad Petellinos montes se reciperet,

§ VI. Plut. in Pomp. c. 32. Oros. Jul. Exsuperant. Flor. 3; 22. Val. Max. 7, 6. Sallust. § VII. Oros. Jul. Exsuperant. Idid. 9, 2. Plin. 7, 26. Sallust.

insecutos L. Quinctium & Tremellium Scrofam Crassi quaestorem fuderat.

IX. Ab hac victoria spiritus adeo creverunt fugitivorum, ut progressum in Calabriam ducem, convertere agmen, & incedenti per Lucaniam Crasso occurrere cogerent. Neque prorsus carebat ratione consilium, quia instante jam Pompejo, cunctantibus nulla spes effugii, pugnae quoque fors durior ostendebatur. Sed Spartacus, conditionibus tentatis, & aspernante Crasso, Brundisium petebat: cum suorum clamoribus victus, in Lucaniam referri signa iussit, & ad caput Silari amnis castra metatus est.

X. Nam ad Brundisium contendente fama appulsi e Thracia Luculli perculerat. Idcirco Crassus, cognito hostis adventu, nihil moratus, castra castris contulit, & quo magis ad pugnam irritaret feroces animos, circumvallare hostem orsus est. Ita prohibentibus opus fugitivis, cum, inter paucos orto certamine, vicissitudo victoriae plures subinde alliceret; Spartacus, universo exercitu educto, & equitatu, qui nuper ad eum accesserat, in cornibus locato, ipse inter pedites stetit, acieque structa, equum admotum sua manu confodit, *si quidem victus esset, non amplius usurum eo dicens; victorem multos habiturum, & bonos.*

XI. Pugna fuit vehementer anceps, donec Spartacus superfuit, qua forte Romanum imperatorem agere conspexerat, viam ferro muniens. Sed posteaquam duobus centurionibus, qui pro Crasso propugnabant, impigre caesis, penetrare ad illum nequivit, fauciumque femur submisso genu fulciens, concursu hostium est interfectus: fugitivorum turbatis metu ordinibus, nihil postea, nisi caedes, fuit. Quadraginta millia eo proelio caesa sunt. Victores circiter mille ceciderunt. pro his tria civium Romanorum millia, qui in vinculis apud Spartacum fuerant, recepta. cadaver Spartaci non potuit reperiri.

§ VIII. Appian. civil. l. 1. Plut. in Crass. c. 20. § IX. Orof. § X. Appian. Plut. § XI. Athenæ. 6, 21. Appian. Liv. Epit. Orof. Sallust. Plut. in Pomp. c. 32.

XII. At qui supererant prælio fugitivi, diversa, uti solet rebus perditis, capeſſunt. Namque alii fiducia gnaritatibus locorum, occultam fugam ſparſi, alii globis eruptionem tentavere. Sic agmina ferme quadraginta facta, quo & Craſſus aliique duces, veluti feras in montibus & ſilvis indagando, pleroſque omnes aut interemerunt, aut abriperunt victos. Unus in agro Lucano conſtiterat, gnarus loci, nomine Publior. ad hunc magna manus fugitivorum ſe aggregaverat, ut quinque circiter hominum milia eſſent.

XIII. Sed hos Pompejus obtrivit, forte cum exercitu ſuperveniens: ſcripſitque ſenatui, *fuſos a Craſſo fugitivos, a ſe radices exciſas eſſe belli*. Ita tandem illud formidabile belli ſervilis incendium, multo utrinque ſanguine reſtinctum eſt. ſexaginta milia fugitivorum cum Spartaco, & poſt illum cæſa ſunt, capta ſex milia; quos victores tota via, quæ Romam a Capua ducit, diſpoſitis crucibus affixerunt. Craſſus, ſextum intra menſem Italia tantis cladibus metuque liberata, jam ſe non imparem Pompeji gloriæ ſerebat, ex prætura, ſicuti per legem Corneliam licebat; conſulatum petiturus, competitore Pompejo: quamquam hic nullum ante magiſtratum geſſerat, neque legitimam ætatem habebat, ſed magnitudine rerum geſtarum, & favore populi, ob hoc quoque flagrantiore, quod haud obſcure ſe auctorem reſtituendæ tribunitiæ poteſtatis profitebatur. Nec ille civium exſpectationi deſuit, quin ſtatim eo de negotio verba faceret, cum primam concionem ad urbem conſul designatus habuit.

XIV. Sed huic deſtinationi complures, interque eos homo ſapientiſſimus atque ampliſſimus, C. Catulus, adverſabantur. Inter hæc de M. Antonio triſtes nuntii venerunt, qui poſt Siciliam Græcoſque Aſiaticos ſtudio donandi rapiendique, in utroque immodicus, deſpoliatus, Cretenſibus bellum intulerat. Faville Mithridati videbantur; permiſſo, ut bellum Romanis facienti juvenus ſua militaret. Piratas etiam, Mithridaticarum partium genus, cum per-



sequeretur eos Antonius, aperte defenderant: dimissis cum superbo responso legatis, quos ea de re questum Antonius miserat. Is Antonius filius M. Antonii oratoris erat, clarissimi viri, sed nequitiam patri similis: cumque fratres etiam duos haudquaquam probatæ vitæ haberet, ipse omnium erat corruptissimus, ut perdundæ pecuniæ genitus videretur.

XV. Idem vacuus curis, nisi instantibus, tam contemti adortus Cretam fuerat, ut plures in navibus catenas, quam arma, portaret. Quam vecordiam celerrima poena consecuta est. pleræque enim naves a Cretensibus captæ sunt, remulcoque in portus tractæ; cum velut imitatione quadam triumphi captiva corpora, velis & funibus suspensa, eminus visentibus spectaculo essent. Infelix prælium, & pudor mox injussu senatus populique factæ pacis, ægritudine animi ad corporis quoque subruendam valetudinem Antonio causam præbuit: hominemque, multa contra sociorum salutem, & contra provinciarum utilitatem, & facientem, & cogitantem, in mediis ejus injuriis & cupiditatibus mors oppressit. Tamen Cretici cognomentum ab hac expeditione retulit; non victoriæ argumentum, sed belli temere suscepti.

XVI. At a duobus Lucullis honestius laudabiliusque gesta respublica est: quorum Marcus Macedoniam provinciam, Lucius Mithridaticum bellum obtinebat. M. Lucullus, qui Curioni successerat, majoribus per Thraciam rebus, quam ullus ante eum imperator gesserat, justissimum triumphum meruit. Quippe Getis, qui & Myſi vocabantur, superatis, Bessos, nationem ferocissimam, primus Romanorum ducum bello petiit, eosque in Hæmo monte ingenti prælio fregit. Sic receptis in deditionem Hæmimontanis, Eumolpiadem, quæ postea Philippopolis dicta est, mox Uscudamam, quæ Hadrianopolis est appellata, eodem, quo

§ XIV. Liv. Epit. Ascon. in Verr. 4. Plut. in Anton. c. 5. Flor. 3, 7. Appian. ap. Fulv. Ursin. Sallust. § XV. Flor. Diodor. ap. Fulv. Ursin. Liv. Epit. Cic. Verr. 3, 19. Plut. Appian.

aggressus erat, die expugnavit. Progressus deinde Calyben, quam Philippus Amyntæ filius, pessimis ibi collocatis hominibus, Poneropolin vocaverat, illa quoque capta, usque ad terminum gentium Thracicarum Tanaim, paludemque Mœotin penetravit.

XVII. Inde multas supra Pontum positas insulas in jurisdictionemque populi Romani redegit. Calatim, Phthiopolim, Parthenopolim, Tòmos, Istrum, Buziam omnem cepit, evertit Apolloniam, arma Romana Scythis monstravit; belloque confecto, sub tempus victi a Crasso Spartaci Romam regressus de Bessis triumphavit, & præter alia ornamenta, Colossum Apollinis, quem ex Apolloniatarum insula transvexerat, in Capitolio posuit.

XVIII. Sed L. Luculli, qui frater hujus fuit, nescio an majores eodem tempore, clariores certe, scriptorumque beneficio notiores res fuerunt; de quibus deinceps dicemus. Vere ejus anni, quo Cn. Orestes, P. Lentulus consules fuerunt, Lucullus, Muræna cum duabus legionibus ad obsidionem Amisi relicto, cum tribus aliis per montana versus Cabira movit, ubi Mithridates hiberna habuerat, & tum quoque iisdem in locis erat, eo consilio, ut Romanis advenientibus resisteret. Stationes tamen disposuerat in montibus, quæ & opponerent sese transitum molientibus, & ignibus excitatis, adventum hostium significarent.

XIX. His Phœnicem quendam regii generis virum præfecerat. qui signum quidem, factis ignibus, Mithridati dedit, sed ipse cum iis, quas secum habebat, copiis transfugit ad hostem. Mithridates impigre motus, amne Lyco superato, in campis patentibus pugnandi copiam fecit. Commisso equestri prælio, superiores regii fuerunt, rejectusque Lucullus, retro se ad montes recepit. Præfectus ejus equitum Pomponius, cum ad Mithridatem saucius adduceretur, roganti regi, *ecquid amicus ipsi futurus esset*, ji

§ XVI. Cic. Verr. 2, 8. Oros. 6, 3. Sallust. Sex. Ruf. Marcellin. 27, 8. Eutrop. Strab. l. 7. § XVII. Flor. 3, 4. Eutrop. Sex. Ruf. Appian. civil. l. 5. § XVIII. Appian. Mithrid. Plut. in Lucull. c. 28. Phlegon ap. Phot. Memnon.

*eum conservasset? Amicus, inquit, si quidem amicus populo Romano fueris; sin vero, hostis.* Volentibus eum post hanc vocem interficere barbaris, laudabili voce Mithridates occurrit, *in virtutem a fortuna destitutam scviendum* negans.

XX. Post hæc, per continuos aliquot dies instructam aciem Mithridates ostentare; Romanus retinere suos, & equitatu inferior, campis nolle credere: donec ancipiti malo circumventum (quia per patentia non audebat ducere; circumitus per montes longus ac tædii plenus erat) forte reperti venatores recrearunt, calle ostenso, per quem copias suas supra caput regis in locum ita comparatum duxit, ut pugnare volenti spatium non deesset, prælium detrectans cogi nequiret.

XXI. Cum neuter alterum adoriri decrevisset, casu contractum certamen est, quia persequentibus forte cervum regis, Romani quidam occurrerant: pluribus deinde, ut fit, hinc inde aggregatis, loco pulsi Romani sunt. Hæc ignominia, ex superiore loco conspecta, iram movit militibus, signumque pugnae continuo poposcerunt. Lucullus, quiescere iussis, ut doceret, quantum in præsentia boni imperatoris esset, cum paucis descendit, primisque fugientium, ut consisterent, occlamavit.

XXII. Cum illi paruissent, & proximi quique ad idem imperium exemplumque firmarent pedem: globo facto disjecit hostes, victorque ad suos rediit. deinde pro concione increpitos, qui fugerant, in conspectu totius exercitus fossam duodecim pedum discinctos fodere coegit. Sed longe majus occultiusque periculum, sub eisdem dies, quod virtute amoveri nequibat, casu idem Lucullus effugit. Olthacus quidam, ex Dardariorum Mæotica gente, cum apud Mithridatem de gloria & præmiis virtutis sæpe cum aliis regulis disceptasset, ut se omnibus ostenderet superiorem, Luculli capite regi promisso, specie transfugæ in Romana castra pervenerat.

XXIII. Is deinde, cum frequentibus excursionibus promtam euisamque operam exhibuisset, postremo quoque equestri prælio servasset multos, in propiorem admissionem receptus, mensæ consiliisque admoveri cœperat. Igitur observato tempore, quo missis principiis vacuum magis incustoditumque prætorium erat, brevi pugione accinctus ex more ad Lucillum introibat. Sed illum forte fatigatum longis vigiliis corpus meridiari coegerat: & Menedemus cubicularius, ad ostium stans, negabat *intromitti quemquam mortalium posse*.

XXIV. Ille, *subitum esse ac necessarium, quod afferret*, dictitans, nihilominus conabatur irrumperere; cum accensus ira Menedemus, *nihil salute imperatoris magis esse necessarium* regerens, ambabus manibus repulit hominem. Quare, ne suspectus haberetur, veritus Scythæ, equis, quos ante portam castrorum paratos stare jusserat, ad Mithridatem refugit, aliumque Scytham, nomine Sobadacum, transfugere ad Lucillum conari detulit: qui statim jussu regis comprehensus est.

XXV. Dum his aliisque rebus bellum trahitur, longe lateque omnibus circum evastatis, inopia utrumque exercitum incessit. Idcirco Lucillus, quo re annonaria commodiore uteretur, in planum degressus, quia patentibus locis equitatum regis timebat, ita metatus est castra, ut munimenti vicem uliginosum paludibus solum hosti objiceret, & regnum Ariobarzanis, intactum bello, a tergo haberet, unde commeatus subveherentur. Crebra inter hæc equestria prælia fiebant. Semel etiam, cum suos fugientes obviam egressus e castris Mithridates acerbe corripuisset, iis animis in pugnam redierunt, ut Romani fusi fugatique, etiam reversis a persequendo hostibus, suum quisque contubernalem pro victore metuentes, vix aliquando facerent fugæ finem: tantus eos pavor occupaverat.

XXVI. Hanc victoriam, missis ad vicinos reges natio-

§ XXIII. Front. Strat. 2, 5. Appian. Plut. § XXIV. Front. Plut. Appian. Memnon. Sallust. § XXV. Memnon. Appian. Sallust.

neſque nuntiis, magnificentius, quam verius, Mithridates extollebat, promptumque Romani exercitus exitum augurabatur. Sed eventus contra dedit. Cum enim haudquaquam reprehendendo conſilio hoc ageret, ut Lucullum com meatibus excluſum ad eas redigeret anguſtias, in quibus ipſe ad Cyzicum fuiſſet; negotium equitibus ſuis dedit, ut frumentatores e Cappadocia redeuntes (nec enim aliunde Romanus alebatur) exciperent.

XXVII. Neque deſidia regionum res corruppebat; ſed nimius pugnandi ardor non ſinebat a ſuis locis aliena diſcernere. Igitur primo Sornatius, cum una legione ex Cappadocia redux, præfectum regis Menandrum, alacritate majori, quam conſilio, congreſſum, cum magna hoſtium cæde, in fugam egit. Fabius deinde Adrianus, cum ex eadem Cappadocia magnum annonæ modum adveheret, a Menemacho & Myrone, quos Taxiles & Diophantus, cum quatuor peditum, duobus equitum millibus immiſerunt, laceſſitus eſt.

XXVIII. Et ſi, donec in æqua loca deſcenſum eſſet, exſpectare regii potuiſſent, fortaiſſis in periculo & cohortes Romanæ, & quam adducebant, annona fuerat: in ipſis adhuc anguſtiis invadente hoſte, & ſuum ſibi equitatum efficiente inutilem, haud ægre reſtiterunt, donec auxilium Lucullus ſubmitteret. Tum vero effuſa fuga Mithridaticorum verſus eum locum, ubi Taxiles & Diophantus tenebant, eodem etiam victorem deduxit. & poſt acre, ſed minime obſtinatum certamen, diſſipata barbarorum acies, diverſa fuga diſparuit: pauci cum ipſis ducibus ad Mithridatem pervenerunt.

XXIX. Magna eo die cædes regionum fuit, & a quinque Romanorum millibus, triginta millia, totius exercitus regii robur, fuſa referuntur. Mithridates, hac accepta clade, veritus, ne deſtitutum equitatu quamprimum Lucullus circumveniret, ſtatim convocatis amicis aperuit,

§ XXVII. Plut. in Lucull. c. 33. Memnon. § XXVIII. Appian. Memnon. Phleg. ap. Phot.

*sibi in animo esse discedere, priusquam itinera ab hoste clauderentur.* Illi suarum rerum anxii, non expectata luce, pecunias suas suppellectilemque emittebant e castris: & cura hoc a multis & divitibus fieret, brevi angustiae circa portam erant, & rixae agasonum, unoquolibet ante alios exire properante, audiebantur.

XXX. Exercitus, re cognita, visisque ducum farcinis, metu & indignatione commotus, prodique se vociferans, vallo proruto, qua cuique proximum erat, sine duce, sine imperio evadebat. Inter eum tumultum direptae multorum praefectorum farcinae sunt, custodibus interentis: Dorylaeus quoque, magni nominis ductor, nihil praeter purpuram, qua erat amictus, habens, propter illam interfectus est. Hermæus haruspex, qui & ipse exercitum duxerat, in porta castrorum, pedibus hominum jumentorumque obtrititus: rex ipse, extremis proximus, inter turbam pedes profugit. nec enim quisquam ministrorum apud eum remanserat, donec impulsu turbæ humi stratum Ptolemæus eunuchus conspexit, equumque, desiliens ipse, praeiuit.

XXXI. Ne si quidem expedita fuga erat, Gallograecis equitibus, qui Lucullo militabant, terga prementibus: sed forte, an consilio Mithridatis, objectus mulus, ex iis, qui aurum & argentum regum portabant, avaritiam persequentium praedae dulcedine distinuit, tempusque evadendi dedit: ceteri plerique caesi sunt. nam Lucullus, cognita suorum victoria, e vestigio equitatum ad persequendos hostes miserat, legiones circumdederat castris, ut ibi fugientes, hic resistentes internecione delerentur. Amplius sexaginta Ponticorum millia his cladibus extincta creduntur.

XXXII. Praeter ereptum triumpho Mithridatis corpus, confectique belli gloriam extortam, aliud quoque non

§ XXIX. Appian. Eutrop. Plut. § XXX. Appian. Plut. Strab. I. 12. Mannon. § XXXI. Plut. Cic. pro leg. Manil. c. 9. Appian.

leve incommodum Lucullo militum avaritia attulit. Calistratum, qui regi a secretis fuerat, comprehensum in castra ducere iussi, cum aureis quingentis succinctum fessissent, interemerunt. Castra tamen regis diripi, prædamque militis esse passus est, quo insolentiam illorum moliret, nuper etiam in Amisena obsidione invidiose querentium, *quod nullam civitatem vi caperet, conditionibus omnes acciperet in deditionem, ne militi pro labore tanto periculisque fructus ullus usquam esset.*

XXXIII. Sane vix ulli imperatorum justior victoria flagitio militari de manibus excidit: meritumque virtute decus ingratus impiusque exercitus, varie vexato, & ad postremum relicto Lucullo, interceptit. Dum hæc diversissimis locis aguntur, Romæ haud exiguum metum Pompejus atque Crassus faciebant, exercitus retinendo. nam ille, *se Metellum expectare*, dictitabat, *ad triumphum venientem*: Crassus *æquum esse* dicebat, *priorem Pompeji exercitum dimitti*. Sed Pompejus eam quidem dubitationem sustulit, *statim a triumpho missos facturum milites pollicitus*. Igitur cum ex Hispania Metellus advenisset, multi sub finem anni hujus triumphi fuerunt.

XXXIV. Sub idem enim tempus & ex Macedonia C. Curio, & ex Isauria P. Servilius, & ex Macedonia M. Lucullus triumpharunt. Ex Hispania Q. Metellus, & Cn. Pompejus, hoc nomine quoque gloriosius, quod iterum eques Romanus triumphabat. Crassus de fugitivis triumphum petere pudore prohibitus, ovans inivit urbem, hoc novo honore magna ambitione impetrato, ut pro myrtea corona, qualem ovantes sumere consueverant, laurea uteretur. Consules deinde M. Crassus, Cn. Pompejus Magnus facti. Eo tempore Pompejus, quod per militiae tempora senatus habendi consulendique rationem ignorabat, M. Varonem familiarem suum rogavit, *uti commentarium faceret*

*isagogicum, ex quo disceret, quid facere dicereque deberet, cum senatum consuleret.*

XXXV. Consul enim fiebat ex equite Romano, priusquam quæsturam gessisset. tanta hujus adolescentis gratia & virtus erat, ut quibuslibet legibus facile solveretur. Latum ex senatusconsulto ad populum est, *ut Cn. Pompejum consulem fieri liceret, cum curulem magistratum nullum per leges capere potuisset.* Nec illud tamen plus adjicere magnitudini videbatur, quam quod M. Crassus, contemtor omnium, & divitiis facundiaque inter primores excellens, non erat ausus consulatum petere, priusquam Pompejum rogavisset; & Pompejus, olim cupidus demerendi hominem potentissimum, adeo enise gratiam suam interposuerat, ut non pro Crasso minus, quam pro semetipso, laborare testaretur.

XXXVI. Discors tamen magistratus fuit: nec quidquam magnopere ab iis domi forisve memorabile gestum est, nisi quod Crassus, Herculi decimas solvens, decem mensarum millibus epulum populo præbuit, ac frumentum gratuitum in trimestre dimensus est. Pompejum illa dies magno honore illustravit, qua militiæ vacationem a censoribus postulavit: quod, expletis stipendiis, equites Romani facere consueverant. Sedebant pro tribunali L. Gellius, Cn. Lentulus censores. ad hos Pompejus descendit in forum, equum manu ducens, ceterum insignibus nitens magistratus sui.

XXXVII. Ubi stetit equum ad tribunal, major natu censor, *quæro ex te, inquit, Pompei magne, ecquid omnia stipendia expleveris?* Cui Pompejus alta voce, *explevi, inquit, & quidem me imperatore.* Tum vero mixtus lætitia & admiratione clamor populi ortus vix fedari potuit; donec surgentes de tribunali censores, ut populo applaudenti

§ XXXIV. Eutrop. Cic. in Pison. c. 19. Vellej. 2, 30. Plut. in Crass. c. 22. Agell. 5, 6. Plin. 15, 29. § XXXV. Liv. Epit. Plut. in Pomp. c. 33. Idem. in Crass. Vellej. 2, 44. § XXXVI. Vellej. 2, 44. Plut. apoph. Rom. c. 35. Idem in Pomp. & Crass.



gratulantique gratum facerent, Pompejum consulem domum deduxerunt. Magnus enim ejus apud populum favor erat, cum plus in senatu Crassus polleret. & erat in invidia Pompejus, quod plebi potius, quam fenatui, gratificatus, tribunitiam potestatem restituerat, assentiente quidem Crasso, quia prohibere nequibat: sed Pompejus solus pertenderat, nec sibi glorioso, nec in rempublicam utili facinore, quæ iterum ab eo principio tribunitiis seditionibus periculose vexata est; donec hac quoque non ultima impellente causa concideret.

XXXVIII. Tribunitia potestas restituta, traxit & judiciorum ordinem, quod eorum levitas flagitandæ potestatis ejus permagnum desiderium fecerat. Igitur L. Aurelius Cotta prætor, favente & annitente Pompejo, judicia ad equites transtulit, non ut penitus excluderentur fenatores, sed ut major esset equitum potentia, communicatis inter tres ordines judiciis, fenatum, equites, & tribunos ærarios, qui ferme erant ex equitibus. Iisdem consulibus P. Virgilius Maro natus perhibetur, Idibus Octobris; ut publicorum actuum monumentis natalis ejus infereretur, ingenii operumque præstantia meritis. Interea Lucullus Cabi-  
 rorum castellum, cum aliis multis, custodias thesaurorum victorumque, in deditionem accepit; passim ad victorem præfectis regiis deficientibus, quorum ex numero Strabonis, ejus, qui geographiæ pulcherrimum opus edidit, avus maternus, quindecim castella, fide accepta, tradiderat.

XXXIX. Magnæ in iis opes, tætri quoque carceres reperti, quibus Græci barbarique multi olim desperata salute attinebantur. Inter hos & Nyfa liberata est, soror regis, eademque ob Nicomedem, cui nupta fuerat, hostis. Hanc igitur nihil nisi extrema expectantem, inopi-

§ XXXVII. Plut. in Pomp. Ascon. in Verr. 2. Sallust. Catilin. c. 38. Liv. Epit. Cic. de legg. 3, 9. § XXXVIII. Cic. divin. c. 3. & pro Cluent. c. 47. Liv. Epit. Plut. Ascon. in Cornel. & Pison. Phlegon ap. Phot. Sallust.

nata salus respexit. at alias mulieres regias, cum procul omni metu abesse viderentur, triste fatum comprehendit. Mithridates enim, desperatione rerum suarum Ponto profugus, cum venisset in Armeniam, nec admitti se in conspectum Tigranis videret; immani tristitia & mœrore percussus Bacchidem eunuchum misit, ut sorores uxoresque, & concubinas regias tolleret, quæ Pharnaciæ servabantur, quod oppidum haud procul Trapezunte aberat.

XL. Multæ erant, sed præ ceteris insignes Roxane & Statira, quæ circiter annos quadraginta in virginitate exegerant: conjugesque duæ, Jonici ambæ generis, Berenice Chia, & Monime Milefia, cujus præcipua inter Græcos fama erat. Hanc, ubi Bacchides arbitrium mortis dedisset, detractum capite diadema obvolvissè collo ferunt, ut inde suspenderet corpus, abruptoque, exclamasse, *o execrabilis fascia, ne ad hoc quidem usui eris!* consputum deinde abjecissè, jugulumque præbuissè percussori. Berenice, veneno temperato, partem præsentis rogantique matri dederat. Ergo remissior & divisa vis potionis cum in senili corpore viam leti haud difficulter invenisset, juvenculam diu cum anima luctantem Bacchides strangulavit.

XLI. Sororum regis longe dispar ut animus, ita sermo extremus fuisse traditur. Roxane, cum venenum miscuisset, *Hoc igitur, inquit, extremum a fratre munus teneo, invisum certe, nisi esset odiosior, qui misit. Hoc igitur erat, cur me felicem prædicarent homines, tantis majoribus, in hac fortuna genitam, sororem magni Mithridatis! Ergo igitur, si quoslibet de vulgo parentes, quemlibet fratrem fors dedisset, viverem. quia regibus orta sum, & hunc consanguineum habeo, moriendum est. At illum tanta, ut aiebant, potentia, tanta virtute præditum, tutelam omnium, etiam minimorum fore credideram; nedum ut sororum suarum proditor, sororum interfector esset.*

XLII. Sane jam tum satis esset miser, si ex tanta fiducia

§ XXXIX. Strab. l. vi, Plut. in Lucull. c. 33. Memnon. liv. Epit. Appian. Mithrid. § XL. Plut.

*tantum in metum venisset. sed fac metuere, quam procul adhuc absunt Romani? Cur non servamur in spem melioris fortunæ, nunquam defuturo veneno, si sequius consuli necessum sit; cur non in Bosporum aut Colchos mittimur, quo populi Romani non modo arma, sed etiam nomen vix penetravit? cur hostis & carnificis officium ipse occupat? quid facerent Romani crudelius? Sed aliud nimirum expectare sorores non oportuit, ab isto quidem, qui matrem venenum coegit bibere! Sed age, age, bibamus, soror, si nihil aliud, hoc certe consecuturæ, ut postea nihil in nos tali tyranno liceat. at tu, pessime omnium, & perfidissime parricida, in hoc per annos quadraginta virgines asservasti, ut, ubi tu summam rerum ad desperationem adduxisses, veneno moreremur? Tibi vero scelerum ultores Dii eandem aliquando necessitatem moriendi imponant, facultatem negent!*

XLIII. Hæc dicentem Statira consolabatur, fratrem simul excusans. Summæ fortunæ, sicuti singularem honorem, potentiam, gloriam, ita nec vulgares molestias adjacere. Deorum imperium in reges, quemadmodum in ceteros homines potestatem regum esse. nullum tanta sapientia aut prudentia unquam exstitisse, ut destinatum sibi a potentiore exitum vitare quiverit. Idcirco minime imputandum Mithridati, sive quod vinci debuerit, omnibus frustra tentatis; sive quod victus, ultima cura providerit, ut quod suorum servari non posset, honeste saltem, & in libertate moreretur.

XLIV. Sibi quoque minime lætam mortem esse: verumtamen hanc malle, quam quæ timenda essent in potestatem hostium venientibus. in bello nemini parci: multos adeo intervenire casus, quibus vilissimum quidem calonem coercere, ne suus quidem imperator posset. Sæpe & alias, & hoc bello audivisse, quanta in captis urbibus esse licentia militis, quanta cum crudelitate libido soleat.

XLV. Sibi quidem vel millies mori satius esse, quam ut hanc non dicere sortem, sed vel periculum subeat. non igitur maledicendum esse fratri, qui sanguinem suum, per longissimam temporum seriem deductum a regibus, contaminari, aut servire nobis: sed gratias potius agendas curanti, ut, quatenus omnibus

*molestiis liberari nequirent, maximis certe & gravissimis eriperentur. Magnum in eo fraterni amoris curæque specimen inesse, sed & vere regii animi, quod inter suos casus laboresque, de sororum periculo, deque domus suæ dignitate cogitasset; neque dubium esse, quin aliud nihil viderit pro his melius: nam eadem mandata dedisse ad uxores, quas utique non odisset. Post hæc & talia verba, sumto veneno, exanimatæ sunt.*

XLVI. Hæc audita mœrore affecerunt Lucullum, clementem virum, & plurimæ humanitatis: præfectos autem Mithridatis, velut signo dato, ad tradenda, quibus præerant, præsidia, paucis exceptis, incitaverunt, ultimæ necessitatis id facinus esse reputantes. Lucullus Mithridatem usque ad Talaurea (castelli nomen est) infecutus, ubi quadriduo ante illum in regnum Tigranis perfugisse intellexit, Chaldæis, qui & Chalybes vocantur, Tibarenisque subactis, receptaque minore Armenia, quæ in ditione Mithridatis fuerat, ad obsidionem Amisi reversus est. Amisenis condiciones respuentibus, (Callimachus enim præerat, machinarum mirus artifex, consilioque & audacia promptus) ad Eupatoriam se contulit: quam haud procul Amiso regiam Mithridates struxerat, & ex suo cognomento voluerat appellari.

XLVII. Cum & hic impigre resisteretur, Lucullus per aliquot dies languidiori oppugnatione usus, propugnatorum negligentiam felici consilio aluit. cum enim statâ quasi diei hora soleret abducere ab oppugnatione suos, ubi opportunum visum est, eodem tempore *corripere scalas, & in mœnia eniti*, jussit. infrequentes defensores aderant, plerisque jam de more per hospitia dilapsis. Statim igitur capta Eupatoria, statimque deleta est. neque multo post Amisus, eodem ferme modo, in potestatem venit: parique facto incensa est, Callimacho injiciente ignem, ut interea facilius abnavigare posset, an quia prædam Romanis inuidebat.

XLVIII. Nec eripere oppidum, licet summa ope anni-

§ XLVI. Plut. in Lucull. c. 37. Appian. Mithrid. Strab. l. 12. Eutrop. Memnon. § XLVII. Memnon. Plut.

teretur, Lucullus poterat: jussique ignem restinguere milites, minaci cum clamore arma quatiebant, donec exercitui se prædam concedere edixit, modo ab incendio adificia protegerentur. sed intentus rapinis miles auxit magis, quam restinxit ignem, cum multi, quoslibet angulos cum facibus perscrutando, ultro succenderent aedes, ingentemque in urbe paulo ante frequentissima vastitatem facerent. Idcirco postridie ingressus urbem Lucullus, non tenuit lacrimas, dixitque amicis, *sæpe sibi fortunam Sullæ admirabilem visam, eo maxime, quod Athenas servare, cum vellet, potuerit: se parem gloriam magno studio expetentem, ad L. Mummiæ sortem detrudi, ut everfor potius magnarum urbium, quam servator prædicetur.*

XLIX. Bona tamen pars urbis erepta flammis est plus viæ miseratione, quæ opportune, velut ex machina, prorupit. Et Lucullus, priusquam inde discederet, operam dedit, ut pleraque corrupta restituerentur. edictoquoque collegendis Amisenos, qui e patria profugerant, novisque colonis Græcis, quibus ibi habitare placebat, auctos, agro quindecim millium passuum urbi adjecto locupletavit; Alexandrum imitari studens, qui eandem urbem, cum Persicis regibus parentem invenisset, liberaverat. Amisum Athenienses condiderant, quo tempore classibus validi, non proxima tantum, sed & jam longius sita maria pervagabantur. eoque nuper multi, ut tyrannidem Aristionis fugerent, velut in aliam patriam concesserant: ignari, eodem quoque, quam metuebant, belli perventuram tempestatem esse.

L. Sed illos Lucullus honeste vestitos, ducenis distributis denariis, in patriam remisit. Tunc etiam inter captivos Tyrannio fuit, celeberrimi nominis Grammaticus. eum Lucullus gentili suo Murænæ, præcipuo legatorum, rogatus concessit. Ille magnanimi doctissimique, & ob hoc doctorum studiosi imperatoris, munere perquam illiberaliter usus, manumisit hominem, ut ab eo commoda, quæ patronis liberti præstant, adipisceretur. alia quoque similia multa

idem Muræna designavit, bello non spernendus, vita moribusque multum ab imperatoris sui nobilitate discrepans. Rebus Amisî ex præsentî copia constitutis, Lucullus in Asiam hibernatum abiit, ut civitatibus illis, sub æris alieni pondere gravissime anhelantibus, succurreret. Interea misit ad Tigranem, Mithridatem sibi dedi postulans. Eant legationem Ap. Claudius obiit, qui uxori imperatoris frater, & liberis ejus avunculus erat.

§ L. Strab. l. 12. Plut. Memnon. Sallust.

---

JOANNIS FREINSHEMII  
SUPPLEMENTORUM  
LIVIANORUM  
LIBER LXIII.

IN LOCUM LIB. XCVIII LIVIANI.

---

E P I T O M E  
LIBRI NONAGESIMI OCTAVI.

*Machares, filius Mithridatis, Bospori rex, ab L. Lucullo in amicitiam receptus est. Cn. Lentulus & L. Geilius censores asperam censuram egerunt, quatuor & sexaginta senatu mortis: a quibus, lustro condito, censa sunt civium capita quadringenta quinquaginta millia. L. Metellus prætor in Sicilia adversus piratas prospere rem gessit. Templum Jovis in Capitolio, quod incendio consumtum ac refectum erat, a Q. Catulo dedicatum est. L. Lucullus in Armenia Mithridatem & Tigranem, & ingentes utriusque regis copias, pluribus præliis fudit. Q. Metellus proconsul, bello sibi adversus Creteneses mandato, Cydoniam urbem obsedit. C. Triarius, legatus Luculli, adversus Mithridatem parum prospere pugnavit. Lucullum, ne persequeretur Mithridatem ac Tigranem, summamque victoriæ imponeret, seditio militum tenuit, quia sequi volebant: id est, quia legiones Valerianæ, impleta a se stipendia dicentes, Lucullum reliquerunt.*

I. **O**PPRESSAM ære alieno Asiam, &, quo recreata est, Luculli consilium traditurus, cohibere animum nequeo, quin præsentibus temporibus ingemiscat, Germaniam intuens, nullo miserante deterius propemodum ab hac peste, quam sub tricennalis belli nefandis cladibus, pereuntem. Cum enim ad omnes prorsus homines, quibus aliquantulum rei est, aut fuit, malum istud pertineat, a plurimis annis, sine cura, sine lege, ut cuique potentia aut debilitas aderat, extorquebantur a debitoribus nummi, aut negabantur. Ita, dum alii partem fortis offerendo, tamdiu usurpatæ pecuniæ alienæ mercedem postulant: alii, quamquam præter suam culpam fortunis exuti, etiam usuras repræsentare coguntur. Justitia & concordia, quæ in medio esse debuerant, miserandum in modum lacerabantur: donec prorsus Alexandrino more nodum hunc secari placuit; utinam durabili ad pacem remedio. Sed his quoque calamitatibus nostris finem aliquem viderit Deus!

II. Asiæ acerba ob impotentiam fœneratorum conditio erat, quod imperatam a Sulla pecuniam viginti millia talentorum, civitates a publicanis maxime sub gravibus usuris acceperant. Erat illa potentissima factio, & plerumque magistratus Romanos opibus & gratia sic habebant obnoxios, ut illorum auctoritate ad quodvis desiderium suum abuti possent. Ergo fervilem in modum vexati provinciales, quo exedentem omnia voraginem interdum placarent, privatim liberos suos, virgines, puerosque formosos; publice, quidquid ornamentorum in civitatibus erat, vendere cogeantur. quæ omnia cum insatiabile fœnus hausisset, nec ideo expungi debita possent, ad extremum ipsi creditoribus in servitutem addicebantur.

III. Adversus hæc Lucullus primo constituit, ne majores centesimis usuræ ducerentur. Deinde usuras, quæ fortem excefferant, amputavit: non ad invidiosum illud & inverecundum alterius tanti commentum, quo nuper



ex orco revocato, & interpretatione aucto, perfidiosissimi seculi turpitudine ad exstinguendas fidei & justitiæ tenues reliquias erudiri gaudet: sed quia rem suam creditoribus salvam præstabat, jamque providerat, ut expensam pecuniam brevi recuperarent, tam gravibus usuris ulterius aggravari provinciam non patiebatur. Quippe quod longe utilissimum apparuit, creditorem in bona obæratum hæcenus misit, ut quartam reddituum partem perciperet. ita neque debitor egebat, & fœnerator, haud longo tempore, quod erat ab ipso profectum, cum usuris ad præscriptum a Lucullo modum recuperabat.

IV. Quod si quis usuras applicuisset forti, & fortem & usuras amittebat. Hac æquitate rem paulo ante desperatissimam confecit, ut intra quadriennium omni debito liberaretur Asia, & possessiones, obligatione solutæ, ad eos, qui antea tenuerant, reverterentur. Hoc pacto duplum ejus, quod dederant, paucis annis affecuti fœneratores, non ideo quiescebant. nam, ut ipsi subduxerant calculum, non quadraginta ipsis, sed centum viginti talentorum millia debebantur. Ceterum in provincia novare nihil poterant. Romanam scripserunt ad suos, tribunosque plebis, commodum præstinam omnia turbandi licentiam adeptos, mercati sunt, ut actis desideriiisque Luculli obstreperent.

V. At ille magna, non solum apud suam modo provinciam, sed universos, gloria (justos enim magistratus, rebus ipsis cogentibus, unaquæque civitas laudat) Ephesi residens Asiam constituebat legibus, cumulabat fide pacis, bonis spectaculis etiam, ludisque triumphalibus seque & illam recreabat. vicissim in honorem ejus Asiatici instituerunt Lucullea, celebraruntque. Dedit deinde Ap. Claudio operam, de legatione sua referenti. eum regii viarum duces, longo circumitu, & sinuosis itinerum anfractibus destituerant, donec a servo doctus, quem natione Syrum secum habebat, illis valere jussis, paucis diebus ad Emphratem, & annis superato, Antiochiam pervenit.

VI. Aberat Tigranes, & , Ptolemaide capta, cui se regina Syriæ Cleopatra incluserat, reliquas Phœnices urbes obibat. Idcirco Appius, dum illum opperitur, nonnullos regulorum haudquaquam æquo animo Tigranis opes intueri cernens, illorum animos Romanis conciliabat. quorum & Zarbienus fuit, Gordyenorum rex, quam gentem Gordys condidisse traditur, Triptolemi filius. Civitates etiam multas nuper a Tigra-ne domitas, cum ad ipsam clam misissent legatos, in præsentia quiescere iussit, ut advenienti Lucullo se reservarent. Græcarum enim urbium spiritus Armenium jugum haudquaquam animo æquo patiebantur. Et super omnia invisa erat intolerabilis superbia Tigranis, qui fortuna inflatus, neque cupiditatis suæ finem, neque magnitudinis modum reperiebat.

VII. Nam a mediocribus initiis profectus, annis viginti quinque multas gentes domuerat. Mesopotamiam, Syriam, Phœnicen occupaverat. Parthos gravius, quam quisquam ante eum alius, vexaverat: infinita prope millia Græcorum, e Cilicia Cappadociaque abactorum, in Mesopotamia collocarat; Scenitis etiam Arabum, transferre fedes in loca sibi placentia, coactis. His rebus ita erat elatus, ut multos in quotidiano ministerio reges haberet. quorum quatuor, si equo veheretur, juxta incedebant pedites; si responsa legatis gentium redderet, consertis pectinatim manibus adstantabant taciti.

VIII. Nihil hac scena perturbatus Appius, cum ad edenda mandata in conspectum venisset, *L. Lucullus*, inquit, *populi Romani imperator, Mithridatem ob multas & graves injurias justo pioque bello petito regno suo expulit, rex Tigranes. quem igitur nobis hostem sua improbitas, servum victoria & virtus nostra fecit, eum, quoquo fuga se proripuit, jure gentium reposcimus. Non arbitramur, te, ut hominem, donec opibus & fortuna floruit, omnibus iniquum ac gravem, mearis, cum victo & exsule communia habere fata velle. nec*

§ VI. Appian. Joseph. 15, 24. Plut. in Lucull. c. 42. Strab. l. 16. § VII. Eutrop. Plut.

enim ignoras, eandem causam esse eorum, qui fugiunt heros, & qui fugitivos recipiunt. Etiam si te præ multis regibus potentia valere scio, non tamen opinor tam levi de causa facturum esse quidquam, quo de illa dimicare cogaris. Quanto plura possides, tanto gravius periclitabere.

IX. Quid arma Romana valeant, si magnus nuper Antiochus, & magna Carthago parum grandia aut recentia documenta sunt, Mithridates docere potuit, qui & ipse vulgo jam ceperat Magnus vocitari. & tamen ille in ea tempora incidit, quibus arma civilia, aut socialia, aut servilia denique, vires imperii nostri divisas atque districatas tenebant. nunc intestina bella penitus quieverunt, nullus usquam Sertorius est, nullus Spartacus, qui afferre impedimentum queant, ne, quod senatui populoque Romano visum fuerit, paribus animis viribusque exsequamur.

X. Notarunt, qui adfliterant, hac juvenis audacia tantum hominem, qui tot ab annis liberam vocem nullam audiverat, non tenuisse vultus, quem induerat, æqualitatem; sed, quamquam ferenum placidumque fingeret, commotionem animi prodidisse. Respondit, sibi quoque non ignotam Mithridatis pravitatem esse, sed necessitudinem revereri, & commune apud omnes homines opprobrium, si socerum suum ad exitium dedidisset. In eandem sententiam & literas ad Lucillum dedit, in quibus imperatoris omissa appellatione, hanc causam homo vecors attulit, quod se quoque regem regum appellare Romanus neglexisset.

XI. Misit tamen multa & splendida dona Appio, & illo recusante, plura etiam & pulchriora adjecit. e quibus Appius, ne quasi professis odiis superbum & potentem regem irritaret, una phiala accepta, cetera remisit, celerique cursu ad imperatorem suum est relictus. Toto illo tempore cum Heracleotis negotium M. Cottæ fuerat: isque iterum tentata improspere oppugnatione, Triarium advocavit, ad prohibendos comعات, qui obsessis mari subvehantur. Triarius cum suis tribus & viginti triremibus,

viginti Rhodiis, cum Cottæ nuntiandum curavisset, qua die esset affuturus; in idem tempus suum exercitum paravit Cotta, acciditque, ut simul terra Romani, simul navibus ad Heracleam accederent. Heracleotæ, re inexpectata perterriti, tamen triginta naves femiplenas deducunt: ceteri ad pellendum mœnibus hostem accinguntur.

XII. In agmine Romano primæ Rhodiæ naves ibant: in quas illati Heracleotæ, statim deprefferunt tres hostiles; ipsi vicissim quinque perdidit. Superveniente deinde Triario, cum aliquandiu restitissent, in majorem portum coacti sunt refugere, navibus amissis quatuordecim. idcirco, licet irritus tum quoque conatus Cottæ fuisset, inopia tamen rerum necessariarum, quod Triarius quotidie cum triremibus oberrans subvectionem comæatuum impediēbat, brevi in maximas calamitates obsessi inciderunt, donec chœnix frumenti octoginta drachmis Atticis veniret. tandem, ut solet, ex fame pestilentia accessit; quæ & Lamachum, omnium malorum patriæ auctorem, præ ceteris longius & acerbius excruciatum absumsit, & in præsidarios præcipue sæviens, de tribus millibus, qui tum adhuc superfuerant, trientem demessuit.

XIII. At Romani, quibus aura liberior & annona sufficiens erat, intacti ab his suppliciis manserunt. Inde Connacorigi tempus visum de deditioe agendi, quo suæ salutis vel per interitum Heracleæ consulere. Igitur assumpto in societatem consilii Damophèle, qui partium Lamachi cum fuisset, etiam in præfecturam ejus successerat, Cottæ ingenium, ut ferox & infidum, averfati, cum Triario agere cœperunt.

XIV. Ea re per epistolam quandam interceptam prodita, magno cum tumultu in theatrum populus concurrat; cunctisque metu trepidantibus, Brithagoras e primoribus civium oravit Connacoriga, *siquidem deditio cordi esset, at saltem ne ignavis oppidanis res tanta agitaretur*, seque in illud negotium legatum offerebat; cum negaret Connacoriga,

*deditionem sibi placere; esse meliorem salutis viam, sibi que ex  
literis amicorum compertum, a Tigraue Mithridatem exceptum  
honestissime, neque diu emansura auxilia.* Sic decepto po-  
pulo, Connacorig intempesta nocte milites suos cum sarcinis  
(id enim Triarius permittebat) imposuit triremibus, simul-  
que cum iis abnavigavit.

XV. Sub idem tempus Damopheles apertis portis Tria-  
rium accepit. nonnulli milites, siue tædio moræ, siue quo  
vi capta civitas videretur, per muros transcendere malue-  
runt. Sic occupata Heraclea, crudeliter in oppidanos sæ-  
vitum. Romanique memores, quæ longam inter obsidionem  
fastidia, quos labores tolerassent, vel ab aris & simulacris  
abstractos jugulabant. quo metu magna pars per mœnia  
desiliens, per universam regionem, ut quisque latebras  
speraverat, dissipata est, aut ad Cottæ castra perfugit. Ille,  
hactenus ignarus rei, cum captam urbem direptamque ex  
his didicisset, ira fremens excivit exercitum, protinusque  
contendit ad urbem, pœnam sumpturus a Triario, a quo  
esset & Heracleæ capiendæ gloria, & manubiarum utilitate  
spoliatus: concursumque civilibus armis foret, nisi Tria-  
rius, Cottæ exercituque multis lenibusque verbis placato,  
prædam communem omnibus fore spondidisset.

XVI. Sic redintegrata amicitia, cum Tion & Amastrin  
ab Connacorigè teneri didicissent, Triarius in istam expedi-  
tionem profectus, utrumque oppidum, pacto securum abi-  
tum Connacorige, nullo negotio recepit. Inter hæc Cottæ  
captivos Heracleotarum, & qui eorum ad se perfugerant, reti-  
nens, crudeliter & avare præsentibus utebatur; omnibus  
abreptis templorum donariis, simulacrisque numinum, ut  
nec Herculi parceretur, cui sacram urbem suam, & in il-  
lius honorem oraculi jussu conditam. Heracleenses fere-  
bant. Ejus effigiem antiquitus talem posuerant, ut nihil ad  
summam magnificentiam pretiumque ac pulchritudinem re-  
liquum videretur. Clavam addiderant auro obrizo soli-

dam: & ex eodem metallo leoninam ingentem finxerant, plenamque sagittis pharetram.

XVII. Hæc & alia cum ad naves deportasset, injicere ignem iussit: quo pleræque urbis regiones conflagraverunt. Hic fuit Heracleensis obsidionis exitus; alterum in annum protraxit. Cotta, missis ad Lucullum, qui iterum in Pontum movebat; cohortibus aliisque Romanis, permissoque focis, ut suam quisque in patriam reverterentur, cum classe Romam instituit iter: sed pars navium onere gravata, cum haud procul litore processisset, subsedit; alias flantes forte Aquilones in brevem compulerunt, ut facere jacuram cogerentur.

XVIII. Cum ita quotidie in deterius res Mithridatis ruerent, motus iterum ex Asia Lucullus, validius eas impulit, ira quoque instigante, ob superbas Tigranis literas. idcirco, postquam iterum in Pontum irrupisset, Sinopen obsedit, clarissimam Ponticarum urbium, quam caput regni Mithridates, natus in ea, & educatus, effecerat. Leucippus & Cleochares spado urbi præerant; eratque Seleucus, a quo vectus Heracleam rex fuerat, pari auctoritate additus. horum Leucippum, die ad populum dicta, prodicionis collegæ reum egerant, &, cum nihil accusando profecissent, noctu interfecerant per insidias.

XIX. Hinc irritatis magnopere Sinopensibus, unam efugienda vindictæ viam creditam, tyrannidem invaserunt. Cum in eo res essent, annonam a Bosporo ad castra Luculli vehentes apparuerunt, quos cum triremibus quindecim præfectus classis Censorinus deducebat. Igitur Seleucus cum Cilicibus suis & Sinopensium navibus longis provectus, superatis Romanis, onerarias aliquot abstraxit. Hæc fortuna magis adhuc inflavit, asperioresque fecit tyrannorum animos: multique ab iis oppidanorum, indicta plerumque causa, jugulati. Sed & inter ipsos parum conveniebat, Cleochare resistendum Romanis contendente, Seleuco,

§ XVI. Justin. 16, 3. Memnon. § XVIII. Plut. in Lucull. c. 47. Memnon. Strab. l. 12. Oros. 6, 3.

trucidandos Sinopenſes, acceptiſque ingentibus præmiis, tradendam Lucullo urbem. Cum neuter cederet, re in medio relicta, opes ſuas onerariis navibus impoſitas ad Macharem miſerunt, Mithridatis filium, qui tum apud Colchos agebat.

XX. Circum hæc occupatis Lucullus ſupervenit, caſtriſque ad Sinopen poſitis, obſidionem cœpit. Venerunt mox a Machare legati, ſocietatem & amicitiam petentes: quos ille comiter receptos omnia ſperare a ſe & populo Romano juſſit, dum ne commeatu rex eorum Sinopenſes, aut ulla re alia juvaret. Machares, reſponſo Luculli cognito, feciſſe imperata non contentus, ut ſe bene & gnaviter deſtinaiſſe probaret amicitiam Romanam colere, quidquid in uſum Mithridaticarum partium paraverat, ultro in caſtra Luculli miſit.

XXI. Ea res non ſolum obſeſſoribus fecit animos, ſed & tyrannos penitus adegit ad deſperationem. Igitur nocte quadam per milites urbe juſſa diripi, levioribuſque navigiis delectis, cum magnis divitiis ad interiora Ponti, ubi Sanni Lazique accolunt, profugerunt, ignibus antea reliquas in naves injectis. Lucullum ortus in urbe clamor (multam enim cædem inter diripiendum Cilices ediderant) ſimul flamma viſa admonuit, ut ad urbem duceret, cujus jam etiam partes aliquas ignis comprehenderat. Scalis admotis, facile tranſcenſum; & Cilices, quos præda tardaverat, paſſim occiſi. ne oppidanis quidem parci inter tumultum potuit, donec octo ferme hominum interfectis millibus, cædibus abſtineri imperator juſſit.

XXII. Deinde conſolatus Sinopenſes, privatim ſua cuique reddidit, publice dedit libertatem: præter ingenium beneficum ac mite, ſomnio quoque motus. Proxima ante capiendam urbem quiete, videre viſus eſt habitus ignotioris hominem, pauliſper jubentem progredi, ut Autolyco occurreret. Id ſomnium inter tantarum rerum occu-

§ XIX. Plut. Memnon. § XXI. Appian. Mithrid. Memnon. Plin. 6, 4. Plut. Oroſ.

pationes cum effluxisset animo, forte, dum Cilicas ad mare fugientes persequitur, obvolutam pannis statuam vidit. hanc ubi solvi eximique iussit, statim agnovit speciem, quæ obversata noctu fuerat, simul præsentium aliquis Autolycum esse, Sthenidis opus, confirmavit.

XXIII. Heroem Autolycum Sinopenfes colebant, quod five Jasonis in expeditione Colchica, five Herculis adversus Amazonas profecti focius, cum forte naufragium iis locis fecisset, Sinopen cum suis pervenerat, eamque urbem prioribus incolis, a Syro, quem Apolline & Asopi filia Sinope genitum ferebant, ibi collocatis, adentiam obtinuerat. Ea res admonuit Lucullum commentariorum, quos ei Sulla inscripserat, inferueratque monitum, *ut per quietem oblata præcipuæ firmitudinis existimare meminisset*. Quæ fatua & puerilis hominum credulitas, quid aliud, quam theatrum est, in quo fabulas suas deceptores genii pro luitu instruant, erroresque omnes, in quos demergere miseram mortalitatem student, nullo negotio stabiliant?

XXIV. Hanc igitur statuam Lucullus abstulit, una cum Billari sphaera: ceteris ornamentis oppidi abstinuit injuriam. Sinope recepta, nihil jam iis regionibus hostile, præter Amasiam, supererat. Sed ipsa quoque paulo post in ditionem populi Romani concessit. Hæc agenti Lucullo legati a rege Bosporano advenerunt, coronam auream dono afferentes. quibus ille benigne exceptis, Macharen illorum regem focium amicumque populi Romani appellavit. His rebus patris, cum finem imposuisse Pontico bello videretur, rege fugato, nemine præterea morante victorem; Sornatium cum sex millibus militum præsidio reliquit provinciae; ipse cum reliquis duodecim millibus peditum, equitum haud totis tribus millibus, Tigrani bellum illaturus, castra movit.

XXV. Tigranes enim, postquam per annum integrum, æctoquo præterea menses in regno suo versari Mithridatem

§ XXII. Plut. Memnon. Appian. § XXIII. Plut. Strab. l. 12. Appian. § XXIV. Strab. Memnon. Appian. Liv. Epit. Plut.



passus, non admisisset in conspectum, sed custodia corporis attributa, in remotissimis locis, magis captivi, quam regis, modo habuisset; sive misericordia ductus, sive metu Romanorum, & legatione irritatus Appii, perquam honorifice acciverat. Triduum inter se arcanis sermonibus transduxerunt, conciliataque plenissime gratia, quod ex factis deprehendi potuit, priorum offensivuncularum causas in amicos rejecerunt. Ex quibus statim interfectus est a Mithridate Metrodorus Scepsius, vir facundia & eruditione clarus, quem in eum amicitiae gradum Mithridates receperat, ut regis patrem appellari pateretur.

XXVI. Sed Tigranes exposuerat Mithridati, *quemadmodum ad se missus ille, cum mandata regis sui de belli adversus Romanos societate edidisset, interrogatus a Tigra- ne, quid igitur ipse suaderet? in hæc verba responderit: ut legatus, suadeo; ut consilium rogatus, alia omnia.* Nec oderat Metrodorum Tigranes. idcirco suam per culpam interfectum dolens, magnifico extulit funere, & suprema ei magnis sum- tibus persolvit. Splendidis dein epulis omni- que comitate focerum cum excepiisset, attributis decem millibus equi- tum, dimisit, in Ponto res novaturum.

XXVII. Hæc, ut solet, in majus distulerat fama, re- gesque junctis viribus jamjam in Lycaoniam Ciliciamque irrupturi ferebantur: cum miratus Armenium Lucullus, quod non stantem potius Mithridatem sustinuisset, quam ut erecturus prostratum idem ipse discrimen adiret, occu- pare ejus adventum proposuit, & ultro in Armeniam pro- cedere. Gravabantur milites, alioqui plus æquo turbulenti, in regionem hostilem gentesque bellicosas, & innumerabili equitatu instructas, terramque vallis amnibus & nivosis montibus septam sequi. Romæ quoque a tribunis plebis consilium imperatoris carpebatur: *hominem imperii & opum cupidum bella ferere ex bellis, ut publico periculo privatis libi- dinibus satisfaceret, invidiose querentibus.*

§ XXV. Memnon. Appian. Plut. § XXVI. Memnon. Plut. § XXVII. Memnon. Plut.

XXVIII. Sed ille, placatis utcunque militibus, in Capadociam duxit, ut ibi Ariobarzanis opibus amicitiaque apparandis, quæ usus belli poscebant, instructior, ubi primum tempus anni pateretur, Euphratem transcenderet. Hoc anno tristem in urbe censuram L. Gellius Puplicola, Cn. Cornelius Lentulus Clodianus egerunt, quatuor & sexaginta senatu motis. In his & C. Antonius fuit, Marci oratoris filius, cui causas subscripserunt censores, quod focios diripuerit; quod judicium, apud M. Lucillum prætorem accusatus, recusarit turpi allegatione, *se cum Græcis hominibus in urbe non posse æquo jure contendere*; quod propter æris alieni magnitudinem prædia manciparit, bonaque sua in potestate non haberet. Etiam P. Lentulus Sura, qui nuper consul fuerat, senatu motus est, & Q. Curius notissimus aleator, ceterique mox ad Catilinariæ conjurationis scelus non tam hac censoria nota, quam causis aliis, impulsis.

XXIX. Lustrum deinde conditum est. civium amplior quam ante numerus, receptis in idem jus fociorum populis, fuit. capita nongenta quinquaginta millia censa. Principem senatus Q. Lutatium Catulum legerunt. Per idem tempus L. Metellus Siciliae prætor, rem adversus piratas prospere gessit. Nam inter foedissimam C. Verris præturam Pyrganio archipirata Syracusanum portum, pulsa classe Romana, obtinuerat, insulamque inde cædibus rapinisque misere vexabat. Hunc igitur Metellus terrestri navalique prælio victum profugere ex Sicilia coegit, pacemque provinciæ reddidit.

XXX. Finem hujus anni lætum urbi, reditu suo in gratiam, duo potentissimi viri Pompejus Crassusque consules fecere. Illi hætenus retinuerant exercitus suos, neque populum extrema quæque inter discordes & prævalidos metuentem, cum eos rogaret, ut reconciliari pate-

§ XXVIII. Ascon. in Tog. cand. Liv. Epit. Plut. in Cæs. c. 5.  
§ XXIX. Plut. in Cic. c. 22. Diodor. l. 26 & 27. Sallust. Catilin. c. 23. Liv. Epit. Orof.

rentur, audiverant. Sed postquam alio tempore sedentibus pro tribunali, Cajus quidam Aurelius, equestri loco natus, sed qui vitam procul negotiis egerat, ad eos ascendit, *Jovemque sibi per quietem imperasse dixit, moneret consules; uti in gratiam redirent*, populusque gemebundus & supplex eadem precari cœpit, Pompejus restitit tacens: at Crassus prior porrigens dextram, *nihil*, inquit, *me indignum aut vile facere reor, si huic Pompejo aliquid deferro, quem vos imberbem adhuc appellare Magnum sustinuisstis, quem triumphare jussistis, priusquam in senatum legeretur.*

XXXI. Tunc & Pompejus occurrit Crasso: junctisque dextris fecerunt redintegratæ gratiæ fidem. ergo populus in lætas acclamationes votaue & preces effusus, non ante destitit, quam dies ab utroque mittendis exercitibus diceretur. Id ubi est factum, magistratu consules abiverunt. C. deinde Hortensio, Q. Cæcilio Metello, qui postea Creticus appellatus est, consulibus, templum Jovis in Capitolio, quod ex Sullanorum temporum injuria super iisdem fundamentis restructum erat, a C. Catulo dedicatum est: quem solum honorem felicitati suæ defuisse, confessum questumque L. Sullam ferunt. In ea dedicatione, cum vehemens æstus esset, Q. Catulus velis expansis umbram fieri populo jussit, quod deinceps in theatri est frequentatum.

XXXII. His consulibus Romanæ copię, imperatore Lucullo, maximis itineribus per regnum Ariobarzanis contenderunt ad Euphratem, qua in parte Cappadocia ab Armenia disjungitur: & quamquam ad id naves codicariæ occulto per hiemem fabrefactæ aderant, tamen hibernis aquis tumidus amnis transeundi metum faciebat: sed mira felicitate circa vesperam ejus diei subsidere flumen cœpit, & fluctus intra alveum coercere. Igitur accolæ, cum redita luce non inflatior solito Euphrates parvas in mediis aquis insulas ostenderet, adoraverunt Lucillum, amicum

§ XXX. Plut. in Pomp. c. 35, & Crass. c. 22. Appian. civil. 1. 1. § XXXI. Appian. Plut. in Pomp. Liv. Epit. Dionys. Halic. 4, 69. Cassiodor. Chron. Cic. Verr. 4, 31. Plin. 7, 43. Tacit. hist. 3, 72.

Deo imperatorem rati, cujus honoris causa præter solitum tam cito amnis detinuerat.

XXXIII. Alia deinde haud minus insolita res oblata transgresso, opinionem hominum firmavit. Pascebat in ea regione Persicæ Dianæ sacrum armentum, peculiari nota insigni, & humanis usibus exemptum. ex eo, ubi tempus sacrificii venisset, plerumque non sine magno labore victima capiebatur. Sed tum ultro ad petram, quæ sacra Deæ habetur, insigni specie bos concedens, eo loco constitit, demissoque capite, tanquam recte traheretur, hostiam se præbuit Lucullo. Ille & hoc peregit sacrum, & propter facilem transitum taurum immolavit Euphrati.

XXXIV. His eodem die perfectis, postero sequentibusque per Sophenen iter fecit, pacato agmine, quod incolas pacificis animis imperata facientes nulla re violari voverat. sed & militibus, castrum quoddam, ubi magnos esse thesauros audierant, capere volentibus, ostenso procul monte Tauro, *istud potius, inquit, excindendum nobis præsidium est. nam hæc quidem victoribus servantur.* Magnis deinde itineribus ad Tigrin, & hoc quoque superato, in Armeniam processit. Nec quisquam ibat obviam, ignaro omnium Tigrane, cui nuntiare Luculli adventum audebat nemo, quod, qui primus id fecerat, tanquam civitatibus turbandis nuntium fingeret, capitali supplicio erat affectus. & adulatores blanditiis & laudibus vanos spiritus inflabant, *egregium fore ducem Lucillum, dictitantes, si vel Ephesi expectet regis regum impetum, nec ad primum conspectum innumerabilium copiarum diffugiat.*

XXXV. Tandem unus amicorum Mithrobarzanes verum indicare ausus, e vestigio assumtis tribus equitum milibus & ingenti peditum numero, Romanos obterere iustus est, solum ducem vivum adducere. Forte castra metari primum suorum agmen Lucullus jussit, donec reliqua pars exercitus, quæ adhuc erat in itinere, successisset.

§ XXXII. Plut. in Lucull. c. 51. Plin. 19, 1. Sallust. § XXXIII. Appian. Mithrid. Plut. § XXXIV. Phlegon ap. Plut. Appian.

set; cum adesse illi hostes nuntiatur. idcirco, ne distractas copias Armenii opprimerent, ipse ad castra permunienda substitit. Sextilium legatum cum mille sexcentis equitibus, militumque & velitum haud multo majore numero præmisit, mandato, *ut, cum appropinquasset hostis, citra pugnae periculum distineret eum, donec munita esse castra diceret.*

XXXVI. Imperium ducis cum servare Sextilius vellet, impetu ferociter invehentium se hostium dimicare est coactus. pugna prospera Romanis fuit. Mithrobarzanes in prælio cecidit; barbari plerique fugientes cæsi, pauci ad regem redierunt incolumes. Is hoc nuntio territus, neque minus nunc ad timorem præceps, quam paulo ante superbia tumidus fuerat, Tigranocerta Mancae fidei committit. Ipse ad Taurum montem se confert, omnes imperii vires eo contracturus, Mithridate quoque revocato. Lucullus interea urbem, in qua concubinas regis asservari audiverat, obsidebat; Sextilio ad Tigranocerta claudenda; aliis quoque ducibus circum insigniora castella dimissis.

XXXVII. Mancaus Sextilium arcere instituerat. sed repulsus intra mœnia, suburbanam regiam diripi, seque & urbem circumvallari, adduci machinas, effodi cuniculos tulit. Interea sex equitum millia jussu Tigranis ad concubinas eripiendas profecta, per medias Romanorum copias, cum imbre sagittarum clausissent iis exitum, eduxerunt mulieres, præmiseruntque per noctem. sed orta luce, Romanisque & Thracum auxiliis acerrime præliantibus, magna multitudo Armeniorum cæsa captaque: præmissum tamen agmen, quia jam aliquantum viæ præceperat, in loca tuta pervenit.

XXXVIII. At Lucullus, ne spatium regi per otium contrahendarum virium concederet, Murænam ad carpandos, qui ad illum accelerabant, misit. ipse cum Tigranocerta venisset, Sextilium occurrere Arabum exercitui jussit, qui conjungere se Tigrani cupiebat. Et horum plerique op-

§ XXXVI. Appian. Mithrid. Plat. in Lucull. c. 53. Memnon.  
§ XXXVII. Memnon. Appian.

pressi sunt a Sextilio, cum forte castra ponentibus supervenisset. Muræna in arcæ quadam & confragosa valle Tigranem nactus, loco audaciam dante, conferuit manus: neque spernenda victoria potitus, impedimentis omnibus regem exuit. Sed Lucullus, ut ad pugnam eum eliceret, acriter Tigranocerta premebat; non sine periculo militum, in quos obsessi, præter solita defendendis urbibus, ignes omnia comburentes, nec restingui faciles, ejaculabantur.

XXXIX. Naphtam vocant bituminis genus, adeo cognatum ignibus, ut eminus rapiat flammæ, & momento vel in longa spatia diffusum inardescat. similis natura Malthæ, cujus in Commagenes urbe Samosatis stagnum est: qua etiam, oppugnante Lucullo muros, defendisse oppidum traduntur. Urgebat tamen inceptum Lucullus, haud dubitans, succursurum ei urbi Tigranem, quam tantæ curæ semper habuisset, totque ac tantis nobilitasset ornamentis. Namque Tigranes, ut hanc omnium efficeret opulentissimam, proceribus suis, *ut ibi haberent domicilia*, præceperat, *multa quoque imposita, ut, quidquid pretiosarum rerum in eam urbem non transfulissent, publicaretur.*

XL. Huc coactis Græcorum, Adiabenorum, Assyriorum, Gordienorum, eque Cappadocia & Cilicia multis millibus, quorum patrias non aliam ferme ob causam exciderat, murum curaverat exædificandum cubitorum quinquaginta altitudine, in cujus ambitu stabula equorum erant disposita. Regiam quoque hortosque in suburbiis, ferarumque & piscium vivaria, itemque arcem validam juxta struxerat. neque Mithridates aliud, quam quod in expectatione Luculli erat, metuebat. crebris ergo nuntiis literisque monebat Tigranem, ne in discrimen res daret: tantum intercipere commeatum niteretur. unam hanc victoriæ viam: collatis signis insuperabilem rem Romanam esse.

XLI. Eadem Taxiles, dux Mithridatis, qui tum Tigrani

§ XXXVIII. Xiphilin. Plut. § XXXIX. Sallust. Plin. 2, 101. Plut. in Alex. c. 54, & Lucull. Appian. § XL. Plut. Diodor. l. 35. Appian.

aderat, præcipere non desinebat. Tigranes ab initio præbebat aures : sed postquam Armeniorum Gordyenorumque coacta multitudo affuit, exercitusque numerosos Medorum Adiabenenorumque reges adduxerunt, præterea a Babylonio mari Arabum, a Caspio Albanorum & Iberorum, magnus numerus advenit, accedentibus quoque liberarum gentium auxiliis, quæ ab Araxe fluvio, partim donis aut gratia motæ miserant, partim ea opinione, quod ad diripiendum nobilissimum iis oris sanum Romani existimabantur venisse; omnia apud barbaros audacia minisque personare cœperunt. neque in conviviis regis, neque in consilio, aliis erat sermonibus locus.

XLII. Taxiles, quia tum quoque pugnam oblique dissuadebat, in periculum vitæ adductus est: Mithridates pro æmulo traductus, qui tantam gloriam genero invideret. Igitur non expectato illo, ne veniret in victoriæ societatem, Tigranes toto cum exercitu movit, nihil æque apud amicos, ut ferebatur, questus, *quam quod cum uro tantum Lucullo, ac non simul omnibus Romani populi ducibus dimicatio instaret.* & erant eæ vires, quæ modestiorem etiam animum efferre potuissent. funditores & sagittarii viginti millia expleverant, equites millia quinque & quinquaginta: quorum, ut ad senatum scripsit Lucullus, septemdecim millia cataphracti erant, ferrea omni specie. His gravis armaturæ milites centum quinquaginta millia accesserant: calorum quoque & munitorum ad pontes sternendos, cædendamque materiem & similes usus, triginta quinque millia sequebantur.

XLIII. Hoc tantum agmen, ubi primum superato Tauro conspici a Tigranocertis potuit, obsessi ex metu in audaciam versi, Romanos respicere minitabundi jubebant. At in principiis Romanis diversæ sententiæ dicebantur: quibusdam *occurrendum regi*, aliis *non esse deserendam obsidionem* affirmantibus. Lucullus, *utrosque recte censuisse* dicens, & *neutros*, divisit copias: Murænaque cum sex peditum millibus in castris relicto, quatuor & viginti cohortes, in

quibus haud erant amplius decem armatorum millia, cum omni equitatu, & funditorum sagittariorumque mille ducit in Armenios.

XLIV. Illi patente in campo juxta flumen castra metantem conspicati, contempta paucitate, ludum jocumque faciebant. neque quisquam erat regum ducumve, quin, adito Tigrane, sibi seorsum pugnam posceret: neque enim attinere, tantum exercitum tam levi operæ pretio fatigari. Etiam Tigranes facetus esse voluit, &, *siquidem hi pro legatis*, inquit, *adsunt, oppido multi sunt; sin vero pro bellatoribus, oppido pauci*. Longe alia æstimatione suas Tigranisque vires Lucullus pensabat, inhabilem hostium multitudinem sua mole perituram ratus, si, priusquam ordinari posset, turbaretur.

XLV. Idcirco simul cum luce copias armatas instructasque castris educit, amnem transiturus. Erat in averfa ab hostibus parte commodum transgressuro vadum. id dum petit, speciem fugientis præbuit Tigrani, isque præ voluptate gestiens Taxilem compellabat, *ecce autem invidi tui Romani fugiunt*, inquiens. Rursus ille, *utinam ita sit, o rex! at vero comitis illos signis, armisque fulgentibus incedere video. hoc ad pugnam euntes faciunt, in itinere coriaceis tegumentis arma condere soliti*. Vix finierat, cum prima Aquila flectentis agmen Luculli, versus Tigranem ire visa est, manipulatimque cohortes sequi. tum vero, tanquam ex profunda ebrietate reversus ad se Tigranes, bis terve exclamato, *itane in nos illi?* propeere suos instrui jubet.

XLVI. Mediam aciem regendam sibi sumit; lævum cornu Adiabeno regi permittit; dextrum, ubi plerique cataphracti primis in ordinibus stabant, Medo. Hoc in cornu primum invectus Lucullus, reperit victoriæ viam. Tumulum enim quendam, sub quo cataphracti collocati erant, conspicatus, hoc situ, ut in vertice planus & patens, aditu haud valde aspero passuum non ferme quingentorum

§ XLIV. Xiphilin. Appian. Mithrid. Memnon. Plut. Front. Strat. 2, 1. § XLV. Plut.



ascendi posset; Thracum Gallogræcorumque alas ex obliquo in cataphractorum ordines incurrere jubet, ensibusque contritos, in quibus omnis illorum vis est, detorquere. Interim ipse, conspicuis armis indutus, exserto gladio ante prima signa in tumulum enititur; locoque capto, *vicimus*, exclamat, *vicimus, milites!* simul ruit in cataphractus, *omissis pilis enses stringi, perique crura & femora, quæ sola patebant vulneribus*, præcipiens.

XLVII. Sed hostes, non expectato congressu, sædam prorsus fugam præcipitant: ipsique & equi armis graves intolerabili pondere incumbunt suorum ordinibus. Omnia statim tumultu & terrore complentur, alios aliis turbantibus; neque fugæ locus est: conferta constipataque acies a paucis impune cæditur. Multum ibi sanguinis fusum est, quia Lucullus spoliari corpora, nisi post consummatam victoriam, severo proposito edicto vetuerat. Igitur per quindecim millia passuum, armillas torquesque aureos calcando insecuti hostem sunt: sub noctem demum reversi, Lucullo jam permittente, legerunt spolia.

XLVIII. Peditum ad millia centum interfecta traduntur; equites valde pauci effugisse, cum victores omnino quinque cecidissent, centum essent vulnerati: ut ipso propemodum puderet victoriæ suæ, qui cum talibus mancipiis, quasi cum viris, signa contulissent. tam levi momento dejectus conculcatusque potentissimi regis, ejusdemque superbissimi, factus fuit: atque ipse inter primos fugiens, vix centum quinquaginta equitibus comitatus, cum filium in eadem fortuna conspiceret, diadema capiti detractum porrexit lacrimans, iussitque alia, quæ videretur, via salutem quærere. Adolescens imponere sibi tiaram non ausus, servandam uni ex fidissimis dedit. atque eo capto, diadema quoque cum dependentibus vittis pervenit in potestatem victoris.

XLIX. Pugnatum est pridie nonas Octobres, quamvis

§ XLVI. Memnon. Appian. Plut. Front. Strat. 2, 2. § XLVII. Memnon. Appian. Plut. § XLVIII. Plut. Cæsar. 6, 3. Memnon.

illa dies, ob cladem Cæpionis Cimbricam, inter atras haberetur. Sed Lucullus id submonenti cuiquam, *ex atra facturum* respondit *candidam*; idque cum ingenti sua gloria præstitit. Nunquam tanto inferiores numero Romani pugnaverant. nec enim vicesimam hostium partem Luculli exercitus adæquabat. Sed apud peritos belli hoc summi ducis argumentum habebatur, quod duabus diversissimis artibus, celeberrimos duos ætatis ejus reges, Mithridatem fregisset mora, Tigranem celeritate obtinisset.

L. Atque res tam improvisa etiam Mithridatem fefellerat: qui, Lucillum priore belli gerendi ratione usurum ratus, non maturaverat ad Tigranem accedere. tendenti ad illum occurrerunt in itinere pauci primum, deinde plures profugorum ex prælio. unde cognito Tigranis casu, requisivit eum diligenter; neque reddidit contumelias, sed ex equo desiliens, vestem ei regiam, haud inferiorem, quam gestare erat solitus, sui que comitatus partem dedit: bonoque animo esse iustum, ad parandas alias copias, bellumque resumendum confirmavit.

LI. Inter hæc reverso ad Tigranocerta Lucullo, Manæus Græcis militibus mercenariis, quod suspectos haberet, arma ademit. Unde illi acerbiora veriti, dies noctesque congregati permanebant, fustibus armorum loco arreptis. idcirco Manæus cum armatis in eos impetum fecit, eventu prorsus inopinato. Namque brachia veste obvoluta clypeorum vicem objicientes, fustibus haud impigre se defenderunt: occisorumque barbarorum armis celeriter inter se divisis, mœniorum partem occuparunt. Cum iis magna quoque pars Græcorum urbem incolentium sentiebat. Ea discordia Romanis urbem aperuit, thesaurosque regis, & aliorum amplissimas opes tradidit. Octo millia talentum signatæ pecuniæ inventa sunt. Urbs diripienda militibus data, & insuper distributi in singulos denarii octingenti. Multi scenici artifices capti erant, quos ad dedicandum

theatrum Tigranes contraxerat. iis Lucullus ad ludos victoriæ suæ usus est.

LII. Convenas deinde variarum gentium, quibus Tigranes urbem suam frequentaverat, in suam quosque patriam dimisit, Græcis etiam viatico dato. ita cujus urbis incrementum multarum aliarum ruina fuerat, ejusdem interitus vicissim illas magna ex parte recreavit. Interea reges, magna cura nationes obeundo, novum exercitum colligebant: summam rerum, permisso Tigranis, in se recipiente Mithridate, quod animo ac prudentia præstare, & belli contra Romanos gerendi per adversa ac prospera peritior habebatur.

LIII. Misit etiam Tigranes ad Phraatem, qui Deus cognominatus nuper Sinatruci successerat. *cum patre suo quægessisset inimicitias, ipsius morte exspirasse; adversus novum regem integra sibi omnia: quoque magis fida inter utrumque sit amicitia, & adversus communes regum hostes Romanos societas, Mesopotamia & Adiabene, & regione, quam Convalles Magnas vocant, cedere.* Mithridates quoque literas addidit, quarum sententia in Sallustii Crispi fragmentis, ita est exposita.

LIV. *Omnes, qui secundis rebus suis ad belli societatem orantur, considerare debent, liceatne tum pacem agere: dein, quod quæritur, satisne pium, tutum, gloriosum, an indecorum sit. Tibi perpetua pace frui liceret, nisi hostes opportuni, & sceleratissimi; egregia fama, si Romanos opprèsseris, futura est. neque petere audeam societatem: & frustra mala mea cum tuis bonis misceri sperem. atqui ea, quæ te morari posse videntur, ira in Tigranem recentis belli, & meæ res parum prosperæ, si vera æstimare voles, maxime hortabuntur. Ille enim obnoxius, qualem tu voles, societatem accipiet: mihi fortuna, multis rebus ereptis, usum dedit bene suadendi; &, quod florentibus optabile est, ego non validissimus præbeo exemplum, quo rectius tua com-*

§ LI. Diodor. l. 35. Memnon. Plut. § LII. Appian. Plut. Strab. l. 11. Memnon. Diodor. § LIII. Phlegon ap. Phot. Appian. Diodor. Memnon. Sallust.

ponas. namque Romanis cum nationibus, populis, regibus cunctis una & ea vetus causa bellandi est, cupido profunda imperii & divitiarum: qua primum cum rege Macedonum Philippo bellum sumfere; dum a Carthaginensibus premebantur, amicitiam simulantes. ei subvenientem Antiochum, concessione Asiae, per dolum avertere: ac mox a Philippo Antiochus, omni eis Taurum agro, & quindecim millibus talentorum spoliatus est.

LV. Persen deinde, Philippi filium, post multa & varia ceramina, apud Samothracas Deos acceptum in fidem, callidi & repertoires perfidia, quia pacto vitam dederant, insomniis occidere. Eumenem, cujus amicitiam gloriose ostentant, initio prodidere Antiocho, pacis mercedem; post Attalum custodem agrum captivi sumibus & contumeliis ex rege miserrimum servorum effecere: simulatoque impio testamento, filium Eumenis Aristonicum, quia patrum regnum petiverat, hostium more per triumphum duxere; Asia ab ipsis obfessa est. Postremo totam Bithyniam, Nicomede mortuo, diripuerunt; cum filius Nysæ, quam reginam appellaverant, genitus haud dubie esset.

LVI. Nam quid ego me appellem? quem disjunctum undique regnis & tetrarchiis ab imperio eorum, quia fama erat, divitem, neque servitutum esse, per Nicomedem bello lacefferunt, sceleris eorum haud ignarum, & ea, quæ accidere, testatum antea, Cretenfes, solos omnium liberos ea ea tempestate, & regem Ptolemaum. Atque ego ultus injurias, Nicomedem Bithynia expuli, Asiamque spoliū regis Antiochi recepi, & Græciæ demum grave servitium. Incepta mea postremus servorum Archelaus, exercitū prodito, impedivit; illique, quos ignavia aut prava calliditas, uti meis laboribus tuti essent, armis abstulit, acerbissimas pœnas solvunt: Ptolemaus, pretio in dies bellum prolapsus; Cretenfes, impugnati semel jam, neque finem, nisi excidio habiuri.

LVII. Equidem cum mihi ob ipsorum interna mala dilata proelia magis, quam pacem datam, intelligerem; abnuente Tigrane, qui mea dicta sero probat, te remoto procul, omnibus aliis obnoxiiis, rursus tamen bellum cepi: Marcumque Cottam Romanum ducem apud Chalcedoniam terra fudi, mari exui classe pulcherrima. Apud Cyzicum magno cum exercitu in obsidione

*moranti frumentum defuit, nullo circum annitente: simul hiems mari prohibebat. ita sine vi hostium regredi coactus in patrium regnum, naufragiis apud Parium & Heracleam, militum optimos cum classibus amisi.*

LVIII. *Restituto deinde apud Cabira exercitu, & variis inter me atque Lucillum præliis, inopia rursus ambos incessit. Illi suberat regnum Ariobarzanis bello intactum: ego, vastatis circum omnibus locis, in Armeniam concessi: secutique Romani non me, sed morem suum omnia regna subvertendi, quia multitudinem arctis locis pugna prohibuere, imprudentiam Tigranis pro victoria ostentant. Nunc, quæso, considera, nobis oppressis, utrum firmiorem te ad resistendum, an finem belli futurum putes? Seio equidem, tibi magnas opes virorum, armorum & auri esse; & ea re a nobis ad societatem, ab illis ad prædam peteris: ceterum consilium est, Tigranis regno integro, meis militibus bello prudentibus, procul ab domo, parvo labore per nostra corpora bellum conficere, quando neque vincere, neque vinci sine tuo periculo possumus.*

LIX. *An ignoras, Romanos, postquam ad Occidentem pergentibus finem Oceanus fecit, arma huc convertisse? neque quidquam a principio, nisi raptum, habere, domum, conjuges, agros, imperium? convenas olim sine patria, sine parentibus, peste conditos orbis terrarum? quibus non humana ulli, neque divina obstant, quin socios, amicos, procul juxtaque sitos, inopes potentesque trahant, excidantque; omniaque non serva, & maxime regna, hostilia ducant. Namque pauci libertatem, pars magna justos dominos volunt: nos suspecti sumus, æmuli, & in tempore vindices affuturi. Tu vero, cui Selcucia maxima urbium regnumque Persidis inclitis divitiis est, quid ab illis, nisi dolum in præsens, & postea bellum expectas?*

LX. *Romani in omnes arma habent: acerrima in eos, quibus victis spolia maxima sunt. Audendo, & fallendo, & bellis ex bellis ferendo magni facti, per hunc morem exstinguunt omnia, aut occidunt. quod difficile non est, si tu Mesopotamia, nos Armenia circumgredimur exercitum sine frumento, sine auxiliis, fortuna, aut nostris viris adhuc incolumem. teque illa fama se-*

*quetur, auxilio profectum magnis regibus, latrones gentium oppressisse. Quod uti facias, moneo hortorque, neu malis perniciem nostra unum imperium prolatare, quam societate victor fieri.*

LXI. Romæ, his rebus auditis, haudquaquam pro merito Luculli gratia fuit. quin *elapsum Tigranem* imputabant, & *imperii certe dulcedine hoc agi, ut perpetua iis locis bella essent.* Igitur tum quidem *prætores sortiri* iusserunt *Asiam*; deinde decreverunt, *ut alter sequentis anni consulum succederet*: quamquam sine ulla ærarii molestia, bello semet alente, tot amplissimæ provinciæ populo Romano quærebantur. Sed invidia, quæ plerumque bonum publicum vincit, tum quidem potior ad minuendam summi imperatoris dignitatem, quam ad augendam virtus fuit.

LXII. Alienis quoque vitiis miscebatur, *Ponticos imperatores sibi prospicere posse, rempublicam post privata commoda ducere*, clamantibus multis; quod M. Cotta nuper cum invidiosis opibus redierat. Et quamquam, minuendi rumoris causa, magnam pecuniam in ærarium intulerat; manebat opinio, *de multis eum pauca populo Romano dedisse. Neque aliam veriore causam fuisse volebant, cur quæstorem a se P. Oppium dimisisset.* Atqui Oppius, cum ob pecunias male captas, & cibaria militum fraudata, a proconsule ablegaretur, etiam insidiatus illi fuerat, deprehensusque, dum tectum veste pugionem conatur expedire.

LXIII. Sed apud iratos etiam, quæ sublevare hominem debuerant, ultro in crimen vocabantur. Idcirco propter illius offensam Heracleotis æquiores, *dimitti captivos illorum, libertatique restitui*, iusserunt. Quorum Thrasimedes, cum ei concionem inimicus Cottæ Carbo præbuisset, Heracleensium defleta calamitate, *innocentiam illorum, sævitiamque & aviditatem Cottæ* exposuit. Simul captivorum multitudo, promiscuus sexus atasque, protensis supplicum ramis, velut publica comploratione populum movebant. Cotta deinde pauca pro se locuto, & ad *populi jussu* vocante, fur-

gens Carbo, *capi*, inquit, *Heracleam*, non exscindi, *jussimus*.

LXIV. Aliis quoque Cottam inculantibus, præcipuo Carbonis studio damnatus est. Exilio tamen remisso, senatoriis insignibus caruit: Heracleotis ager portusque, & quod in mari juris habuerant, redditum: *civitasque libera esse*, &  *suis uti legibus*, iussa est. At Lucullus imperator, rebus gerendis intentus, non armis modo, sed justitiæ & humanitatis blandissima vi barbaros subigebat. Tigranoceritis multas nobiles feminas captas honestissime habuerat. per has tanti earum adducti sunt in fidem: quos inter Antiochus Commagenæ rex fuit, & regulus Arabum Alchaudonius. Armeniæ quoque multæ partes se dediderunt, Sophenorum tota natio, & regis sui casum acerbè ferentes Gordyeni.

LXV. Zarbienus is fuerat, jam ut prædiximus, per Ap. Claudium adjunctus Lucullo; & hoc crimine, postquam res prodita, ab Tigraue interemptus est. Huic insignes exsequias Lucullus fecit, *amicum sociumque populi Romani* appellans, monumentumque locavit splendidissimum. Nam in thesauris ejus auri argentique magnam vim repererat; præterea conditi in horreis frumenti medimnorum tricies centena millia. Cognitis deinde regum ad Phraatem legationibus, ipse quoque sociorum nonnullos ad eum misit, ut amicitiam ei Romanam utiliore bello fõre ostenderent.

LXVI. Parthus, utrisque spe societatis clam facta, legatos dimisit. Deinde cum missus a Lucullo Sextilius venisset; virum militarem ad speculandum regiones viriumque habitum accessisse suspicatus, neque promissa Romanis auxilia, neque contra eos regibus misit: quod, illis inter sese bellantibus, sibi certissimum cum securitate emolumentum pollicebatur. Neque impunita ei astutia mansisset, ni Luculli animum ignavia & seditio militaris destituisset. Cum enim ille ad Sornatium ceterosque legatos ac

§ LXIII. Diodor. Val. Max. 5, 4. Memnon. § LXIV. Plut. Xiphilin. § LXV. Diodor.

tribunos suos scripssisset, *adduci* jubens, *quas reliquerat in Ponto, copias*, quod per Gordyenem in Parthos irrumpere cogitabat, dilatis interim Tigrane & Mithridate regibus: milites, *neque ad Lucillum iuros*, responderunt, *neque diutius futuros in praesidiis*.

LXVII. Quod ubi in castris Luculli est cognitum, eadem contumacia in praesentem exercitum pervasit. omnes mirari ac laudare *Ponticorum militum animos: hos vere liberos, hos viros dicere. at se, tanquam vilia mancipia, quocunque inquieti domini cupiditates jussissent, sub alium pæne solem, ignotas in terras trahi, etiamsi impervia ferro membra haberent, senio & iuvenum labore defesturos*. Ita Lucullo quiescendum aliquamdiu contra animi sententiam fuit. Interea Romæ iisdem consulibus M. Pupius Piso ex Hispania triumphavit, non admodum magnis rebus gestis. Sequens annus unum tantummodo consulem habuit, C. Marcium Regem, quia L. Metellus collega ejus principio anni obiverat, & post eum alius, qui fuerat in locum Metelli subrogatus; eaque ex re, postmodum suffici quemquam, religio inceserat.

LXVIII. Interea Mithridates, armorum officinis per oppida institutis, omnique fere Armeniorum juventute contracta, delectus agebat: unde retentis, quorum alacritas & robur eminebat, septuaginta millibus peditum, triginta quinque equitum, ceteram multitudinem dimisit. Eas copias in cohortes alasque proxime Romanum morem tributas, per homines Ponticos, gnaros ejus militiae, exercebat. Spatium ei dabant Romanorum militum vitia, jam velut precario parentium. Hæc verior causæ dilatæ expeditionis Lucullo fuit, quam frigora, quæ obtendebantur.

LXIX. Igitur non ante mediam æstatem motis castris, cum persequendi Tigranis causa Taurum transcendisset, licet opinione sua falsus, in plana deduxit exercitum. Quam enim ille messem, ob anni tempus, jam maturam adeptu-

§ LXVI. Memnon. Diodor. Appian. Mithrid. Plut. Eutrop.  
§ LXVII. Alcon. & Cic. in Pison. c. 36. § LXVIII. Appian. Phlegon ap. Phot. Diodor. l. 35.



rum existimaverat, adhuc in herba erat, propter cœli asperitatem tardius ibi canescente segete. Quapropter, ut ad prælium eliceret hostem, vastare partem regionis cœpit: & nihilominus cunctantibus Armeniis, ad illorum castra contendit. Erant illa in colle quodam sita, ubi peditatum omnem cum parte equitatus Mithridates continebat: cum reliquis equitibus Tigranes frumentatoribus infidiatus, his terve repulsus a Romanis est; levi cum jactura hominum, quia Romano superior barbarus equitatus, simul accedere pedites senserat, vertebat terga, fugamque inibat hostibus damnosiores, emittendis a tergo sagittis, multosque aut interficiebant statim, aut gravissimis afficiebant vulneribus.

LXX. Duplices enim aculeos illorum sagittæ habebant, sic aptatos, ut, si arundinem velleres, una tantum ferri particula sequeretur; altera, quod prehendi trahique non posset, cæca peste corpus ad perniciem ureret. Neque poenitet, quo clarius intelligatur ejus ingenii ratio, rem ex usu remotam, præterea perquam obscure traditam, pluribus verbis & manifestioribus exposuisse. Præfixum arundini ferrum non erat solidum, sed duabus ex laminis ita compositum, ut altera fibulam haberet, qua ligno annecteretur, altera huic sic jungeretur, ut coiret in unius aculei speciem; ceterum leviter tantum esset alligata, quo emitti quidem arcu posset, & simul penetraret in vulnus, sed tracta evulsaque sagitta, hamulis suis retentum facile se vinculo educeret.

LXXI. Ceterum illæ, quamquam modicæ, victoriæ, submovebant tamen hostem, vicosque liberius populandi copiam Lucullo faciebant. Atque ille, intercepto, qui regibus apportabatur, commeatu, quam timuerat inopiam, in eam hostes redegit. Reges tamen nulla re ad universum certamen eliciebantur, cum nihil intentatum Lucullus reliquisset, etiam castra circumvallare orsus. Igitur annonæ jam deficiente, cum præterea milites, qui inter levia cer-

tamina sagittis vulnerabantur, aut inter curandum morentur, aut mutilarentur membris: Artaxata versus instituit iter, ubi regia Tigranis, & cum parvis liberis uxores erant.

LXXII. Igitur, quod quæsitum a Lucullio fuerat, Tigranes obviam progressus, quarto die ad Arsaniam fluvium ostendit se Romanis, qui transeundus erat Artaxata petentibus. Cum prælium instaret, Lucullus, egregie litato, tanquam certus de victoria, duodecim cohortes in fronte statuit: reliquos, ne circumveniretur a multitudine hostium, collocavit in subsidiis. Nam multum lectumque equitatum in adversa acie conspiciebat: sagittarii erant equites Mardi, & hastati Iberi, cujus generis auxiliis Tigranes plurimum confidebat. Nullam tamen insignem ediderunt pugnam: sed cum equitatu Romano paulisper velitati, simul succedere peditem viderunt, in fugam dissipati sunt.

LXXIII. Ostenderunt se deinde Armenii, proprius Tigranis miles, egregia specie armorum virorumque. Idcirco Lucullus, jussis acciri equitibus, qui primo prælio pulsos insequiebantur, ipse adjuncto promptissimo quoque oppositos sibi Atrapatenos invalit, eo terrore, ut, priusquam ad manus veniretur, hostes solutis ordinibus fugerent. De tribus regibus, qui ei pugnae affuerant, turpissime fugit Ponticus Mithridates, (nam & Medo Mithridates erat nomen) cum ne clamorem quidem hostium sustinisset.

LXXIV. Reliqua parte diei, totaque deinceps nocte, caesi captique fugientes sunt; maximaque relata spolia, donec fatigatus persequendo miles conquievit. Plures priore prælio hostes, hoc insigniores, morte aut captivitate desiderati sunt. Præter ignobile vulgus, de robore exercitus, quinque millia ceciderunt, capti aliquanto plures sunt. Attamen victoriae fructum Lucullo, cum speraret amplissimum, tempus anni & natura locorum inviderunt. Sub æquinoctium frequentes nives gelu jam adstringebant flu-

mina. ea præcipue equis infesta res erat, quibus & infalubris rigore potus fiebat, & inter transeundum rupta glacie crura convulnerabantur.

LXXV. Neque exercitui faciles aut dies iter facienti erant, aut noctes in humenti solo silvosisque locis stativa habenti. aliquot tamen dies militum patientia tenuit: inde per tribunos imperatorem deprecati, cum nihil proficerent, tumultuosius egerunt; frustra obtestante Lucullo, *hunc saltem extremum laborem sumerent, donec insensissimæ hostis monumentum, velut alteram Carthaginem evertissent.*

LXXVI. Nam Artaxata condendi auctor Hannibal Pœnus fuerat, cum ad Artaxiam Armeniorum regem profugus patria se contulisset. Igitur per alia juga, quam venerat, reducto cis Taurum exercitu, imminente hieme Mygdoniam intravit, fertili amœnitate, Nisibique urbe (*Antiochiam Mygdoniæ Græci vocant*) nobilem.

LXXVII. Eam Parthis cum ademisset Tigranes, thesaurorum suorum, aliarumque rerum, quas diligenter asservari oportebat, custodiam fecerat, Gura fratre præposito. Eodem nuper Callimachus venerat, diu defensa contra Lucullum Amiso notior. Oppugnabat urbem acriter Lucullus: sed munita duplici muro lateritio non vulgari crassitie, fossaque altissima, quæ & machinarum vim omnem, & cuniculorum dolos a muro defenderet, expugnari nequebat, donec, quæ rerum humanarum est fragilitas, hiems superveniens, exploratam prope spem salutis in pellem & exitium Nisibenorum vertit.

LXXVIII. Obsessi enim, nihil credentes certius, quam propter anni tempus paulo post abituros Romanos esse, negligentius agebant excubias: cum Lucullus, observata nocte illuni, quam insuper pluvix & tonitrua exsurdaverant, ad murum sgressus est. Oppidani, quidlibet potius præstolati, paucis admodum in exteriori muro, & ad fossam, quæ post illum erat, relictis, in urbem concess-

§ LXXIV. Phlegon ap. Phot. Plut. § LXXVI. Oros. 6, 3. Diodor. § LXXVII. Plut. Diodor.

ferant. Igitur per aggeres, quos ante murum jecerat, dein de scalis adhibitis, in mœnia enisus, custodibus facile oppressis, *fossæ partem* (pontes enim barbari removerant) *ingesta terra compleri* jubet.

LXXIX. Quod ubi majori cum labore, quam periculo, perfectum est, quia neque sagittas, neque ignes jacere barbari, pluvia utrumque impediante, potuerant; alter quoque murus, qui priori haudquaquam firmitudine comparandus erat, superatus est. Urbe sic capta, Guras, qui in arcem confugerat, cum ceteris, fide accepta, in potestatem venit; comiterque est ab imperatore habitus. Diversa Callimachi fors fuit, quem, licet maximos thesauros absconditos indicaturum promitteret, compedibus vinciri iussit, pœnas daturum, quod desperata Anisi defensione fugiens, oppidum incendisset.

LXXX. Tanta felicitate capta Nisibis, non solum magnis opibus ditavit imperatorem, sed etiam fatigatis labore & frigore copiis abundantissima hiberna præbuit. Dum in Armenia L. Lucullus Mithridatem & Tigranem, & immensas utriusque regis copias pluribus præliis fundit; L. Cæcilius Metellus proconsul cum tribus legionibus in Cretam est profectus. Cretenses, victo Antonio, legatos Romam miserant, magna spe, fore, ut non antiquis modo legibus amicitia reintegrari posset, sed etiam ultro aliquod beneficium adjiceretur, ob servatum comiter quæstorem militesque Romanos, qui in potestatem illorum pervenerant.

LXXXI. Atqui apud Romanos plus irarum erat, quod Cretenses non essent dediti, quam gratiæ, quod deditis pepercissent. Nihil tamen fecius legati (triginta ex senioribus missi principes erant) obeundo sigillatim senatorum domos, blandisque sermonibus utendo, partem Patrum in sententiam suam traxerunt. In curiam deinceps introducti, cum, apte refutatis criminibus, quam enise

§ LXXIX. Eutrop. Diodor. Plut. § LXXX. Diodor. ap. Fulv. Ursin. Liv. Epit. Phlegon ap. Phot. Euseb.

omnibus bellis populi Romani imperatores adjuvissent, exponerent; motus est senatus, ut *populi Romani socios amicosque Cretenses appellandos esse* censeret.

LXXXII. Ei senatusconsulto P. Lentulus Spinther intercessit, annitentibusque aliis, inclementius senatusconsultum factum est: *captivi omnes transfugæque repetiti, pecuniæ talenta quatuor millia, naviumque majorum usque ad quatuor scalmos, & trecenti insuper obsides* postulati, *Lasthenisque & Panaris imperata deditio*. Nec expectatum, donec suorum sententiam legati exquirerent, alterique consulum ea decreta provincia est, ut jussa recusantes vi ad obsequium cogeret.

LXXXIII. Simul, quia non obscurum erat, legatos operam duros, ut intercessores pretio pararent, senatusconsultum factum est, *ne quis Cretensibus pecuniam crederet*. His tam duris imperiis in insulam perlatis, anxia erat & sollicita deliberatio. Seniores, *vim Romanam* veriti, *quam ne maximi quidem reges potuissent sustinere*, omnia, quam bellum, malebant: Lasthenes ejusque factio, quibus præcipue auctoribus bellatum cum Antonio fuerat, timentes, ne dederentur, populum commovebant, *ab omni memoria remtentam libertatem prodi* vociferantes. *præterea absurdum indignumque esse, si, quod rebus integris nunquam facturi fuissent, id bello superiores, post insignem victoriam, facere sustinerent*.

LXXXIV. Facile persuaso vulgo, delectus habiti, & ad viginti quatuor millia coacta egregiæ juventutis, & tam pernicitate corporum, quam laborum patientia, sagittarumque usu, præstantissimæ. Ita conflatum bellum Creticum fuit, culpa haud minima C. Hortensii, qui tum designatus provinciam eam sibi destinabat. Sed idem postea consul, cum fortitus Cretam esset, amore urbis & judiciorum, in quibus regnabat, Metello exercitum provinciamque transdidit. Metellus cum fecisset exsensionem, accurrentem sibi cum copiis in Cydoniatarum agro Lasthes

§ LXXXI. Diodor. ap. Fulv. Ursin. § LXXXII. Diodor. Appian.

§ LXXXIII. Ascon. in Corn. Appian, Diodor.

nem primo adventu fudit: & ex eo prælio *Imperator* appellatus, incolas intra Cydonia mœnia compulso obfidione clausit. Ei tum oppido Panares præerat, quod elapsus fuga Lathenes Cnossum petivisset.

LXXXV. Inter hæc Lucullo ad Nisibin, neque magis in vincendis hostibus, quam continendis suis, occupato, magna pars Armeniæ, Pontique a regibus abstracta est. Etenim Tigranes, quod munimentis Nisibis confideret, in alia verterat impetum, pulsūque L. Fannium, receptis, quæ ille tenuerat, plerisque, in munito quodam loco circumfedit. Sed ille quidem Luculli auxilio exemptus est. Mithridates cum quatuor millibus suorum militum, totidemque submissis a Tigra, minorem Armeniam, vicinasque ei regiones obiens, multos Romanorum, necopinantibus superveniens, interficiebat; permultis oppidis castellisque magna celeritate recuperatis.

LXXXVI. Nam hominum animos ei non assuetudo tantum parendi, & morum originisque communio conciliabat, sed etiam hostium vitia. quippe relictī a Lucullo, ut victas provincias & jam Romanas tuerentur, negliger & avaræ se gerebant. Perniciosum id M. Fabio Adriano fuit, locis illis præsidii causa cum parte copiarum relicto. Ille speculatum præmiserat Thraces, qui prius apud Mithridatem meruerant stipendia, atque iterum in partes illius inclinabant. Igitur cum nihil sani renuntiassent, Fabium, cum militibus longius progressum, Mithridates ex improviso est adortus: & Thraces, inter prælium mutata fide, Romanam aciem exterruerunt: amissisque circiter quingentis militibus, Fabius in castra sua se recepit.

LXXXVII. Postridie data servis, quotquot aderant, libertate, denuo eduxit copias, totumque fere diem dubio Marte certavit; donec servi, ad regis partes, qui & ipse promittebat libertatem, transeundo, extremum in pericu-

<sup>c</sup> LXXXIV. Vellej. 2, 3. Cic. Verr. 2, 31, & pro Muræn. c. 38. Idem in divin. c. 8. Xiphilin. Phlegon ap. Phot. § LXXXV. Liv. Epit. Diodor. l. 35. Appian. Mithrid. § LXXXVI. Eutrop. Diodor. Appian.

lum adduxerunt rem: deletæque Romanæ copiæ forent, nisi Mithridates, dum inter primos pugnat, licet septuagenario major, lapide in genu, sagitta sub oculo faucius, curam suis injecisset. Idcirco his inter trepidationem cessantibus, Fabius cum reliquis militum evasit; neque prius desit fugere, quam munimenta Cabirom attigisset.

LXXXVIII. Mithridates ob sua suorumque vulnera multis diebus quiete transmissis, donec ab Agaris, Scythica gente, qui serpentum virus curationi vulnerum adhibent, perfanaretur; adducto ad Cabiram exercitu, M. Fabium cœpit obsidere. Sed illum improvisa fors ita servavit, ut vicissim depulsis ab hoc calamitatibus implicaret servatorem. C. Triarius ex Asia, ubi nuper direptam ab Athenodoro Delon muro cinxerat, ad Lucullum proficiscebatur. Is, audito Fabium obsideri, contractis undique, quantas potuerat, copiis, ad eum obsidione liberandum properans, terruit Mithridatem, ut, priusquam veniret in conspectum, (justum enim exercitum Romanum adduci putabat) omissa obsidione discederet.

LXXXIX. Neque pulso contentus rege Triarius, recedentem longius in Commagenos usque persecutus, acie vicit. Cum enim, ut fessis ex itinere hostibus occurreret, flumine, quod in medio erat, cum parte copiarum transito, ceteris, *ut per alium pontem subsidio sibi venirent*, Mithridates præcepisset; pugna commissa, dubioque eventus tracta, expectatum regi subsidium procella, quantam vix vidisse quisquam meminerat, interceptit. Per hanc in utrisque castris disiecta sunt tentoria, jumenta in transversum acta, militum etiam quidam rapti præcipitatie.

XC. Eadem pontem sub mole transeuntis exercitus laborantem abruptit, exterritumque regem excedere prælio coegit. Sed eadem tempestas, quæ fugæ causa fuerat, prohibitis sequi Romanis, tutum regi abitum præstitit. Jam hiems aderat. igitur nulla præterea re tentata, in hibernæ

§ LXXXVII. Diodor. Appian. § LXXXVIII. Appian. Phlegon ap. Phot. Cic. pro leg. Manil. c. 3. § LXXXIX. Appian.

discessum est. Vere demum reddito, cum M'. Acilius Glabrio, C. Calpurnius Piso consulatum gererent, Mithridates ad Gazivra, veterem Ponti regiam, castris Triario oppositis, Romanos pugnam detrectantes, tum aliis rebus, tum in conspectu eorum exercendo suos, provocabat: quo, priusquam Lucullus adventaret, his, uti sperabat, superatis, recipere regnum atque constituere posset.

XCI. Quietis ad hæc Romanis, partem copiarum ad oppugnanda Dadasa milit, quo in castello impedimenta exercitus sciebat asservari. Hæc ei ratio processit, invitumque ducem coegerunt milites expedire, *ni faceret, injussu ejus ad sua defendenda ituros* minati. Alii, *quo ante Lucullum cum rege confligeret, gloriamque reportaret victoriae, festinasse Triarium*, tradiderunt. Quo tamen falleret hostem, per tenebras profectus, jamque castello appropinquans, in excubias regis incidit, paulo longius millibus passuum, tribus ab oppido Ziela, quod antiquitus Persicorum Deorum cultu celebre, ab illa clade Triarii, magnam deinceps in illis partibus nobilitatem habuit.

XCII. Cum his contractum ante lucem certamen, cum totam Mithridaticarum virium molem attraxisset; multitudine barbarorum, & initium victoriae faciente rege, circumventa Romanorum acies est, multique in loco interfecti: multos, cum in campos se recepissent, ignari, fluminis partem (Iris per ea loca labitur) in eos derivatam esse, compulsos in cœnosa fossam, quia repugnare lapsantibus vestigiis nequibant, impune cecidit hostis. Nec effugisset quisquam, nisi persequentem equites Mithridatem centurio Romanus, atroci vulnere in femur adacto, stitisset.

XCIII. Transfugæ Romani apud regem multi erant. ex eo genere hunc etiam esse, juxta equum suum diu currentem conspicatus, crediderat: deinde se præbuerat, tanquam

§ XC. Strab. l. 12. Diodor. § XCI. Strab. l. 12. Appian. Plut. in Lucull. c. 72. Hirt. de B. Alex. c. 72. § XCII. Strab. Plin. Appian. Diodor.



dicere aliquid cupienti. Percussor e vestigio concisus est a proximis. Regem in extremum agmen amici receperunt, signumque dederunt receptui. Milites, subita re perturbati, postquam vulneratum esse regem audierunt, interfectum rati, statim in campo circumdederunt lecticam.

XCIV. Igitur, ut spirantem cognoscerent, Timotheus medicus, jam cohibito sanguine refocillatum, de superiore loco ostendit. Rex, simul ad se rediit, signum receptui datum tulit graviter, eodemque adhuc die ad castra Romana duxit. Sed illa quoque fuga jam deserta erant. Cum spoliarentur mortui, *tribunorum quatuor & viginti, centurionum centum quinquaginta*, dicuntur *agnita cadavera*; *militum quoque Romanorum plus septem millia cecidisse*. At Mithridates, percurato vulnere, plures hoc genus insidiatores in castris suis agere suspicatus, convocatos milites *subito in contubernia* iussit *discedere*. quod cum esset factum, & Romani, quo se reciperent, non haberent, deprehenso, supplicioque affecti sunt.

XCV. Inde regressus in minorem Armeniam, quo adventanti Lucullo inopiam commeatum faceret, asportata, quanta poterat, annona, quod erat reliquum corrumpibat. Tum detectæ sunt aliæ adversus regem insidiæ, ab Attilio paratæ, Romano senatore ex proscriptis. Eum rex, pristinae dignitatis reverentia torqueri non passus, simplici morte; ceteros, qui cum eo conspiraverant, excruciatos necavit: liberos homines dimisit illæsos, *debuisse illos parvo no morem gerere*, præfatus.

XCVI. Castris deinde circa Talam aspero & montuoso situ positis, Lucillum exspectabat. Neque defuit ille accedere, castra conjungere castris, modisque omnibus ad pugnam barbaros elicere. Contra Mithridates suos intra munimenta continebat, Tigranem opperiens. Et per eosdem dies alius Mithridates Mediæ rex, palantibus forte Romanis, ex improvviso superfusus, multos interemit. Hæc omnia,

§ XCIII. Diodor. Appian. § XCIV. Plut. Appian. Diodor.  
§ XCV. Appian. Diodor.

femel exacerbatis militum animis, augebant iras, seditio-  
nesque alias super alias excitabant. Erant jam ab initio  
male erga Lucullum affecti milites, quod per duas conti-  
nuas hiemes, ad Cyzicum prius, deinde ad Amisum, sub  
pellibus eos attinuerat. Sed & ceteram militiam sic exege-  
rant, ut aut inter hostes esset hibernandum, aut sub dio  
tendendum apud socios. nam in oppidum Græcum & pa-  
catum nunquam hiemandi causa intulerant pedem.

XCVII. Ad hæc ipsius Luculli, inter maximas viri vir-  
tutes, desiderabatur comitas; adeo non parata vulgo, ut  
nec pari quidem dignitate viris exhiberetur, quos despi-  
ciebat præ se, atque contemnebat. Nec erat omnino ab  
imperii & pecuniæ cupiditate immunis. Hæc etiam in ur-  
be a tribunis plebis, & L. Quinctio prætore, qui & ipse  
in tribunatu adversatus Lucullo fuerat, taxabantur. A. Ga-  
binus ad augendam invidiam, villam Luculli pictam ex-  
plicabat in concionibus; ipse mox ædificaturus longe pul-  
chriorem: nec ante desierunt, quam imperii diuturnitati mo-  
dum statuendum esse populo persuasisent, ejusque scito *Va-  
lerianæ legiones, quod jam completis stipendiis essent, dimitti ju-  
berentur*. Sed nihil æque milites adversus imperatorem ani-  
mavit, quam P. Clodii sermones, jam in Nisibenis hibernis.

XCVIII. Is uxoris Luculli frater erat, perditus adole-  
scens, & præter cetera flagitia incestu sororum infamis.  
Idcirco aliis se postponi sentiens, cum esset primi loci cu-  
pidissimus, milites, præsertim Fimbrianos illos, seditiosis  
vocibus instigabat, illorum fortunam cum his, qui sub  
Pompejo militassent, conferens. *eas Luculli stipare camelos  
& plaustra, auratis gemmatisque onusta poculis: contra Pompe-  
janos domi cum uxoribus & liberis copiosam tranquillamque  
vitam agere, fertili agro donatos: quamquam illi neque Mithri-  
datem, neque Tigranem in solitudines invias exegissent, sed in  
Hispania cum exsulibus, in Italia cum Mancipiis habuissent  
negotium.*

§ XCVI. Diodor. Plut. § XCVII. Cic. pro Sext. c. 43. Plut.  
Diodor. § XCVIII. Diodor. Plut.

XCIX. *Quod si igitur nulla sit unquam speranda missio, ac illi potius imperatori, quod reliquum esset vigoris, servant, qui summum suum ornamentum esse existimet militum divitias.* Hoc genus fufurris ita corruptus exercitus est, ut nec in Tigranem cupientem ducere Lucullum, nec in Mithridatem sequeretur. Hiemem caufati, tempus in Gordyena trahebant, successorem Luculli opperientes. Ad famam deinde cladis Triarianæ, cujus ne nuntius quidem penetrare potuerat, pudore moti sunt, ut signa sequerentur. Postea Triarium, cum a militibus ad necem quæreretur, clam eripuit Lucullus.

C. Hæc res iterum offendit contumaces animos : auditoque, *venire successorem Lucullo consulem Acilium, cui lege Gabinia Bithynia & Pontus data erant, missasque Valerianas legiones esse*; Lucullum pro privato habere cœperunt contemtui. Nam & ipse Acilius vulgari per populos iusserat, *populum Romanum Lucullo finisse imperium : discedere iussisse milites, pœna quoque addita, ut manentium bona publicarentur.* Has inter angustias, & quia, audito, Q. Marcium Regem proconsule per Lycaoniam cum tribus legionibus in Ciliam tendere, cohortium aliquem numerum frustra ab illo petierat, Tigrani, qui cum maximis copiis juncturus se Mithridati ferebatur, statuit occurrere : ea potissimum spe, ut, si fatigatum itinere necopinantem vicisset, reperturum se aliquam ad placandos militum animos viam confideret.

CI. Sed milites aliquousque secuti, postquam in Capadociam iri viderunt, ne voce quidem ulla emissâ retro verterunt agmen : & Valerianæ legiones, *impleta a se stipendia* dicentes, Lucullum reliquerunt. Hic ille nihil non indignitatis subiit,prehendendo singulos, rogando universos, tentoria cum squalore & lacrimis obeundo, ut contumaciam eorum flecteret. At illi, manus tendentis preces averfati, vacuas ostentabant zonas, *solum jubentes dimicare cum hostibus, ex quibus solus sciret ditefcere : donec reliquo jam exercitu jungente preces, hactenus expugnati sunt,*


ut ea adhuc *estate mansuros* promitterent : quod si nulli *interea comparuissent hostes*, *discessuros a signis* prædicerent.


CII. His oportebat acquiescere Lucullum, qui alias facile mederi acceptis incommodis potuisset; & interea *vastari a Tigra*ne Cappadociam, recipi a Mithridate Pontum pati. quod tamen dedecus ita dissimulabat, ut, *propinquo jam Glab*riene, *nullas in eo suas partes esse* diceret: cum vicissim Glabrio, cognitis Luculli rebus, ex magna festinatione cunctator factus, in Bithynia desideret. Quintus etiam Marcius, nullis ad Lucullum missis militibus, quod *eos ad illum nolle proficisci* diceret, cum in Ciliciam venisset, Menemachum quendam a Tigra<sup>n</sup>e deficientem recepit: & Clodium, Lucullo deserto, ad se venientem præfecit classi; nam alteram Clodii sororem in matrimonio Marcius habebat.

CIII. Sed Clodius, captus a piratis, ad Ptolemæum Cypri regem misit, *pretium redemptionis* petens. Allatum est; sed adeo parcum, & illiberale, (talenta duo erant) ut piratas accipere pueret. Igitur, remissa ad regem pecunia, Clodium sine pretio, Pompeji, ut creditur, metu, dimiserunt. quæ res postmodum exitiosa Ptolemæo fuit, Clodio suam, ut putabat, injuriam in tribunatu crudeliter vindicante. Sed is quidem liberatus a prædonibus, cum quiescere turbulentus & audax animus nequiret, Antiochiam Syriæ pervenit, tanquam adversus Arabum regem Aretam bellum gerentibus auxilio futurus; atque ibi etiam cum seditiose ageret, propemodum interfectus est.

§ CI. Liv. Epit. Plut. §. CII. Cic. pro leg. Manil. c. 2 & 5. Diodor. § CIII. Strab. l. 14. Appian. civil. l. 2. Diodor. l. 35 & 38.











PA  
6452  
A2  
1784  
v.9

Livius, Titus  
Historiarum libri qui  
supersunt omnes

PLEASE DO NOT REMOVE  
CARDS OR SLIPS FROM THIS POCKET

---

UNIVERSITY OF TORONTO LIBRARY

---

